






Early European Books. Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CINADEL 2.3.234








Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.3.234



Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.3.234



Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.3.234

2-3 242
























2.3.124  
97


ANTONII MARIÆ  
GRATIANI  
A BURGO S. SEPULCHRI  
EPISCOPI AMERINI  
*DE VITA*  
JOANNIS FRANCISCI  
COMMENDONI  
CARDINALIS  
LIBRI QUATUOR.



PARISIIS,  
Apud SEBASTIANUM MABRE-CRAMOISY,  
Regis Typographum, viâ Jacobæ sub Ciconiis,  
M. DC. LXIX.  
CUM PRIVILEGIO REG. IS.



234



ILLUSTRISS. ET AMPLISS. VIRO  
IOANNI IACOBO  
**MEMMIO**  
COMITI AVAUXIO  
CONSILIARIO REGIO  
LIBELLORUM SUPPLICUM EXMAGISTRO  
MAJORI PRÆSIDI DESIGNATO.



*I quis vel ignotissimus  
Tibi, VIR ILLUSTRIS-  
SIME, egregio huic ope-  
ri patrociniū à tuo no-  
mine quæreret; nā ille haud absur-*

ā ij



EPISTOLA.

dè fecisse videretur. Litterarium  
nempe munus litteratissimo nomini ;  
vitam hominis in rebus agendis e-  
xercitatissimi , ingenio ex Gentis tuae  
peculiari dote , ad summa quaque  
negotia tractanda nato commodum  
offerret. Ego verò , si aliunde huic  
libro fidei meae ad editionem concre-  
dito , tutelam arcefferem , non mo-  
dò inconsultò egisse , verum etiam  
ingratissimi animi crimen incurrisse  
meritò viderer. Educatus enim ac  
penè innutritus , in sinu magni il-  
lius Claudii Memmii Comitae  
Avauxii , cuius fama orbem Chri-  
stianum pervagatur ; cui nutritia  
persolvam quam tibi tanti nominis ,  
tantarum virtutum ex asse heredi?

111  
EPISTOLA.

*Ex alieno scilicet ; cum ex meo vix  
possim aliud quàm gratum animum  
præstare , ac memoriam benevolen-  
tia , qua me Illustrissimus Patruus  
tuus ab eo tempore , quo illi magno  
meo bono addictus fui , prosecutus  
est , sanctissimè colere. Obversatur  
perfectò animo penè cottidie ho-  
minis humanitas , cum me inter fa-  
miliares quos sibi tam acri & an-  
xio delectu comparabat , licet aliis  
atate & meritis imparem adlegit ;  
sacris legationum adhibuit , exscri-  
bendis videlicet epistolis , quas è  
conventu illo celeberrimo Monaste-  
riensi , in omnes ferè Europæ partes  
emittebat. Quæ ibi imperiorum ar-  
cana jam non mihi videbar intue-*

ã iij



# EPISTOLA.

ri? Principum certè varia pro cu-  
 jusque eorum ingenio ac utilitate  
 consilia; Legatorum in rebus agen-  
 dis, aliorum prudentiam, cando-  
 rem, fidem; aliorum astutiam, teme-  
 ritatem, fallaciam introspicere licuit.  
 Cum verò ea recogito quæ in tam  
 felici rerum Gallicarum cursu sua-  
 denda paci ad Regni Administros  
 scribebat, ne scilicet hoc gaudium  
 fortuna ægritudine aliqua corrum-  
 peret; tum verò non consilia dedis-  
 se, sed oracula fuisse affirma-  
 re non dubitaverim. Enimverò  
 ea tempora sunt secuta, quæ ho-  
 minis miram in prospiciendis re-  
 rum eventis sollertiam; profundam  
 in rebus gerendis prudentiam, ni-

14  
EPISTOLA.

*mis quàm verè , magno tamèn Rei-  
publica damno probaverunt.*

*Ego igitur , cùm in tali ludo ti-  
rocinium posuissem civilis doctrina;  
fatendum quod res est , nonnullam  
rerum gerendarum habilitatem ac  
notitiam contraxi ; quo nomine in  
Poloniam sum ablegatus , ut nego-  
tiorum quæ nunc feruent maximè  
fundamenta ponerem. Quàm feli-  
citer cesserit dicent alii , mihi haud  
decorum est. Omnem certè movi la-  
pidem , omne studium consumpsi , ut  
res è sententia Regis mei Christia-  
nissimi succederet. Statum ac regi-  
men Poloniae introspexi ; ingenia,  
mores , affectus & studia Procerum  
qui maximè in eo Regno possunt ,*



EPISTOLA.

quàm potui sagaciter, odoratus  
sum; celeberrimas de summa Re-  
publica tractationes pervolvi; anti-  
quas cum novis comparavi, eas po-  
tissimùm quæ aut negotiorum similitu-  
dine, aut tractandi ratione, aut  
aliquo denique nexu, ad rem præ-  
sentem pertinere videbantur. Hic  
libentissimo animo in laudes Patro-  
ni mei, Patruï tui, revolvor; cui  
consortem, ac tanquam ejusdem  
aræ Paredrum, me arcessere Cardi-  
nalem Commendonum profectò non  
dedignaberis. Hos eximios viros,  
ne dixeris tantùm pares; prorsus si-  
miles fuere. Mitto majore stilo ac  
Charoneo quodam ore, celebranda  
virtutis, pietatis, candoris, sapien-  
tiæ,

V  
EPISTOLA.

*ria, eloquentia parallela. In rebus  
certè Polonicis paria & similia ges-  
serunt, quæ in memoria hujus gen-  
tis nunquam sunt intermoritura.  
Alter sanctæ Sedis Legatus, ne la-  
tius subnascentes hæreses in eo Re-  
gno serperent, indefesso labore ac  
mira industria prohibuit; Rempu-  
blicam consiliis salutaribus juvit;  
electioni Henrici nostri prudentissi-  
mè præsedit, ac comitiorum æstus  
compescuit, in mutuam perniciem e-  
rupturos. Quid verò in Germania  
& alibi dexterè feliciterque gesserit,  
malo Te ex eleganti & copiosa quam  
damus historia cognoscere, quàm ex  
jejuna mea oratione. Alter verò,  
Claudius scilicet Memmius Regis  
Christianissimi in omnes penè Euro-*



# EPISTOLA.

*pa partes Legatus, quot quantásque  
 res in celeberrimis conventibus Ro-  
 ma, Venetiis, in Dania, Suecia, Ger-  
 mania gesserit, multi locuti sunt,  
 plures loquentur: Mibi utcumque per  
 triennium Polono, in sola Polonia  
 consistendum est. Proh Dei hominúm-  
 que fidem! quàm grata, suavis, ho-  
 norifica, apud hujus Regni Proceres  
 rerum ibi supra omnem expectatio-  
 nem gestarum ab Illustriss. Legato  
 recordatio! Cùm à Suecis fortuna suæ  
 insistentibus; à Polonis repugnanti-  
 bus generosè, inducias illas viginti  
 sex annorum, miris prudentiæ ac elo-  
 quentiæ artibus, expressit & penè  
 extorsit. Istud verò pietatis specimen  
 lubens haud pratermiserim; cùm fœ-  
 dus de quo agimus, jamjam pactum,*

VI  
EPISTOLA.

*in discrimen adduxit, ac tantum non  
abrupit, ni Livones Catholici profi-  
tenda religionis publicam libertatem,  
à diversæ partis hominibus obtine-  
rent. Quocirca nullus mirari debet,  
si Agens in rebus Polonicis, ejusmo-  
di Heroum res in eo Regno gestas  
assidue in mente, in oculis habuerit:  
Et si, cum ex veteri Sapientum dicto,  
Deus simile semper adducat ad si-  
mile; historiam vitæ Commendoni,  
Illustriss. Avauxii hominis ei similli-  
mi Tutelæ commendavit, ut commen-  
dator in publicam lucem prodeat.*

*At non nemo regeret continuo, me  
longè aberrare à proposito, vel Tibi  
velle illudere, qui prestigiatoria qua-  
dam arte, Patrum pro nepote sup-  
ponam. Absit tantum crimen à me,*



EPISTOLA:

VIR ILLUSTRISIME, non impono  
 Tibi; virtus tua imposuit mihi. Omni-  
 no ita se res habet. Quoties intueor in-  
 genii tui dotes egregias, mores compo-  
 sitos, animum ad magna erectum;  
 pectus omni & severiorum & amœ-  
 niorum litterarum genere subactum;  
 quodque caput est, genium illum re-  
 bus gerendis & negotiis tractandis  
 natum factumque; toties Excellentiss.  
 Patrum tuum mihi videre videor vi-  
 vum ac spirantem. Quidni ego? Cum  
 Rex noster Christianiss. inter ceteras  
 divinæ mentis opes ingenii suorum  
 perspicacissimus indagator, idem ju-  
 diciū tulerit: cum te jamdudum per  
 vestigia tanti Legati passibus æquis  
 ingredientem, ad Septentrionis Re-  
 ges Oratorem ante plures annos desi-

EPISTOLA.

gnavit: cum te pactis suis nuptiali-  
bus, quibus pax Christiana sancita  
est, testem adhibuit; cum te denique  
sacri Musei participem esse jussit.  
Habe igitur, Redivive AVAUXI, ju-  
re merito quod Excellentiss. Patruo  
tuo tot nominibus debitum, sinerent  
fata, persolverem; quod tibi tot be-  
nevolentia, humanitatis ac bene affe-  
cti erga me animi testimoniis adstri-  
ctus, debeo; alias etiam, vel solo  
virtutum tuarum respectu, lubens &  
volens ultrò oblaturus. Vale. 111.  
Eid. April. CIOIOC. LXIX.

Tibi addictissimus ROGERIUS AKAKIA.



## LECTORI S.

**C**ODEX manuscriptus ex quo editio hæc nostra expressa est, paratissimus erat ab omnibus quæ desiderari possunt, ut quivis bonæ notæ liber faustis avibus in lucem prodiret. Viri scilicet eruditissimi & diligentissimi, à quibus manumissionem expectabat, nil prætermiserunt, quo ornatiori cultu se daret in publicum. Præfationem elegantissimam, elogium ipsius scriptoris è selectissima Nicii Erythræi Pinacotheca præmisere, indicem denique copiosissimum addiderunt; adeò ut totus ex se aptus Typographos ad amorem sui pellicere videretur. Verùm ejusmodi artificum hodie in Italia talis aut penuria, aut negligentia est, ut aliunde quærendi fuerint, qui optimum fœtum tollere, & sibi vindicare vellent; quod tandem feliciter factum est, auctore ac fidejussore locupletissimo V. C. Petro Segguino Regiæ insignis Ecclesiæ S. Germani Parisi Decano. Is cum Italiam perambularet, in qua, tum humanitate tum doctrina, sibi similes complures amicos conciliavit,

VIII  
Romæ in Museo Illustriss. ac Erud. Viri ,  
opus istud egregium nactus est. Ægrè tu-  
lit profectò vir acerrimi iudicii in dijudi-  
candis ejusmodi lucubrationibus , eximium  
scriptorem diutiùs in ea custodia tanquam  
captivum latere ac detineri : Alapas ei à li-  
bri Domino facilè impetravit , libertatem &  
lucem Gallicam promisit ; illam in hoc  
splendidissimo Academiæ Paris. sole præstat.

Fruere isto doctissimi Seguini dono , LE-  
CTOR , quòdque ingenui animi est , cui  
jam multùm debeas , perge plura libenter  
ei debere velle. Non potes ignorare , nisi  
sis omninò amœniorum litterarum experts ,  
& reconditoris antiquitatis incuriosus ,  
quantùm debeamus scrutatoribus & inter-  
pretibus priscorum numismatum , quan-  
tùmque ad historiam Græcam Latinàmque  
intelligendam , ac temporum seriem dige-  
rendam conferant : At ille noster instructis-  
simus ejusmodi Cimeliorum Museum pos-  
sidet ; sed non tantùm sibi : studiosis latè  
patet , quos si quid vel abstrusissimum ab eo  
illustrari velint , quâ est affabilitate ac sol-  
lertiâ , promptè ac egregiè doctos dimittit.  
Novissimè verò , invisas hætenus aliquot  
Deorum , Heroum , ac Regum effigies , aut



non intellectas earum inscriptiones, mirā  
Latini sermonis puritate ac interpretationis  
felicitate, plaudentibus artis peritis edidit.  
Verumenimverò, pace illius dixerim, in-  
ter illas imagines licet raritate & pretio e-  
ximias, eminet imago vitæ Commendoni,  
quam ejus beneficio tibi exhibemus, vnde  
viri Ecclesiastici, religionis & pietatis amo-  
rem; Politici rerum agendarum peritiam  
hauriant; Tu quisquis es, LECTOR, vir-  
tutum omnium exempla depromere possis.



AMICO

AMICO LECTORI

B. R.

**I**N historia superiorum temporum  
tametsi non ita hospites eramus,  
neque adeò rerum ignari, quin  
Joannem Franciscum Commen-  
donum Cardinalem & vixisse, &  
virum fuisse magnâ virtute, & sapientiâ sci-  
remus; minimèque nos prateribat, Antonii  
Mariae Gratiani librum de bello Cyprio à  
doctis hominibus legi, & laudari: nihil ta-  
men ampliùs de his à nobis quarendum existi-  
mabamus. Cùm ecce tibi ab Amico aliud mi-  
hi ejusdem Gratiani scriptum de vita Com-  
mendoni, egregium, ut aiebat, legendum tra-  
ditur. Quod cùm vix à limine salutasset, statim  
Heracliti celebre illud occurrit, Introite. In-  
gressus igitur non priùs abstiti, quàm ad ex-  
tremum pervenirem, ea cum admiratione præ-  
stantissimi operis, ut exinde palàm indignarer,  
adeoque stomacharer, libris omne genus hac tem-  
pestate sine modo, ac discrimine prodeuntibus, ja-  
cere hunc in obscuro, eique lucem, & immortali-



tatem, quam meritò posceret, invideri. Accepis  
hac generosus quidam juvenis, librúmque nactus  
cúm perlegisset, & quâ est eruditione, & judicio  
vehementer probasset, illico animum induxit,  
occasionem arripere, laudémque ipse praripere  
ejus editione, non modò de præstantissimo scri-  
ptore, sed universa etiam de Republica bene-  
merendi. Quamobrem diuturno tamquam car-  
cere liberatum, eo quem vides nitore, & orna-  
tu prodire jussit in publicum, idque nostrâ  
ipsius curâ, & diligentia. Sed ne fortè quod  
titulum vita præfert, in præjudicium ipsi ver-  
tat, & fraudem perinde quasi inane quod-  
dam sit opus angustis finibus, rerúmque mi-  
nutarum sterili narratione conclusum: contrâ,  
prædicimus in hujusmodi vita Christiana Rei-  
publica, ac totius fermè Europa multorum an-  
norum vitam (ut ita loquar) comprehendí,  
rerúmque maximarum consilia, administra-  
tiones, eventus dilucidè, copioseque narrari.  
Neque enim vir ille, quo de agitur, intra do-  
mesticos parietes privatis suis, aut civitatis  
tantùm suæ publicis curis occupatus, confedit,  
sed difficillimis temporibus, gravissimorum  
Christiana rei negotiorum pondus, & molem  
non solum animo subiit, sed & nobilissimis le-  
gationibus in regiones, & Regna longè divisa,

X

ultro, citroque incredibili celeritate commeans,  
admirabili tum prudentiâ solertiâque, tum au-  
thoritate, & eloquentiâ sustinuit, atque in his  
Gratianum hunc ipsum perpetuò comitem, &  
consiliorum participem habuit, rerumque ge-  
rendarum fidelissimum, & solertissimum ad-  
ministrum. Is autem quæ vidit, & quibus  
interfuit in historiam ita congesit, ut disci-  
plina sapientissimi Heri sui alumnum facile  
agnoscas, quem ut prudentiâ, & doctrinâ,  
ceterisque expressit virtutibus, ita eminentissi-  
mâ dignitate, ad quam per ejus vestigia viam  
sibi muniverat, expressisset; sed mors manum  
injecit. Caterum orationis munditiam, nito-  
rem, & elegantiam, rebûsque aptum, & ac-  
commodatum dicendi genus, quo utitur, ju-  
dicio ipse suo, & industriæ præcipuè debet:  
nonnihil etiam fortuna, cum in ea tempora  
inciderit, quibus scribendi rectè, & Latine  
loquendi leges, atque præcepta religiosius ali-  
quantò observabantur. Quæ quidem omnia,  
ERUDITE LECTOR, tute optimè intelliges,  
præclarumque scriptum non modo tecum gaude-  
bis, sed cum omnibus etiam doctrinâ, & ju-  
dicio præditis, gratulaberis tandem aliquando  
communicatum.





# ANTONII MARIÆ GRATIANI

VITA

EX PINACOTHECA

JANI NICII ERYTHRÆI.



UAM multa sæpè, ac summa ingenia in occulto latent, quæ, si amicâ cujuspiam operâ in apertum proferrentur, maximum sibi, familiæ, patriæque suæ, atque adeò orbi terrarum, splendorem, & ornamentum possent afferre. Nunc autem, cùm, tanquam ferrum humi defossum, in tenebris jaceant, suâ desidiâ, tamquam rubigine exeduntur, & illorum vsus nequior efficitur. Atque, ne longiùs aberreret oratio, nisi Antonius Maria de Gratianis, Biturgiæ, nobili imprimis loco, natus, in Cardinalem Commendonum incidisset, quicum Aloysio fratri magnus vsus, & amicitia intercedebar, vel in castris vsu militiam didicisset, Julii patris exemplo, qui sæpè in ea ordines duxerat, vel procul à Republica sine litteris, sine aliquo rerum vsu, agrum, à patre relictum, coluisset, vel per inertiam, desidiâque, morti similem vitam exegisset. Commendonus igitur, qui fortasse, quâ erat animi sagacitate, adolescentis ingenium odoratus fuerat, Aloysio fratri fuit auctor, suasor, impulsor, ut liberalibus cum disciplinis erudendum, instituendumque curaret. Itaque, annos natus

## AUCTORIS VITA.

vnum & viginti, missus est in quoddam Forolivii op-  
 pidum, vbi notus quidam magister, brevi, ac novâ ra-  
 tione, eas artes docebat, quibus ætas puerilis institui  
 ad humanitatem solet. At ipse parentum, in ipso eru-  
 diendo, negligentiam, discendi celeritate compensavit.  
 Nam cum eò esset profectus, omnium rerum rudis, pau-  
 cis post annis an mensibus? reversus est Latini sermonis  
 adeò peritus, ac doctus, vt diligentiam admirarentur  
 omnes, ingenium agnoscerent: at Commendonus adeò  
 amplexus est hominem, vt eum numquam à se dimise-  
 rit, sed in filii loco dilexerit, ac magistri partes sumens,  
 in libris Aristotelis de Rhetorica, de Republica, ac de  
 moribus, erudierit, tum semper ad manus habuerit,  
 ejusque & fide, & industriâ cognitâ, omnium consiliorum  
 eum esse participem voluerit, in illis octo nobilissimis  
 legationibus, quibus functus est, quarumque immorta-  
 lis erit memoria. Quibus legationibus diligenter obeun-  
 dis, ac fideliter administrandis, Commendonus ita se  
 præbuit, vt eum omnes, tamquam è cælo delapsum,  
 intuerentur. Nam, si repetere memoriam temporum pla-  
 ceat jam inde vsque ab initio nascentis Ecclesiæ, inve-  
 niemus, nullum vmquam fuisse tempus Reipublicæ  
 Christianæ atrox, atque difficile, quin eodem tempore  
 divinitus excitatus sit aliquis, qui ingenio, auctoritate,  
 sapientiâ, arduis illis rebus, ac dubiis posset occurrere:  
 idque cum constet, tum ex antiquis, tum ex recenti-  
 bus nostrorum monumentis, ac litteris, non est necesse  
 pluribus verbis ostendere. Atque in Commendoni æ-  
 tatem inciderunt hæc omnia, maxima atque gravissi-  
 ma; Concilium Tridentinum, cujus convocandi gratiâ,  
 bis missus est ad Ferdinandum Cæsarem, semel à Pio  
 I V. Pontifice Maximo, iterum à Cardinalibus, qui sa-  
 cro-sancto illi conventui præerant; tum, res in Polonia  
 consecutæ sunt, implicatæ, atque difficiles, vnde ma-  
 gnus periculorum metus portendebatur: eò etiam profe-  
 ctus est, semel, atque iterum; primò Pii I V. jussu, vt

i iij



## AUCTORIS VITA.

Nuncii ordinarii provinciam administraret; quod munus cum egregiè, atque sapienter obiret, antequam inde discederet, creatus est ab eodem Pontifice Cardinalis: deinde coactus est rursus illud iter arripere, missus à Pio V. Legatus ad Regem Augustum, ut, uxori Catharina nuncium remittere cogitantem, de sententia dimoveret, & ad bellum Turcis inferendum impelleret; ubi etiam, cum Rex ille diem obiisset supremum, omnes conatus adhibuit, ut in ejus locum succederet aliquis, qui Catholicæ religionis cultor existeret; ac tantum auctoritate potuit, valuitque eloquentiâ, ut Henricus Galliarum Regis frater, Rex Poloniæ, omnium suffragiis, eligeretur. Quibus actis, cum Pontifex fecisset illi potestatem redeundi in urbem, rebus nondum planè in tranquillo collocatis, & hæreticis quamcumque fors obtulisset rerum novarum occasionem, paratis arripere, Antonium Mariam, de quo est sermo reliquit, ut, ex Pontificis auctoritate, Episcopos, & Catholicos Regni confirmaret, novoque Regi adesset. Quem cum adventare, jamque in Saxoniam pervenisse, comperisset, sexcentis fermè millibus passuum obviam illi processit, & quo loco Regni res essent, exposuit; rationes, quibus illud ex sententia administrari, & Catholica fides promoveri posset, ostendit. Quæ ita Regi grata fuerunt, ut ea sibi scripta tradi mandaverit, neque deinceps quidquam, nisi ex ejus auctoritate, atque sententia, gesserit. Inciderunt etiam in Commendoni tempora, alia quatuor, maxima, atque gravissima: fides Catholica, totâ Germaniâ, labefactata, ac pænè convulsa; comitia Augusta habenda; metus, ne Augustana confessio in summam Germanæ religionis perniciem, Austriæ civitatum populis permitteretur; fœdus adversus Turcam inter Christianos Principes incundum. De his omnibus quater intra paucos annos, missus est in Germaniam Legatus ad Maximilianum Cæsarem, qui etiam fuerat placandus, quod iniquo animo tulisset, Cosmo Mediceo à Pio V. Magni Ducis cognomentum fuisse

## AUCTORIS VITA.

inditum, quòd ejusmodi cognomentis, & appellatio-  
nibus quemquam afficere, ad Imperatorem, non autem  
ad Romanum Pontificem, pertinere contenderet. In  
his omnibus adfuit Antonius Maria; neque quidquam  
sine ejus consilio gestum est. Sentiebat enim Commen-  
donus, quantæ sibi ejus opera esset utilitati, ornamen-  
tòque. Neque id Regem Henricum fugit; qui magnis  
ad se illum pollicitationibus, semel, iterum, ac sapius,  
invitavit, ut ejus operâ, quemadmodum expertus fue-  
rat, egregiâ, atque fideli vteretur. Sed nulla tam lucu-  
lenta conditio inventa est, quæ illum potuerit à Car-  
dinali Commendono divellere; cui soli, neque alteri  
cuipiam, quoad viveret, suas operas deberi existima-  
bat. Qui Cardinalis cùm de referenda tor, tantisque il-  
lius in se meritis gratia cogitaret, si non pari, grato ta-  
men aliquo munere; die quodam ad se vocatum dona-  
vit syngrapho, in quo erat perscriptum, ut ab argenta-  
rio, quatuor scutorum millia, numerata perciperet, quæ  
vellet esse quasi mercedem laborum, quos pro ipso sus-  
cepisset; simulque petebat ab eo, ne hanc, quamvis  
exiguam, suæ in ipsum voluntatis significationem asper-  
naretur, sed illud, quidquid esset, æqui, bonisque con-  
suleret. Cui Antonius Maria respondisse fertur; quid-  
quid fecisset, se honoris sui gratiâ fecisse, verùm, si res ad  
calculum revocaretur, bene initâ, subductâque ratione,  
non par inveniretur ratio acceptorum, atque datorum:  
nam, se multò illi plura debere profitebatur, quàm ipse  
ab illo accepisset: illum verò dolorem se non posse dis-  
simulare, quòd cerneret, eorum se loco, ac numero ha-  
beri, qui mercenariam ipsi operam darent: se enim, ni-  
hili antea hominem, ejus operâ, atque labore, factum  
esse alicujus precii, ipsique Reipublicæ inventum esse,  
in usu, probiorem, ac, petiti ab eo demissè, & humi-  
liter veniâ, syngraphum conscidit. Admiratus Card-  
nalis magnitudinem animi, spernentis id, cujus alii cu-  
piditate abrepti, fidem jurisjurandi, religionem, justiti-  
am, bonam famam, existimationemque contemnunt,



## AUCTORIS VITA.

non ita multò pòst locupletem Saxiferrati Abbatiam, ex qua bis mille scuta quotannis redibant, sibi detractam, est illi, quamvis invito, ac repugnanti, clargitus. Mortuo Cardinali, Sixtus V. vsus eo est in Latinis literis scribendis. Quo in munere perquàm diligentem, ac laudabilem illi operam dedit. Post cujus mortem, eodem gradu fuit apud Alexandrum Cardinalem Montalrum, eique in quatuor illis conclavibus, quæ deinceps consecuta sunt, affuit; in ejusque opera, Clementi VIII. ad Pontificatum Maximum adipiscendum, longè maximus vsus fuit. Id quod Clemens non dissimulavit, sed sæpè, multis audientibus, dixit se Antonii Mariæ in agendo dexteritati, prudentiæ, diligentiaque Pontificatum referre acceptum. Quapropter ornabat eum officiis, beneficiisque pluribus: nam & Episcopum Ameriæ creavit, quòd superiori Episcopo mortuo esset alter in illius locum subrogandus; & Nuncium ad omnes primùm Christianos Principes, fœderis causâ ferendi contra Turcas, deinde ad Rempublicam Veneram misit. Ubi, maximè duabus in rebus gravissimis, ejus virtus eluxit. Etenim cùm de jure, imperioque quæreretur, quod Veneti in Adriatico mari exercent, pro Sede Apostolica libellum elegantissimum scripsit, qui etiam nunc in Tabulario Vaticani Palatii continetur: neque tamen eo offensi sunt Veneti; cùmque Alphonso, Ferrariæ Duce, vitâ functo, Cæsar Estensis, cognatione illi proximus, Ferrariam sibi deberi contenderet, auctoritate, consilioque perfecit, ne Senatus ille Cæsaris causam susciperet, eamque armis tueretur; imò ab eodem obtinuit, ut Sedi Apostolicæ, plura armorum genera ad illius belli vsum suppeditarentur. Atque constat Clementem habuisse in animo in Cardinalium Collegium eum cooprare, ac non semel, sed quoties Cardinalium comitia essent habenda, descriptum in illis habuisse, qui eo essent honore coonestandi; sed semper sententiâ destitisse, deterritum à Petro Cardinali Aldobrandino, fratris filio, cui cum

Magno

## AUCTORIS VITA.

xiii

Magno Etruriæ Duce, cujus ille in imperio, ac ditione erat, (nam Biturgiæ, ut diximus, ortus, quæ Magnorum Etruriæ Ducum parer imperio, cum primis illius civitatis numerabatur) variâ, inquam, discordiarum causâ intercedeabant. Verum, cum jam atate confectus, & podagrâ vehementer obnoxius, re ipsâ experiretur, Venetum cælum sibi minùs esse salubre, petiit opere maximo à Summo Pontifice, ut ab ea provincia removeretur; ac, veniâ impetratâ, Ameriam se contulit. Quam Ecclesiam usque ad extremum vitæ spiritum, integritatis, prudentiæ, ac sanctitatis famâ administravit, quæ sit numquam interitura, sed deinceps omnibus qui in eundem locum, ac numerum venerint, ad similitum virtutum exemplum, imitationemque victura. Nemini erat molestus, nemini gravis; sed contrâ, omnibus jucundus, omnibus comis; numquam animos extulit, sed demissè humiliterque se gessit; nemini petenti aditum conveniendi non dabat, sed omnes ad ipsum aditus cunctis, qui vellent, quibusvis erant horis aperti: nemo se ab eo despectum, nemo contra rem suam injuriâ aliquid decretum fuisse questus est umquam; sed omnibus jus suum tribuebat, omnes amplectebatur, omnibus se dabat cum magna conversatione; cum tristibus severè, cum remissis jucundè vivebat; atque, ad Apostolicum exemplum, ad cujusque ingenium, quò omnes lucrifaceret, versabat suam naturam, huc, & illuc torquens, ac flectens. Nullum honesti sermonis genus à se umquam alienum duxit, sed de omnibus rebus, quæ in sermonem, disceptationemque cadunt, copiosè, elegantèrque differebat; cum militaribus hominibus de officio Imperatoris, ac de omni re militari, cum eruditis de omni elegantia litterarum, cum philosophis de rerum natura, cum Theologis de Deo immortali, divinisque mysteriis loquebatur. Denique homo erat omnium, ut dicitur, horarum, temporum, & hominum. Multa reliquit egregia, quæ teruntur hominum manibus; Synodum Ecclesiæ Amerinæ, de bel-



## AUCTORIS VITA:

Io Cyprio, de casibus adversis illustrium virorum sui ævi, Cardinalis Commendoni Vitam; quo libro omnes ab eo legationes obitæ, omnésque res magnæ suæ auctoritate, consilióque gestæ narrantur. Obiit Americæ, annos natus quinque & septuaginta, ciorocxi.




---

## ANTONII Mariæ GRATIANI in Cardinalatum Joannis Francisci Commendoni,

**Q**UI tibi purpureos meritò mandavit honores,  
Ipse quidem magno est auctus honore Pater.  
Nam virtute tuâ magnum capit incrementum  
Ipse honor, & pulchra est purpura facta magis.  
Mox ubi tergemino fulgens radiaverit auro  
Frons sacer ipse, omnis aureus Orbis erit,





# INDEX CAPITVM.

## IN LIBRUM PRIMUM.

CAP. I.	<b>D</b> E origine, familia, & parentibus Jo. Francisci Commendoni.	
	pag. 1	
CAP. II.	De iis, quæ infanti acciderunt, & de periculis ejus in navigando.	6
CAP. III.	De prima ejus institutione.	8
CAP. IV.	De profectione ejus ad visendam Urbem, & quo auctore suscepit.	13
CAP. V.	De primo ejus ad Rempublicam accessu, & de ratione, quam primum habuit.	18
CAP. VI.	Brevis transitus rerum, & honorum ejus.	23
CAP. VII.	De prædictionibus futuræ dignitatis ejus.	25
CAP. VIII.	Quæ prima commendatio ejus ad Julium Pontificem.	29
CAP. IX.	Quò primum publicè missus sit.	31
CAP. X.	De profectione ejus ad Belgas.	33
CAP. XI.	De ejus in Britanniam adventu, & actis ibi per eum.	37
CAP. XII.	De reditu ejus in Urbem.	43



## INDEX CAPITUM.

CAP. XIII.	De profectione ejus in Lusitaniam.	47
CAP. XIV.	De Marcelli, & Pauli Pontificum Maxx. studio erga eum.	50
CAP. XV.	De novo ejus itinere ad Belgas.	53
CAP. XVI.	Ad Venetos, & alios Italiae Principes mittitur.	58
CAP. XVII.	Quomodo è Pauli gratia decidit.	61
CAP. XVIII.	De Carrafa, fratribusque Urbe puls.	64

## IN LIBRUM II.

CAP. I.	<b>A</b> D Casarem, & Germania Prin- cipes de Concilio mittitur.	70
CAP. II.	Acta per eum in conventu Germanorum.	76
CAP. III.	Principum Germania contumeliosa ora- tio, & Commendoni responsio.	82
CAP. IV.	De reliquo ejus per Germaniam itinere.	95
CAP. V.	Nova ejus ad Casarem profectio.	105
CAP. VI.	In Poloniam Nuncius Apostolicus ad Regem mittitur.	108
CAP. VII.	De sacrorum disciplina in Polonia de- pravata.	110
CAP. VIII.	De dissensione inter Episcopos, & quo- rundam consiliis à Commendono re- pudiatis.	116
CAP. IX.	De Bernardino Ochino, aliisque per eum è Polonia puls.	123



xv

INDEX CAPITUM.

CAP. X.	De nationali Concilio per Commendonum rejecto.	134
CAP. XI.	De Concilii Tridentini decretis à Rege, Senatūque acceptis.	139
CAP. XII.	De studio ejus peragrande Polonia.	150
CAP. XIII.	De Prussia feris.	158
CAP. XIV.	De Succino.	163
CAP. XV.	De Russia.	166
CAP. XVI.	De Podolia, deque ejus frequentandæ consilio Regi allato.	171
CAP. XVII.	De Rege cupiente divorcium cum uxore facere, & per Commendonum dissuasione.	179

IN LIBRUM III.

CAP. I.	<b>D</b> E eo in Cardinalium collegio cooptato.	211
CAP. II.	De discessu ejus à Polonia, & legatione ad Germanos.	228
CAP. III.	De reditu ejus ad Urbem.	241
CAP. IV.	Secunda legatio ejus ad Cæsarem.	246
CAP. V.	De negotio illi dato ordinandi rem Ecclesiasticam.	262
CAP. VI.	De fœdere per Pontificem adversus Turcas icto ejus operâ.	266
CAP. VII.	De nova ejus ad Cæsarem, & Polonos legatione.	271
CAP. VIII.	Causa magni Ducis Hetruriæ per eum	ó iij

## INDEX CAPITUM.

	<i>apud Casarem acta.</i>	278
CAP. IX.	<i>De nova legatione, &amp; profectione ejus in Poloniam.</i>	289
CAP. X.	<i>Actio cum Rege, &amp; Polonis de fœdere.</i>	293

## IN LIBRUM IV.

CAP. I.	<b>D</b> E Sigismundi Augusti Regis ultimi Jagelloniæ familie morte.	314
CAP. II.	<i>De præparatis ab eo pro Regis Catholici electione.</i>	317
CAP. III.	<i>De consiliis ejus Regnum uni è Casaris filiis conciliandi.</i>	325
CAP. IV.	<i>De legatione ad eum ab hæreticis missa, ut egrederetur Poloniâ.</i>	333
CAP. V.	<i>Quomodo Casar petitionis suæ rationem omnem everterit.</i>	337
CAP. VI.	<i>De competitoribus Regni.</i>	344
CAP. VII.	<i>De impia hæreticorum fraude, quam confederationem ipsi appellarunt.</i>	354
CAP. VIII.	<i>De adventu Commendoni Varsaviam, &amp; de consilio illi in Castris dato.</i>	362
CAP. IX.	<i>De comitiis habitis, &amp; Henrico Rege creato.</i>	369
CAP. X.	<i>De discessu Commendoni Poloniâ, &amp; de mora adventus Regis.</i>	380
CAP. XI.	<i>De quibusdam quæ adventantem Regem</i>	



# INDEX CAPITUM.

	auctor edocuit.	391
278	CAP. XII. De adventu Regis, & de coronatione,	
ione ejus	& fuga ejus.	401
289	CAP. XIII. De eodem Commendano.	411
le fæde-	CAP. XIV. De quibusdam moribus ejus.	415
293	CAP. XV. De constantia ejus adversus potentiores.	
	419	
	CAP. XVI. De more ejus numquam se purgandi, de	
	quo conscius sibi non esset.	428
gis ultri-	CAP. XVII. De abstinentia ejus.	432
morte.	CAP. XVIII. De habitu corporis, valetudine, & mor-	
	te ejus.	436



## Errata sic corrige.

PAG. 26. persolvit, <i>lege</i> , percoluit	sum
Pag. 31. haberetur, <i>leg.</i> laberetur	Pag. 182. ac Polonos, <i>leg.</i> ac Polonus
Pag. 40. ministro, <i>leg.</i> ministros	Pag. 212. & cum hac, <i>videtur deesse a-</i>
Pag. 67. Florentium, <i>leg.</i> florentium	<i>liquid</i>
Pag. 73. peragatur, <i>leg.</i> peragat	Pag. 263. affectantes, <i>leg.</i> affectantes
Pag. 100. Namburgium, <i>leg.</i> Ham-	Pag. 294. Tagellonis, <i>leg.</i> Jagellonis
burgium	Pag. 306. formandis, <i>leg.</i> firmandis
Pag. 107. emineret. Trecenti, <i>leg.</i> emi-	Pag. 322. deduxerat, <i>leg.</i> diduxerat
neret, trecenti	Ibid. haud, <i>leg.</i> aut
Pag. 119. injiciebant, <i>leg.</i> injiciebat	Pag. 345. videbantur, <i>deest verbum</i>
Pag. 121. populus, <i>leg.</i> populi	<i>aliquod, ut recusaturi; rejecturi</i>
Pag. 133. cuiquam. <i>distingue &amp; lege</i> ,	Pag. 313. & quid, <i>leg.</i> Ecquid
cui quamplurimos	Pag. 316. frequentiam, <i>leg.</i> infrequen-
Pag. 135. cum Frisio, <i>leg.</i> Friccio; is est	<i>tiam</i>
Modrevius	Pag. 387. objicere, <i>leg.</i> abjicere
Pag. 137. hominum, <i>leg.</i> hominem	Pag. 417. tūmq; <i>leg.</i> eūmq;
Pag. 141. quod, <i>leg.</i> quō	Pag. 430. Duclitio, <i>leg.</i> Duditio.
Pag. 172. multū efficiunt, <i>leg.</i> mul-	



215274







ANTONII MARIÆ  
GRATIANI  
DE VITA  
JOANNIS FRANCISCI  
COMMENDONI  
CARDINALIS  
LIBER PRIMUS.

*De Origine, Familia, & Parentibus ejus.*

CAPUT PRIMUM.

**C**ENS Commendona apud Bergo-  
mum, nobilem Cisalpinæ Galliæ  
urbem, honestæ in primis, ac ve-  
rustæ originis habetur. Ipsi stir-  
pem suam ad Germanos referunt.  
Inde virum quemdam domi nobilem nomine

A

2 DE VITA JOANN. FR.

Dogaldum, patriâ profugum, Bergomum venisse, & hospitaliter primò à Bergomatibus habitum, mox etiam in civitatem, publicumque Consilium receptum translatis omnibus fortunis apud eos consedisse memorant. Post multos deinde annos, fortunæ proventu aucti, gentili amisso, cognomen ab dominatu oppidi Bergomatium agri, cui Commendono est nomen, accepere. Et hodie eorum quidam non alio cognomento, quàm Dominorum, vtuntur, vocitanturque. Potentiæ, ac divitiarum familiæ multa, nec pauca sunt argumenta. Præter Commendonum oppidum, Albinum quoque vicum in ditione habuere. Et Bergomatium Episcopatus, quod non liberalitatis solùm, sed pietatis etiam documentum est, ab iis auctus, ac latifundiis donatus est, in quibus insignia Gentis lapidibus incisa, quo monumentum munificentiae ad posterorum memoriam extat, in hodiernum diem manent. Joannes Galeatius Vicecomes Mediolanensium Dux, cuius tantæ fuere opes, vt ad Italiæ Regnum aspirasse dicatur, Bergamo in potestatem redacto, Commendonam gentem in primis afflixit, penitusque evertit, quia pertinaciùs pro Veneta Republica adversus Galeatii partes steterisset. Concinus tum familiæ Princeps erat, quem patriâ, fortunisque pulsum Veneti benignè excepere, stipendia ei posterisque ejus, ac filiabus dotem de publico statuere, cuius rei in tabulariis Venetorum extant Senatusconsulta



COMMENDONI CARD. 3

honorificis in Concinum, majorésque ejus scripta verbis, quos insignes viros magnis clientelis, & affinitatibus, magnis item opibus, & summa apud Montanos homines auctoritate præditos appellant; hisque omnibus ob eximiam in Venetam Rempublicam fidem, atque studium bello Mediolanensi spoliatos testantur. Ab hac communi familiæ ruina, pars in vicinis vrbibus, quas sibi quisque exilii sedes delegerat, mansere; pars Bergomum rediit, vbi hodie quoque inter honestos, ac locupletes cives habentur. Ex his, qui solo patrio ejecti, reverti Bergomum neglexerunt, proavus Joannis Francisci, cujus nos vitam scribere instituimus, Venetias se, resque suas transtulit, atque ibi vxore ductâ Josephum filium reliquit, atque hic Antonium procreavit: Qui ingenuè à patre educatus vir evasit in Philosophiæ, ac Medicinæ studiis non mediocriter eruditus. Quam quidem ipse artem haud paulò liberaliùs, quàm pro more medicorum, exercuit, non pretium, sed doctrinæ ac benevolentia officii fructum ex ea petens; fuitque ob id magna in civitate gratia, qua inde Patriciæ nobilissimæ virginis conjugium meruit: Quamquam id quidem non tam gratia assecutum tradunt, quàm quia vxoris frater, cùm ob sordes animi grandem jam natu virginem, & parentibus amissis, quintum, ac vigesimum transgressam annum domi in ancillaribus penè ministeriis nullâ ætatis, aut dignitatis ejus curâ habere porro perge-

A ij

ret, atque eam locare pari, ne dotem adnumeraret, prorsus negligeret, ipsam sibi, ne in illa miseria senesceret, consuluisse, & Antonio, qui forè ægram accersitu fratris, curabat, ultro nupsisse. Hoc igitur Antonius fortunæ suæ modo contentus honesto in otio consenuit. Atque hæc gens, & is pater Joanni Francisco fuit. Maternum autem genus splendidius, illustriusque. Mater Laura Barbadica summo Venetiis loco nata, per quam nobilissimas Patriciorum familias propinquâ affinitate Joannes Franciscus continebat; Materna Avia Clara Bolania, cujus dote Barbadicorum ditata est Domus, in quam aureorum nummum supra 70000. intulisse dicitur. Proavus Marcus Antonius Barbadicus, cujus duo fratres natu majores, Marcus, & Augustinus, alius post alium Principes Reipublicæ sunt creati. Marcus modestiâ, atque innocentîâ vitæ, & gloriâ ablati à paucis familiis, quæ se vetustate originis aliis præferebant, principatus, & ad numero plures penes quas hodie manet, translati celebris. Prudentiæ laude, & rebus gestis Augustinus major, clariorque, cujus Principis auctoritas in civitate tanta fuit, ut in potentiam verteret, majorem, quàm tutum communi libertati fore videretur, ni fides illi, & amor Reipublicæ sanctior, potiorque omni regno fuisset. Augustinus enim majestatem Regis sibi, quàm potestatem apud cives suos esse maluit. Quin eos moriens monuisse dicitur, ut ne posthac quicquam uni



COMMENDONI CARD. 5

tantum juris esse in Republica paterentur. Quod  
& Veneti secuti consilium sunt, circumcisâ, ac  
severis legibus coërcitâ Ducum potestate. Ex  
Laura Antonius quatuor liberos suscepit, Joan-  
nem Franciscum, qui natus est Venetiis anno  
1524. xv. Kalend. Aprilis hora circiter sexta diei;  
Josephum, qui penè infans decessit, Clementiam,  
& Lucretiam. Hæc adultâ ætate aspernata nu-  
ptias Patavii in contubernio sacrarum Virginum,  
quo usâ à primis annis fuerat, decessit anno 1564.  
quo tempore Joannes Franciscus legatione apud  
Polonosungebatur. Clementia Venetiis nupsit  
Balasari Caveo patricii generis juveni, quas nu-  
ptias, absente Joanne Francisco, Philippus Mo-  
cenigus is qui postea Archiepiscopus Cypri fuit,  
quicum Joannes Franciscus à condiscipulatu  
conjunctissimè vixerat, conciliavit. E Clementia  
tres nati filii: Joannes Franciscus, Antonius, &  
Laura. Hanc virginem viginti jam annos natam,  
cùm Commendonus jam Cardinalis homini no-  
bilissimo Silvio Gonzagæ despondisset, ante nu-  
ptias pestilentia intercepit. Qua quidem pesti-  
lencia ipsi quoque parentes ejus, & Joannes  
Franciscus frater Patavii anno 1576. continuatis  
funeribus alius super alio interiëre. Quem casum,  
stragémque Domus suæ Commendonus sicuti  
summo cum dolore accepit, ita eximiâ animi  
constantia pertulit. Antonius natu minimus suis  
omnibus superstes fuit, atque hic postea à Com-  
mendono vnicus hæres relictus, & aliquot diti-

A iij



6 DE VITA JOANN. FR.

bus sacerdotiis auctus, vltimus stirpis fuit, cùm  
sacris addictus prolem non propagarit.

---

*De his quæ infanti acciderunt, ac de pericu-  
lis ejus in navigando.*

CAPUT II.

**E**DITUS primùm in lucem, cùm de more  
ab obsterice lavaretur, ipso in alveolo sua  
sponte genibus sterisse, junctasque in cælum  
manus retendisse dicitur. Item quo die initiandus  
Christianis sacris, solemnique ritu sacrata infu-  
su aquæ abluendus erat, ad templum cùm defer-  
retur, nebuloso admodum cælo repente è me-  
diis nubibus emisso solis radio infans clarissimâ  
est luce perfusus. Quæ seu casu acciderint, sive  
quod sæpè evenisse constat, futuram pueri ma-  
gnitudinem portenderint, constanter quidem  
rum de eo memorabantur. Vixdum quadrimus  
summum vitæ discrimen navigans adiit. Cùm  
mater è Clodia Venetias parvâ cymbâ tranaret,  
puer, nihil advertente matre ad latus navigii ob-  
repfit, & manu aquam contingere adnitens in  
mare decidit, & cymba velo, secundaque aura  
ferebatur: exterrita ad filii casum præcipitatura  
se illa in vndas fuit, ni conantem, ac propè a-  
mentem excepissent famulæ. At puer admirabili  
audaciâ, & celeritate nautæ servatus est, qui cla-

vum regens, animadverso casu, relaxato subito fune, quo velum pandebatur, in mare profiluit, ac suscepto puero incolumem ad navigium, quod dejecto velo constiterat, nando retulit, matrique propemodum jam dolore exanimatae restituit. Futura pueri dignitas fecit, ut non frustra tam evidenti Dei numine tanto periculo ereptus videretur. Nec ferè vnquam ille sine periculo navigavit. Romam petens, cum Clodiae ut Ancoram trajiceret, conscendisset, fracta per noctem ad Senogalliam navi, vadosum ejectus in littus, trecentos amplius passus nandi ignarus, vndantibus supra pectus fluctibus, confecit pedibus; atque agrè per tenebras in siccum evasit, cum eorum aliqui, qui eodem navigio vehebantur, aquis obruti perierint. In Belgis Oceani sinum transmissurum ab Amstelodamo caelo sereno, ac secundo provectum vento, tanta eadem nocte tempestas adorta est, ut obfusis vndique densissimis tenebris, caelo crebris, atque ingentibus tonitribus, fulgoribusque omnium mentes pavore perstringente, ac non vectoribus modò aliis, & comitibus ejus, sed ipsis etiam territis naviulario, nautisque, non longè abfuerit, quin magnitudine fluctuum navis hauriretur; sed salutis omnibus ipse tum vnus fuit. Nam ceteris horrore, nausaeque jacentibus, animoque, & corpore abjectis, quorum in numero ipse fui, qui hæc postea scripsi, ille quamquam adeò solutus aër in imbrem erat, ut completurus navim vide-



retur, ad officiâque discurrentes in os incidens impediret, tamen nullâ territus re, vno adjuvante cubiculario ejus Dionysio Viterbio Paravino, qui solus expers nausæ fuit, ad omnia nautarum munia occurrens, eosque despondentes jam animum, nunc oratione, nunc vltro subeundo opera eorum confirmans navem servavit, cum sequenti die luce ortâ desævisset tempestas, & reddita mari tranquillitas esset. Ne fluminibus quidem vnquam sine adversis casibus navigavit. Vitandam omnem navigationem, mari, aquisque abstinendum, quoddam fatale inde periculum immineret, prædicentes quosdam, & monentes amicos, risit semper, nec quoties res, atque oportunitas tulit, propterea committere se mari, navibusque est veritus.

---

*De prima ejus institutione.*

CAPUT III.

**S**UMMA Patris cura institutus est; nam penè infans specimina ingenii dederat, & ab Astrologis ingentia, atque summa portendi, talium haud incurioso Patri responsum erat. Vix decimum annum agens Latina carmina non scripitabat solùm, sed etiam de re proposita ex tempore edebat, eratque propterea in amoribus Principum civitatis, quorum amicitia florebat  
Pater,



COMMENDONI CARD. 9

Pater, ut multi ad ludum, ubi cum æqualibus instituebatur, ventitarent, quo pueri ingenium in ejus ætatis exercitationibus spectarent, cognoscerentque an famæ, quæ de eo inter aliorum parentes puerorum erat, responderet, nec alio ferè cohortandi, aut increpandi liberos loco vterentur, quàm ut ejus ad imitandum exemplum proponerent. Magister illi erat Bernardus Felicianus, vir quidem eruditus, ac diligens, sed quod fateri ipse, ac præ se ferre soleret, Commendoni ingenio, quàm suo majorem in civitate famam adeptus. Unde cum multi ad eum è Patritiis primorum filii ducerentur, ipse tamen unius excellenti indole, atque acumine gloriaretur, eoque studiosius, & majori curâ omnibus doctrinis informabat, instituebátque, quas puerilis illa capere ætas potest. Ab hoc ad Antonium Ariam Hispanum nobilem Grammaticum se contulit, eodémque tempore Antonio quoque Eparcho ab Zacyntho Græcarum litterarum Doctore est usus, & ipse puer ad omnem disciplinam cum mirè docilis, tum quod paucis admodum usu venit, memoria summa ad ea, quæ doctus esset retinenda erat; nam à quibus celeriter res percipiuntur, iis etiam facile solere excidere, & contrà qui laboriosè discunt, firmiùs omnia aiunt retinere; veluti impressa difficiliùs, quàm quæ modò illita sunt, delentur. Magnòpere autem videbatur animus ejus teneri commemoratione insignium Virorum, qui per virtutem ad magnam aliquam gloriam, ho-

B

norémque pervenissent, eorúmque egregia facinora adeò cupidè audiebat, vt sæpè ab ore narrantium talia penderet, sæpè Patrem, Magistrúmque oraret, vt sibi de claro aliquo viro commemorarent: sive ea pueri natura, quod illi ætati accidere solet, curiosior fuit, sive animus ejus jam tum magnæ laudis spem affectans, narratione alienæ virtutis gestiebat. Quartum-decimum agens annum Patavium à patre discendi causâ est missus, vbi plures annos in optimis disciplinis magnâ ingenii gloriâ est versatus, captus primò Poëtarum suavitatem, ita se Poëtices studiis, legendisque, ac scribendis carminibus dedit, vt inde vel præcipuam sibi famam comparaverit, tanto quidem majori immaturæ ætatis ejus admiratione, quanto non æqualibus modò suis in eo genere celeriter antecelleret, verùm etiam cum claris viris conferebatur, qui Poëtices laude præstare tum existimabantur. Philosophiam deinde aggressus doctissimos homines audivit, aviditate ingenti Philosophorum præcepta hauriens, maxime Platonis sapientiâ delectatus, propterea quòd illum diceret propius, quàm ceteros à Christianæ Philosophiæ institutis abesse. Multos ejus libros exercendi ingenii causâ è Græco in Latinum vertit, omnes ferè explicatione rerum, quæ obscuriores essent, illustravit. Hi postea commentarii ejus in manus nostras pervenerant, quos studiosè conservatos à nobis, cum fortè ipse multos post annos reperisset, conscidit, atque incendit,



fanè immerentes. Verùm dum his disciplinis  
 adolescens cupidè animum imbuit, & discendi  
 dulcedine studiis nullâ valetudinis curâ vsque in-  
 dulget, nullûmque sibi legendi, ac meditandi  
 modum statuit, in periculofum, atque importu-  
 num incidit morbum oculorum, quo magnope-  
 re illi retardatus, ac pæne intercifus est omnis sus-  
 ceptæ laudis cursus. Ab succo nimio corporis vis  
 magna sanguinis in oculos influens aciem obdu-  
 xerat, curatione adeò difficili, vt cùm multa ex-  
 pecto infeliciter omnia procederent, etiam ipsum  
 quadriennium inclusus conclavi, atque impatiens  
 lucis vim infesti humoris, neque exficcare, ne-  
 que aliò derivare vllis remediis præstantissimis  
 adhibitis medicis valeret, desperatâ valetudine,  
 de illa ipsa Terentiana domo ad Vallis prata,  
 quam Patavii conductam inhabitabat, emenda,  
 omnique deinceps vita ibi agenda cogitaverit.  
 Tandem Joannis Baptistæ Montani Veronensis  
 Medicorum tum longè principis consilio, caute-  
 rium sinistro in crure cùm fecisset, sive id reper-  
 tum mali remedium, sive suâ sponte consumpta  
 vis morbi esset, lumen ei est restitutum, ita inte-  
 grâ acie, vt qui acutiùs, aut longiùs cerneret,  
 qui celeriùs objecta oculis percurreret, fuerit  
 postea nemo. Toto verò illo tempore, quo ocu-  
 lorum captus vsu in tenebris egit, quamquam  
 omnis ejus fuerit studiorum ratio perturbata, non  
 tamen ipse se desidia, aut languori dedit: Verùm  
 aut dictandis carminibus, quâ re maximè adole-

scientis animus recreari videbatur, temporis ejus molestiam lenibat, aut legenti operam dabat, solatia mali inde petens, unde contraxerat. Cum maximè morbo vexaretur, patrem amisit octo & septuaginta annos natum, cum esset ipse decem & novem annorum; cujus morte magnam fecit familiaris rei jacturam, quæ illi tota comminuta, ac dissipata est, cum curare ipse res domesticas nec per ætatem, nec per valetudinem quiret, & Marcus Antonius Barbadicus avunculus ejus, qui tueri adolescentis rem debuit, homo effrenatæ avaritiæ etiam diripuit. Quæ tamen ipse damna haudquaquam quanti erant æstimavit, doctrinarum cupidine occupatus, & omnibus curis depellendò morbo intentus. Cum convaluisset, consilio eorum quibus à patre fuerat commendatus, ad cognoscendum Jus Civile animum nequaquam libenter traduxit. Quo ipso in studio ut pares ab eadem celeritate ingenii progressus faceret, eoque magnopere lætarentur, quibus auctoribus eam doctrinæ viam ingressus erat, tamen Platonis, & Philosophorum consuetudinem ut abjiceret adduci cujusquam auctoritate non potuit; & animus jam tum gestiens enitendi, & navandi aliquid studio, in iis maximè virtutis præceptis constitit, quibus ad res gerendas, vitamque in hominum luce agitandam instituitur, frustra suscipi putans rerum abditarum scientiam, nisi ea ad hominum usum, utilitatēque compareretur. Eloquentiæ exercitationes omnes, sine qua ipsa



vix ratio satis tueri munus suum posse videtur, ingenti labore est persecutus, scriptitando, declamando, colloquendo. Nam & juvenis æqualis sui ob eadem factam capitis arcessiti causam Patavii apud Prætozem egit, tenuitque. Et cùm Patavinorum civitas Francisco Donato Reipublicæ principatu de more gratulatum misisset, orationem, quam Legati habuere, ipse composuit. Quo ex studio id sanè est adeptus, quod postea magno ei fructui, ac decori fuit, ut promptâ, & expeditâ dicendi facultate rem propositam seu patriâ, seu Latinâ oratione, vel continuatâ, & productâ, si res desideraret, ita explicare, ac peragere posset, ut cùm nihil conquirendis verbis, aut jungendis hæsitaret, quod plerisque accidere solet, genus orationis minimè inquinatum, ac barbarum, & certè, quod difficillimum est, æquabile, & vnde- quaque sui simile teneret.

---

*De profectione ejus ad videndam urbem, &  
quo auctore eam suscepit.*

## CAPUT IV.

**F**ACTIS per has maximè artes reliquæ vitæ fundamentis, motâque apud omnes magnâ sui expectatione ad vigesimum quintum ætatis annum pervenit, ut erecto ad res capeffendas animo ita haud satis certus quam vitæ rationem se-

B iij

queretur. Erat Patavii Aloysius Cornelius insignis eâ tempestate senex ille, cujus in valetudine tuenda tanta cura, ac religio fuit, ut cum optimis, & ad concoquendum facillimis vteretur cibis, tamen apposita libra, ut quidque edendum bibendumque erat lancibus examinaret, & modum quem sibi ab intelligentia sui corporis ipse præstituerat, nihil excederet, unde ei Sobrii cognomen accidit. Hunc colebant, observabantque ferre Patavii quoscunque aut generis, aut ingenii præstantia nobilitaret; nam & splendidè ipse semper, atque honorificè vixit, & ejus domus, quam ad Antonii ædificaverat, propter hortos & ædificii elegantiam vulgò visebatur, & ducebantur homines non literatissimi illius quidem, sed moderati, & maximè acuti, & jucundi senis sermonibus. Itaque nullius frequentior Patavii domus erat; ipseque mirificâ in omnes humanitate, incredibiliter præclaris ingeniis delectabatur, iisque cum opus esset, omnibus suis studiis aderat. Commendonum senex adolescentem summè dilexit, in quo clarissima industriæ lumina elucebant. Cum igitur dubitantem quam potissimum vitæ viam insisteret, idque secum diu, multumque deliberantem Cornelius aggressus (senserat enim senex sollicitum adolescentis animum) hortari institit, ut se Romam conferret; in una illa civitate virtuti cum omnia paterent, tot instructo naturæ, ac doctrinæ adjumentis celeriter aditum ad res magnas futurum: denique eum sibi vnum tan-



tā industriæ curriculum videri. Id consilium ab  
 amantissimo sui homine profectum, ut non as-  
 pernatus est adolescentis animus, ita accipere, ac  
 de se statuere tanta præsertim de re non audebat,  
 eo minùs, quòd cum vnus ipse Venetiis Com-  
 mendonæ familiæ reliquus esset, interiturum cum  
 eo, si sacerdos fieret, gentis quoque nomen erat; &  
 paterni amici, conjunctique omnes Venetiis eum  
 retinebant. Cum sæpe hac de re appellatus à Cor-  
 nelio nihil statueret, rogare senex eum cœpit, ut  
 saltem Romam ad visendam urbem, formamque  
 Reipublicæ illius cognoscendam iret. Ad id qui-  
 dem eo faciliùs perpulit, quòd is erat annus M.  
 D. L. quo indicto à Julio III. Pontifice Maximo  
 Jubileo, multi mortales, vel ab vltimis profecti  
 terris Romam religionis causâ convenire solent;  
 & urbis templa, & Divorum sepulcra, Petri ma-  
 ximè & Pauli ossa eodem condita tumulo vene-  
 rari. Sub finem ejus anni Commendonus Romam  
 venit, comitibus Hieronymo Renaldo, & Anto-  
 nio Altano, quorum amicitia Patavii plurimùm  
 utebatur. Quatuor admodum menses Romæ est  
 commoratus. Reversus Patavium de Romanis re-  
 bus, deque tota ratione Romanæ aulæ, & qui-  
 bus quisque initiis, & quasi ostiis ad eam acce-  
 dere, per quas artes, ad quem finem spectare, & ten-  
 dere deberet, ita differuit cum Cornelio, ut senex  
 exclamaret, aut hunc summum Romæ virum fo-  
 re, aut se rerum omnium imperitissimum esse. Au-  
 divi ego aliquot post annos, cum adolescens Pa-

Patavii literis operam darem, & Commendonus in magno honorum cursu, maximâque hominum spe, atque fama publicas legationes pro Romana re obiret, sæpe hæc commemorantem Cornelium, qui nullâ re magis gloriari videbatur, quàm quòd Commendono auctor Romanæ protectionis ipse fuisset. Singularis hujus viri extitit in Commendonum benevolentia, quam à pueritia ejus susceptam ad ultimum vitæ conservavit. Quam quidem vitam in tantum produxit, ut eo anno sit mortuus, quo Commendonus legatione apud Polonos fungens Cardinalis est creatus. Quo quidem anno cum ego ex Polonia rediens, quò cum illo eram profectus, Patavii recreandæ valetudinis causâ restituissem, & Cornelium paucos antequam moreretur dies adiissem, effusissimè senex mihi Commendoni Cardinalatum est gratulatus, ex quo tantam se lætitiâ cepisse aiebat, ut nihil meminerit sensisse in vita jucundius. Deinde quo die est mortuus, cum instare sibi vitæ finem præsentiret, deque ea re ita loqueretur, ut non de omnium maximè horribili, sed veluti de migratione quadam in aliam domum, sedens in lectulo, quo perangusto & parvo utebatur, & Veronica vxor adesset, anus ferè ejus æqualis, mihi magno prorsus, & integro vocis sono, causas, propter quas non invitatus de vita discederet, commemoravit, ac longo pióque habito sermone, ad postremum hoc, inquit, vno minùs libenter migraturus è vita sum, quòd Commendonum videre

re



re antè nequiverim, eo insignem honore, cui à me tantò antè confiso ejus virtute, præstantique natura spe destinatus fuit. Atque hoc loco multa ei, & summa cùm esset auguratus, epistolam ad eum scripsit sua manu, qua certio rem mortis suæ instantis reddebat; hortabaturque eum, ut pergeret iisdem artibus, quibus virtutem suam in amplissimo gradu dignitatis collocasset, in dies magis de Christiana Republica, & Ecclesia Dei bene, ac fortiter mereri; temperantiam coleret virtutum omnium genitricem, qua & mentis acies acuitur, & valetudo, maximum in humanis rebus bonum, integra, vigensque conservatur. Hæc cùm scripisset, & vix putare se bidui vitam superesse sibi diceret, nos discessimus. Ille paulò post abeuntem credo vitalem vim sentiens arcessi sacerdotes Jesuitas jussit, collocutusque cum iis de divinis rebus, cùm se antè Christianis sacris ritè procurasset, Crucifixi parvum simulacrum læva manu tenens, lætum se, ac bona spe fretum venire, simulacrum intuens proclamavit. Eo deinde posito, decorè sese in lectulo composuit, oculisque occlusis, tamquam obdormiturus leni efflatu animam egit, cùm vix horæ tres ab eo sermone, quem nobiscum habuerat, intercessissent. Nam ex illa victus moderatione, mente, sensibusque integris ad postremum usque spiritum vixit, quem ad octavum & nonagesimum annum ætatis perduxit. Hæc pauca de Cornelio, viro ac sene clarissimo, libuit interscribere, quan-

do & memorabilis ipse vir fuit, & Commendandum in primis dilexisse est visus.

*De primo ejus ad Rempublicam accessu, & de ratione quam primum in urbe habuit.*

## CAPUT V.

**V**ISA Româ, perceptâque civitatis ejus formâ, nihil vltra dubitavit, quin sibi immigrandum in eam urbem statueret, eorum spretis consiliis, qui ad eum domi retinendum, & honorifica illi conjugia, & accessum in scribarum Collegia offerebant, in quæ nonnisi honesti de plebe homines, vetustæque in civitate originis, si modò patritio genere orti non sint, admittuntur. Honores enim, & publicæ procuraciones, & jus suffragiorum Venetiis Patritio tantum parent: reliqui non in aliam Reipublicæ partem, quàm ministerii admittuntur. Sed Commendono major, atque elatior animus, naturæque erat, quàm ut se, aut in scribarum humilitatem demitteret, aut in ea civitate vivere sciret, in qua exors Reipublicæ, nec pari cum reliquis jure esset futurus. Nec magis alia res juvenem, ut Venetias, ac spem propagandæ familiæ relinqueret, compulisse creditur, quàm ut eò decederet, ubi nihil clausum sibi, nihil interdictum, nihil, quod, quominus virtute, atque industria niti posset, im-



pediret. Commodum hæc cogitantem senior propinquus ejus Ecclesiasticis beneficiis duobus in Patavino agro auxit, quorum ex vectigalibus ad trecenti numi aurei ad eum redibant, tantumdem ex patrimonii sui reliquiis capiebat, præter id quod in sororum dotem seposuerat. Hoc igitur fortunarum modo compositis domi rebus, Romam concessit anno M. D. LI. nec diù moratus, viam, qua sibi eundum esset, delegit. Plerique homines, qui Romam ad capeßendas res urbanas, quod quidem nemini, quantumvis longinquo, & alienigenæ non licet, quo potentis alicujus gratiâ, atque opibus adjuti facilius entantur, in Principum, aut Cardinalium alicujus fidem conferre se consuevêre. Sed Commendonus, qui se ita alteri adjungerent ratus non suâ, sed alienâ fortunâ ferri, nemini vni se applicare, suus, non alienus Reipublicæ non partium ejus esse, statim ab initio decrevit; inque eo vsque ad ultimum vno vitæ, & consiliorum tenore permansit. Itaque nactus Romæ Nicolaum Pontium Venetorum Legatum, eum qui postea civitatis suæ Dux est creatus, per hunc Julio III. Pontifici Maximo commendatus in familiam ejus, Cubiculariorumque numerum, ut ascisceretur impetrat; qui tum ordo perhonorificus Romæ habebatur, neque in eum nisi magno cum delectu honoris causâ assumebantur probatissimi juvenes, & ingenii, & generis dignitate commendati. Hoc modo ille non tam in Julii familiam adscri-

ptum se, quàm in jus civitatis, ac Reipublicæ receptum putavit. Nam Romana res, etsi vnius imperio habetur, tamen quia is eligitur liberis suffragiis, neque ob provectam ætatem diu rerum potitur, nec ejus ipsius vllum est in successore arbitrium, ac nemo spe, atque aditu honorum arceatur, inesse huic civitati, & aliæ species Reipublicæ videntur, vt cùm vnus summam potestatem, summumque jus omnium rerum obtineat, nonnullæ tamen esse, & principum, & multitudinis opes videri possint. Itaque Commendonus gratiæ, amicitissque conjungendis animum intendit, magno iudicio, delectuque, cuiusque enim ante omnia mores spectavit, studiæque, quarum rerum similitudine maximè familiaritas, & benevolentia confirmatur. Dedit igitur operam, vt qui essent in vrbe viri literarum, & doctrinæ nomine clari, eos haberet amore, & consuetudine conjunctos; nec gratiam solùm inter illos, sed ingenii quoque famam celeriter est assecutus. Quorum præter cæteros familiariter vsus est Hannibale Caro, propter morum, & doctrinæ elegantiam, & suavitatem, Gulielmo Sirlero, qui ei postea collega in Cardinalatu fuit, vir cùm innocentia summâ, tum memoriæ tantæ, vt cùm omnes omnium artium libros, omnia scripta Græcorum ac Latinorum vetera, recentiaque infatigabili labore perlegisset, eorum non singulas modò sententias, sed verba quoque memoriter recenseret, cùm bibliothecæ instar, vel de abstrusissimis re-



bus consuleretur. Quod nisi congestis in vnus  
 notitiam tot rerum doctrinis ingenium impar  
 fuisset, memorabiliorem virum ætas nostra non  
 tulisset. Octavio præterea Pantagato, Jacobo  
 Marmita, Basilio Zanchio, Paulo Manutio, Ju-  
 lio Pogiano, viris Romanæ eloquentiæ principi-  
 bus, qui omnes cum eum ætate anteirent, tamen  
 gravitate, modestiæque morum, & peracri in ipsis  
 quoque doctrinæ studiis iudicio juvenis mirificè  
 tenebantur. Nec minùs studiosè è sacerdotum  
 societatibus, maximè Jesuitis, quorum (vt fla-  
 grantissima sunt omnium initia disciplinarum)  
 longè tum sanctitas, atque auctoritas inter om-  
 nes eminebat, qui scientiâ divinarum rerum, &  
 morum, ac religionis laude commendarentur,  
 amicitias coluit. Probatissimo cuique & prospe-  
 ræ in civitate famæ diligi, carumque haberi ap-  
 petens, quod sibi existimationi, atque laudi re-  
 batur fore. Et quamquam amicos non numero,  
 sed genere distinguebat, & doctorum hominum,  
 ac proborum consuetudine maximè utebatur: ta-  
 men quamplurimos ex omni genere benevolen-  
 tiâ, atque officiis devinctos vti haberet, & quàm  
 latissimè gratiam propagaret, operam dabat. Cæ-  
 terùm è Cardinalium ordine ingentes viros, lon-  
 gèque inter omnes pietatis, & sapientiæ laudi-  
 bus præstantes, colendos sibi, atque in vitæ, ac  
 morum institutis imitandos suscepit. Horum ob-  
 servavit maximè Joannem Petrum Carafam, qui  
 tum Collegii princeps erat, & Marcellum Cer-

vinum, & Reginaldum Polum Britannum. Quorum Marcellus Julio, ei ipsi deinceps Joannes Petrus in Pontificatu Maximo successere: & Polus nihil propius fuit, quam ut Pontifex renunciaretur iis comitiis, quibus Julius ipse creatus est. Proximos his habuit Jacobum Puteum, Rodolphum Pium, Joannem Salviatum, Federicum Cesium, quibus omnibus adeo probatus est juvenis senibus, ut omnes sui perstudiosos, suisque faventes rebus semper habuerit. Innocentium Montium, quem Julius non humilibus modo, ac sordidis, sed vix satis certis parentibus ortum, ac ne ullius quidem artis specimine commendatum, inopia prolis adoptari à fratre jussu, atque in summum inde cooptato ordinem, summum gratiae, atque rerum propè omnium arbitrium, prava, insanæque indulgentia permiserat, cum vnum omnes appellarent, appeterent, ambirent, omnibus colerent officiis, Commendonus moribus originis suæ sordibus imbutis, non novâ fortunâ, atque amplitudine dignis viventem, nec propriè observavit umquam, & penitus se domo ejus abstinuit: qui enim intelligeret quale cujusque sit ingenium ex eorum maxime moribus aestimari solere, in quorum quis amicitiam se contulisset, maluit famæ ex gravissimorum virorum familiaritate, quam ambitioni ex unius inconsulti, ac dissoluti juvenis gratia inservire.



*Brevis transcursus rerum, & honorum ejus.*

## CAPUT VI.

**P**AULò pòst publicis rebus admotus est, atque honores velut impetu aggressus omnes contento propè cursu pervasit, & quod mirabilius, & ut nos senes longo vsu vrbinarum rerum peritos sæpe narrantes de eo audivimus, prorsus singulare fuit, non suis, non cujusquam potentis opibus nixo, non petenti, ac sæpe recusanti, minimèque ambitionis causâ alienis moribus servienti, vltro omnia delata, atque ingesta sunt. Anni quatuordecim à primo adventu ejus in vrbem ad Cardinalatum intercessere, quibus numquam ferè vacuus à publico munere egit. Eodem quo Romam venit anno M. D. LI. Urbinum est missus: anno insequenti in Belgas, atque inde in Britanniam. Inde regressus in Lusitaniam est profectus, atque his itineribus Julii quinquennium est transactum. A Paulo IV. M. D. LV. scribendis epistolis ascitus, eodem anno Episcopus creatur; destinatus & Urbanus Prætor ab eodem Paulo, sed mox O-rator, sive, ut novo quamquam vsitato jam, ac trito Romæ vocabulo vtar, Nuntius ad Carolum Cæsarem commorandi causâ apud eum est missus, ad quem tamen bello inter ipsum, & Paulum exorto non pervenit. Reversus Romam ad concitandos ad bellum Principes Italiæ circummittitur,

atque iis aditis, Venetiis, ut in eandem societatem armorum Senatum adduceret, manere est iussus, atque his quoque obeundis muneribus, quatuor ferme consumpti anni, & Pauli Pontificatus exactus est. A Pio IV. quo anno Pontifex Maximus est creatus, qui fuit M. D. LX. Nuntius item ad Ferdinandum Cæsarem, Principesque Germaniæ est ire iussus, qua in peregrinatione annum & dimidium fuit. Post reditum inde à Cardinalibus Concilii præsidibus ad eundem Ferdinandum Cæsarem remittitur, eoque celeriter confecto itinere, in Poloniam, ut Nuntius apud Sigismundum Augustum Regem, gentemque esset, protinus legatur. Sic Pii IV. anno item quinto, quo anno Pontifex moritur, absens Cardinalis est creatus. Anno inde M. D. LXVI. à Pio V. legatus ad Maximilianum Cæsarem Germaniæ conventum Augustæ agentem ire iubetur. Ac biennio post ad eum à præcipiti consilio tribuendi Austriæ populis jus Lutherani hæresis revocandum est missus: alióque item biennio post ad eundem Cæsarem, & ad Regem Poloniæ de fœdere iungendo adversus Turcas novâ legatione est perfunctus. His itineribus, quibus omnes propè Christianas provincias, quæ in Europa sunt, peragravit, numquam æger fuit, viæ difficultates, laboresque etiam voluptati habuit; non eum æstus, non imbres, non immania Septentrionis frigora fatigarunt. Proposito hoc veluti cursu rerum ipsius singula nunc ordine enarrare pergemus.

*De*



*De prædictionibus future dignitatis ejus.*

## CAPUT VII.

**I**MPUBERIS adhuc, & adolescentis tanta opinio, atque expectatio fuit, ut passim prædicarent homines eum ad summam aliquam laudem perventurum. Cum Romam venisset, statim eadem de illo orta spes. Hannibalem Carum, virum sanè optimum, & urbanarum rerum diuturno usu, atque observatione in primis peritum, adolescens ego sæpe audiui cum diceret, duobus se æqualibus suis Nicolao Ardinghello, & Marcello Cervino primis diebus, quibus Romam venire, perspectâ eorum industriâ, Cardinalatum prædixisse, in neutro falsum se judicio esse; utrumque enim per varias mandatorum munerum functiones, suâ virtute Paulo III. Pontifici Maximo probatâ in summum ordinem pervenisse; quorum Ardinghellus decesserat, Marcellus in maxima hominum fama, atque spe supremi honoris tum erat. Quem postea honorem haud ita multis interjectis mensibus mortuo Julio est adeptus. Commendonum tertium esse Carus aiebat, quem magnis gerendis rebus factum eidem amplitudini ab pari ingenii æstimatione, destinavit. Ei certè tantum tribuit semper, ut nullius benevolentiam, atque amicitiam magis coluerit: illi fratris

D

filium in domesticorum munerum ministeria tradiderit, nec ullius fidei commendatam domum, suosque magis cupierit: cæterum comprobata eventu conjecturam suam, ut impensè, ita non diu lætatus est; iisdem enim diebus jam senex est mortuus, quibus Commendonus ad urbem Cardinalis venit anno 1566. Joannes Petrus Carafa Cardinalis, qui postea Paulus IV. est dictus, summæ vir gravitatis, & prudentiæ consuetudine juvenis mirè delectatus, sæpe inter suos parem cum omnibus honoribus, & brevi adepturum edixit, ipsumque identidem accendens, hortabatur, ut pergeret ire quibus cœpisset itineribus, ad magna & summa perventurum. Idem cum non multò post Pontifex Maximus eum Episcopum faceret, ferrètque multis laudibus, adjecit:

*Debile principium melior fortuna sequetur.*

Sed hæc ex moribus ejus conjectabant homines: Illa ex interpretatione astrorum. Quo tempore est natus responsum patri à Mathematicis est, magnum virum fore, summumque imperium ad eum perventurum. Romæ eadem seu verè, sive assentantes spei, quæ de illo erat, cecinere, & quidem constanter, nec multum variante judicio omnes. At in Lusitania cum eò à Pontifice ad Regem missus venisset; inter eos, à quibus observari, adiri que officii causâ solebat, exul Hispanus nomine Maldonatus, studiosius eum quam cæteri perfolvit, homo Latinis, Græcisque litteris doctus, & in Astrorum scientia memoriæ ejus



facile princeps. Is in longo sermone variè per-  
cunctando à Commendono elicit non diem mo-  
dò, sed horam quoque ortus ejus. Tum positu  
cœli stellarumque notato, quo quæque in signo,  
quæve earum inter se conjunctiones, motusve,  
nascente illo fuissent, ad eum rediit manu ferens  
parvam schedam, quam Commendono tradidit.  
In ea Mathematicorum notis situs syderum, de-  
scriptioque dimensa, ac designata erat, & sub-  
scripta brevis epistola. Natalem à se horam mul-  
torum inspectam esse, quòque nati fato, quæve  
eventura iis ex astrorum observatione esse vide-  
rentur prædixisse: nullius ortum felicioribus signis  
conclusum animadvertisse. Pergeret porro, & quò  
Deus, & natura vocarent, sequeretur, imperium  
ei, ac principatum deberi illius Reipublicæ ad  
quæcumque se contulisset, suam propè jam æta-  
tem exactam esse, neque ad illud tempus produce-  
re vitam posse, filio mandaturum, ut ei à se obfi-  
gnatas litteras afferret, orare ut memor à quo tan-  
tò antè hæc sibi prædicta fuissent, tum aliquam  
filio gratiam referret, cum prædictionem suam  
secuta res confirmasset. Tempus quoque definire  
non est veritus alterum & sexagesimum ætatis an-  
num, trigessimum tum agentis, in quem annum  
incidit mors Gregorii XII. Pontificis Maximi,  
cui ipse successor, & votis bonorum, & studiis  
Patrum destinabatur, nisi importuni morbi vis  
eum paucos ante dies, ut suo loco dicemus, præ-  
ripuisset. Hunc Maldonatum satis constabat mul-

D ij

ta ab eadem scientia multis, quæ evenêre, præ-  
nunciassè. Ipse in exilium ierat, quòd cùm Hi-  
spaniæ civitates à Carolo V. defecissent, intercon-  
citatores popularium, vnus omnium acerrimè in  
illa versatus causa erat. Quamquam antè consu-  
lentibus amicis adversum seditionis eventum, &  
suam ipsius calamitatem prædixerat, testatus offi-  
cium nihilominus sibi, atque fidem erga patriam  
omnibus rebus antiquiorem fore, nec necessario  
tempori suorum civium defuturum. Cùm exula-  
tum in Lusitaniam venisset, Joannem Regem mo-  
nuerat, vt maturaret Emanueli filio nuptias, ne-  
gans eum adolescentiam evasurum, cuius dicto  
& pater paruit, & filius intra vigesimum annum æ-  
tatis extinctus fidem affirmavit. His conjectorum  
dictis ad amplissimas opes Commendonis incitari  
potuisset; sed ea ille haud ignarus vanitatis Mathe-  
maticorum, & quæ ipsa portendunt astra, fallacissi-  
mo ab iis sensu judicari, trahique plerumque quò  
aut assentandi, aut obtrectandi libido rapit, per-  
risum, jocumque accepit, nullam fati vim, omnia  
cœlesti numine contineri, ac regi existimans, quæ-  
que hominibus prospera, adversaque eveniant, ea  
Dei nutu, atque potestate, à quo singula provi-  
dentur, atque administrantur, non necessitate  
vlla fieri naturæ aiebat.





*Quæ prima commendatio ejus ad Julium  
Pontificem.*

## CAPUT VIII.

**H**ORTOS Julius extra Portam Flaminiam sumptu, atque opere sanè magno ædificabat, in eos nobilis, ac vetusti fontis aquam virginem duxerat. Antiqui operis statua eam virginis sopitæ somno, ac super urnam recumbentis effundebat. Hanc celebrari carminibus varii generis, prout spatia lapidum erant, quibus incidenda essent, & Julius jussit, & certatim non Romæ solùm, sed per Italiam quoque arrepta materia est decoris ingeniis. Commendonus summum illud studium suum, quo à pueritia fuerat incensus, deque animi ad eam rem impetu plurimum remiserat; sed tum incitatus studio Pontificis, & contentione eruditissimorum hominum, & ipse epigrammata aliquot, & argumento, & intervallis apta composuit. Quæ cum Julius legisset, (& habebatur talium peracutus æstimator) non probavit modò, sed omnibus prælata insculpi protinus jussit. Vocato inde ad se Commendono variè percunctando juvenis animum exploravit, expenditque. Quo deinde dimisso ad adstantes conversus, Majorum, inquit, laudum semina huic juveni insunt, majusque ingenium, quàm

D. iij

vt condendis versiculis occupetur. Et Commendonus, sive quòd satis inde fructus, famæque partum sibi, eâque decorari adolescentiam, virum alia decere existimarit, sive gravioribus intentus studiis; nam Theologiam tum magnâ vi aggressus erat, totam rem prorsus abiecit, desitque, nec postea per omnem vitam attigit ampliùs, quamquam & factos ab aliis versus legit libenter, & subtiliter æstimavit. Sed suorum adeò pœnituit, vt etiam ab amicis accuratè conquisitos, in quibus iusta aliquot volumina, & tragœdiæ, & comœdiæ erant, omnes incendit, non antea scribendis iis, quàm tum abolendis intentior. Cùm multa ab eo de studiis litterarum sciscitatus Julius, triennii operam cognoscendo Juri civili insumptram didicisset, collaudatò instituto ejus reprehendit, quòd probari, & appellari Jurisconsultum neglexisset. Commendonus in id triginta dierum spatio impetrato Patavium excurrit, vt quo in loco eam hauserat scientiam, ibi potissimùm ejus ab se ratio redderetur. Atque ab Hieronymo Torniello, cui antea Doctori operam dederat, deductus, vt assolet, laudatùsque summâ Collegii approbatione Jurisconsultus appellatus, Romam ad diem commeatus rediit.



*Quò primùm publicè missus sit.*

## CAPUT IX.

**G**RATUM Julio, & obsequium juvenis, & celeritas fuit: itaque nihil jam non rectè committi industriæ ejus putans, paucos post dies eum ad Guidubaldum Urbinatum Ducem misit Urbinum. Mittendi causa hæc fuit. Contendebant armis Cæsar, Gallique; & cùm Sena nobilis Etruriæ civitas fatigata Didaci Mendotii importuno, superbòque imperio, Hispanis ejectis Gallorum præsidium in oppidum accepisset, ad vindicandam, tuendamque eam magnâ vi bellum vtrimque parabatur: vtrique Guidubaldum, cujus erat ditio, vel ipsâ propinquitate bello opportuna, trahere in suas partes, militiamque propositis amplis stipendiis, optabant, Juliùmque Pontificem, cujus auctoritatem secuturus Guidubaldus videbatur, variè sollicitabant. Et Julius veritus, ne Guidubaldus cupiditate haberetur, atque in vtram ille sectam transisset, sibi ab aliis impunitaretur, eum retinere, sibi que militare volebat. Qui igitur eum ab studio factionum averteret, conduceretque Commendonum misit. Et quia eodem tempore à Cæsaris Legatis missum ab urbe certum hominem ad transigendum cum Duce intellexerat, dare operam Commendonum jussit, ut diligentia & celeritate illum antecederet. Ex-

templò profectus, ac brevissimè confecto itinere mandata Pontificis Guidubaldo exposuit, planè jam ad accipiendas quas ei Cæsar conditiones offerebat inclinato, expectantique eum quo coram de omnibus rebus pacisceretur. Sed cùm Commendonus ei, & voluntatem Pontificis, & anceps, nec ullam in partem tutum consilium se, resque suas duorum præpotentium Regum dissidio, armisque miscendi ostendisset, & auctoritate Julii, & Commendoni sermone permotus, in potestate Pontificis futurum se respondit. Ita stipendio, pactisque conventis in Pontificis militiam est adscriptus, eique urbis Præfectura tradita. His confectis cùm paulò post à Gallis, Cæsarianisque missi supervenissent, comiter atque hospitaliter ab Duce accepti Romam sine effectu rediere. Mandaverat præterea Commendono Julius, ut si locus ei daretur, Guidubaldi animum de sororis matrimonio exploraret, verùm ita ut nihil suis verbis cùm illo ageret, æquum enim censebat priorem se de eo ab Duce appellari. Ea erat virgo per matrem Camertium Ducum hæres, cupiebatque Julius, ut Fabritio Montio fratris sui filio desponderetur. Commendonus cùm sublati post cœnam mensis, longo ambitu variæ orationis, Guidubaldum in hunc sermonem de Pontificis affinitate traxisset, quàm multa commoda, quantasque ad omnia opportunitates ea res habitura esset, disseruit, suamque in id Duci operam, atque studium obtulit. Quod ille non aspernatus, postulavit à  
Commen-



Commendono, ut suo nomine optare siquidem id, atque pervelle Julio diceret. His actis, eadem nocte conscensis, & crebro muratis equis, Romam rediit, cum Julius vixdum venisse eum Urbinum existimaret.

*De profectioe ejus in Belgas.*

CAPUT X.

**D**ISSIDENTIBUS, ut dictum est, atrocibus inter se odiis Cæsare, atque Henrico Galliarum Rege, ac exitiabili bello Christianam Rempublicam dilacerantibus, Julius, quod sui in primis officii erat, de componendis Regum controversiis, reducendisque in gratiam eorum animis, Hieronymum Dandinum paulo antè à se in amplissimum Collegium cooptatum, ac tam præcipuè apud Pontificem gratiâ, atque auctoritate florentem, Legatum ad Cæsarem misit. Is Commendonum, cujus antè ingenium nonnullâ ejus consuetudine probatum, perspectumque habebat, secum ducere cupivit, impetravitque à Julio. Celeriter juvenis gravitate, & modestiâ morum, & omni officiorum humanitate cum cæteris carus, jucundusque, tum longè acceptissimus Legato haberi est cæptus, atque intimis quoque consiliis adhiberi: Itaque ad Cæsarem cum venisset, & nunciata paulò post Edoardi Britannorum Regis mors esset, in Britanniam ab eo est missus: de

E

qua profectioe priusquam dicamus, causam paulo altius ab origine repetere operæpretium fuerit. Henricus Octavus cum duodetriginta annos Catherinam Ferdinandi Regis Hispaniæ filiam, Caroli Cæsaris materteram in matrimonio habuisset, filiosque ex ea suscepisset, seu deflorescentis ætatis ejus, vergentisque ad senium peractus, sive alterius amore ab illa alienatus, ad cupiditatem ejus repudiandæ impotenti animo incubuerat, effrenatæque libidini, quâ præceps ferebatur, causam prætexebat, quòd Catherina antè Arturo fratri suo nupta fuisset, qui quartumdecimum annum agens intactam puellam relinquens morbo decesserat; & virgo petentibus enixè Regibus patre, ac socero ex auctoritate Julii II. Pont. Max. tradita Henrico fuerat. Cum Romæ, ut matrimonium, quod sibi non justum cum Catherina esse aiebat, dirimeretur, impetrare nequisset, amens cupiditate, ac scelere, spreto Pontifice Maximo, abjectoque religionis, & sacrorum respectu, omni divinarum, atque humanarum legum jure contempto, exacta thoro, & conjugio suo Catherina, Annam Bolenam, quam perditè deperibat, uxorem duxit, & à Pontificum Maximorum fide desciscens, penitus se, regnūque à Catholica Ecclesiæ corpore præscidit; eundemque se summum in suo regno sacrorum Antistitem appellavit. Quo facto veluti perrupto aggere omnis ille pravissimarum opinionum, hæresūque oceanus Angliam inundavit. Unde



tanti, ac tam sævi seditionis æstus, tot monstro-  
rum species prodierunt, frustra obnitente, & acri-  
bus suppliciis auctores coërcente Henrico. Mo-  
riens inde Edoardum filium tertia vxore susce-  
ptum successorem Regni reliquit, puerum indo-  
lis probæ, sed adedò à tutoribus, rectoribúsque  
in sacrorum disciplina corruptum, vt vna illi re-  
ligio fuerit veræ religionis fundamenta evertere,  
funditúsque eruere. Verùm is seu morbo, seu frau-  
de suorum intra xvii. ætatis annum extinctus, Re-  
gnum, exclusâ Mariâ sorore, Joannæ consobrinæ  
sue filiæ testamento reliquit. Hanc Dudleus Nor-  
tumbriæ Dux summam sub Edoardo potentiam  
adeptus, nurum sibi adsciverat, instrumentúm-  
que transferendi in domum suam Regni habe-  
bat; sed Maria, cognitâ fratris morte, haudqua-  
quam segniter ad vindicandum jus suum exurre-  
xerat, provectâque ingenti popularium favore,  
paucis diebus paternum Regnum recepit; & quod  
alterius Regni instar fuit; Nortumbrius ipse, &  
Joanna, & maritus Guilfordius in potestatem ejus  
venêre. Nam Nortumbrius palam factâ morte  
Edoardi, quam ipse dum destinata disponit, tri-  
dum occultaverat, cum testamentum Principi-  
bus coram aperuisset, ex eoque Joannam nurum  
Reginam nuncupasset, ac deductam in Londi-  
nensem arcem, vt mos genti, in possessione Re-  
gni locasset; nuntiis mox de Maria allatis, de-  
promptâ Regiis thesauris pecuniâ, ac magnâ lar-  
gitione militibus sibi, vt rebatur, firmatis, cele-

E ij

riter copias adversus Mariam eduxerat, ut antequam opprimeret, quam ad convalescendum spatium haberet. Sed tanta repente ad Mariam animorum facta inclinatio est, ut non destituerint modò Nortumbrium milites, sed custodiâ circumdatum Reginæ tradiderint. Maria iusto, quamquam infelici Catherinæ, & Henrici matrimonio erat nata, ac primâ ætate, cum frater eadem matre genitus intra infantiam mortem obiisset, non regio solùm cultu, regiisque opibus innutrita fuerat, sed vnicè dilecta parentibus, etiam in non dubiam spem Regni educata, nuptiæque ejus maximis Europæ Regibus sunt appetitæ. Quâ fortunâ adeò post repudiatam matrem, prolapsûmque ad flagitia, & scelera patrem decedit, ut ex auctoritate ejus, de sanctioris consilii sententia hæreditatis, ac successionis in paternum Regnum jure privata, ancillaribus ministeriis Henrici pellicibus famulari cogeretur. Nec post patris mortem honoratior apud Edoardum fratrem fuerat, abjecta, spretaque, ac procul Regia habita, magis divinâ ope, quam cautione, & custodia sua Nortumbrii fraudes variè vitæ ejus insidiantis, vitaverat. Fuit enim innocentissima femina, & pari Catholicæ religionis constantiâ, & vitæ sanctitate, ut nihil adepta Regnum habuerit prius, quam patris, fratrisque leges adversus jura factorum latas abrogare, ac pristinum pietatis cultum restituere, usque adeò in id intento studio, ut monenti Carolo Cæsari consilium ne ap-



properaret, neve tam immaturis rebus sese indicaret, responsum sanè memorabile reddiderit: Sed dum deserta, destitutaque in sua calamitate jaceret, non alterius spe, atque ope, quàm Dei sustentatam, ad Regnum inde provectam fuisse: Itaque statutum sibi, cui salutem, & dignitatem deberet, ei non cunctanter, aut obscurè, sed statim, ac propalam gratiam profiteri. Nec quia ob id crebræ eam seditiones, tumultusque quorundam, qui omnium rerum licentiæ, ac impunitati assueti, ac propè omni religione soluti ægrè sub jugum suave, ac salubre Christianæ disciplinæ redibant, exceperunt, destitit incepto; sed punitis fortiter auctoribus, ac multitudine ad sanctitatem reductâ, eximia cum gloria & Regnum pacavit, & colendæ pietatis rationem constituit.

---

*De ejus in Britanniam adventu, & actis  
ibi per eum.*

## CAPUT XI.

**V**ERUM, ut vnde transgressi paulum seriem rerum, temporisque sumus, eò revertamur in continentem post nuncium extincti Edoardi nihil nisi itum ad arma ab Nortumbrio, & gentem Mariæ studere incertis rumoribus afferebatur. Nam ardente inter Gallos, & Cæsarem bello omnia plena suspicionum erant, omnia littora,

E iij

ne quis ignaris præfectis, aut trajiceret in infulam, aut inde appelleret, custodiebantur. Postremò etiam desertum à militibus Nortumbrium, & prosperæ Mariæ res nunciabantur. Hieronymus Dandinus Legatus, cùm Regni nobilissimi paulò antè vnius furore, atque amentia Regis à Catholica religione, & fide Pontificis Maximi avulsi salus ageretur, & Mariæ conatus aut adjuvandi à Pontifice, aut confirmandi esse viderentur, vehementer Britannicis nuntiis excubabat, qui ipsi cùm nec certi, & secundi tamen venirent, aliquem in Angliam virum industrium, intentumque, qui explorata, & certa omnia referret, mittere agitabat, cùm ei à Julio literæ id ipsum jubentes redduntur. Nam Julius Edoardi morte acceptâ, Reginaldum Polum, qui tum ad lacum Benaci haud satis firmâ valetudine locorum salubritates sectabatur, mittere in Angliam decreverat, idque per litteras Polum docuerat. Cui cùm nihil properè agi, & certiora expectari placuisset, Dandinum de eo per celerem tabellarium monuerat. Tum ille Commendonum, quem gerendis rebus peracrem, cupidum navandæ operæ, & consilio promptum cognoverat, appellat, hortaturque, ut rem ejus ingenio, & solerti studio dignam suscipiat. Haud cunctanter Commendonus, quamquam magnæ, & in trajiciendo difficultates, & trajecto pericula proponerentur, operam proficitur. Collaudato juvene, rebûsque communicatis Legatus ei propria nulla mandata de-



dit, nisi ut diligenter omnia cognosceret, quæ  
agerentur, quique aditus, quæque spes recipien-  
di ejus Regni ostenderentur. Si locus cum Maria  
agendi daretur, eam ad sananda religionis vul-  
nera, suumque Deo reddendum cultum hortaretur,  
Pontificisque ad id non solum studium, sed  
etiam opes polliceretur. Denique omnia pro fide  
sua, & prudentia gubernaret. Ille cum per infe-  
stissimos Romano nomini hostes, & tum licen-  
tiâ, & futuri metu efferatos iter esset, ne se cujus-  
que crederet fidei, sine comite, aut servo vlllo  
Bruxellis profectus Gravelingam vno die itinere  
confecto venit. Quo ex oppido commodissimus  
erat in Britanniam trajectus: ibi duos sibi corpo-  
ris ministros ignaros sui conduxit, vtrumque Gal-  
licæ, alterum etiam Anglicæ peritum linguæ. Cum  
his compositâ sibi causâ, quod avunculus merca-  
turam Londini fecisset, multaue negotia haud  
satis explicata decedens reliquisset, navem con-  
scendit, ac nequaquam secundâ tempestate trans-  
vectus in insulam, Londinum contendit, quò  
profectam Mariam, receptamque in itinere cog-  
noverat. Eò cum venisset, plena barbarum om-  
nia, feroces adhuc licentiâ hæreticos, conantés-  
que Mariam à pristina revocanda religione abs-  
terrere, & Reginam illam magis, quam Regni  
potentem invenit. Nam & ipse interfuit, cum  
ausus sacerdos in templo adversus novas concio-  
nari doctrinas, adeò iram insolentis jam talium  
multitudinis commovit (& genus est omne hæ-

reticorum audaciâ, & temeritate præceptis) ut non obstrepuerint modò dicenti, sed miles quidam è media concione nudatum pugionem in perseverantem orare conjecerit. Quo facinore Com-mendonus est admonitus quanto ipse in discrimine versaretur, si aut quis, aut à quo, aut qua de causa venisset, rescirent. Nec tamen hoc metu, ac difficultate destitit; quin ad ipsam jam adire Reginam parabat, cùm fortè Joannes Lius nobilis Anglus ei occurrit, quem sub Edoardo ob religionem profugum in Italia familiariter noverat, nec parvis officiis devinctum habebat. Ac primò quidem perhumaniter amplexum offerenti ecquid eo tempore in Britannia quærenti, eadem avunculi negotia, pecuniâque sibi pluribus in nominibus relictam obtendere. Pòst ubi carum Reginae eum, atque inter intimos ministro com-perit, multâque amicè secum, ac fidenter ab illo de Republica, præsentique rerum statu, atque omnia pro pristina familiaritate, & benevolentia fieri satis antea, vel ex constantia avitæ pietatis probato, causam adventus sui aperit, celeritèrque ab eo ad Reginam deducitur. Quod tamen ipsùm non sine difficultate fuit; omnia enim septa custodiis, omnes clausi aditus erant, ne quis externus cum Regina colloqui clam aliis posset: maxime Cæsar, & Pontifex suspecti habebantur; quorum cum altero de matrimonio senserant agi, alterum pollutæ religionis, bonorùmque à templis direptorum ultorem timebant. Reginam  
Commen-



Commendonus ad pristinas sacrorum ceremonias, fidemque restituendam, Regnum Catholicae Ecclesiae reconciliandum, ac referendam hanc statim gratiam Deo, qui eam devictis sine vulnere, sine civili sanguine perduellibus, atque hostibus suis, potestatiue ejus traditis, paterni Regni compotem fecisset, cum esset hortatus, atque omnes in id Pontificis Maximi facultates pollicitus, à Regina adventu ejus mirè lætata perbenignè est auditus; prolixè multa de se, deque fide, ac studio suo erga Pontificem Maximum, & Catholicam Ecclesiam professa, de ratione conficiendæ rei, consilioque suo cum eo communicavit, jussumque redire ad se dimisit; monitum prius etiam atque etiam, ut custodiam sui haberet, diligentissimèque caveret, ne, quid acturus venisset, à quoquam sentiretur, rebus enim tam turbidis periculum ejus præstare se vix posse. Interea pacandis rebus intendit, multitudinem armatorum, & quorum ægrè coerceri licentia poterat, qui Reginam in Regni possessionem reducere, adessèque initiis ejus etiam repugnante ipsa voluerant, in suam quemque domum dimisit, civitatemque illâ turbâ, & colluvione hominum exhausit, exoneravitque. Cum Cæsare matrimonium Philippi filii sui offerente, quo ipsa communitura sibi Regnum præpotentis, & propinqui Regis connubio videbatur, de fœderis, & affinitatis conditionibus occultè agebat, causamque Nortumbrii, quem in custodia habebat, cogno-

sci, perficique jusserat, ac in singulos dies magis convalescens, rerum, ac Regni potens efficiebatur. Commendono ad eam quoties vellet, atque opus esset, per eundem Lium adeundi facultas erat. Cum & fœdus cum Cæsare, & nuptias cum filio pepigisset, nec tamen id palam esset, arcessi Commendonum jubet, ei tum mentem, consiliūque suum omne patefecit, litterasque ei manu suā scriptas ad Julium Pontificem perferendas dedit, quibus se, Regnūque in fide, & auctoritate Pontificum Maximorum fore pro certo confirmans pollicebatur; addens de cæteris rebus mandata se Joanni Francisco Commendono dedisse, de ipso plura sciturum. Summa mandatorum fuerat, Reginam habito Britannia sanctiori Consilio, ex ejus auctoritate patris, fratrisque scita, jussūque de religionibus abrogaturam, statimque Legatos Romam, qui Pontifici Maximo debitum fidei, & obedientia officium persolverent, missuram: Interim postulare, ut Julius publicè Anglis ignosceret, ne cui assensisse Henrico, Edoardoque divinum sibi jus arrogantibus, descivissetque à majorum pietate, & Romanæ Ecclesiæ fide, fraudi, noxæve esset; Reginaldum Polum Cardinalem cum summa potestate Legatum in Angliam mitteret, à quo hæc omnia ritè fierent, resque sacræ ad pristinae disciplinae normam per eum ordinarentur. Cum his mandatis exemplò proficisci parantem Regina biduum Londini retinuit, ut Nortumbrii damnationem, poenam-



que præsens aspiceret. Is enim à Judicibus rerum capitalium majestatis damnatus fuerat, productusque in publicum capite pœnas luere est coactus, veniâ prius filiis, nuriq̃ue ab clementi Regina impetratâ, cùm ipse ejuratâ hæresi, cui non errore mentis, sed cupidine potentiæ adhæsisse se confitebatur, ad Catholicæ religionis fidem rediisset, Catholicisq̃ue sacris sese ritè procurasset.

*De reditu ejus in urbem.*

## CAPUT XII.

**S**UPPLICIO de Nortumbrio sumpto, Regina Commendonum cum litteris, & mandatis, vt suprà ostendimus, dimisit, jussum eum fide omnia ad Pontificem perferre: nec præterea cum ullo mortalium, præterquàm cum Polo communicare. Ille cùm triduo incontinentem transmississet Bruxellis à Legato Romam dimittitur, quò per equos, qui dispositi ad celeritatem sunt, continuato die, noctûque itinere, nona, postquam à Legato discesserat die, pervenit, milliariis amplius mille propè incredibili cursu confectis. Quamquam diverterat ex itinere ad Polum, ac mandata ad eum Regina pertulerat, nunciaveratque Dandini verbis, vt profectionem suam tantisper differret, donec tranquillæ in Anglia res compositæque essent. Id Cæsarem magnopere eum rogare; nam Cæsar matrimonio Mariæ Re-

F ij

gnum Angliæ filii opibus, suisque adungere maximè cupiens, cum satis abhorrebat ab ea voluntate Anglorum animos intelligeret, intentâ curâ observabat, ne quid conatui suo impedimentum afferret. Et Polum ipsum esse in Angliâ, qui Reginæ maritum destinarent, intellexerat, ac ne ipsa quidem Regina initio eum aspernata dicebatur, quæ à Commendono quæsierat, an eum lege sacrorum, qua Polus adscriptus erat, Pontifex soluturus fuisset; erat enim Diaconus, cui ordini sæpe tributa legis venia est à Pontifice Maximo: sed postea Gallorum vim metuens, quos adversariis suis studuisse compererat, nec Anglis ipsis satis jam fidens, ad Philippum inclinavit. Ex eo Cæsar Polum ante peractas filii nuptias transire in Angliam nolebat, non tam fidei ejus diffidens, quàm timens, ne adventu ejus territi hæretici ad res novas respicerent, studiisque ad Gallum verterent, ejusque adjuti viribus sua consilia disturberent. Romæ suspensa omnia, ac profectum modò in Britanniam Commendonum auditum erat, & Pontificem ingens cura, quis exitus rerum in Insula futurus esset, intentum, sollicitumque habebat. Itaque Commendonum non certas solum, sed perfectas res, & supra spem latus afferrenti tanto gaudio accepit, ut lectis Reginæ litteris, quæque mandata ab ea, quæque gesta ad eam diem essent, totòque penitus illarum rerum statu percepto, cuncta ordine referente Commendono, tenere lacrymas nequiverit. Ac tu verò, inquit,



COMMENDONI CARD. 45

fili, non latus modò Nuncius mihi, sed vnus minister præclari operis, atque effector extitisti, plûsque nobis tua præstitit industria, quàm nos ausi votis, & optatis, nedum spe concipere simus; arcêque complexus juvenem, ac multis præterea laudibus, vt dignum erat, profecutus, Deo summas gratias egit, quòd potissimùm in Pontificatu suo amissum nobile Regnum ad officium, fidemque Catholicæ Ecclesiæ redire voluisset. Sed tantum solus gaudium cùm non caperet, impatiensque moræ vellet extemplò suam felicitatem aliis impartiri, & Commendonum iuberet comparare sese, vt omnia sequenti die Senatui, quem ob id esset vocaturus, renunciaret, non est veritus ille admonere Pontificem Reginæ voluntatis, ne ea tum offerrentur, suæque in id obligatæ fidei. Quam ego verò, inquit, si per te liceat, pari religione, ac tua iussa apud Reginam sum executus præstitero. Admiratus constantiam juvenis Pontifex, quæque effanda, quæque reticenda essent cum eo constituit, seque ipsum ea Patribus expositurum ostendit. Verùm in Senatu recitatis Reginæ litteris, reliqua ipse, vt accéperat, enarrare orsus, medium sermonem, cui non satis, credo, moderari poterat, repentè abrupit, ac vocari Commendonum, introductumque Patribus coram expromere quæ sibi pridie nunciaverat, iussit. Quemvis, vel exercitatissimum Patrum, & dicere, & audiri in eo loco assuetum tam subita res, nullo spatio ad meditandum dato, pertur-

F iij

turbasset, nedum juvenem, quem aspectus modò Pontificis, & confessus summorum virorum, & majestas illius loci conterrere, & confundere potuit, præsertim cum Latinè (peregrina nunc nobis lingua, neque enim aliter licet eo loco verba facere) edisserenda illa essent. Commendono id fere in omni vita accidit, ut initio dicendi rubore quodam ingenuo perfunderetur, timidiùsque inciperet; sed ubi velut iter ingressus orationis erat, nemo illo solutior, liberiórque incescit, nam & sententiæ illi percrebræ, & verba apta rebus suppetebant. Tum quidem, ut semper, non timide solum, ac dubitanter, sed penè tremens est orsus, quod ei in modestiæ, ac verecundiæ laudem vertit. Nam sumens inde paulatim animum, eo ordine, eâ copiâ, & prudentiâ orationis cuncta ut acta, ut sibi à Regina mandata erant, exposuit, atque de toto statu Britanniciæ disseruit, ut omnes Patres in admirationem sui verterit, atque unus eorum illud ex Evangelio dictum vsurpans: Quis putas, inquit, puer iste erit? Ejus certè diei gloriâ satis creditur aditum illi, viamque ad reliquas res, honorésque, quos deinde cepit, gessitque, maximè munivisse. Nam & Pontifex perhonorificis est eum verbis profecutus, & singuli postea Patrum accersitum ad se domum juvenem complexi, & gratulati ei sunt, & prolixè studium, atque operam suam polliciti. Ante omnes Joanni Petro Carafæ Cardinali, qui in Britannia fuerat, ejusque Insulæ magnam notitiam habebat, mi-



COMMENDONI CARD. 47

rè est ex eo conciliatus. Nec apud Patres solum, sed in vulgus quoque celebre esse inde nomen illius cœpit. Julius ex litteris Reginæ, atque oratione Commendoni tridui supplicationes indixit, solemniâque sacra instituit, quibus ipse rem divinam fecit, ejusque nuncii lætitiâ omnibus rebus celebrari imperavit. Commendonum inde, quoties mentio rei incidisset, laudibus tulit, de mensa ad eum sæpe misit, magnoque in honore, ac pretio semper habuit. Quibus ille rebus nihilo elatior, cum ei ab omnibus magna gratulatio fieret, in sua se vitæ, morumque modestia diligentius etiam, quam antea continuit.

---

*De profectione ejus in Lusitaniam.*

CAPUT XIII.

**J**OANNI Lusitaniæ Regi inter hæc Emanuel filius, quem vnicum Regni hæredem habebat, moritur. Eodémque die in afflictæ domus solatium Emanuelis conjux filium enixa est. Ad hunc igitur consolandum Regem ægrum animi ex tam acerba morte filii, gratulandumque alterius ortum, Julius Commendonum in Lusitaniam misit. Eò cum Galliam omnem ab Alpibus ad Pyrenæos, Hispaniâque item quanta in longitudinem patet, pedibus transgressus venisset, honorificè ac-

ceptus, comitèrque habitus à Rege est, cujus ipse cum morum, atque ingenii dexteritate, tum de Britannis rebus, quarum recens adhuc fama erat, curiosè multa exquirentem facundè alloquendo, magnam sibi gratiam conciliavit. Unde eum Rex etiam legere in militum, qui Christi appellantur, societatem voluit, in quam Principes gentis pro magno dignitatis ornamento oprari à Regibus solebant. Quod cum ipse alienum vitæ suæ institutis ferens recusasset, Joannes rubram ei crucem singulare societatis ejus insigne tradidit, potestatemque ei fecit, quem vellet, eo militiæ honore decorandi, dum ingenuis ortus parentibus, majoribusque esset, idque Legato suo Romæ solenni ritu probaretur: quem ipse honorem in nobilissimum juvenem amicum suum postea contulit. Discedens à Rege ad visendum inclytum religione templum Divi Jacobi in Galitiam proficiscitur, prosequente eum Joanne omnibus humanitatis, & benevolentiae officiis. Nec aliâ re libentius Lusitanicam illam profectionem, munusque susceperat Commendonus, quàm quòd ei occasio videndi tot exterarum provincias futura esset, Galliam enim, Hispaniamque diversis iens, rediensque itineribus perlustravit. Et fuit sanè videndi, cognoscendique res externas singulari studio. Nam & situs regionum, & opportunitates earum, quæ maria, quæ portus, quæ flumina, quibus quæque rebus abundaret, egeretque, qui hominum mores, quæ studia, quæ regendæ publicæ rei



rei ratio, diligenter admodum inquirebat, eaque adeo tenaci memoriâ complectebatur omnia, ut barbara quoque nomina hominum, locorumque retineret. Quæ res ei, cum propè omnem inde Europam studio eodem, ac diligentia peragrasset, magno vsui, atque laudi postea fuit. Ex Lusitania Romam cum rediisset, Julius octavum & sexagesimum agens annum, postremum vitæ diem obiit, vir ingenuæ, ac liberalis naturæ, planèque probus, & innoxius, ac ne litterarum quidem, & industriæ expers, sed negligens rerum, & in Pontificatu adeo curas omnes, laboresque refugiens, ut abditus hortis, quos immensi sumptu ædificabat, hilaritatibusque intentus suis, ne Senenses quidem, quos Cosmi Florentinorum Ducis, atque Hispanorum arma premebant, ad se urbem, agrum, suæque omnia in Romani Pontificis ditionem dedenda venientes audierit, quamquam & Galli, quorum ope illi defendebantur, huic ditioni annuerent, neque adversarentur Hispani. His temporibus ætatem degerat Julius, quibus gravitas, modestia, pudor pro tristitia, atque inertia ducebantur, cunctaque voluptas, & lætitia, & effusus in omnem jucunditatem animus habebat, nec aliàs Ecclesiastica disciplina solutior fuit. Beneficia & sacerdotia haud aliud, quàm alimentum luxuriæ haberi. Eorum plura, & quæ per leges non liceret capi: ut quidam tres Episcopatus vno tempore gesserint: passimque ea gratiæ, non meritis dari. Amictus sacerdotalis ad honorem,

& dignitatem institutus, omnibus sordere, sagulum, quàm toga magis placere. Neque liberiùs vivere, ac se prorsus hilaritati dedere. Denique conviviis, ludis, spectaculis indulgere, cum mulieribus discumbere, cum iisdem vnà vectari per urbem turpe, ne gravibus quidem, & honoratis viris habebatur: adeò licentia, & consuetudo mores, judiciâque corruerat. Hæc Julius eodem depravatus usu, & fecerat juvenis, & fieri se Pontifice facilè est passus, virtutis cultor magis, quàm vindex vitiorum. Sed Commendono sponte honestis, & priscis moribus insistenti tot inquinata corruptelis tempora in gloriam cessere, cuius etiam fructum secuta mox severior ætas attulit.

---

*De Marcelli, & Pauli Pontificum Maximorum studio erga eum.*

CAPUT XIV.

**M**ARCELLUS Cervinus, qui secundus est appellatus, in Julii locum Pontifex creatur. Cujus tanta virtutis opinio fuit, tanta spes restituendi per eum antiquam disciplinam, pristinumque cultum, ac splendorem religionis, & Christianæ Reipublicæ, ut præclarè actum cum illo videri possit, quòd intra vigesimum diem ostentatus terris, ereptusque fuerit. Neque enim erat mediocris sapientiæ, motæ de se tantæ expe-



COMMENDONI CARD. 51

stationi respondere. Et is quibus diebus Pontifex est renunciatus Commendonum ultro accitum inter familiares receperat. Et Joannes Petrus Carafa qui ei successit, cui Paulo IV. nomen est inditum, statim Pontificiis epistolis scribendis designavit. Cui muneri vnà cum illo Paulus insignes dignitate, & eruditione viros, partitis inter eos provinciis præposuit. Joannem Casam Archiepiscopum Beneventanum, Annibalem Borzutum Archiepiscopum Avenionensem, Antonium Ælium Episcopum Polensem, Angelum Massarellum item Episcopum, & Sylvestrum Aldobrandinum Jurisconsultum, ad quem postea ob excellentem industriam, atque fidem, aliorum senescente gratiâ, rerum propè omnium summa delata est. Paulus non solum dignitate princeps amplissimi ordinis, sed sacrarum rerum doctrinâ, eloquentiâ, magnitudine animi, innocentiam morum, & totius vitæ sanctitate; & ad hæc ætatis quoque honore longè inter omnes Patres eminebat. Itaque ei Commendonus in Cardinalatu præcipuam observantiam, cultumque tribuerat. Et ipse senex adeò juvenis ingenio est delectatus, ut multas sæpe horas cum eo, legendo, differendoque nunc de privatis, nunc de publicis rebus perfamiliariter, jucundèque consumeret, eumque haud ferme alio, quàm filii nomine appelleret. Pontificalibus comitiis prælato Marcello, cui ipse quoque Paulus, etsi quinque & viginti annos natu minori suffragatus erat, omnes de il-

G ij

lo spes omnibus deciderant, concurrentibusque ad Marcellum cunctis, desertum, destitutumque ab omnibus, quibus antea coli, frequentarique solebat, Commendonum tum maxime assiduus cum illo, majori, quam antea studio affectari, deducere, observare, & ad omnia præstare esse. Itaque ergo creatus Pontifex Commendonum ob modestiam adire ad eum differentem, ultro requisivit, habitationem in Palatio, sumptumque largè præberi jussit, Carolo, & Joanni fratris filiis commendavit verbis, & pluribus, & amantissimis, ac filium ipsum, quoties mandaturus ei aliquid esset, appellare perseveravit. Arcanis & rebus, & sermonibus inter intimos ministrorum admittens. Nullius denique operâ libentiùs uti, ac ne consuetudine quidem, ac domestica collo- cutione cujusquam æquè delectari est visus. Pri- mis inde Pontificatus diebus, ignarum, non so- lum non petentem, Zacynthiorum Episcopum designavit, Venetorum Legato coram honorifi- câ oratione prosecutus. Abnuentem, seque im- parem ferentem Pontifex osculatus admonuit honores pari pudore recusaret, ac peteret; quæ enim ei nullo ipsius ambitu, aut studio, sed ul- tro deferrentur ab eo, cui vis divinæ potestatis inesset, perinde accipienda, ac si manifesto Dei ipsius instinctu obvenirent. Cum Episcopatu Be- neficium ei in Veronensi agro dedit, cujus an- num vectigal erat quingentorum aureorum numum.



*De novo ejus itinere in Belgas.*

## CAPUT XV.

**E**X his rebus non dubia opinio incefferat homines, juvenem nullis, aut pecuniæ, aut voluptatum illecebris corruptum, & inquinatissimo sæculo ultro se majorum disciplinæ subjicientem, ætate, viribus, animo vigentem, & ab his artibus acceptum Pontifici ad Cardinalatum vsque proferri. Quam ille opinionem occulere per modestiam, atque adeò obruere eam conabatur. Contrà quàm plerique faciunt, sanè ineptè, qui famâ, ac prædicatione sui haud minùs quàm ipsâ re efferuntur, monstrarique, ac celebrari spes suas gaudent, ac levi auditioni ipsi de se ante omnes credunt, ut quidam prædices, & maximè ambitiosus, cum suum nomen inter eos ferri, quos sermo vulgi proximis Comitibus Cardinales destinabat, accepisset, ipsum dicitur appellasse Pontificem, magnum memorans totâ vrbe rumorem esse de constituta ejus voluntate cooprandi se in Cardinalium numerum, ac sibi id multos affirmasse. Cui subridens Pontifex, At isti, inquit, falsa narrant, nec tu iis ullam fidem habueris. Longè ab hac vanitate aberat Commendonus, nec tamen vitare invidiam potuit, quæ eò acrior erupit, quo minùs loci ad obtrectandum inveniebat. Verùm ut artificiosa, & callida malicia est,

G iij

quem crimine non possunt, laudibus eum suis oppugnare aggrediuntur, extollere ingenium, vim animi, corporisque, & in gerendis rebus studium, & industriam, & per speciem honoris amandandum, habendumque procul à Pontificis oculis curant, ita rati opportuniorem fraudi fore. Ad procurandam igitur Rempubicam apud Carolum V. Cæsarem, revocato inde Archiepiscopo Confanorum, qui ei muneri à Julio præpositus fuerat, destinatur. Sed quia eo tempore suspensum induciis bellum inter Cæsarem, & Gallos erat, Pontifex è Cardinalium Collegio Legatum ad Cæsarem creavit Scipionem Rebibam, cumque in Belgas proficisci, Cæsaremque cohortari ad pacem ex induciis firmandam, jussit; misso eadem de re Carolo Carafa Cardinale ad Henricum Galliarum Regem. Commendonus iter cum Rebiba suscepit. Jam è Mediolano per Helvetiorum fines in Belgas egressi erant, cum Mastricum ad Mosam flumen, oppidum ditionis Caroli intrantem Legatum festinus tabellarius ab Urbe missus assequitur, eique à Joanne Carafa Pontificis fratris filio litteras reddidit, quibus jura fœderum à Cæsarianis violata, insidias Pontificis vitæ factas, bellumque exortum nunciabatur, ipseque, & Commendonus jubebantur, omisso itinere, quod instituerant, redire Romam, & incolumitati suæ, si possent, consulere; caveréque diligenter, ne in potestatem adversariorum venirent. Legatus eo nuncio vehementer perturbatus, quòd in me-



dia Germania, atque in Cæsaris ipsius Regno de-  
 prehensus, quò, aut quà elabi posset, ignorabat,  
 tradere se hosti, & quemcumque fors cogeret  
 casum subire parabat. Sed Commendonus vbi  
 ea accepit, confusum novitate tam subitæ rei Le-  
 gati animum confirmat, docet quanti ad omnia  
 intersit non intercipi eos, & publicas litteras, &  
 publicarum rerum ministros in hostium venire  
 potestatem, vt carcer, & reliqua captivitatis ma-  
 la negligantur. Possè si consilium, celeritâsque  
 adhibeatur, antequam adventus ejus vulgaretur,  
 aut nunciaretur Cæsari, aliquò inde evadi. Sibi  
 videri, vt Cardinalis cultus, insigniâque Legati  
 deponerentur, & mutatis vestibus, relictôque  
 omni comitatu, cum paucis, atque expeditis ex-  
 templò se in Galliam proriperent. Hac approba-  
 tâ sententiâ Rebiba regionum nescius, & consi-  
 lii inops regendum se Commendono permittit.  
 Deposito igitur sacerdotali ornatu, & familia-  
 rium sagis, palliisq; assumptis, cum paucis op-  
 pido egrediuntur, dato mandato his, qui relin-  
 quebantur, vt si quis de Legato quæsisset, ad-  
 ventare eum, & mox adfuturum responderetur.  
 Commendonus ex consuetudine sua omnia per-  
 cunctandi, & nota loca, nominâque locorum,  
 & qui circa fines, quæ proxima Gallorum oppi-  
 da, præfidiâque antè inquirendo compererat. Ne-  
 mo enim eo percunctator curiosior fuit, minutis  
 teneri, quàm quid præterire quod scitu dignum  
 esset malebat. Ad ea ducibus agrestibus homi-

nibus, quos subinde parvâ mercede comparabant, per devia itinera incolumes prius pervenire, quàm de fuga eorum resciri ab adversariis potuerit; qua quidem in fuga longè maximum discrimen Commendonus ipse adivit, cùm in densissimis Arduennæ saltibus, prægressis reliquis solus ab via aberrasset, totam enim noctem per tenebras vagatus, ægrè postèrà luce ad socios, de salute ejus vehementer sollicitos, se recepit, atque per Eburonum, seu Leodiensium fines in Galliam, atque Lugdunum transgressi, inde cum Carolo Carafa ab Henrico redeunte, classe Gallicâ Romam omnes trajecere.

*Ad Venetos, & alios Italia principes  
mittitur.*

#### CAPUT XVI.

**I**NTEREA Romæ Marco Antonio Columnæ Ascanii filio, quòd occultos domi suæ cœtus adversus Pontificem habuisset, dies est dicta, cùmque citatus non adesset, majestatis damnatus oppida, quæ intra Romanæ Ecclesiæ fines obtinebat, amisit. Hinc exortum inter Pontificem, & Cæsarem bellum, cùm Cæsar non opprimi Columnam suarum rerum interesse diceret, Paulus impediri se in suo jure iniquissimum censeret. Commendonus igitur reversus Romam initio hujusce



jusse belli, statim vix tridui quiete concessa, ad Principes beneficiarios Romanæ Ecclesiæ continendos in officio, ne quis auctoritate, & pollicitationibus Cæsaris abductus de fide decederet, est missus. Quorum Hercules Ferrariensium Dux, etiam in societatem armorum venit, infestumque bellum in circumpadanis locis Cæsarianis fecit. Sed cum maximè omnium cuperet Pontifex Venetos sibi propter civitatis ejus opes, ac dignitatem adjungere, tantum Commendoni industriæ, atque fidei tribuit, ut eum potissimum Venetias mittendum censuerit. Quod quidem Veneto civi ante ipsum contigit nemini, præterquam vni Petro Bembo, viro ætatis ejus famæ eruditionis præstantissimo: quem Leo Pontifex ab simili causa Venetias ad Senatum misit. Eaque res Commendono haud mediocri apud cives suos gloriæ fuit, cum tantis de rebus vni commissum munus, vnus Principis latus tegens, cæteris omnibus infra se positis conspiceretur. Quin etiam accidit, ut illis fortè diebus Antonius Trivultius Tolonensis Episcopus, vir apud Insubres claræ nobilitatis, qui tum pari Nuncii munere Venetiisungebatur, in Cardinalium Collegium à Paulo sit lectus: cujus honoris ornamenta ab Urbe ad eum missa, Commendonus illi ex auctoritate Pontificis tradidit solemnibus in sacris, quibus Princeps, Senatusque celebrandæ rei causâ intererant, Antoniusque ad genua accidentis capiti purpurei galeri insigne imposuit; quod cum

H

faceret, succlamatum à quibusdam est; Antoni hanc postmodum reddere operam Commendono memento. Ea enim ejus erat virtutis fama, ut passim summos illi honores homines augurarentur. Cæterùm Commendonus vsque fere ad exitum belli in ea civitate est retentus, vbi sæpe apud Venetos de iniquitate adversariorum, de injuriis, de insidiis Pontifici Maximo factis, de periculo in quo Romana res versaretur, ac de Hispanorum cupiditate Italiæ Regnum affectantium, gradùmque sibi ex subactò Romano Pontifice, populisque ejus imperio parentibus ad reliqua, & ad ipsos Venetos struentium, copiosis, crebrisque orationibus disseruit. Et quamquam Venetorum civitas pacis, & otii studiis dedita armorum motus reformidet, Senatúsque exactæ senectutis Pontifici haud fidens, temerè in bellum adversus præpotentem Regem non esse sibi descendendum statueret, tamen ne cadere quidem rem Romanam, & crescere supra modum Hispanorum in Italia opes, non ad se magnopere pertinere existimabat. Commovebatúrque Commendoni oratione, affirmantis, nisi Veneti opem tulissent, suaque pro Italiæ salute, & pro Antistite sacrorum, & principe Christianæ Reipublicæ justa, & pia arma adversus gentis externæ, & nequaquam vanâ spe omnium libertati imminentis vim opposuissent, oppressum in tanta, tam repentini, nec opinati belli mole Pontificem Maximum, cui si victo jugum ab superbo hoste injectum fuisset,



id verò non turpe solùm, ac deforme Venetis, qui confugientem ad eorum societatem Pontificem aspernati dicerentur: quod à pietate, & sapientia Senatus alienum esset, sed periculosum quoque, atque adeò exitio proximum fore. Hæc Commendonus cùm apud Patres, tum apud amicos, & propinquos suos graviter, accuratèque discessens, civitatem in magnam curam, metùmque conjecerat, ne Hispani, gens imperii avida, imparatum aggressa Pontificem subigerent, atque nullo inde pudore reliquarum civitatum libertati vim afferrent. His anxii, cùm neque tutum civitati suæ esse videretur pati in tantum jam propagari Hispanorum in Italia opes, ut omnium rerum vis, ac potestas ad eos perveniret, neque tamen temerè se dubio implicare bello vellent, in præsentia medium sequi consilium placuit. Reconciliatores pacis se ferentes Franciscum Frumentum scribam Reipublicæ cum litteris, & mandatis ad Albæ Ducem, qui pro Cæsare Italicis rebus cum imperio præerat, mittunt. Orant, ut vi, atque armis abstinat, neque sacrosanctum Pontificem, quod invidiosum Hispanorum nomini, & à Cæsaris, Regisque filii pietate abhorrens esset, oppugnatum eat: posse de quibus dissiderent utilius, salubriusque per communes amicos componi. In eandem sententiam litteras in Hispaniam ad Regem dedere. Videbantur & ad minas, denunciationesque belli, si preces non valuissent, impelli posse, tantus metus incefferat civitatem,

H ij

ne Pontifex inermis, & impar opprimeretur, pro-  
tinúsque inde ipsi à victoribus peterentur. Sed  
Carolus Carafa Cardinalis, vbi descendere ab  
Alpibus Gallorum copias accepit, spe victoriæ per-  
inde ac ipsâ victoriâ inflatus, ac tumens, Vene-  
tias ipse excurrerat, Senatúmque vrgendo ad ca-  
pessenda simul arma, atque infestæ gentis spiri-  
tus infringendos, persequendósque communes  
hostes, & Italiâ pellendos hortabatur. Ingentem  
vim equitum, peditúmque invictæ juventutis è  
Gallia adventare, & transgressas Alpes esse, Pon-  
tificem ad ultionem sui inflammatum enixè in-  
struere bellum, justúmque exercitum habiturum.  
Accedere Ferrariensium Ducem opportunum dis-  
tinendo circa Pádum hosti; victoriam esse in  
manibus, magnáque victoriæ præmia: Venirent  
ipsi in partem, & augendi imperii occasionem  
elabi sibi ne paterentur. Hæc Carafa elatè, ac  
magnificè jaçtabat: Cæterum Senatum, quem  
metus ex periculo Pontificis ad curam rerum sua-  
rum converterat, tantæ ostentatæ vires securum  
sui magis, quàm alieni sollicitum reddiderunt.  
Itaque accepto, cultóque omnibus honoribus Ca-  
rolo, & speciosis responsis sine vlllo effectû dimis-  
so, ipsi quietem egerunt.





*Quomodo è Pauli gratia decidit.*

## CAPUT XVII.

**C**ARAFa quamquam sensit hac jactatione virium laxatum ab se eum metum in Venetorum animis esse, quem Commendonus studiosè intenderat, & quo vno trahi Senatus in causam posse videbatur, tamen errati sui invidiam in Commendonum ipsum vertit, quem occultè oderat dissimilitudine morum. Nam Commendonus arctiori amicitia ejus, vel ultro officiis invitatus abstinuit semper, horrens ingenium hominis mente malâ imbutum, ac perditum flagitiorum consuetudine. Unde obsequii jus obtrudere apud eum, quàm gratiæ, & familiaritatis satius duxit. Ergo vitare arcanos aditus, temporaque, & publicarum rerum ministerium, non maiorum conscientiam appetere. Si quando imprudens indecoris supervenisset, abire statim, tamquam per reverentiam, adversus eum. Venetiis solemnes post dapes, quibus Carafam Senatorum vnus acceperat, nobilium matronarum cœtum, saltationemque celebraturum, moris civitatis, quàm personæ suæ magis memorem, vnâ ingrediente, & in assentationem ejus hilarè, ac jucundè agente, togatâ comitum turbâ, solus Commendonus reliquit, fictâ sibi discedendi causâ, veniâque impetratâ ab libente, sed occultè ira-

H iij

sciente, quòd exprobrari sibi quos ille respueret mores, rebatur. Haud ignotum id Commendonno, cujus & audita vox inter suos scientem se, ac prudentem labi: sed honesti, decorique amor in juvenis animo ambitione validior erat. Offendebatur quoque Carafa, quòd cùm ipse numquam de Hispanis, Regéque eorum mentionem sine infectatione, & contumelia faceret, furoríque ejus assentantes plerique assiduè probra ingererent, moderatiùs Commendonus ageret, & quamquam apud Senatù pro Pontificis causá acriter, tamen cum privatis nomen Cæsaris, Philippique modestè, nec sine honore vsurparet; sedare, quam intendere odia vtilius ad omnia ratus. Carafa igitur Romam reversus frigidè rem actam à Commendonno dicere, Hispanorum respectu, quibus occultè studeret. Nec apud Paulum cupidine vindictæ flagrantem atrocius vllum crimen. Itaque rediens Romam Commendonus ad pedis osculum admissus, brevi sermone, nec pro pristino amore comiter, atque amanter excipitur à Pontifice. Sensit ille ictum se Carafæ malevolentia, quam sponte motam multi spei ejus invidentes aluerant, atque incitarant. Sed & fore ita providerat, nec remedia quæsit. Non ipse locum, tempúsque aptum alloquendi Pontificem, non per alium purgare se tentavit, tacitus, pacatúsque injuriam tulit. Mansit tamen sua illi integra dignitas, neque re, neque dicto minùs liberali est violatus. Non ædes in Palatio ademptæ, non vi-



ctus præberi defitus, ne aditu quidem, atque amicitia prohibitus, nisi quod ipse ultro se rebus subduxit, idque Carafa satis habuit, virum infontem, & secundissimæ famæ, vltra infectari, aut non ausus, aut non visum. At reliqui ferme omnes, quicumque initio publicis negociis, consiliisque à Paulo admoti fuerant, gravius perculsi, Palatio alii ejeti, alii carceribus inclusi, in exilium alii pulsi, in quibus & ii fuere, qui maximè Commendono obrectaverant. Nam Carafa, ut solus omnium rerum potiretur, neminem vlllo amicitia, aut gratia jure pollere apud Pontificem patiebatur, nisi qui ab ipso provecti ejus beneficium agnoscerent. Ita alium alia de causa omnes amovit, in locoque eorum clientes suos suffecit, homines, quibus nulla Reipublicæ, aut honesti cura, ipsaque in illum fide, non religione, sed utilitate, ac spe improbâ crescendi ex publicis malis stabat. Vacuus igitur Commendonus publicis muneribus, insperatumque eo tempore nactus otium, avidè studia sua repetiit, opusque antè inchoatum à se de jure Romani Imperii ad Germanos translati, de Pontificum Maximorum potestate, ac de publicorum Conciliorum vi pertexte, atque absolvere est adorsus. Ob id assiduos in Vaticana Bibliotheca vetustos, ac situ, & pulvere obsitos libros excutere, evolvere, totam scrutari, atque eruere antiquitatem, multa librarium, multa etiam suâ manu exscribens. Per hæc ipsum fermè annum utilibus, atque honestis stu-

diis cùm transegisset, postremò bona cum Pontificis venia anno insequenti M. D. LIX. ab Urbe Venetias discessit, inde Zacynthum, ac Caphaleniam, quarum Insularum Episcopus erat, transmissurus. Verùm dum ibi tempestatem ad navigandum idoneam opperitur ad xv. Kal. Septembris Paulus IV. decessit, tertium quidem & octuagesimum agens annum, sed irâ, ac mœrore magis, quàm senio confectus, quòd scelerum Carafæ, fratrùmque, vt diu nescius, ita serus ultor extitisset.

---

*De Carafa, fratribusque Urbe pulsis.*

CAPUT XVIII.

CARAFÆ Cardinali duo fratres erant, natus major Joannes Dux Paliani, minor Antonius Marchio Montibelli, vterque titulum per alterius injuriam adeptus. Diversi vitiis, sed omnes arrogantia, & sôcordia pariter odiosi, invisique. Caterùm discordes inter se, obsidendis patrii auribus, ne quid quod ipsorum scelera proderet, permanere ad eum posset, fraterna concordia, & fides ex mutuo metu. Uni Paulo fictæ probitatis, & innocentia speciem præferebant; apud alios certabant flagitiis. Ac falsus simulatione Paulus iis se abutendum permiserat, intentus ipse jubendis novis legibus, quæ projectam homi-



hominum licentiam frenaret; & domesticæ turpitudinis nescius aliorum ordinabat mores. Unde pari odio & virtutes ejus, & vitia suorum habebantur. Quæ cum omnem excessissent modum, extitit, qui miseretur Pontificis, alioquin egregii, & publicæ rei percupidi; & in quo, præter alperius adversus repugnantes ingenium, vehementioremque naturam, nihil quod magnopere reprehendi posset, invenires, quando ille in tantam invidiam, atque offensionem hominum nullo suo merito adductus videretur. Is quicumque fuerit (nam & in occulto mansit, nec sciri ad rem magnopere pertinet) dicitur veniam impetratâ, quod non hæc antea detulisset, vitam, mores, facinora trium fratrum, ac dedecora domus omnia aperuisse, addito, quantum inde ad bonos offensionis, quantum ad ipsum invidiæ, atque adversæ famæ redundaret. Attonitus ea audit Pontifex, & ubi haud vana referre viso fides auctori fuit, ingenti dolore, atque impetu exarsit, cum quid potissimum in eos statueret pudore simul, iraque confuso non satis succurreret, in præsentia misit, qui omnes, quicumque se aliquâ propinquitate contingeret, aditu, & conspectu suo prohiberet, & Senatum in sequentem diem, quia tum nox suberat, vocari iussit. Cum ventum in Senatum est, gravi oratione prius de Patrum fide est conquestus, à quibus admonitum se oportuit eorum, quæ contra publicam rem, famamque, & existimationem suam fieri animadverterent.

Quamquam ignoscere se alienis dixit, quando à suis tam sceleratè deceptus, ac proditus fuerit. Trucibus inde verbis in eos inuectus, Carafam Cardinalem legatione Bononiæ, atque omni publicâ administratione removit: Joanni militarem ducatum, atque imperium, quod ei totâ Romanæ Ecclesiæ ditione erat, item Præfecturam clausis ademit: Antonium suâ Burgi, & Palatii custodiâ privavit, atque ipsos, & præterea reliquos gentiles, atque affines suos, præter Alphonsum Cardinalem Antonii filium spectatæ modestiæ juvenem, ante noctem excedere vrbe, & assignata cujusque exilio in oppida abire imperavit; malum minatus, si quis aliquem eorum vllâ re juvisset. Professusque graviora meritos, adiecit vlciscendi sui, ac dignas pœnas à fontibus repetendi palmam successori relinquere. Cùm multa in hanc sententiam atrociam plenus iræ, vultu, voce, oculis terribilis intonuisset, (& inerat ei dicendi summa vis, summâque facultas, & gravitas, & trux cùm ira efferbuisse, oculorum obtutus) adeò exterruit Senatum, vt magis nutu, vultuque miriora Patres precari viderentur, quàm quicquam aggredi sermone auderet. Et Ranutium Farnesium Cardinalem clementi ingenio, liberalique naturâ, ac præstanti facundiâ juvenem, vnum lenire iram, tegere reos, deprecari tam subitam damnationem, audiendisque, & copiam adeundi patrum aures, diluendisque quæ objicerentur, aut clementiam implorandi fratris filiis



non negandam differere orsum responso adeò sa-  
 vo pertulit, ut diceret, Si Paulus III. avus tuus, „  
 Ranuti, eâdem severitate Petri Loyfii filii sui fa- „  
 cinora, morésque coërcuisset, non illum fœdum „  
 in modum trucidatum, laceratúmque Placenti. „  
 ni è fenestris in viam publicam projecissent. Tum „  
 verò ne hiscere quidem audente ullo exilium Ca-  
 rafa, cæterisque indicitur, denunciaturque, nul-  
 lam veniæ spem, nisi fortè in obsequio esse. Tum  
 dilabentibus qui assiduè affectari, deducere, obser-  
 vare consueverant, qui fere fortunæ auram, non  
 amicitia jura sequuntur, Commendonus, ( non-  
 dum enim Româ discesserat ) quamquam Flo-  
 rentium domo pridem abstinerat, tum labefa-  
 ctos, pressósque omnibus officiis percoluit, ma-  
 ximè Cardinalem, à quo etiam decorum nava-  
 tæ fidei testimonium tulit: cùm enim eum Vi-  
 tellius Cardinalis Palatio exeuntem solaretur, &  
 ut fit, bonam habere spem juberet, Carafa ver-  
 sus ad Commendonum, qui ponè sequebatur,  
 dextrâque in humerum ejus injectâ: Quid, in- „  
 quit, Vitelli, non æquo animo adversa nostra fe- „  
 ramus, quando sic tulit? Quem si nos audisse- „  
 mus, numquam hoc scopulo impacti tantam con- „  
 tumeliam subire nunc necesse haberemus. Ita „  
 Carafa Marinum exulatum abiit, cæteri item „  
 quò quisque jussus erat. Pontifex ad hæc eorum  
 acta permulta rescidit, quos ipsi publicis munc-  
 ribus præposuerant, statim ejecit, tributa, one-  
 ráque se incio ab iis imposita populis sustulit.

Nec tamen grata hæc in vulgus erant , quia non tam ex beneficentia in alios , quàm ira in suos profecta interpretabantur. Et quamquam illos amotos rebus , punitosque gaudebant , tamen quisque quid sibi timendum esset , quando proximis tam implacabilis fuisset , reputabant. Quantum verò terroris ea severitas in omnes effuderit , id argumentum sit , quòd cum fortè ignara rei in Urbem venisset , eo ipso tempore Poliniani Marchionis vxor , Pontificis ipsius sororis filia , inventus nemo sit , qui eam domo reciperet , quæ ut venerat frequenti comitatu , imbre maximo , totam emensa urbem , ab singulis Principibus , cum quibus aliquod hospitii jus haberet , exclusa , ad publica diversoria descendit , sed ne ab iis quidem admissa , timentibus cunctis , ne quid contra voluntatem Pontificis facerent , post diuturnum ludibrium remota in Urbis parte ab caupone omnium ignaro , humili , ac sordido tecto madida , deformisque recipitur. Inde insequenti die primâ luce Neapolim abiit. Et Carafa Cardinalis cum ab ægritudine animi morbo quoque corporis graviter decumberet , medicosque accitum Romam misisset , nec ire ad eum , nec ea de re Pontificem appellare quisquam est ausus. Non omittam hoc loco exitum horum fratrum , qui documentum mortalibus esse possunt , quàm incertis casibus humanæ res versentur , & quàm instabili gradu illi nitantur , qui fixam terræ mentem cœlo numquam erigunt. Hi satis amplâ do-



mi fortunâ orti, eâ mox per ruinam partium, quas secuti fuerant, dejecti, diu exules, atque egentes fuerunt, & Carolus vitam mercede militiæ sustentavit. Ad eam inde potentiam pervenerant, ut potiundi Neapolitani Regni spem animo concipere, atque aggredi potuerint, rerumque arbitri quatuor Romæ annos fuerint; tandem à patruo indelebili ignominia notâ Urbe expulsi, quandiu ille supervixit, exularunt. Postremò à Pio IV. qui post Paulum Pontificatum gessit, Carolus, & Joannes capti, damnatique, ac publici carnificis manu necati sunt.

*FINIS LIBRI PRIMI,*





ANTONII MARIAE  
GRATIANI  
DE VITA  
JOANNIS FRANCISCI  
COMMENDONI  
CARDINALIS  
LIBER II.

*Ad Casarem, & Germania Principes de  
Concilio mittitur.*

CAPUT PRIMUM.



MORTUO, ut tradidimus, Paulo,  
Commendonus omisso consilio  
in Graciam navigandi Romam  
est reversus, eo animo, ut suc-  
cessorem sibi in Episcopatu à no-  
vo Pontifice postularet. Retinue-  
rant enim eum in Italia sui, nec passi trajicere



Zacynthus fuerant. Quid enim longinqua, atque inopi in insula inter paucos, & sordidos Græculos incultam, desertamque ab amicis vitam ageret, ut maris, & navigationis incommoda non extimesceret? Ipse si non eundem sibi, ne habendum quidem Episcopatum statuit. Romæ post quartum demum interregni mensem renunciatur Pontifex Joannes Angelus Medices Mediolanensis, qui Pii IV. nomen accepit. Ab eo facile impetratum, ut alius Episcopus Zacynthiensibus præficeretur, arbitriumque deligendi Commendono ipsi permissum, quem etiam honorificâ oratione Pius est prosecutus, virum talem Romæ ad usus Reipublicæ retinendum ferens. Mansit igitur Romæ Commendonus imperio Pontificis non integrum annum. Quo tempore traditis in custodiam Carafâ Cardinali, & fratre ejus Palliani Duce, cum amici quoque eorum, & qui sub Paulo aliquam partem Reipublicæ administrarent, & maximè belli consiliorum participes fuerant, passim alii in vincula conjicerentur, alii fugâ sibi consulerent, ne aut diluere sua, aut aliena prodere crimina cogerentur, Commendono tanta fides innocentiae, atque integritatis fuit, ut neque ipse in ullius culpæ suspicionem Pontifici, aut Judicibus veniret, neque necessitas ei vlla imposita sit testimonio suo cujusquam periculum onerandi. Interea Pius cum multas Christianæ Reipublicæ partes pravis religionibus turbatas, & præter cæteras Germaniam à Chri-

stianis sacris palam descivisse, & gliscere in dies malum, remediúmque posci maximè à Pontifice animadverteret, animo sanè ingenti publicum omnium Episcoporum Concilium habere instituit: invitatus maximè opportunitate pacis paulò antè inter Gallos, & Hispanos compositæ. Ita edictis promulgatis, missisque per provincias Concilium Tridentum convocavit. Quam urbem Paulus, & Julius Tertii Pontifices Maximi antè delegerant, ut quia Germanorum causâ ea suscepta res esset, eorum quoque commoditati in primis consuli videretur. Est enim intra fines Germanorum in Rhetiis Alpibus sita. Cùm ad ipsos mittere Germaniæ Principes, in quibus aliquot erant magnæ dignitatis, atque potentiæ Reguli, aliquem statuisset, qui eos aut exciret ad Concilium, aut quid spei ostenderetur sanandi mentes tot hæresum labe depravatas exploraret, deligendúque ad id munus vir cùm fide, atque industriâ spectatus, tum doctrinâ, atque eloquentiâ promptus videretur, multi, ut fit, suam ad id operam profiteri, magnisque studiis per potentes, & gratiosos homines apud Pontificem contendere instituerunt. Sed non iudicio solùm, & sermone hominum vni Commendono ea provincia destinabatur, illum parem tali negotio ferentium, qui præter litterarum, & ingenii laudes innocentiam viræ, & gravitate morum antecelleret. Sed Pontifex ipse sepositum sibi in hanc ipsam Legationem eum pro aliis petentibus respondit. Vocato igitur



tur ad se, cùm ei suam sententiam aperuisset, litteris, mandatisque instructum dimisit: jussum ante omnes Ferdinandum Cæsarem adire, perlatâque ad eum Pontificis voluntate, ejus ad reliqua consilio maximè vti. Commendonus præmissâ suorum parte, jussisque per Carnos in Regiam Cæsaris pergere, ipse cum paucis dispositos, per equos Tridentum, atque inde Viennam contendit: quò circiter Kal. Januarii anno M. D. LXI. venit. Erant apud Cæsarem Pontificis Nuncios duo, Stanislaus Hosius Episcopus Varmiensis, Polonus, & Zacarias Delphinus Episcopus Pharensis, Venetus, paulò antè de Ungaricis rebus ad Ferdinandum missus. Atque is proficisci ad civitates, Regulosque, qui Rhenum accolunt, eosque ad Concilium invitare est jussus, dum Commendonus trans Visurgim, Albimque interiora Germaniæ peragratur. Cum his communicatis rebus vnâ ad Cæsarem posterâ die deducuntur, à quo Commendonus comiter, benignèque acceptus, litteras ei Pontificis manu scriptas reddidit, easque oratione subsecutus, quæ sibi mandata erant, aptè, & copiosè expoluit. Summa fuit, Pontificem Maximum occurrendum tot hæresibus, magna in dies incrementa capientibus ratum, postquàm & Dei, & cælestium opem, veniâque implorasset, & Regum cæterorum, & ipsius in primis Cæsaris sententias perrogasset, Christianæ Reipublicæ Concilium de integro cogere Tridentum decrevisse, vt discussis, quibus

» Christiana res in sectas , ac dissidia abit , errori-  
» bus , antiquus decor , speciésque , & pax Catholi-  
» cæ Ecclesiæ redderetur , aut si qui adamatas se-  
» mel opiniones pertinaciùs amplecti voluissent ,  
» illi à cæteris manifestâ animi labe distingueren-  
» tur. Quamquam autem omnes vniversè per edi-  
» ctum evocarit , tamen dedisse hoc Pontificem  
» dignitari Germaniæ , suoque in gentem illam  
» summo , ac singulari animo , vt duos Episcopos ,  
» se , & Pharensen obire omne Germanicum no-  
» men , & singulos Principes , liberásque civitates  
» ad id Concilium celebrandum , ac de communi-  
» bus rebus in medium consulendum adhortari ius-  
» serit. Quod quo promptiùs , ac sine vllò metu à  
» cunctis fiat , velle , juberéque Pontificem omni-  
» bus turò veniendi publica sub fide potestatem ef-  
» fe , júsque liberè , atque audacter apud Patres dis-  
» ferendi , qua quisque de re seu conqueri , seu di-  
» scepere , seu rogare Patres voluerit. Petere ergo  
» à Cæsare , vt qui reliquos Reges dignitate præ-  
» stet , exemplo quoque anteeat , & Tridentum pri-  
» mo quoque tempore Legatos suos mittat , qui non  
» peragendis modò , sed inchoandis quoque rebus  
» adsint , salutarémque hunc Pontificis conatum  
» opibus , auctoritate , consilio juvet. Cæsar collau-  
» dato Pontificis pio instituto , seque in auctorita-  
» te ejus futurum semper , neque passurum vllâ re  
» desiderari ab se officium suum pollicitus , mo-  
» nuit Nuncios Germaniæ Principes illos , qui à Ca-  
» tholicæ religionis fide desciverant , postquàm de



Pontificis Maximi voluntate habendi Concilium certiores facti sunt, missis inter se Nunciis, locum, diemque statuiffe, quo & ipsi de suis rebus convenirent: Diem ad ix. Kal. Februarii, locum Nauburgium Misniæ urbem ad Salam fluvium sitam delegisse. Quando commodius univērsos coactos in unum ipsi allocuturi videantur, sibi quidem videri, ut eò vnà vterque Nuncius proficiscatur, aut enim moturos aliquid, aut quid spei in singulis sit, certiùs intellecturos; sed leniter agendo, mulcendōque animos, plusquàm castigando apud alienatos, atque contumaces profecturos. Se quoque idoneos viros ex suis eodem allegaturum, mandaturūque iis, ut Nuncios, remque studiosè, ut locus dabitur, adjuvent. Verū instare diem, nec Germanos credi diu Nauburgii moraturos, ut si in tempore adesse velint, ne differendus discessus sit, & iter maturandum. Pragæ certiora à Ferdinando filio suo scituros, & consilium tempori accommodaturos. Quamquam Commendono ea profectio non probaretur, quòd diceret in tali conventu, neque Nunciis adeundi, ac agendi cum singulis, & consilia eorum disjungendi, quā vnā viā profici aliquid posse videretur, facultatem, & vnā omnium sententiam fore, & asperrimum quemque plurimū valiturum, tamen cū Collegis non refelli Cæsaris consilium, quod ipsi poscere, & sequi iussi essent, placuisset, sequenti die Vienne discedunt.

*Acta per eum in conventu Germanorum.*

CAPUT II.

**P**RAGAM septimâ die, atque inde hieme  
 sævâ, atque adeò frigidâ, ut ferri vix posset,  
 viaque per Bohemiæ saltus maximè nivibus im-  
 peditâ, die quintâ Nauburgium venerunt. Ad-  
 venientibus nec obvium missum, nec ullum ho-  
 noris, aut amicitiae officium, nec omnino hospi-  
 tale quidquam tributum. Biduo cognoscendis re-  
 bus dato, tertiâ die constituunt, ut singulos suæ  
 quisque provinciæ privatim conveniar. Delphi-  
 nus ad Palatinum Rheni, Commendonus ad Du-  
 cem Saxoniae (ii quia è septem viris erant, qui  
 jus creandi Romani Imperatoris habent, cæteris  
 præminebant) mittunt, qui adeundi tempus po-  
 stulent. Ab utroque idem responsum, in commu-  
 ni conventu, nihil nisi de communi sententia agi  
 „ posse, relatu-  
 „ ros ad socios, & voluntatem omnium  
 „ significatu-  
 „ ros Romanis. Decernitur inde in eo-  
 rum consilio privatis colloquiis in re publica opus  
 non esse; & verba Legatorum ab adversariis ve-  
 nientium omnibus coram esse audienda. Ab hoc  
 decreto mittunt cum militum cohorte, quam Saxo  
 ad custodiam corporis habere circa se consue-  
 vit, primos amicorum, qui Nuncios in curiam  
 deducant. Illi quamquam id quidem minimè  
 voluissent, tamen reculare non ausi, ne si ab his



exclusi forent, ab nullo deinde Germanorum satis  
benignè acciperentur, ire porro, & alloqui uni-  
versos statuunt. Curru vectos, Germani, qui ad de-  
ducendum eos venerant, pedibus, quod honoris est,  
antecefferunt, & Principes ingredientibus ad se  
omnes assurrexere; non tamen illis dextras ex mo-  
re gentis porrexerunt, qui mos apud Germanos,  
sicuti servatus amicitiae pignus habet, ita præter-  
missus non dubium est alieni, atque averſi animi  
argumentum. Nuncii litteras Pontificis edicti-  
que exempla singulis reddiderunt: ubi consedere  
prior Delphinus omnia quæ edicto continebantur,  
de voluntate Pontificis, de studio, atque consilio  
medendi tot morbis, quibus Christiana Respu-  
blica ex mota semel religionis fide laboraret, est  
persecutus. Tum ejus excipiens orationem Com-  
mendonus admonuit Germanos temporis ad sa-  
crum celebrandum Concilium peropportuni, re-  
conciliatâ nuper inter Gallos, atque Hispanos  
gratiâ, & pace constitutâ inter duos opulentissi-  
mos Christiani nominis Reges, & eo nobis Pon-  
tifice ad regimen divinarum inter homines re-  
rum dato, qui curas, & cogitationes suas huc om-  
nes contulerit, ut pietas, cultusque Dei purus,  
sanctus, inviolatus habeatur, custodiatûrque, &  
si quid negligentia irrepsit in publicas ceremo-  
nias, quod alienum à dignitate Christianæ fidei  
videatur, id verò antiquari, atque abrogari velit,  
ac præterea corrigi, emendarique, & ad veteris  
disciplinae normam restitui, quidquid in homi-

» num moribus à majorum nostrorum sanctissimis  
» institutis deflexisset. At cùm Christianos omnes  
» gaudere hujus celebratione Concilii, quo pristi-  
» nus Ecclesiæ decor, & moribus pudor reddatur,  
» debere, tum verò ab his accipi animis libentibus,  
» qui sive errore decepti, seu callidâ quorundam  
» sacrarum litterarum interpretatione inducti, se ab  
» aliorum sententia, placitisque sejunxissent. Cùm  
» enim nostra omnium salus verâ de cælesti numi-  
» ne opinione, atque fide maximè contineatur,  
» nec fides esse vera, nisi vna, possit, eaque non à  
» singulis pro cujusque libidine animi dijudicari;  
» sed ab vniversis ex cælestibus jussis constitui de-  
» beat, an vsquam meliùs, certiusque exquiri, aut  
» dilucidius explicari veritas queat, quàm vbi ex  
» omnibus gentibus coacti doctissimi mortalium  
» convenère? Ubi à sacratis viris nihil nisi rite, pla-  
» catóque per preces, & sacrificia Deo incipitur?  
» Ubi omnia divino instinctu, afflatúque aguntur?  
» Nec verò vltra cunctandum, differendúmque re-  
» medium esse; prolabi enim, ac ruere quotidie  
» in deterius rem, divinos monitus, præceptaque  
» detorqueri, perverti, depravari ab ambitiosis no-  
» varum rerum auctoribus, quos dum nescia sui  
» multitudo suscipit, favoréque tollit, infirmari  
» vim legum, & ipsa convelli fundamenta religio-  
» nis, quæ quanto periculo moveantur, non ne-  
» cesse esse apud expertos memorari. Neque verò  
» Christianam esse religionem inventu hominum  
» comparatam, sed cælitus traditam nobis, ac præ-



sentis ore Dei institutam, ut eam arbitrio subji-  
 cere, atrectare, minuere, sensui suo accommo-  
 dare mortalis nemo possit, quin idem se, & gra-  
 vissimo piaculo, atque inexpressibili fraude in per-  
 petuum obstringat, & erroribus inexplicabilibus,  
 turbulentissimisque involvat. Quippe sacrorum  
 dicta librorum, si quisque pro capto ingenii sui  
 interpretetur, idque verum sit, quod cuique pro-  
 babilius visum fuerit, tum quot capita hominum  
 tot fore de divinis rebus sententias. Ab tali ar-  
 rogantia, ac vanitate longè sanctos illos abfuis-  
 se viros, qui, quæ à præsentī Deo acceperant,  
 nobis tradiderunt, traditæque capite, ac sangui-  
 ne suo sanxerunt; nam Divos Paulum, & Barna-  
 bam, ut Lucas rerum ab Apostolis gestarum scri-  
 ptor memoriæ prodidit, de controversia inter  
 Christianos tum fortè Alexandria orta de Moy-  
 sis legibus, nihil ausos statuere, Hierosolymam  
 petiisse, ac rem ad Concilium Apostolorum re-  
 tulisse, decretoque eorum paruisse. Hinc nostram  
 à primordio sui vniuersi de cælestibus fidem,  
 immutabilēque manere, aliorum variam, mul-  
 tiformem, nec usquam firmè consistentem esse.  
 Nempe Dei cultum, ac religionem, quæ verā  
 sanctitate nitatur, usu, & consensu augeri, ac  
 propagari, moræque, ac tempore stabiliri. Ho-  
 minum commenta, quæ tantum novitate pla-  
 cent, atque impetu pollent, diuturnitate vane-  
 scere, & extingui. Quot his paucis annis opinio-  
 nes summis vulgi studiis acceptas cum ipsis au-

» Aetoribus consensuisse? Quot quotidie exoriri no-  
» vas, aut veteres, & pridem explosas, atque ob-  
» soleras revocari? Ecquis in tanta licentia, atque  
» impunitate modum audaciæ statuat, ne ad vlti-  
» mum impietatis provolvatur? Etenim quibus tam  
» varii, ac diversi ritus, & modò hæc, modò illa  
» sacra, ac semper prioribus rejectis novissima ma-  
» ximè placeant, iis brevi nulla fore. Tollenda igi-  
» tur hæc dissidia, tantùmque coalescere, atque hæ-  
» rere in Republica malum non sinendum, quod  
» & Dei in nos iram irritat, & si invaluerit, dis-  
» tracturum, ac debilitaturum rem Christianam,  
» & Turcis veris, & internecinis Christiani nomi-  
» nis hostibus, & jam pridem ab sua immani po-  
» tentia, nostraque infelici discordia in omnium  
» cervices imminentibus, aditum ad communem  
» perniciem patefacturum. Proinde mitterent Le-  
» gatos, & de quo vel minùs liqueret, vel ab aliis dis-  
» sentirent, conditorum nostrorum exemplo ad pu-  
» blicum Concilium referrent. Magis hæc cum silen-  
» tio audita sunt, quàm quidquam movere Germa-  
» nos, quos in eum locum ad confirmanda, & re-  
» novanda inter se fœdera contraxerat, non cura  
» concordia, aut religionis, sed metus, ne quo  
» Regum consensu vis eis pararetur, armisque, ac  
» bello parere Concilii voluntati, jussisque, & ra-  
» pra Ecclesiis restituere, atque ad auctoritatem  
» Pontificis redire cogerentur. Nunciis orantibus,  
» multi è Germanis Principibus, qui in consilio ex  
» more aderant, singula verba excipientes, vtriuf-  
» que



que orationem perscripserunt. Ac tum quidem non alio responso accepto, quàm deliberaturos de postulatis eorum Principes, domum iisdem comitantibus Germanis, à quibus antea deducti fuerant, redierunt. Vix horæ vnius spatium intercessit, cùm missi à Principibus tres viri eorum, quos ipsi, quia publicarum rerum participes, ac ministros habent, Consiliarios vocant, advenère: introductique litteras, quas Nuncii à Pontifice Maximo singulis Principibus reddiderant, ad eos retulerunt, his totidem fèrme verbis vsi. Princi-  
 pes, cùm has litteras eis redderetur, appellatos  
 se filios à Romano Pontifice non adverterunt,  
 quem quia ipsi parentis loco non habent, ne lit-  
 teras quidem tali cum appellatione accipere ab  
 eo voluerunt. Responsum à Commendono est,  
 Non aliter appellatos à Pontifice Maximo Germa-  
 nos Principes, quàm quomodo Cæsar ipse, cæ-  
 terique Christiani Reges, & Principes nuncupa-  
 ri ab eo consueverunt. Illi positis litteris abière.  
 Nunciis quamquam rejecta legatio videbatur  
 non acceptis Pontificis litteris, ex quibus fides  
 dictis eorum habenda erat, tamen quia illi edi-  
 cta de Concilio retinuerant, opperiri paululùm rei  
 finem placuit. Germani remissis epistolis, ac le-  
 ctis edictis de responso consultant, sententiâsque  
 alius alio ferociùs dicunt; nam quo quisque as-  
 periùs, & contumeliosius adversus Romanos lo-  
 quebatur, eo plus laudis ab aliis, & gratiæ fere-  
 bat: audiebaturque ut vsurpatorum sacrorum, &

L

Germanicæ libertatis vindex. In quibus acerrimum fuisse Christophorum Virtembergensium Ducem accepimus, qui præter insitam Germanorum ingeniis ferociam, magnas possidebat opes ademptas templis, unde justos dominos exturbarat, ac supra centum millium aureorum vectigal sibi ex illa rapina confecerat. In eadem noxa & cæteri ferè Principes erant: sed Christophorus eo infensior nobis, quo plura eripuerat, increpare confidentiam Pontificis eos ad Concilium evocare ausi, & tentationem eam esse dicere, ut si molliri, si flecti leni, ac subdola oratione se patiantur, mox graviora moliantur, donec aut vi, aut dolis eos sub antiquum jugum servitutis redigar. Ex hujus maximè sententia, & repudiata litteræ Pontificis fuere, & quæ inde contumaciter responsa sunt, composita.

---

*Principum Germaniæ ad Pontificis Maximi  
Nuncios contumeliæ plena oratio; &  
Commendoni responsio ad eos.*

## CAPUT III.

**T**RIDUO igitur post expectantibus Nunciis, ut ad accipiendum responsum in Conventum vocarentur, decem ad eos Consilarii primarii homines magnâ comitum frequentiam missu Principum venere; inter quos dignitate



præstabant Misquitius quidam, & Gregorius Cracovius, amicorum intimi, ille Palatini, hic Saxoniae Ducis. Omnes à Nunciis summa cum comitate, atque benignitate appellati, atque accepti cum essent, Cracovius vir multarum linguarum peritus, nec ignarus dicendi, ita Latinè infit. Magnopere mirantur Germaniae Principes quâ tandem de se opinione, aut spe fretus Romanus Pontifex eorum tentare constantiam, & se compellare legationibus sit ausus: cum incredibile sit, ignorare eum quæ jura sacrorum sancta Germanis, quam de divinis rebus infixam animis fidem habeant ab eo tempore, quo eam scriptam, firmatamque, & comprobata illi-tribus sacrarum litterarum testimoniis Carolo V. Cæsari triginta abhinc annis Augustæ tradidère. Sed neque tum temerè, aut levibus de causis fecère, ut à Pontificum ditione, ac potestate, cui parere antea assueverant, desciscerent, quando non JESU CHRISTI nomen, aut gloriam propagari, curarive ab iis, sed propriae potentiae, atque amplitudini studeri didicerant. Neque nunc sibi statuunt Pio IV. ad Concilium vocanti obtemperandum, penes quem ne esse quidem ullum ejus rei arbitrium sciunt. Etenim auditu etiam indignum est, eum disceptatorem aliorum controversiae, ac discriminum statui, qui ipse discordiarum, ac dissensionum omnium fons, & origo sit, & in Judicis sedere loco eum, quem maximè sisti ad judicium, inter reosque haberi convenit,

» & à quo vno veritas ipsa tam diu tam immaniter  
» oppugnatur. Cui enim obscura sunt Pontificum  
» Romanorum studia committendi assidue armis  
» inter se nationes, dissidiâque ferendi, quò ex  
» aliena pernicie suas ipsi opes, & potentiam au-  
» geant? Cui non nota infectatio, ac sævitia ad-  
» versus eos, qui à cultu ipsorum, atque inanum  
» idolorum ad veram pietatem animum traduxe-  
» runt? Quis verò nescit quantum contaminatæ  
» superstitionis, ac falsarum opinionum dispersum  
» per gentes sit à Romanis Pontificibus; quantum  
» tenebrarum Evangelii luci offusum, & nunc ma-  
» ximè offundatur? ut tetriores, ac fœdiores erro-  
» res ferat, foveatque vester iste Pontificatus, quàm  
» olim ante cognitum Christum gentes habuere;  
» &, quod detestabilius est, res impias, & execrabi-  
» les honestis nominibus tegitis, & morum, & sa-  
» crorum corruptores, vni sacratarum legum aucto-  
» res, & custodes haberi vultis. Nos verò cum ipsi  
» cupimus, tum in omnibus esse populis non dubi-  
» tamus probos, & Reipublicæ amantes viros, qui  
» vanas istas fraudes, & impuras corruptelas, qui-  
» bus deformatam Ecclesiam cernimus, aboleri,  
» auferrique cupiant, & veram, & cum cælestibus  
» iussis consentientem disciplinam restitui. Quod  
» sanè in primis curæ esse debuisset Romanis Pon-  
» tificibus, qui sibi tot sæculis superbum in Chri-  
» stiana Republica titulum, summumque sacrorum  
» jus arrogarunt. Sed nimirum constat eos id qui-  
» dem minimè velle, qui vnâ dominandi libidine



occupati, cumulandis superstitionibus, quàm di-  
 vinis rebus ordinandis magis intendunt. Falsò  
 præterea, & iniquè Germani levitatis à vobis in-  
 simulantur, & sibi non constare, pluresque in-  
 sectas divisi contrariis, & repugnantibus opinio-  
 nibus jactari dicuntur, cùm vna nostrorum om-  
 nium voluntas, & consensio sit in eam doctrinæ  
 formulam, quam scripto comprehensam Augu-  
 stæ ex auctoritate Cæsaris edidimus: ab ea nostri  
 Principes neque se discessuros vnquam profiten-  
 tur, & minimè verò leges imponi sibi à Roma-  
 no Pontifice passuros. Nullius enim mortalium,  
 nisi Cæsaris imperio Germani continentur, quippe  
 hic arbiter, ac princeps, & caput rerum est in Chri-  
 stiana Republica, huic, non Pontificibus vestris,  
 iusta, & legitima Concilia cogere, atque habere  
 jus est. A quo cùm Legati ad Conventum hunc  
 venerint, iis suam de convocando hoc tempore  
 Concilio rationem, ac sententiam Principes ex-  
 proment, cum Romano Pontifice omni rerum  
 communicatione in perpetuum sibi abstinendum  
 esse statuunt. Vos verò iidem Principes, quia cla-  
 ris Venetorum familiis ortos, & egregiis virtutis,  
 ac sapientiæ laudibus excellentes esse viros acce-  
 perunt, omni quoque honore, & observantiâ di-  
 gnos judicant, præstitissentque ea vobis, si pri-  
 vati huc, non Pontificis Romani jussu ad eos ve-  
 nissetis. His acceptis Nuncii pauca inter se col-  
 locuti, non tacitis ea esse ferenda statuunt. Tum  
 Commendonus: Fecêre, inquit, prudenter vestri „

” Principes, qui quando talia responderant, absen-  
” tibus ipsis ea, quam coram dici vobis maluerunt.  
” Quò enim acerbitas ista, ac licentia verborum  
” adversus eos, qui ad suum testandum studium  
” Reipublicæ, vestrumque in ultimam usque Ger-  
” maniam venire nos jusserunt? Scilicet hunc quo-  
” que morem à Doctoribus, ac Magistris vestris  
” didicistis incessendi contumeliis, invidiaque one-  
” randi eos, quorum redargui rationibus, ac veri-  
” tate revinci vos sentitis, cuius tamen ea vis est,  
” ut maledictis illustretur, non obruatur. Cæterum  
” ego dicta criminosè à vobis in Pontifices Maxi-  
” mos refellam, non imitabor, ut vos modesti-  
” quoque, & temperamento linguæ, non solum  
” causâ vinci à nobis intelligatis. Quo animo, &  
” quo consilio Pius Pontifex Maximus vocatum  
” Germanos ad Concilium miserit, dictum abun-  
” dè à Collega, meque est nuper apud ipsos Prin-  
” cipes; optimo scilicet, & cum publicæ, tum in  
” primis Germaniæ salutis cupido; licet id vobis,  
” ut cætera, suspiciosè, criminosèque libeat inter-  
” pretari. In sanandis enim Ecclesiæ morbis, nec  
” justius aliud, nec usu compertum est salubrius,  
” ullum remedium, majores nostri adhibuerunt,  
” quam auctoritatem publici Concilii, cuius tan-  
” ta majestas, sanctitasque apud omnes Christia-  
” nos omnibus temporibus fuit, ut ejus jussis haud  
” secus, quam cælestibus monitis paruerint homi-  
” nes, ii etiam, qui aut proprio mentis errore, aut  
” alterius impulsu lapsi, ab aliis discreparent. Quo-



ties enim accidit, vt ægrè, ac gravi, ac pestilen-  
 ti hæresi laborantes provinciæ, Concilii auctori-  
 tate acceptâ ad sanitatem, officiûmque redierint?  
 Et quis adeò projecti pudoris est, qui plus sa-  
 pientiæ, plus consilii vindicet vni sibi, quàm  
 tribuat vniuersis? Et adversari consensui eorum  
 audeat, quos Deus nobis interpretes religionum,  
 & sacrorum magistros dedit, & quibus ipse præ-  
 sentiam sui in perpetuum est pollicitus, & sæpe  
 manifesto numine declaravit? At vos etiam de  
 exemplo, ac de jure Concilia convocandi; hæ-  
 bendique dubitare, & cavillari vultis? Unde ve-  
 rò vobis venit in mentem hanc potestatem à  
 Pontificibus Maximis, penes quos ab Ecclesiæ  
 ortu, Dei, hominûmque concessu fuit, perpe-  
 tuâque mansit, ad Cæsares transferre, qui nec  
 vsurparunt vnquam vt suam, & Ferdinandus ipse  
 ad quem vos scilicet eam defertis, non recipit?  
 Quippe discrimina sui, & Pontificis muneris, &  
 novit ille, & qui vir est antiquæ sanctitatis etiam  
 servat: ea autem quæ sint, non est hujus loci  
 differere, neque omnino res vllum sermonem de-  
 siderat, cùm obscurum nemini sit, quâ fide, &  
 observantiâ, & optimus quisque Cæsarum Pon-  
 tifices Maximos coluerit, & Ferdinandus colat,  
 & quàm ipse paterno animo, atque amore à Pio  
 Pontifice habeatur. At ne illud quidem est igno-  
 tum, quàm propensa Pontificum Maximorum stu-  
 dia in Germanos semper fuerint, quantâque orna-  
 menta in hanc gentem contulerint. Unde enim

» vobis Cæsares? Unde Imperii hoc decus, & jus Im-  
» peratoris eligendi, quo cæteris nationibus præful-  
» getis? An igitur Pius I V. Pontificum aliorum ve-  
» stigia secutus, & officii, ac personæ memor, quæ illi  
» divinitus est imposita parentis, & rectoris humani  
» generis, si errantis Germaniæ curam habet, si moni-  
» tum vos, si patriæ charitate revocatum à pravissimis  
» erroribus, invitarumque ad Concilium nos misit,  
» quorum tamen dignitati tribuere vos aliquid vi-  
» demini, id ei audaciæ vertetis? mirari vos dice-  
» tis? Videre vel hinc licet, quàm à recto majorum  
» vestrorum more, ac voluntate desciveritis. Illi  
» dubiis, aut incommodis eorum rebus nusquam  
» aliò fidentiùs, quàm ad Pontifices Maximos re-  
» fugerunt. Vos Pontificem ultro admoventem  
» vulneribus vestris manus, iniqua cum exprobra-  
» tione repellitis. Revocandi autem veterem dis-  
» ciplinam, ad eamque corruptos hominum mores  
» emendandi curam ad Pontificem Maximum per-  
» tinere, quod objicitis, & nos fatemur. Atque  
» id quidem Pius I V. statim ac est Pontifex renun-  
» ciatus, enixè, ac studiosè facere est aggressus, &  
» nunc impensius in idem opus incumbit; & quia  
» magni negotii res est, quo absolutius, perfe-  
» ctiusque conficiatur, omniâque, quæ vbiq;  
» sunt, incommoda comprehendat, vniuersèque  
» ad omnes permanet, de Concilii ipsius senten-  
» tia, & ex consulto Patrum sanciri, constituique  
» voluit, idque vobis ignotum esse non debuit;  
» cum & edicto contineatur, quod legistis, &  
» quæ



quæ Romæ aguntur, perferri ad vos quoque po-  
 tuerint, nisi capere cuncta in deterius, & ho-  
 nestâ, rectâque nescire, & tantum secus facta  
 reprehendere, atque insectari liberet. Et quid  
 ego nunc illam orationis vestræ partem refellam,  
 quâ nobis superstitionis crimen, si Deo placet,  
 & obscurati Evangelii invidiam, maculamque  
 infligere, odio veri, ac libidine maledicendi  
 occacati, non estis veriti? Quibus gloriari lice-  
 ret nullâ re æquè Romanam Ecclesiam cæteris  
 Christianis populis, quàm Evangelii propagatio-  
 ne, custodiâque præstitisse, nisi à consuetudine  
 nostra abhorreret, aliter, quàm in eo gloriari,  
 cujus cælesti numine hæc orbi terrarum salutis,  
 & beatitudinis lux effulsit. Sed profectò constat  
 omnibus antiquitatis monumentis veteres illos  
 Patres, qui maximè sanctitatis, & doctrinæ lau-  
 de floruerunt, Christianamque pietatem pariter  
 moribus, atque ingeniis illustrarunt, ab usque  
 Apostolorum memoria, ut quæque res dubia,  
 aut difficilis explicatu incidisset, Romanam Ec-  
 clesiam consulere, ejusque responsis haud secus,  
 quàm divinis oraculis stare consuevisse. Possem  
 ego, ad quamcumque terræ plagam me verterem,  
 percensere Reges ultimarum quoque gentium,  
 nationesque, quæ sacrorum jura petitem Romanam  
 misere. Possem & innumerabiles hominum mul-  
 titudines, Pontificum Romanorum curâ, atque  
 illius Ecclesiæ studio ab impiis falsarum religio-  
 num ludibriis, quibus captas mentes habebant,

M

» ad Christi veri Dei cultum traductas commemo-  
 » rare, cùm nulla Christiana provincia sit, quæ  
 » aut acceptæ, aut conservatæ Catholicæ religionis  
 » gratiam Romanæ Ecclesiæ non debeat. Sed vt  
 » alios mittam, ( neque enim mihi apud vos agen-  
 » ti aliena exempla conquirenda sunt) quæro à vo-  
 » bis, vnde Christianæ religionis, fideique primum  
 » nomen Germani audiveritis? Unde magistri pie-  
 » tatis, vnde Evangelii ipsius lumen, disciplinâ-  
 » que ad vos pervenerit? An inficiari potestis, quòd  
 » Christiani sitis, quòd barbaras superstitiones exue-  
 » ritis, id secundum Deum beneficium esse Ro-  
 » manæ Ecclesiæ? Ab hac prima Christianæ pieta-  
 » tis semina jacta in vobis sunt, ab hac sacrorum  
 » jus, & Dei rite colendi, ac de divinis rebus verè,  
 » rectèque sentiendi tradita ratio est, à qua sum-  
 » mo isto imperii, & majestatis honore præ cæte-  
 » ris gentibus aucti, atque decorati estis. Ab hac  
 » vos Ecclesia, quæ beneficiis meruit, vt parentis  
 » majestatem apud vos obtineret, postquam gra-  
 » tiæ obliiti descivistis ab hac veritatis, ac fidei re-  
 » gula, ad quam omnes, quæ rite Christum Deum  
 » venerantur, gentes, suas de divinis rebus ratio-  
 » nes semper direxerunt, postquam declinastis, &  
 » quod vnum rectum est ad cælum iter reliquistis,  
 » in quos, Deus bone! & quàm devios amfractus  
 » deflexistis? quibus vos erroribus implicuistis?  
 » quibus mentes vestras tenebris mersistis? At er-  
 » iam iniquo animo ferri à Principibus vestris nu-  
 » per dicebatis, quod nos variâ, ac multiplici re-



ligione agitari , impellique Germanos vobis ad-  
 jecimus , idque inficias ire verecundia non fuit. »  
 An potest clarius , an evidentius esse quidquam »  
 vestris inter vos de tota cælestium rerum , ac di- »  
 vinarum ceremoniarum ratione dissidiis , & con- »  
 certationibus ? Una est vestrum omnium consen- »  
 sio , & conspiratio adversus nos , Ecclesiámque »  
 à qua defecistis ; cætera nihil dissimilius , nihil »  
 disjunctius , nihil discrepantius. An verò id non »  
 testatum omnibus ? An non omnis referta libris »  
 Germania est , contraria , & pugnantia docenti- »  
 bus ? An adeò hebetes nos , ac rudes Germani- »  
 carum rerum esse putatis , ista ut ignoremus ? At »  
 Lutherus quidem ipse , Paulus alter , ut vos vul- »  
 tis , qui præceptum se ex Ecclesiæ navi in mare de- »  
 jecit , à quo jactata à vobis Augustana formula »  
 conflata est , quando sibi , aut in quo satis con- »  
 stitit ? An istam ipsam formulam non quotannis »  
 quamdiu vixit , commutatam , diversasque in »  
 sententias contortam edidit ? An qui postea »  
 ipsum secuti sunt , non æquè licenter trahendo »  
 eam , quò cujusque libido rapuit , totam aliam »  
 fecerunt ? Sed quot jam rixæ inter vos de dictis , »  
 sententiisque Lutheri ? Et quotus quisque est , qui »  
 quæ placita illi sunt probet ? Quot Melanchthon ?  
 Quot Oecolampadius ? Quot Zuinglius ? Quot de-  
 nique Calvinus trahit ? Quot alii sexcenti , qui  
 omnes de summis rebus à Luthero , atque inter  
 se dissentiant ? Non modò civitas , aut municipi-  
 um ; sed ne domus quidem in Germania est

» vlla horum certaminum expers. Cum viro vxor ,  
» cum parentibus liberi de fide sacrorum , de divi-  
» narum litterarum intelligentia altercantur. Fœmā  
» nā , pueri in circulis , in cauponis , inter pocula ,  
» ludōsque , quod miserandum est , de religione  
» constituunt. A vobis denique ipsis hoc ipso in  
» Conventu , quanto laboratum est opere , vt ali-  
» quam vniūsmodi mentis speciem præferre posse-  
» tis ? Quod assequi tamen nequivistis ; scilicet , vt  
» discrepare inter se vera , ita conjungi , & con-  
» venire falsa non possunt. Et quantò quis ab Ec-  
» clesiæ portu magis recedit , quantò longius à ve-  
» ra , stabilique fide in errorum veluti pelagus pro-  
» vehitur , tantò cæcioribus fluctibus jactatur , fal-  
» laciōribusque opinionibus involvitur. Quin vos  
» ipsa varietas , inconstantiāque Doctorum vestro-  
» rum revocat aliquando ad cogitationem verita-  
» tis , quæ simplex , neque plus vna est ? Quin imi-  
» tamini Pauli Apostoli exemplum , ad nostram  
» eruditionem memoriæ proditum ? qui cūm ni-  
» hil , nisi divino spiritu afflatus ageret , divinitus-  
» que traditam sapientiam haberet , vt labi , atque  
» errare nullo modo posset , tamen divinitus item  
» admonitus de re , quæ iustam dubitandi causam  
» habere aliis videri poterat , ad Apostolorum Con-  
» cilium retulit , ne forrè , vt Lucas inquit , in va-  
» num curreret , aut cucurrisset. Sed hæc vos vide-  
» ritis. Pontifex quidem Maximus pio , piūque pa-  
» rentis officio adversus vos functus , omnique ni-  
» xus studio , vt deviis quoque , & contumacibus



filiis salutem redderet, jure vobis, ac omni Ger-  
 mania exprobrabit illud Evangelii, *Quoties volui*  
*congregare filios tuos, quemadmodum gallina convocat*  
*pullos suos sub alas; & noluisti?* Quæ autem postre-  
 mō honorificè de nobis ipsis dixistis, pro priva-  
 to Principum erga nos studio, privatas quoque  
 gratias iis à nobis referre vos jubemus. Cæterum  
 ea nos non aliâ re deberi nobis, quàm ejus à  
 quo missi sumus nomine, profitemur. Hac à  
 Commendono habitâ oratione, Germani nullo  
 dato responso discesserunt, variè pro cujusque in-  
 genio dicta Nuncii accipientes; pars veritate per-  
 culsi taciti ingemiscere, fremere alii, ac indi-  
 gnari, ea dicere tam celebri loco ausum. Et mox  
 conventus ipse dissolvitur, renovatis fœderibus,  
 & constituto, vt neque ipsi mitterent ad Conci-  
 lium, & metum injicerent Germaniæ Episcopis,  
 ne à custodia rerum suarum abscederent. Actum  
 inter eos magnis certaminibus est de conciliandis  
 opinionibus, quibus dissidebant Palatinus, qui  
 totum Calvinum amplectebatur, Lutherique ex-  
 plodendi locum quærebat, vt ad Augustanam for-  
 mulam Melanchthonis quoque apologia addere-  
 tur, contendit: eo enim libro Melanchthon paula-  
 tim à Luthero, cui in docendi munere successerat,  
 defleatens, viam ad Calvinī disciplinam aperuerat.  
 Alii item alia adscribi demissè Augustanæ for-  
 mular, vt cujusque rationibus conducere, aut in-  
 geniis aptiora esse videbantur, postularunt. Id  
 cū alii indignè ferrent, res in magnam est al-

tercationem adducta. Et Joannes Federicus Velmariensium Dux, Friderici illius filius, qui à Carolo V. armis victus, septemvirali dignitate privatus fuerat, susceptum familiæ suæ inde ab initio Lutheri patrocinium tuendum sibi existimans, quamquam Palatini filiam in matrimonio haberet, tamen adeò soceri auctoritatem non est reveritus, ut palam eum Calvinianum, & Augustanæ formulæ desertorem appellaret, protinusque se concilio proripiens in suum regnum abierit. Quæ res actionem illam, & consultationem omnem abruptit. Nuncii cuncta ordine Romam ad Pontificem perscripserunt, ubi maximè probata ab omnibus Commendoni oratio est, quâ contumaciam Germanorum tam licenter in Romanam Ecclesiam insultantium, egregiè retudisse est visus. Cum enim aptè ad rem, verèque, tum moderatè simul, ac fortiter, & prorsus pro majestate Romani nominis locutum prædicabant. Nos exitum, actaque in eo conventu paulò fusiùs tradidimus, quia & celebris res fuit, nec scitu injucunda, & veriùs differi, quàm à nobis, qui omnibus rebus interfuimus, à nemine posse est visa.





*De reliquo ejus per Germaniam itinere.*

## CAPUT IV.

**N**UNCII Naumburgio profecti ad reliqua obeunda digrediuntur. Commendonus Saxoniam intrat, fide prius ab Augusto Duce acceptâ per regni sui fines tutò transeundi. Is erat Augustus non immiti vir ingenio, & fessus tantâ sectarum varietate, nascentium quotidie, atque intereuntium, aliquam gratiæ, ac pacis cum Pontifice reconciliandæ rationem iniri cupivisset; sed in discordia, ac defectione audacissimi, atque infestissimi cujusque, valentissima semper auctoritas est. Tum improbi, ac turbulenti furore, sapientes necessitate reguntur. Altera, quàm à Naumburgio profectus est die, Lipsiam venit; inde Halam, ut ibi Archiepiscopum Magdeburgensium conveniret. Is erat Joachimi Brandenburgii septemviri creando Cæsari, quos Germani à munere Electores appellant, filius: sed eo non invento Berlinum ad Joachimi ipsius Regiam perrexit, Albi flumine ad Vitembergiam trajecto. Oppidum Lutheri furore, & Caroli V. victoriâ, & Federici Saxonis, & Lantgravii clade nobilitatum. Joachimus Alberti patris curâ in fide Romanæ Ecclesiæ diu retentus, post mortem inde patris, temporum illorum procellâ abreptus se hæreticis adjunxerat. Sed tamen ex ingenio suo

multa retinuerat de pristinis sacrorum ritibus , multa item ex disciplina Lutheri respuerat. Advenientem Commendonum perhonorificè hospitio accepit , coluitque omnibus humanitatis officiis, plura ut ne à Catholico quidem præstari potuerint. Cum eadem apud illum Commendonus, quæ Naumburgii dicta ab se, Collegæque de Concilio fuerant, disseruisset, responsumque pro cætera benignitate ejus accepisset, quo magnum pacis, & compositionis studium declarabatur, ac de Pontifice, & Romana Ecclesia mentionem numquam sine honore usurpasset, cupientem deinde discedere, aliquot apud se dies precibus, & comitate retinuit, quotidie plures cum eo horas consumens, ut numquam nisi agrè à colloquio, ac sermone ejus avelli videretur, viri ingenio, atque eruditione, ut ipse ferebat, delectatus: inerat enim Commendone gravitas, & facundia par, & mira rerum variarum notitia, & serius, atque efficax sermo. Itaque non difficile ei fuisset Joachimum ab illo errore, in quem credulitate lapsus erat, ad Ecclesiæ fidem reducere, fatentem jam ignota sibi fuisse multa, quæ Commendonum disputantem audierat, nisi suorum auctoritas eum continuisset. Nam Germaniæ Principes omnes ipsi doctrinæ, omnium exterarum rerum, morumque expertes, mirum quàm se plerumque iis credunt, quos sibi in consilium asciverunt, scientiâ juris, aut industriæ opinione commendatos. Ii Joachimum deterruere, ne oratio-



orationi, cohortationibúsque Commendoni assentiretur. Ab eo profectus Brunsvigiis, Lunenburgiis, cæterisque regionis ejus Regulis, Episcopisque conventis, ad Rhenum per Vestphalos iter vertit, visis circa Paderbornam campis, saltibúsque Varianâ olim clade, & Arminii victoriâ claris; quæ loca adhuc post tot sæculorum spatium à Germanis cum gloria, & ostentatione majorum suorum virtutis monstrantur. Sed ingenti dolore animi circumiens Saxonix vrbes afficiebatur Commendonus miseratione tot populorum à propria salute aberrantium, atque impiâ paucorum fraude tantis sese erroribus, ac exitiabili superstitione obligantium. Nec tenere lacrymas poterat, aspiciens tot monasteria, quæ sanè frequentia per omnem Germaniam immanibus ædificata sumptibus visuntur, tot templa magnificis structa operibus, monumenta veterum pietatis, alibi spoliata, desertaque miserabiliter squallere, alibi prorsus diruta, ac vastata esse, quibusdam etiam locis non in profanos modò, sed etiam abominabiles canum, atque equorum usus haberi, ut quibus altaribus sacrificia Deum propitiantia fieri antè consueissent, iisdem jumentorum præsepia locarentur; tantus in quibusdam furor, tanta inventa rabies est. In Ubiis apud Agrippinensem Coloniam, vrbes ejus Archiepiscopum, atque inde bidui itinere adversâ progressus ripâ ad Confluentem Mosellæ, Rhenique, Trevirorum item Archiepiscopum adiit; est enim

N

utroque è septemviris, qui Cæsarem creant. Tum navigio exceptus secundo flumine ad Oceanum usque provehitur, tantum ex itinere ad Clivensem Regulum digressus. A mari Bruxellas petiit, conventaque ibi Margaretâ Philippi Regis sorore, quæ cum imperio iis gentibus præsidebat, in Eburones ad Leodiensem Episcopum transiit. Unde eum haud parvi initium motus in Brabantiam ( ea Belgarum regio est ) revocavit. Lovanium est ampla, ac nobilis gentis ejus urbs, in quam studiorum, ac litterarum causâ magnus è totis Belgis, circumjectisque Provinciis adolescentium numerus convenire solet. Ac tum doctissimis hominibus divinarum rerum, & sacrarum litterarum interpretibus florebat. Inter hos quaestio, ac dissensio magnis orta de rebus distraxerat civitatis studia, vehementerque accenderat juvenum animos, ut non modò in scholis palam pro sua quisque sententia contenderent: sed scriptis quoque, librisque placita tueri parabant; quæ res alienissimo tempore novum datura incendium, aditumque hæreticis ad perturbandas Belgarum res factura videbatur. Eò accersitus Commendonus vocatis ad se, qui utriusque factionis capita erant, quâ comiter appellando, quâ leniter castigando, & de rebus ipsis, quæ in disceptationem venerant ex usu differendo, erumpentem illam flammam repressit, neque destitit, donec auctores quoque dissidii in gratiam, concordiamque reduxit. Quæ res non parvam illi



famam, atque existimationem adjunxit; quippe quos non Magistratus auctoritas, non imperium Præsidis revocare à pertinaci contentione potuerat, vnius viri prudentia, aptusque mulcendis, tractandisque eorum animis sermo, ad pravam æmulationem deponendam pertraxerat. Hac re perfectâ, Pontificis Maximi litteris ad Daniæ, ac Sueciæ Reges ultimas Germaniæ, ac Septemtrionis oras incolentes, proficisci, atque eos invitare ad Concilium jubebatur. Nec ille moram sibi ad proficiscendum fecit; properans difficillimum iter antequàm exiret ætas conficere, ne hyeme in frigidissimis regionibus deprehenderetur. In Holandiam cum transisset, consensu apud Amsterdamiam navi, Oceani sinum, cui incolæ Zudersee nomen dixere, sævâ vexatus procellâ trajecit, atque inde per Frisios in Saxoniam, ac Lubecam, nobile ad Balticum mare oppidum venit. Certos hinc homines ad utrumque Regem misit, & prius voluntates eorum cognoscere, quàm ipse se tam barbaris nationibus committere statuit. Ac Danus quidem juvenis aspero, ac feroci ingenio, & usque adeò vino, atque intemperantiæ deditus, ut rarò sobrius inveniretur, interque ipsa pocula efferri insolenter, ac jactari solitus, superbè, ac rusticè respondit, non esse, cur se Romanus Episcopus legationibus sollicitaret. Suecum, qui missus est, comparatâ classe in Britanniam parantem trajicere, ab Elisabetha Regina inani spe conjugii illectum, invenit. Hic

N ij

quamquam in Lutheranorum erroribus institutus erat, & tum etiam, ut sibi Elisabethæ animum, cujus magnopere affectabat nuptias, conciliaret, Calvini scilicet sapientiam amplexabatur; tamen magnificum existimans se in ultimis positum terris tam longinquis legationibus adiri, benignè  
 ” Commendono rescriptit, sive in Regnum suum,  
 ” sive in Britanniam, quò propediem transmissurus  
 ” erat, ad se venisset, verba ejus libenter auditu-  
 ” rum, neque ei ullum apud se jus hospitii abfutu-  
 ” rum. Commendono, neque Sueciam petere, unde profecturus Rex erat, neque eum in alieno adire Regno est visum, sed Pontificis jussu de eo opperiri, atque interim in Belgas reverti decrevit. A Lubeca bidui itinere Namburgium venit, opulentum oppidum, ac frequens, non longè à mari, quà se Albis in Oceanum effundit tantus quidem, ac tam lato alveo, ut nos qui ab Namburgio Stadiam petentes medio flumine navi descendebamus, veluti magno pelago navigantes ripas fluminis ab neutra parte cernere satis possemus, neque ea latitudo non magnarum quoque navium capax, quæ ab Oceano ad mœnia usque oppidi subvehuntur, variâ merce onustæ: Cymbros olim ea loca, Vandalosque tenuisse credunt, & hodie septem circa civitates pro communi libertate inter se nexæ fœdere, Vandalicæ vocitantur. Ad Bremam inde trajecto Visurgi nobili item Germaniæ flumine, per Frisiæ, ac Vestphaliæ fines in Holandiam, atque inde Bruxellas red-



iit. Ibi Pontificis litteras cū accepisset, qui-  
 bus comprobato consilio ejus, vt omiſſa ad Re-  
 gem Sueciæ profectione in Italiam reverteretur,  
 & ex itinere civitates, Regulosque, qui Rhenum  
 circa colunt, adiret iterum, eosque, & maxime  
 Episcopos ad Concilium exciret, jubebatur. Per  
 Rhemos Lotharingiam petiit, & regionis ejus  
 Regulo appellato in Treviros, atque ab his na-  
 vigio per Mosellam vectus ad Rhenum descen-  
 dit, ac Maguntiam, atque inde Asseburgium  
 ad Maguntinorum Archiepiscopum se contulit.  
 Is est Archiepiscopus septemvirum, qui Cæsarem  
 suffragiis suis creant, loco, ac dignitate princeps.  
 Paulum inde à Rheno discedens ad Herbipolen-  
 sem, & Bambergensem Episcopos divertit. Ab  
 his Norimbergiam prævalidam Franconiæ vr-  
 bem, atque inde viſo Aistadii Episcopo, Mo-  
 nachium ad Albertum Baviariæ Ducem venit, at-  
 que ab eo discedens, decimo tandem, ac septi-  
 mo mense, postquam profectus ex Italia fuerat,  
 Tridentum pervenit, quò jam frequentes Patres  
 ab Italia, Hispania, Galliâque ad celebrandum  
 Concilium convenerant. Tridento Romam vo-  
 catu Pontificis perrexit, Germaniâ, quanta à Bel-  
 garum ultimis finibus, Britannicòque Oceano ad  
 Oderam flumen, atque ab Dania, Cymbricâque,  
 & Baltico mari ad Rhetias Alpes patet, omni  
 peragrata, omnibus latissimæ gentis populis,  
 Principibusque aditis, pari industriæ, atque in-  
 nocentiæ opinione apud omnes relictâ. Miraban-

tur plerique, quòd cùm tot feroces, & Romano nomini infestas nationes obivisset, omnes non solum intactus ab injuria, sed ne risu quidem, aut ludibrio vlllo violatus evasit, sive hæc in ipso cautio fuit, seu spectatæ virtutis, atque integritatis fama venerationem ejus etiam apud barbaros fecerat. Nam Germanorum ingenia aspera, indomitæque, quemadmodum vera Dei religio, cultusque molliverat, ac frenum ferocibus animis iniecerat, ad humanitatemque traduxerat, ita solutis nunc, abjectisque Christianæ legis, ac disciplinæ vinculis, quibus antea continebantur, efferari iterum, atque in antiquam revolve trulentiam, barbariemque videntur, hæ maximè gentes, quæ longius ab exterorum commercio remotæ, interiora Germaniæ colunt. Romæ Commendonus in renuncianda apud Pontificem legatione, multa de Germaniæ vulneribus commemoravit, nihil ibi intactum à pravis religionibus, nihil non pollutum, nihil non inquinatum. Priscæ sanctitatis instituta omnia, aut vi sublata, abolitæque ab hæreticis, aut novorum rituum contagione contaminata, & corrupta. Ecclesiasticum ordinem, amissâ majorum disciplinâ, licentiam omnium rerum amplexum, ac plerosque non tam officio, ac studio religionis, quàm utilitate, ac spe retineri. Episcopos præposteris animis posthabere divinarum rerum curam, & ut suæ sibi fortunæ, opesque, & princeps ille splendoris, ac dignitatis locus, quo inter



cæteros eminent, salvus, inviolatúsque perma-  
 neat, id enixè laborare. Hinc Regulis, ac po-  
 tentibus hominibus, quos antè in sua auctorita-  
 te habere consueverant, adulari, tantóque dedi-  
 tos, atque obnoxios magis esse, quanto illos a-  
 vidiùs, aut occupandis Ecclesiasticis bonis in-  
 hiare, aut occupatis incubare sentirent: scilicet  
 quorum cupiditati, conatibúsque obviàm ire,  
 insolentiàmque coërcere, & deberent, & si se  
 nossent, conjunctaque, & concordia habere con-  
 silia vellent, etiam possent, eos ipsi ultro me-  
 tuunt, suspectósque gratiâ, atque officiis lenire,  
 & conciliare student. Quin Episcoporum quos-  
 dam à fide Romanæ Ecclesiæ descivisse, atque  
 in Principum hæreticorum clientelam se tradi-  
 disse, eorúmque tectos ope ex sua libidine vive-  
 re. Ad Concilium arbitrari se eorum venturum  
 neminem, paucos missuros, si quidem sibi, qui  
 aut valetudine, aut senio invalidi, inhabilésque  
 ad laborem, itérque essent, prolixè pollicitos se  
 Pontificis Maximi dicto audientes futuros, ac  
 Tridentum primo quoque tempore venturos, cæ-  
 teros manendi veniam omnes orare, negaréque  
 sine evidenti periculo posse ab se Ecclesias, rés-  
 que suas relinquere, patentes adversariorum inju-  
 riis, & absentia suâ opportuniore excubantibus  
 in omnes occasiones hæreticis futuras. Adversus  
 hæc tot incommoda, quæ apta, atque vilia re-  
 media, quibus Catholici, & Ecclesiastici præsi-  
 diis, adjumentisq; fulciendi, confirmandique

» esse viderentur, quibus inter se fœderibus jun-  
» gendi, obligandique, quò ab inimicorum frau-  
» de, atque vi tuti libertatem suam, munúsque  
» vindicarent, ac neminem magnopere formidare  
» necesse haberent, exposuit. Quæ omnia magnâ,  
& locorum, & hominum, & rerum illarum no-  
titiâ, memoriâque differentem attentè audivit  
Pontifex, acceptúmque, & collaudatum aman-  
tissimis verbis redire Tridentum, atque eadem  
Præsides Concilii edocere, iisque tantam Rem-  
publicam agentibus consilio, atque operâ adesse  
jussit. Profectus Tridentum cum omnia Præsidi-  
bus, vt præceperat Pontifex, nunciasset, non diu  
moratus, vt se paucorum mensium otio à labo-  
ribus, curisque tam diuturnæ peregrinationis re-  
ficeret, & familiares, ac domesticas res suas, quæ  
ipsum aliquando præsentem magnopere deside-  
rabant, constitueret, impetrato commeatu Ve-  
netias concessit, vbi ingenti gratulatione acce-  
ptus à suis, omnique cultus honore, atque offi-  
cio ab omnibus fuit. Quippe magnum jam esse  
ejus nomen, magna de rebus ab eo sapienter,  
atque industriè administratis prædicatio. Æquè  
& acceptus Principibus civitatis, & graciosus in  
vulgus, clarúsque haberi, vt nullum non virtu-  
ti ejus patere, atque adeò deberi honorem ho-  
mines existimarent.

*Nova*



*Nova ejus ad Casarem profectio.*

## CAPUT V.

QUIETO, ac tranquillo animo rem suam familiarem, domesticamque curantem, & jam cum studiis, librisque suis in gratiam redeuntem, instruentemque se ad ea, quæ pro sententia dicturus de religionibus, de sacrorum fide, de correctione, atque emendatione morum in Concilio erat, novum de integro injectum iter ab instituto avertit. Ferdinandus Cæsar, actò Germaniæ conventu, in quo Maximilianum filium successorem sibi in Imperio designaverat, ut ex propinquo Tridentinis actionibus, Patribusque adesset, Oenipontem accesserat, oppidum ditioris suæ haud ferme plus centum millibus passuum à Tridento distans. Hinc ut præsens assidebat Patrum consiliis, mente vir optimâ, & magno in Christianam rem studio, & pietate: sed ex eo genere hominum, qui quanto sunt ipsi probiores, tanto difficilius esse alios improbos arbitrantur. Quæ ingenia maximè opportuna sunt alienam simplicitatem per speciem boni, rectique ad fallendum captantibus. Itaque callidorum quorundam instinctu, quædam interdum movebat, & à Præsidibus Concilii, Concilioque ipso postulabat, quæ turbandis rebus magis, quàm ordinandis, quod ipse cupiebat, fore vide-

O

bantur. Venerat ex Gallia Tridentum eo tempore Carolus Lotharingus Cardinalis, idem & Archiepiscopus Rhemensium, summâ auctoritate vir, summisque & suis, & familiæ opibus: magno item usu, excellentique ingenio, ac doctrinâ præditus; denique animis, genere, dignitate ingens vir; sed has laudes longè superabat ambitio hominis propè immensa, quâ elatum animum stimulabat insana cupido cuncta sub arbitrium, nutumque suum revocandi. Galliæ Episcopi, qui satis frequentes partim ad Pontificis Maximi edictum, partim ipsum secuti Cardinalem Tridentum convenerant, non sentire modò cum illo, sed ne audere quidem ab ejus auctoritate discedere videbantur. Cæsaris quoque Legati ventitare ad eum, frequentare domum, ac pellekti conferre consilia dicebantur. Incussit ea res curam Patribus, ne turbidi aliquid rebus tranquillè ad eam diem procedentibus, ex his coitionibus oriretur. Id ne fieret, cavendum in tempore rati Præsides mittere ad Cæsarem delectum è Patrum numero aliquem, à quo de Concilii, præfentiùmque rerum statu ille erudiretur, & si quid incommodæ opinionis animo ejus inculcatum à suis hæssisset, evelleretur. Eum denique de Gallorum postulatis, ac de Lotharingii ingenio, atque animo ad vasta semper, atque immodica aspirantis, edoceret. Ad id vnus ex omnibus maximè idoneus visus est Commendonus. Venetiis igitur evocatum proficisci extemplò jubent. Ni-



hil cuiquam eâ tempestate in eo Concilio tam speciosum, tam decorum, tam quod sermones hominum subiret, quôdque plus invidiæ succenderet, accidit. Christiani nominis conventus habebatur, quisquis doctrinæ, quisquis ingenii laudibus uspiam totâ Europâ emineret. Trecenti ferme Episcopi, tot insignes virtute viri Tridenti tum erant, quorum nemo non par, quantumvis magno negotio, nemo non in eam mitti legationem expetisset. Omnibus vnus, & absens, & non petens est prælatus, tantum ei superior ad Germanos obita legatio nominis, tantum existimationis pepererat. Nec ipse opinionem, ac spem sui fefellit. Nam Cæsarem non modò ab omni cogitatione, si qua injecta illi fuerat, novandi aliquid, aut fovendi alterius cuiusquam consilia, quibus arbitria Patrum labefactari, aut scindi consensus, voluntasque eorum posset, abduxit; sed in priore sua mente, ac sententia adeò confirmatum reliquit, vt Lotharingius ipse paulò post ad eum visendum Oenipontem profectus nihil eum immutarit; atque exinde habitum, ac peractum sine suspitione vlla Concilium sit.



*In Poloniam Nuncius Apostolicus ad Regem  
mittitur.*

## CAPUT VI.

**C**OMMENDONVM Tridento Venetias redire domesticæ iterum res coëgère. Sed ne ea quidem diuturna mansio illi fuit. Nam Pontifex certior factus turbatas magnopere in Polonia res, periculúmque esse, ne hæreticorum factio, quæ tum maximè valens, ac vehemens (ut fere sunt acres primi desciscentium motus) ferrebatur, per tumultum, ac seditionem statum illius Regni perverteret; tamquam si, ut quæque pars Reipublicæ ægrotare cœpisset, hujus mandanda curationi foret, Commendonum Patavio, quò se ille tum contulerat, atque privatarum rerum curâ excitum in Poloniam protinus jubet proficisci, maneréque apud Regem, & dare operam, cum ut pristinam sacrorum fidem à perditarum sententiarum contagione, quoad fieri posset, prohiberet: tum sacerdotum ordinem primas in Polonorum Senatu, ac Republica partes obtinentem, in quem maximè incurri ab seditionis illis, atque amentibus novarum opinionum auctoribus sciebat, ab impetu, atque injuria tueretur, Regem in officio retineret, atque ad amplectendam religionis Catholicæ causam excitaret. Commendonus quamquam perexiguum ad



se comparandum spatium Pontifex concedebat, cupiens maturè eum gentis conventui, quem tum maximè indictum cogi Varsaviam acceperat, intervenire; tamen magnâ adhibitâ diligentîâ paucioribus, quàm quos Pontifex præfinierat diebus, cùm reliquis rebus splendide instructus, tum egregio comitatu, viâ se dedit. Semper quidem ille magnam curam in comitum, atque familiæ delectu habuit, ne quem secum duceret, non temporibus, non moribus suis congruentem. Sed tum eo majori quàm antea studio, quo in longinquiore, & perturbatiore Provinciâ iturus erat, insignes ascivit viros, nulli in ea re impendio, aut sumptui parcens. In quibus excellentes litterarum, & doctrinæ laude fuere Paulus Emilius Joanninus exquisitâ, ac multiplici eruditione vir, qui postea Montaltensium Episcopus in Picentibus fuit; & Federicus Pendasius, summus ætatis ejus Philosophus, cujus non multò post ex ipsa Polonia magnâ propositâ mercede à Veneto Senatu, ut Patavii publicè Philosophiam doceret evocati, atque inde Bononiam translati, nomen inter cæteros acuminis, & ingenii famâ claruit. Commendonus igitur Patavio Novembri mense profectus, celeritate, quanta per ingruentem hyemem, impeditâsque multis rebus vias adhiberi potuit, iter intendens in Poloniam, atque Varsaviam in tempore venit. Præcesserat magna de prudentia, ac virtute illius fama, cùm multorum gentis ejus hominum, quos

ipse antea amicitia, & consuetudine devinctos habebat, sermone, & litteris celebrata, tum maximè prædicatione Stanislai Hofii Cardinalis Varmienfis, vnius è Concilii Præsidibus, cui cum Commendono plurimus vsus, & familiaritas intercedebat. Itaque & advenientem Chelmenfis Episcopus, & Plocentium Palatinus primarii homines perornato, ac frequenti comitatu ad tertium ferme lapidem obviam Regis missu egressi cum omni humanitatis, ac benevolentia significatione acceperunt; & apud Regem ipsum singulari in honore, atque dignatione fuit. Vim enim illam ingenii, quæ in eo semper summa enituit, atque vitæ integritatem, & modestiam Rex adeò suspexit, vt quamquam ipse cupiditatibus suis impotenter parere assueffet, tamen alienæ virtutis haud sanè obtrectator, & diligere eum, & certè revereri magnopere visus sit.

*De sacrorum disciplina in Polonia depravata.*

CAPUT VII.

**R**EGNUM Poloniae Sigismundus Rex Augusti huius, ad quem Commendonus venerat, pater, diu temperato, iustoque imperio habuerat, filioque moriens firmum, atque stabile reliquerat, vir cum cætera rectus, & rei suæ probè gnarus, ac prudens, tum eximiâ, & constanti in



Christianam religionem fide. Qui cum junctos sibi amicitia, & affinitate Germaniae Regulos aliquot haberet, iis sacrorum jura turbantibus adeo non favit, ut graviter correptos missis legationibus ab exitialis sententiae ausu detertere conatus sit, florentem Germaniae statum, roburque validissimae gentis convelli, atque infringi confusione illa religionis identidem monens. Idem paulo post ab eodem furore desciscens cum omni prope Germania à Carolo V. Federicum, & Lantgravium, armaque moventes, & se ad societatem ejus belli promissis ingentibus sollicitantes, non rejecit solum, sed cladem, quam mox afflicti corruerunt, utrique praedixit; adeoque cavere, atque alieno periculo sapere didicit, ut nec ipse se in illud bellum interposuerit, nec privatim ex suo Regno quempiam ulli parti militare sit passus, quod apud Polonos gentem ex legibus suis, non ex Regum libidine viventem, & maximè gaudentem libertate, non mediocris curae, atque diligentiae fuit: tantumque omni tempore studii posuit in eo, ne qua contagio pestiferarum opinionum in suum Regnum manaret, ut ne libera quidem suis commercia cum Germanis reliquerit. Mercatores, ut aditu in Regnum non prohibuit, ita licentiā invehendi, ac per colloquia, ceterisque disseminandi novam religionem, acerbis edictis, ac poenis frenavit, planèque coercuit. Quin ne parentibus quidem, quod antea fiebat, mittere in civitates Germa-

niæ liberoꝝ disciplinaꝝ , ac litterarum causâ per-  
 misit , nisi quas integras , nec illâ pollutas esse  
 lue constaret , quamquam huic curæ ejus mole-  
 stum adversarium experiretur Albertum Brande-  
 burgium societatis Theutonicorum in Prusia Ma-  
 gistrum , qui cùm à religione defecisset , idem  
 virus , quo societatem suam non multò pòst op-  
 pressit , etiam in Polonia spargi cupiebat. Sed  
 Sigismundus hoc studio , curâque , quandiu vi-  
 xit , ad ultimam vitæ senectutem pervenit , si non  
 inviolatum à peregrinis religionibus Regnum  
 præstitit , certè incrementum sumere eam pestem  
 non est passus. Post mortem inde ejus , nec con-  
 silium par , nec animus ad eam curam Augusto  
 filio fuit. Ita spes erecta eorum , quibus per hæc  
 crescendi materia quæritur. Secutum filii , ma-  
 trisq̃ue dissidium , quo Regis , legumque resolu-  
 ta majestas , latè aditum excubantibus in occa-  
 sionem hæreticis patefecit , continuoque omnis  
 errorum , ac perditarum opinionum cohors irru-  
 pit. Fortè amisâ Isabellâ vxore in amorem Bar-  
 baræ Radgivillæ Augustus illapsus erat , cui mu-  
 lieri claro in Lithuania genere , ac principe fa-  
 miliâ natæ omnium rerum , quàm famæ major  
 semper cura fuit. Prostratâ pluribus pudicitia , ab  
 ijs ipsis formam , corpûsque , & mollem lasciviam  
 laudantibus deductus ad eam primò Rex  
 ferebatur. Cæterùm utcumque potitus , adeò  
 blanditiis , & consuetudine ejus est irretitus , ca-  
 ptûsque , ut brevi mulier non contenta vi , at-  
 que



que potentiâ, nomen quoque conjugii, & mox  
 Reginae appellationem affectarit. Idem Augustus  
 ipse eo impensius cupere, quo plura adversaren-  
 tur, ut ferè humanum ingenium verita flagran-  
 tius appetit. Id enimverò mater, fororésque Re-  
 gis, haud aliter quàm dedecus ingens domus, ac  
 dehonestamentum averfari. Mater erat Bona  
 Sfortia, Galeatii, & Isabellæ Aragoniæ filia, il-  
 lius cujus injuriæ funestam illam, ac calamitosam  
 faciem accenderunt, quâ, Italiâ Gallorum petita  
 armis, ac diuturno vastatâ bello, omnis propè  
 Patrum memoria conflagravit. Bonæ ingenio  
 materni inerant spiritus, & minimè muliebres  
 curæ, & viro assueverat ab senectâ, ac miti na-  
 turâ vxori obnoxio, ut non consortem modò  
 Regni, sed sæpe arbitram ageret. Filium ipsum  
 Regem imperiosè habuerat, eo exuentem matris  
 obsequium impatientius tulit. Et Barbaræ amo-  
 res ipsa exploratiùs norat, ut ferè turpia fœmina-  
 rum fœminis, quàm viris celerius, certiusque  
 noscuntur, & filio objectabat. Quæ igitur ne ho-  
 nestam quidem, & probam è privata domo nu-  
 rum toleratura fuisset, scortum vsque ad æmula-  
 tionem sui, nuptiâsque, & regium nomen, quod  
 ipsa jam spe satis polluisset, extolli ferociter fre-  
 mebat. Eo Augusti animus magis accendi, nec  
 mora nuptiis fuit. Sed quia non ut conjugis, ita  
 Reginae quoque nomen, ornatumque, & insigne  
 Regium tribui ab illo, aut ne tribueretur obfisti,  
 intercedique à matre poterat, nisi Senatus vo-

P

luntas accederet, sine cujus ordinis auctoritate nihil in Republica decerni ex legibus Polonorum potest, magnis jacturis conciliare, ac trahere ad se quisque Principum animos, singulorumque affectare sententias. Augustus suum cuique dicere in deligenda vxore iudicium, nec Regem non  
» æquâ cum cæteris conditione esse debere. Quæ  
» in matrimonii jus, in domum Regiam, in fortunarum, ac totius vitæ societatem recepta jam sit,  
» cur ei Regium nomen, & par cum viro honos,  
» qui mos in privatis valet, negetur? Bona adversus hæc turpitudinem nuptæ, incontinentiam filii obijcere, & si juvenis infirmitate lapsus nominis, ac decoris sui curam abjecisset, publicam fraudem, noxamque abesse debere, nec ipsos alienæ intemperantiæ participes, ac suffragatores fieri, scilicet Reginam appellarent, haberentque, quam nemo domi suæ nurum, ob vitæ probra passurus esset. Vicit tamen respectus Regis, majestatisque, & conjux Barbara, & Regina appellata est. Cæterum dum discordant ipsi, Regia vis hebetatur, & impunitas, & licentia dominatur. Ita Regnum brevi, ex levissimi cujusque libidine, peregrinis sacris, institutisque, & opinionibus novis oppletur, dispergentibus latè viris multis novitatis Doctoribus, ut numquam defuit, quibus captæ errore mentes emolumentato sunt. Nec secretò, atque intra privatos portes Christiani ritus contemnuntur, sed in publico etiam, ac palam novarum disciplinarum rationes,



ac præcepta traduntur, cœtus, concionesque mixtæ hominum, mulierumque turbæ habentur: novis ritibus res divinæ, precationesque fiunt. Vetus & à majoribus sanctè culta religio eluditur, irrisuque habetur, incestoque ore, ac maledictis incessitur, ac multis passim locis aboletur: templa invaduntur, bona Ecclesiarum ab alienis dominis occupantur, fortunæ diripiuntur, sacerdotes sedibus suis pelluntur, omnes denique ceremoniæ, omnia pietatis jura confunduntur. Principes quoque viri, & serpenti latius quotidie malo pars magna Senatus, cæ contracti labe habebantur, validiorque factio erat, quàm ut leges, aut Regem timeret. Jam non impetu solum, sed tempore etiam invaluerat morbus, cum Commendonus in Poloniam venit, atque hæretici Ecclesiasticorum exitio maximè imminentes, ad eorum accidendas opes Senatusconsultum à Rege proximo superiore anno extorserant, quo sacerdotale jus magnopere minui videbatur, auctique animi de vetustis legibus, quæ adversus violatores sacrorum institutæ apud eos sunt, abrogandis, agitabant. Et illi quidem (ut mos perpetuus omnibus hæreticis) quamquam diversis ipsi sententiis, rationibusque inter sese pugnent, studia adversus nos conjuncta habebant, ardentisque animis, & conatu summo cœptis incumbabant.



*De diffensione inter se Episcoporum in Polonia, & quorundam consiliis à Comendono repudiatis.*

## CAPUT VIII.

**A**PUD Catholicos nihil acre, nihil vehemens, nihil quo stare, atque niti firmè consilium posset, cernebatur. Segnes, & cui vni fidere videbantur, causæ indormientes agebant, & malis haud aliunde majus, quàm ex bonorum morore incitamentum. Episcopi, quorum semper in Senatu, & in Republica auctoritas fuit, quique conjunctis viribus, animisque facilè non restitissent modò adversariorum conatibus, sed etiam in officio manere eos, & parere legibus coëgissent, tantà dissoluti, ac dissipati discordiâ, in tot scissi studia, tantisque in occulto odiis, mutuâque invidiâ dissidebant, ut nemo eorum non reliquis omnibus infensus, invisusque esset. Ita nihil ab his in medium consulebatur, adversariorum amicitias, gratiæque servientes, suæ quisque privatim rei studebat. Jus, ac Respublica in medio jacebat. Duo erant eorum, & ordinis sui, & Senatus totius loco, & auctoritate facilè principes, Jacobus Ucangius Archiepiscopus Gnesnensis, & Philippus Padnevius Episcopus Cracoviensis, ille honore, hic divitiis, & opinione in-



genii præstabat. Inter hos præcipuè , nec obscura simultates cùm essent , dispares animis , consiliisque , par cupiditas miscendi , ac turbandi res sollicitabat. Ucangio inhæserant novæ opiniones , quibus inquietabatur animus suâ sponte varius , inconstans , & novis vsque studens rebus , vt si perturbatâ Republicâ invec̃ta nuper disciplina , religiôque prævaluisset , exclusâ Romani Pontificis auctoritate , summum se Antistitem , ac Principem sacrorum in Polonia fore , ad summâsque opes perventurum , vt suæ quisque cupiditati blanditur , sibi persuaserat : neque ex hæreticis decerant , qui assentando spei illius alimenta subjicerent. Apud Commendonum is priscae religionis studium simulans , deplorabat perditas Catholicorum res , dissidia Episcoporum , cæterorum languentes animos incusabat , Regemque deditum adversariis omnia illis indulgere querebatur. Hunc inde coërcendum minis , ac denuntiatiombus terrendum esse differebat. Catholicos infensos ei esse omnes ob crebras in Magistratibus , publicisque muneribus repulsas , & favorem in adversarios ; nec eorum defutura studia , si se ipse Romani Pontificis nomen , auctoritatẽque præferens , Ducem præbuisset , ac Regem ipsum ingenio timidum , atque audenti opportunum , metu subactum , sibi obnoxium fecisset , scilicet his consiliis averti Augustum à Pontifice , tradisque hæreticis , atque ita suas procedere rationes , cogitatæque cupiebat. Padnevijs quoque idem de

Rege terrendo, quamquam diverso animo suadebat. Neuter publico bono, sed suæ quisque rei tendentes, privata consilia habebant, ad ea aptam sibi facere Rempublicam cupiebant. Hic auctoritate, & gratiâ Regis tantus paulò antè fuerat, ut omnia arbitrio suo subiecta haberet. Eâ non deciderat solùm, sed ut plerumque acrius ex magna benevolentia exurgit odium, invisus, suspectusque irâ, atque invidiâ æstuans agebat. Et superbus, atque indomitus animus, & dominari assuetus, eminentibusque inter ceteros, opibus subnixus quiescere non poterat. Regem sibi magno aliquo periculo, metuque implicandum callidè rebatur, tum aut necessitatibus compulsus ultro ad se venturum, aut locum sibi ad ultionem ex eo aliquem futurum sperans. Eum igitur accusans apud Commendonum magnis criminibus ut reum agebat, nihil leniter agendo profecturum, opponendas formidines, intentandas minas, denunciandum periculum esse. His infirmum, & fractum animum, & ex conscientia omnia timentem in fide, atque Pontificis Maximi futurum. Nihil fallebant hæc consilia Commendonum, qui & ipse per se satis utriusque ingenia tractando perspexerat, & percuntationibus, quibus primum semper tribuere tempus consuevit, aperta & explorata omnia habebat. Itaque longè aliâ, quàm quâ ipsi voluissent viâ ingressus, Regem non asperandum minis, quæ nisi prompta vis ad cogendum adsit, plerumque vanæ evadunt,



aut in intempestivè feroces recidunt: sed crebris  
 orationibus hinc confirmabat adversus metus  
 quosdam, qui ei à falsis, callidisque hominibus  
 ostentabantur; hinc monebat, ne ipse se, Re-  
 gnúmque in id discrimen ultro conjiceret, quod  
 connivendo, atque indulgendo, vitare posse con-  
 sideret. Quippe sic quidem contrahi, majoraque  
 in dies incrementa capere id malum, constare.  
 Quid hac temerariâ licentiâ decedendi à fide,  
 quam majores nostri de divinis rebus habuère,  
 fieri aliud, quàm jus, morem, leges publicas  
 sperni, infringi, subverti? Regni fundamenta  
 subrui, ac labefactari? Adimi Regibus vires, ac  
 tradi multitudini, & seditiosissimo, ac audacissi-  
 mo cuique adjungi? Eo ipso, quòd ille sæpe que-  
 reretur esse quosdam, quorum apud nobilitatem  
 auctoritas valeat, ut illi plus privatim, quàm Se-  
 natus, ac pene quàm ipse Rex polleant: pro-  
 pterea quòd iis multitudo fidat, eorúmque oratio-  
 ni assentiatur, admoneri eum, & ad cogitatio-  
 nem rerum suarum converti debere, nec ultra pa-  
 ti invalescere eorum audaciam, qui excussâ om-  
 ni legum reverentiâ ex libidine sua omnia agant,  
 cœtus cogant, Concilia habeant, concionibus  
 seditiosis homines à vero Dei cultu ad peregrinas  
 ceremonias, & perniciosos errores avertant; qui  
 denique sibi tantos spiritus, tantam arrogantiam  
 sumplere, ut pæne jam nec ferri, nec corrigi pos-  
 se videbantur. Ad hoc Dei quoque metum inji-  
 ciebant, cum numinis sui vindicem, ultorem-

» que , seu neglectæ , seu pollutæ religionis futu-  
» rum , tantóque graviores pœnas ab iis reperitu-  
» rum , qui veluti in custodia locati legum , ac pu-  
» blicorum sacrorum sunt , quanto eos celliores  
» inter mortales honore , imperióque præstare , ac  
» præfulgere voluit ; nam in minuenda , violandâ-  
» que divinarum ceremoniarum disciplina , Deique  
» opinione , aut iussis pervertendis , qui alios , cum  
» possint , ab impio ausu non coërcent , exitiosius  
» peccare , quàm illos ipsos , qui alienâ fraude in-  
» ducti , mentis errore labuntur. Excitabat præter-  
» ea illum parentis sui summi viri , ac Regis in il-  
» la propullanda peste diligentia , ac pietate ; in-  
» terdum vicinæ Germaniæ , & tum maximè fla-  
» grantis Galliæ ruinas , cladisque memorans , vt ex  
» alienis malis vtilia sibi exempla caperet , hortaba-  
» tur. Episcoporum verò gratiæ reconciliandæ ma-  
» gno studio , curaque intendit , rei cum spissæ spon-  
» te suâ , nodisque inextricabilibus plenæ , tum eo  
» difficiliore , quòd palam amicitia , & benevolen-  
» tia simulabantur , odium , & obrectatio in occul-  
» to erant. Ipse & singulos monendo , rogando ,  
» obrestandoque castigavit , & omnes in vnum coac-  
» ctos multis sæpe , & gravibus verbis , est adhor-  
» ratus , vt communem causam communibus con-  
» filiis agerent , neu se , neu dignitatem suam per-  
» tinaci discordiâ proderent , ad eamque everten-  
» dam , gradum , aditumque hæreticis ipsi facerent.  
» Si consentientibus studiis , animisque amplexi  
» Rempubicam fuerint , non magno negotio vul-  
» nera



nera Ecclesiæ in eo Regno à paucis hominibus  
 imposta sanari, & legibus, quas majores eorum  
 ad sancendam Ecclesiastici ordinis majestatem,  
 firmandamque religionis fidem piè, sapienterque  
 condiderunt, vim suam reddi, & aut falsa animi  
 opinione deceptos revocari, aut nimia ambitio-  
 ne, & cupiditate provectorum cohiberi, & sub le-  
 gum jura compelli ab iis posse: Sed quo majores  
 in Republica opes eorum, quo honor, dignitas  
 que præstantior esset, eo promptius privatas fi-  
 multates pro publica salute deponere, & patriæ,  
 & religioni, quæ tam ab dissidio eorum, quàm  
 ab alieno scelere gravius laboraret, remittere de-  
 bere. Id ab iis fidem, id munus, atque officium  
 ipsorum postulare, id Regem, id Senatum velle,  
 id omnes bonos flagitare. Quem quidem Regem  
 ne quidquam ab singulis, aut incusari, aut appel-  
 lari, si vniuersi disjuncti, dissipatique sese ab ad-  
 versariis obterendos, atque subigendos ultro tra-  
 derent, qui ut intenti, ut vigilantes videantur,  
 somno, ac socordia Catholicorum fieri, & auda-  
 ciâ, & consensu eos, non viribus terribiles esse.  
 Hujus generis orationibus sicut planè mederi im-  
 butis pravâ æmulatione, atque invidiâ animis  
 non potuit, ita est affecutus, ut alios adjungeret  
 sibi, alios verecundiâ obstrictos contineret, æ-  
 quioribusque & erectioribus ad omnia vteretur.  
 Per hæc, taliaque cum magnam sibi fidem, at-  
 que existimationem apud Regem, apud omnes  
 fecisset, multa salubria in Republica hortatu, at-

Q

que consilio ejus acta, multa, quæ evertendæ pietati fuissent, rejecta sunt. Cum tributum Rex decerni sibi extraordinariæ magnæ pecuniæ in sumptus belli, quo tum à Moscis, trans Boristhem carpebatur, vehementer cuperet, hæretici per factiosos, ac populares homines rem impediebant. Id callidè molientes, ut inde concessi tributi mercedem decretum abrogandis, aut infirmandis legibus, quæ contra nova invehentes sacra, aut de veteribus quidquam mutantur sunt, auferrent. Etenim hoc vno telo multis in locis petita, gravissimæque vulnerata religio est. Nam capti, percitique pravis erroribus populis jus, quibus velint ceremoniis res divinas procurandi, ac de Deo, ut cuique visum sentienti, loquendique à Regibus pretio mercati sunt. Et Reges ipsi proditam religionem à cultu, & pietate abductam ad præmium, & quæstum transfulere. Nil ergo mirum, si tempestate nostrâ sæpe evenisse videmus, ut & populi irato, & majestatis suæ violatores ulciscente numine, omnibus discordiarum, ac bellorum cladibus affecti sint, & Reges, quam semel multitudini licentiam peccandi in Deum, & in majorum instituta, empti, ac deliniti pretio laxavere, ad eam ne adversus se quidem ipsos cohibendam potentes inde fuerint: justamque illis ea in pœnam verterit, ut intestinis seditionibus, suorumque factionibus vexati, vno tempore, & imperii vim amiserint, & exhausti sumptibus inopes, atque egentes, usque



obsequi vulgi studiis, & turbulentissimi, & audacissimi cujusque libidini obnoxii agere cogantur. Id tum ne fieret una obstitit vigilantia Commendonî, atque industria, quâ factum est, ut & Rex pecuniæ collationem, quam voluit, sit consecutus, & animadversâ fraude, ac malitiâ hæreticorum, etiam in posterum intentiores ad cavendum, & Rex ipse, & Catholicorum Principes fuerint.

*De Bernardino Ochino, hæreticisque aliis per eum à Polonia pulsis.*

## CAPUT IX.

**P**ATEBAT eo tempore Polonia non civium modò, sed exterorum quoque licentiæ, quorum erat omnium mira impunitas. Quicumque aut ob noxam, malumque in religione sensum, patriâ pulsus, aut ne sub legibus viveret sponte profugus, in Poloniam se veluti in asylum conferebat. Ibi nemini deerat ex nobilium numero aliquis, qui in fidem receptos tegeret, foveretque, alii insitâ vanitate ingeniis, alii rerum ipsarum novitate illiciebantur. Ex Germania, Gallia, Italia corruptores aderant, ac prohibente nemine, & inanissimo quoque dictis applaudente, sua quisque somnia venditans, cœtus æmulantium studia profligatâ doctrinæ habebant, & li-

Q ij

centiâ linguæ grassabantur. Eòdem Bernardinus quidam Ochinus confugerat, & præter cæteros magno concursu, & assensu audiebatur. Is erat ex Etruria Senensis civis, qui cùm primam ætatem inter Franciscanos, quos Minores vocant, egisset, inde deflexisse eos à moribus priscis, longèque à Magistri ratione aberrasse ferens, quæ contemptu humanarum rerum contineretur, secesserat ab iis, nactusque sententiæ suæ sectatores, quos & auctoritas ejus & amor religionis attraxerat, societatem Capuccinorum revocatis Francisci institutis, cum Matthæo quodam Urbinatæ, antiqui moris, & magnæ simplicitatis, atque innocentie homine constituerat. Horum est vita omnis (nam propagata inde disciplina est, ac per omnem Italiam latè diffusa, vigetque nunc maximè sanctissimis, & innocentissimis referta viris) dura atque inops; cibus illis, victusque in dies quæsitus simplex sine lenocinio, aut conditione vlla: pellere non irritare famem, corporique alimenta præbere, non etiam oblectamenta volunt: quod crebris insuper jejuniis, vigiliisque exercitum, domitumque habent, quo purior mens, solutiôrque divinarum rerum contemplationi, atque cultui vacet. Vestitus cæteræ vitæ congruens horridus, vilisque, unicâ tunicâ, ac brevi pallio operiuntur, è ciliciis, aut non ab simili materiâ confectis, perpetuòque iisdem nullo ætatis, aut hyemis discrimine, sine calceis nudo pede per nives, per saxa, aspretæque incedunt,



crepidati tantum sacra faciunt. Quietem aut humi, aut perangusto grabato, stramentove recumbentes, capiunt, non aliam, quam quam amiciuntur veste coniecti. Domicilia eorum raro in Urbibus, pleraque omnia in solitudine hominum. Denique omnis est in eo disciplina, ut à corpore, humanisque curis abstractus animus divinis operetur rebus, paupere victu, cultuque, & religione gaudens. Ochinus aliquot annos in illa aspera, atque egentis vitae patientia perduravit. Pascebat scilicet, sustentabatque animum hominis mirè levis, & sui amantis, & ad omnem asperitatem perferendam firmabat gloria, & sanctitatis opinio, quæ illum sic viventem est consecuta. Et fuit præterea vir ipse non ineruditus, quamquam majori multò verborum, quam rerum doctrinâ excultus, sed patrio sermone (nam Latinas litteras vix didicerat) in eo quod sciret adeò comptus, ornatúsque, & copiosus, ut mirum in modum captos specie, ac nitore orationis teneret audientium animos. Nam hominum nostrorum plerique conciones, quæ more antiquitus tradito de divinis rebus in templis habentur, frequentant, celebrantque, non tam quidem, quo mentem præceptis cælesti doctrinâ haustis instruant ad religionem, ad pietatem excitent, quam quod ducuntur orantis ingenio, & genere illo speciosæ, & omnibus luminibus, omnibus undique floribus exornatæ, atque expolitæ orationis delectantur. Cæterum inde nihilo meliores effecti,

Q iij

planè iidem abeunt, qui venerant. Pari vanitate Concionatores ipsi quidam, quò sibi audientiam faciant, hanc ipsam delectationem studiosè aucupantur, auriumque voluptati omni arte morigerantes inserviunt omni verborum lenocinio, atque omnibus orationis illecebris influere in animos student. Quibus mihi non fructus, utilitasque proposita populorum, esse videtur, quos docendos, instituendosque susceperunt, cuius rei causâ is est in Rempublicam vsus concionandi introductus, sed placere ipsi, laudarique, quàm proficere alios malle. Quò enim de rebus maximis, atque gravissimis, de Deo, de pietate, de religione, de vitæ disciplina, sacris in locis ante aras, ante simulacra Dei, & veluti ipsius instinctu numinis dicentibus, inanis ille, atque indecorus apparatus, sonitusque verborum? Quò illa tanto artificio, & varietate distincta, tanto delibuta fuco, tot flosculis conspersa, tot compra concinnis, tot denique coloribus illita, atque picta oratio? Et hi quidem quam vim, quam auctoritatem habeant aut ad impellendos, aut ad continendos homines, ut vitiis abstinent, virtutem amplectantur? qui in re tam severa tam leves, ac dissoluti sint, & permulcendis modo animis, ac suavitate perfundendis, non frangendis, evincendisque intendant? In quo tanta est sæpe quorundam intemperantia, tantum blandiendi, ac placendi studium, ut nullâ quid rem, quid locum, quid ipsos deceat, ratione habitâ, ne re-



nerioribus quidem, & amatoriis verbis interdum abstineant. Quis non tam animi à terrenis abducti curis ad cælestium cogitationem eriguntur, quàm titillantur sensus, & ad jucunditatem, voluptatémque molliuntur. Res sacræ, divinæque puram, castam, simplicem orationem, quales mores desiderant: verba delecta, si vis, non tamen nimia cum cura exquisita, & vndique excerpta, ut dignitatis major, quàm gratiæ, ac leporis ratio habita videatur. Sententiæ, quæ gravitate, ac severitate laudentur, non tantum specie, ac venustate placeant: quæ admirationis, ac terroris audientibus, quàm delectationis plus incutiant, perrumpant pectora, vnde noxios affectus expellant, non molliter influentes foveant; denique doceant, & ad probitatem, pietatémque instituant, non ad levitatem, vanitatémque erudiant. In Ochino (ut ad institutum revertamur) præter eloquentiæ famam, & hanc ipsam orationis suavitatem, & cultum, ætas, genus vitæ, horridus ille ornatus Capuccinorum, promissa, & fluens infra pectus barba, argentea canities, pallor, ac macies oris, & magno studio, artèque simulata imbecillitas corporis, & sanctitatis opinio, propè excesserant humanæ admirationis modum. Ubicumque concionaturus esset videre erat excitas sedibus suis civitates, nulla templa multitudinem capiebant, mulierum turba pæne major, quàm virorum. Si quò transisset, vndique ex omnibus locis occursum ad eum au-

diendum fiebant. Nec verò à plebe solùm ille, humilibusque, sed à principibus quoque viris, regulisque colebatur. Advenientem hospitio, obviam itionibus accipiebant, pari studio, honoréque abeuntem prosequébantur: & ipse quantum poterat omni arte augere famam, ac venerationem sui. Iter non aliter, quàm ex disciplina nudis pedibus facere, tam tenui valetudine ætatéque jumento insidentem nemo vidit. Quæ vitare nequivisset Principum hospitia ingressus, magnificentia ædium, vestium, ornamentorum; nihil de instituto moveri. Apparatis epulis adhibitus cibo non plus vno, eoque communi, ac simplici vescébatur; pari vini abstinentia. Datis lectis mollibus, ac pulchrè stratis, oratus, uti fessa membra quiete commodiori cubili sumptâ reficeret, humi extento pallio cubabat. Hinc incredibile est, quantum ejus nomen totâ Italiâ, quantus illi honor ab omnibus haberetur. Cæterum ut falluntur qui certam gloriam, quæ tantum in vera virtute firmè consistit, fictâ virtutis imagine se consequi posse, & diurnam pietatis simulationem sustinere mente aliter affecti sperant, inflatus, elatusque tantis hominum in se studiis, tantâ sui prædicatione, animus sua sponte levis, & inconstans adeò sibi placere, sese amare, ac tanti suam æstimare fortunam cœpit, ut spem ad immodicam, vastâque homo Capuccinus adjiceret: Sed cum apud Pontificem Maximum non quanti ipse crediderat se, suâque in Rempubli-



blicam, ac religionem merita fieri, nec spei, & cupiditati suæ Pontificis judicio responderi intellexit; mente malâ irâque stimulante, ne continere quidem se potuit, quin ex ipsis concionibus quædam interdum sub ambagibus jaceret, queis Pontificis ipsius majestas, auctoritasque perstringi, minuique videbatur. Hæc ubi excipi, animadvertique sunt cœpta, & in vulgus quoque suspicio manavit, sub tanta sanctitatis ostentatione ambitiosum, & contumacem latere animum; paulatim digredi ab illo homines, in dièscque senescere ejus fama, gratia quoque, quâ latissimè pollebat, languere, minuique quàm antea frequentari. Postremò cum ad ipsum quoque Pontificem ea delata essent, Romam ire, & purgare sese, & coram diluere, quæ objicerentur, jubetur; nec tamen vincula, aut custodes adhiberi, sive parum creditum criminibus, sive tantum dignitati ejus tributum. Veronæ apud Joannem Matthæum Gibertum civitatis ejus Episcopum fortè erat, cum Pontificis maximi voluntas perlata ad eum esset, quem commotum, dubitantemque cum sensisset Gibertus, vir cum egregiepius, & Episcopalis officii laude excellens, tum Ochini ipsius ob innocentie opinionem in primis studiosus, magnopere hortatus est eum; ut porro Romam iret, & veritate fretus animi, ac sententiae suæ rationem apud quos Pontifex jussisset, exponeret, eaque, de quibus insimularetur, constanter refelleret. Ille deterrente hinc

R

metu ex pravæ mentis conscientia, inde hominum existimationem verens, si defugere judicium videretur, Veronâ profectus consilii atque animi anceps, tamen Bononiam vsque processit. Ibi tum erat Legatus Gaspar Contarenus Cardinalis, à quo benignè quidem pro pristina amicitia hospitio est acceptus, sed facultatem cum Legato de rebus suis colloquendi, quam cupiebat, non habuit, quòd æger Contarenus tum maximè decumberet eo morbo, qui supremus illi fuit. Itaque manere, atque opperiri tantisper, dum Cardinali melius esset, jussum; ut est suspicax eorum ingenium, qui gravis alicujus delicti conscii sunt sibi, qui omnia circumspiciunt, omnia timent, & quam meriti sunt pœnam semper ante oculos verlantem habent, ingens hominem occupavit suspicio, ne per simulationem valetudinis, ipse à Legato detineretur, quo inde appositâ custodiâ etiam invitus ad dicendam causam Romam perduceretur. Hoc metu percitus, cum rogando, instandoque introductus tandem ad Legatum esset, & cum æstuantem feбри tantùm salutasset, eâdem nocte fugæ consilium cepit: sumpto communi sago, abjectoque cucullato indumento primus disciplinæ ejus desertor cujus auctor extiterat, ad hæreticos transfugit; atque hic finis illi mentiendæ sanctitatis, & ferendæ alienæ personæ fuit. Cum enim ad eos homines, atque in illa castra venisset, ybi in summa rerum omnium impunitate pro ingenio cujusque, ac libidine vi-



vebatur, ita se statim in eorum formavit mores, ut ab illa continentia, ac modestia professione, votoque, quo constrictus erat, sacerdos, & Capuccinus, & sexagenarius sibi ante omnia virginem juvenulam per matrimonii nomen junxerat, omnique exuta jejunandi, vigilandi, precandi, corporis domandi consuetudine, memoriaque, cum adolescentula vxore liberis operam daret, atque vitam penitus eadem cum cæteris licentiâ institueret, ut non immerito prioris vitæ austeritatem, ac religionem occultæ ambitioni, novam intemperantiam moribus suis adscriberent homines, sed ut ferè perfugis vsuvenit, initio benignè, mox per contemptum habitus, spectusque, apud quos in summo se honore futurum speraverat, ad tuendam nominis sui auctoritatem, quod in primis popolare, ac plausibile rebatur, totam aggredi religionem, nec contentus iis, quæ tum erant falsæ, & ab Ecclesiæ scitis abhorrentes opiniones, novas ipse invenire, conflare, & comprehensas scriptis in vulgus edere, quæ ex Etrusca in Latinam linguam amici verrebant. Et quidem non, ut alii, de perturbata morum disciplina, de Ecclesiæ institutis, de cibis vetitis, de cœlibe vitæ sacratis hominibus indicta, negatogue conjugii jure, de divina hostia populo aut in altera, aut in utraque specie impartienda, cæterisque hujusmodi, quæ quamquam gravia, & adversantia veritati, tamen solemnia illis jam, & visitata, sed audaciùs se in ipsum profundum im-

R ij

mergens, ne senescentis Lutheri signa secutus videri posset, ac signifer ipse, atque dux ferretur, in ipsam Dei notionem invasit; & sententiis Ecclesiæ discerptis, partibus, personisque confusis, & aut revocatis antiqui Arii opinionibus, aut deterioribus additis, ipsius nomen, atque vim Trinitatis nefariè, ac sceleratè impugnare, atque perturbare cœpit, prorsusque ad ultimum impietatis præceps ruere, & cum initio apud Helvetios consedisset, pari inde inconstantia sedes, atque fidem in dies mutans, omnem pervagatus Germaniam, Britanniamque atque undique explosus, postremò se in Poloniam contulerat, & Cracoviæ, ut ostendimus conciones, cœtusque habebat. Referre hîc non pigebit verba ipsa orationis ejus, quam primam ad Italicos homines habuit, qui studio videndi, atque audiendi hominem frequentes quot Cracoviæ erant (& plures ibi negociabantur) ad illum adierunt; quæ nobis ipsi retulere, qui interfuerunt. Hos fratres  
» appellans, Cavete, inquit, putetis ad alium vos  
» hodierna die visendum, quam ad verum JESU  
» CHRISTI Apostolum accessisse; Quin ego plures,  
» & majores pro nomine, atque gloria Christi,  
» & pro illustranda cælestium rerum veritate, labores,  
» atque ærumnas perpeffus sum, quam aut  
» fides fiat pati hominem posse, aut ullus Apostolorum  
» unquam tulerit. Neque verò propterea  
» quòd mihi, ut illis, edere miracula, atque portenta  
» facere datum non est, fidei minùs nobis



debetur, quàm illis, nam eadem nos ab eodem «  
 accepta Deo docemus: ac satis magnum miracu- «  
 lum, atque prodigium est ea à nobis perferri po- «  
 tuisse, quæ tulimus. Atque hæc ille de se, ex «  
 quibus vanitas hominis, & fastus facilè perspici  
 porest. Verùm ad cætera sacrilegæ doctrinæ por-  
 tenta addiderat novum argumentum dialogorum  
 de Polygamia, (sic enim evulgatum à se librum  
 inscripserat) in quibus colloquentes secum quos-  
 dam facit, qui rationibus, exemplisque ex sacro-  
 rum librorum monumentis, & ex utilitate Rei-  
 publicæ detortis, cuiquam plurimos gigni, ac  
 procreari filios, sobolémque ac multitudinem  
 propagari conducit, non licere solùm, sed etiam  
 præcipi Christianis hominibus asseverant, quas,  
 & quot cuique placitum fuerit ducere, atque ha-  
 bere vxores: sic intrudere nobis Barbarorum ri-  
 tum conabatur, quibus nulla fides, nullus conju-  
 galis amor, nulla charitas liberorum, nulla san-  
 guinis necessitudo, quæ omnia illis multitudine  
 distractis vilia ducuntur; quippe alii decem, alii  
 plures pro cuiusque facultatibus, aut libidine  
 alunt vxores. Adeò Capuccinum hominem præ-  
 teritæ continentia pœnituit, ut cum ipse refra-  
 ctis legum vinculis, incestis se, atque innuptis  
 contaminaverit nuptiis, ad evertendam inde ma-  
 trimonii sanctitatem, turpis nequitia magister  
 coortus sit, cujus vim, atque nomen adeò san-  
 ctum esse hominibus Christianis Deus voluit, ut  
 virum vxorémque, veluti mentem corpúsque,

R iij

vnum ex duobus fieri præceperit, penitusque alterum alterius voluntati subjecerit, & foedere sempiterno, & indissolubili junxerit, sic ut iusti conjugii solvendi, dirimendique jus ne illi quidem ipsi reliquerit, quem potestatis suæ vicarium inter homines constituit. Hunc igitur, aliosque perniciosis opinionibus per Poloniam grassantes Commendonum cum apud Principes, & maxime apud Regem redarguens, crebris sermonibus incesset, tenuit, ut Senatusconsultum fieret, ut exteri hæretici omnes à Regno abire cogerentur. Ita Ochinus Poloniâ excessit, ac omnibus jam terris extorris, ac profugus, cum in vili Moraviæ pago à veteri amico hospitio esset acceptus, ibi senio fessus cum vxore, ac duabus filiabus, filioque vno peste interiit.

*De nationali Concilio per Commendonum rejecto.*

#### CAPUT X.

**E**XPURGATA perditis hominibus Poloniâ, & illis seditionum flabellis amotis, facilius fuit gentis quoque ipsius licentiam paulum cohibere, & à templis sacerdotibusque vim, atque injuriam prohibere: sed hæreticorum capita, in quibus erant Principes nobilitatis, & homines summæ potentiae, & magnæ cum apud multitu-



dinem, tum apud Regem gratiæ, & auctorita-  
 tis, quanto intentius rem agi à Commendono  
 intelligebant, tanto ipsi acrius causæ, consiliis-  
 que incumbere. Unum erat, quod summè opta-  
 re, summæque moliri ope videbantur, ut gentis  
 Concilium, quod vocant nationale, cogeretur,  
 in quo sine vlla auctoritate Pontificis Maximi de  
 vniuersa religione inter se, prout ex ipsorum usu,  
 atque Republica visum esset, constituerent: &  
 nacti Archiepiscopum cogitatis eorum opportu-  
 num, cuius dignitas pariter in sacerdotum ordi-  
 ne, atque in Senatu emereret, ipsius intimas spes  
 pollicitationibus fovebant, incitabantque, rati  
 maximè per eum effici posse, ut tale Concilium  
 haberetur. Eòdem intenta cupido Ucangii Ar-  
 chiepiscopi rapiebatur ob eas, quas suprà attigi-  
 mus causas. Id ergo vnum dies atque noctes se-  
 cum volvebat, id clàm cum Frisio quodam inti-  
 mo amicorum coquebat, homine obscuro quidem  
 genere, sed Catholicæ Ecclesiæ, ac prisce pie-  
 tatis insectatione nomen adeptus, adversus quam  
 scripta à se multa volumina foras dederat. Neque  
 hæc quidem consilia Ucangii, & machinamen-  
 ta hæreticorum Commendonum fugiebant: sed  
 quemadmodum intentissimo studio id agebat, ut  
 ne iis quidquam procederet, ita dissimulanda,  
 quæ ad se de Ucangio deferebantur, statuerat.  
 Quòd in tali tempore, in tantis hæreticorum o-  
 pibus tantam vim hominis divitiis, amplitudine  
 honoris, amicitiiis adversariorum pollentis mini-

mè exagitandam, irritandamque, ne in apertam  
turbam erumperet, rebatur; eo minus, quod  
ne Rex quidem talibus cogitationibus abhor-  
rebat, cui multæ incommodæ opiniones ab  
hæreticis, atque ipso Ucangio inculcatæ in ani-  
mo infederant, in quibus evellendis magnum in-  
de negotium Commendono fuit. Sed cum sæpe  
eum studiosè docuisset, quàm ea res ad publicæ  
quietis, jurisque, & imperii sui conservationem  
pertineret, cum quidquid hæreticis, & multitu-  
dini semper turbidæ, ac plerumque in suam per-  
niciem furenti adjiceretur jurium, id totum de-  
trahi majestati ejus necesse esset: vix eos tot le-  
gum auctoritate, tot scitis, exemplisque majo-  
rum oppositis sustineri; quid si juris aliquid pu-  
blici illorum audaciæ adderetur, fore? Quid in-  
de non timendum turbarum, ac seditionum esse?  
In Gallia biennio antè Regem puerum, & sui  
non satis gnarum, quàm imbecillitate matris, quàm  
infidelibus suorum consiliis inductum hæc fecif-  
se, ut Poyssi habito Regni conventu discepta-  
tor ipse, materque inter Catholicos, hæreticof-  
que confideret. Num aliud eam coitionem,  
quàm initium tumultuum fuisse, ac veluti buc-  
cinam civilium armorum, atque classicum cecid-  
isse? ita ab illa disceptatione discessum ad vim,  
atque ad bellum, cujus finis nullus cerneretur,  
fuisse. His Regis animum nihil magis, quàm in-  
testinos motus, atque vim formidantem, à tali  
cogitatione penitus avertit. Itaque cum agitata  
res



res in Senatu esset instinctu hæreticorum, Rex mentionem ejus præcidit professus de sacrorum jure statuere nihil ad se pertinere. Nam non ab Episcopis modò, sed à multis præterea Senatoribus acriter, & constanter defensa religionis causa fuerat: quorum Stanislaus Volskius Castellanus Ravensis non privatis vnus populi, aut gentis conventiculis consilari, & scilicet divinarum rerum jura, & colendæ Christianæ pietatis rationem dixit, quæ omnium salutem contineret: sed in legitimis, atque œcumenicis Conciliis traditò à majoribus more ex Dei præcepto decerni, atque constitui. Atque ego, inquit, Auguste, te quidem Regem meum libenter agnosco, & confiteor: Pontificem Maximum esse mihi non dubitanter nego. Uicinium ipsum palàm profiteri furorem non audentem, ne inde auctoritate Pontificis Maximi, & rei invidiâ, & consensu bonorum opprimeretur, partim per se in officio continebat, partim per Episcopos, Catholicosque alios conatibus ejus obviàm ibat. Et ille dum suos occultare studet sensus, atque viles quoque interdum sententias in Senatu dicit, & vendicans se Commendono cum hæreticis altercatur, ne illi quidem ipsi satis fidere ingenio ejus cœperant; quam suspicionem Commendonus studiosè alebat; atque ita hominum pro præsentis vsu habebat. Sed ille in hanc cogitationem incubuerat: & cùm Tridentinorum decreto Patrum iussi Archiepiscopi omnes essent, suæ quis-

que provinciæ conventus agere ad res Ecclesiasticas ex scitis eorum ordinandas, Ucangius aptam cogitatis suis occasionem arripuit, & studium parendi Patrum auctoritati præ se ferens, consilium convocandi Synodum cum Commendono habuit, & reliqui Episcopi, & ferè optimus quisque Synodum expetebant. Idem Commendonus maximè omnium probasset, nisi suspectum Ucangii ingenium habuisset: verùm ne salutari rei, & in eam consentienti bonorum studio vnus aduersari, qui pro officii sui munere favere maximè debebat, videretur, Petricoviam, sic enim convenerat, indici patitur Synodum. Interea observat Ucangium, ejusque consilia quàm potest diligentissimè, explorat, à quo vt occultè invitatos hæreticos, capitæque eorum se comparare, vt Concilio interessent, comperit, per Nicolaum Volscium Episcopum Chioviensem, vnum eorum, quos maximè deditos sibi habebat, Regem, quæ clàm agitarentur, certiore fecit, caverique initia civilium discordiarum monuit. Itaque ex auctoritate Regis per litteras ab Ucangio pariter, & à Commendono petentis, vt ea Synodi coactio in pacatius tempus differretur: rejecta res est, & Ucangii machinationibus sine motu vllo occursum, & magni negotii discrimen Commendoni solertiâ vitatum.





*De Concilii Tridentini decretis à Rege ,  
Senatûque acceptis.*

## CAPUT XI.

**I**NTER hæc publicum Christianæ Reipublicæ Concilium, quod Tridenti cum magnâ Episcoporum frequentiâ, tum Cæsaris, reliquorumque Regum legationibus celebrabatur, tertio pòst anno, quàm revocatum à Pio IV. vigesimo, quàm à Paulo III. fuerat cœptum, ad finem pervenerat, explicatâ, atque constitutâ totâ ratione, atque disciplinâ sacrorum. Et Pontifex Maximus Concilii acta, decretâque cum auctoritate suâ comprobasset, ratâque omnia habuisset, & referri in volumen, edique, atque pareri legibus iis imperavit. Hunc librum ad Commendonum in Poloniam misit, ac dare operam iussit, ut publicè acciperetur, ex ejusque præscripto res Ecclesiastica administraretur. Ea res magnam Commendono curam incussit, magnæque illi difficultates proponebantur, quâ ab hæreticorum factione prævalida, & Regi ipsi formidolosa, quâ ab Ucangio causas publici dissidii, atque alienationis quærente. Agere cum Rege, & ei solùm librum tradere, ut tutius, ita neque ex dignitate rei esse, neque satis firmè receptum à Regno videri poterat, quod vnus non de suorum sen-

S ij

tentia Rex accepisset. Reddere porro in Senatu, ne res in disceptationem veniret, atque etiam ne contententibus hæreticis dubio aliquo, atque incommodo responso vulneraretur, timebat. Helspergæ in Prussia erat, cum id Pontificis mandatum accepit, profectus eò ad visendum Stanislaum Hosium Cardinalem Varmiensem, tum maximè Tridento reversum: is enim ob excellentes innocentiae laudes, atque doctrinæ in amplissimum Collegium lectus Concilio ipsi Pontificis Maximi nomine cum quatuor ex eodem ordine Collegis præfederat, quo dimisso Varmiam, ubi Episcopus erat, ad muneris sui functionem redierat. Ei Commendonus erat omnibus officiis, omnibus amicitiae, atque benevolentiae necessitudinibus conjunctissimus, ut faciliè hominum voluntates ex morum, studiorumque similitudine conglutinantur. Cum igitur aut conandum id sibi, ut à Rege, Senatùque acciperetur, aut aliter non reddendum eum librum statuisset, particeps consilii sui vno Varmiense habito profectus ab eo magnis itineribus ad Regem contendit: qui longè inde in Lithuaniae finibus Parzoviae conventum Regni habebat. Eò Commendonus cum venisset, priusquam aliud inciperet, aut rem cum ullo communicaret (nolebat enim spatium Ucangio, hæreticisque adversandi, seque contrà instruendi, esse) Regem convenit, atque cum eo de tota re diligentissimè egit, quo sibi ex sententia præparato, cum placuisset Regi



eâdem die verba Legati audiri, Commendono  
 in cubiculo suo relicto, seque ibi opperiri jussu,  
 Senatum ipsum ipse ingreditur, nec diu moratus  
 ad accersendum eum duos Senatores misit, à  
 quibus in Senatum, qui frequentissimè jam con-  
 venerat, est introductus, auditusque magno silen-  
 tio. Ille à causis convocandi, habendique Con-  
 ciliî exorsus, celebritatem, progressionem, ex-  
 itum denique ejus exposuit. Nihil ibi actum, ni-  
 si rite ex veterum consuetudine, & tradito à  
 conditoribus ipsis Christianæ disciplinæ more :  
 nihil prætermisum, quod ad explicandam divi-  
 narum rerum rationem, atque omnia sacrorum  
 jura constituenda res poscere visa sit, quod liben-  
 tius fecisse Pontificem Maximum, ut Patrum  
 consulta rata approbatione suâ faceret, & aucto-  
 ritate additâ promulgari, edique, atque iis stari,  
 ac pareri ab omnibus juberet. Horum igitur de-  
 cretorum volumen ab se Regi reddendum misit,  
 se, ut quæ eo in Concilio Oratorem suum testem,  
 auditoremque omnium consiliorum habuisset,  
 ejus quoque scita Poloniæ populis ediceret : esse  
 verò eum cælestibus præceptis, legibusque refer-  
 tum librum, & cum vniuersæ Christianæ Reipu-  
 blicæ vtilem, tum ægris, & ab hac novarum  
 opinionum pravitate laborantibus provinciis sa-  
 lutarem, ut quibus ad eum fortè diem fluctuanti-  
 bus mens in ambiguo fuisset, eorum jam in ex-  
 plicatâ, constitutâque sententiâ animi conquie-  
 scerent. Cum enim ab trecentis ferme Episcopis,

» & quicquid hominum doctorum totâ Europâ fuit  
» singulis accuratissimè perpensis, examinatisque  
» ea condita, atque sancita decreta essent, quem  
» tandem tantæ arrogantia, & contumaciæ fore,  
» qui non sedulò iis obtemperet? & legitimo, at-  
» que œcumenico Concilio, quod cælesti numine  
» regi dubitare nemo possit, qui Christi nomine  
» contineri velit, ipso auctore Deo, atque ex ipsius  
» doctrina Christi hausta vitæ, & pietatis præce-  
» pta tradenti suam gravatè sententiam subjiciat?  
Atque hîc quanta in Ecclesia fuerit semper, &  
quàm necessaria sacrorum Conciliorum auctori-  
tas ad tenendam, tuendamque pietatis, & fidei  
regulam, ne imbecillitate humanæ intelligentiæ  
à vero, atque recto vllam in partem inflecti, aut  
detorqueri vnquam posset, differuit: refutavit-  
que amentes eorum errores, qui ab Ecclesia de-  
sciverunt, & sese veluti à salutis navi in mare  
dejicientes, nullo inde animi portu incertis affi-  
duè fluctibus agitantur. Quid enim tam absur-  
dum, & ab omni ratione abhorrens, quàm ex  
suo quemque sensu fidem sibi, ac religionem fin-  
gere? Judicem vnumquemque, atque arbitrum  
cælestium rerum, & opinionis, & cultus, & ce-  
remoniarum, quæ adorari, quæ placare divi-  
num numen debeat, fieri: & quæ ab ipso Deo  
tradita sunt veræ pietatis præcepta, quæque di-  
vini homines servanda nobis litteris mandavêre,  
ex vniuscujusque libidine statui, distrahi, detor-  
queri? Id verò incommodum ne ipsos quidem



desertores Catholicæ religionis non intellexisse, «  
 quamquam id quidem illi re magis fateri cogun- «  
 tur, quàm verbis concedere velint: quippe eos «  
 justum, ac legitimum Apostolicæ Sedis Magistra- «  
 tum Christo Deo auctore institutum, pro cuius «  
 fide rogavit ipse, ne vnquam deficeret, & quem «  
 conuersum confirmare aliquando fratres suos ius- «  
 sit, respuentes, post concitas passim multitudi- «  
 nes, post omnes sollicitatos ad defectionem po- «  
 pulos, omniâque tumultibus, seditionibus, ar- «  
 mis denique, ac bello confusa, ac perturbata, «  
 novos sibi Magistratus, novos Pontificatus, aut «  
 Genevæ, aut Vittembergæ, aut aliis nescio qui- «  
 bus in angulis condere necesse habuisse; & quam «  
 in Ecclesia Catholica non ferunt potestatem, «  
 eam in cœtibus, & conciliabulis suis nullo jure, «  
 aut more coactis quærere, & Calvinos, & Lu- «  
 theros, & huiusmodi hominum quisquilias sacro- «  
 rum Principes, & religionum interpretes pati. «  
 At Tridentum ad Concilium veniendi factam «  
 omnibus potestatem, nec vniversos modò, sed «  
 singulos quoque benignè invitatos; datam pu- «  
 blicè fidem, seu disceptare quis, seu petere, seu «  
 monere, sive etiam exoptulare aliquid voluissent, «  
 nemini noxæ, aut fraudi futurum. Adversus id «  
 quàm absurdè, quàm intoleranter multa hæreti- «  
 cos: vt cætera fileantur, quàm illud indignum, «  
 quòd non Pontificis Maximi, non Patrum, non «  
 mortalium cuiusquam iudicium, aut disceptatio- «  
 nem admittunt? Ipsam quoque veterem sanctissi-

» morum virorum testatam litterarum monumentis  
» de Christianæ religionis fide consensionem reji-  
» ciunt, & qui id agere, id spectare videantur, vt ex-  
» leges, & cupiditatibus suis parentes vivant, impo-  
» tentiæ suæ, atque expetitiæ rerum omnium licentiæ  
» divinarum litterarum nomen, & Dei verbum præ-  
» tendunt: hoc se tegunt, in hoc delitescent, hoc  
» mutuo disceptatore differi de sacrorum jure de-  
» bere contendunt: hominum iudicium fluxum,  
» infirmum, quod labi, errare, decipi potest, sci-  
» licet aspernantur; tamquam si aut homines ipsi  
» non essent, aut errore capi, fallique mortalium  
» vni non possent, & id modò pro vero, sanctoque  
» habendum omnibus esset, quod opinati illi fue-  
» rint; ea sacrorum librorum interpretatio, senten-  
» tiæque accipienda, quam ipsi probarint, aptam-  
» que rationibus suis duxerint. Religionis, & fidei  
» jura ex sacris hauriri, atque constitui litteris nega-  
» re neminem posse, sed ne illud quidem dubium  
» esse sacrarum litterarum dicta aliter ab aliis intel-  
» ligi, extollique. Quot enim ea de re omnibus  
» temporibus Ecclesiæ cum hæreticis controversiæ?  
» quot nunc & nobis cum illis, & illis inter se de  
» cælestium dictorum vi, atque intelligentia con-  
» tentiones? Cùm verò obscura multa, & quæstio-  
» nem, & dubitationem habentia sint in divinis  
» litteris, quæ veteres illi sanctissimi, atque doctis-  
» simi viri Augustini, Hieronymi, Bernardi, Ba-  
» filii, Chrysostomi, Gregorii vt intelligerent, a-  
» liisque explicarent, tantum studii, laborisque ex-  
» hauerunt,



hauserunt, ea nos perspicua, illustria, intellectu  
facilia esse dicemus? Verius, dilucidius, ac mi-  
nori negotio, quàm illi, nos perspicere, interpre-  
tarique poterimus? qui neque vitæ, neque inge-  
nii laudibus conferendi sumus cum illis clarissi-  
mis sapientiæ, atque innocentia luminibus: &  
quam Ecclesiæ tribuere auctoritatem gravamur,  
eam aut nobis ipsis nostræque auctoritati arroga-  
bimus, aut ad Calvinum, ad Lutherum turbu-  
lentos, ac pestiferos homines deferemus: qui, ut  
perpetuus hæreticis mos, verba Dei interverten-  
tes, ac per summam arrogantiam ad sensus, cu-  
piditatēque suas accommodantes, omnem dissol-  
vunt Christianæ pietatis disciplinam: & cum om-  
nis semper Ecclesiæ Catholicæ cum omnibus hæ-  
reticis lis, & controversia de sacrorum librorum  
sententia fuerit, sitque maximè cum iis, qui ne-  
fariâ impudentiâ Dei verba semper in ore ha-  
bent, ab iis discedi non oportere vociferantur,  
quasi ea, aut repudientur à nobis, aut vlla lex,  
vllum in Ecclesia colendæ religionis institutum  
sit, quod non in divinis litteris habeat funda-  
mentum: tamen illi cum vrgentur, vsque recur-  
runt eò, in eamque se arcem recipiunt, ut dicta  
Dei, sicut ipsi aut intellexerunt, aut malitiosè in-  
terpretati fuerint, objiciant: denique nullam,  
nisi quam ipsi invenerint, aut probaverint sen-  
tentiam recipiant. Solos-ne igitur Calvinos, &  
Lutheros, aut alios ab his pestibus ortos verita-  
tem invenisse? Solos divinæ mentis internuncios,

T

„ atque interpretes nobis divinarum legum è cælo  
 „ demissos esse? nisi hæc edita in lucem monstra,  
 „ atque portenta forent, genus humanum mersum  
 „ æternis errorum tenebris futurum fuisse? quam  
 „ malum amentiam, quem huic sæculo furorem  
 „ objectum, vt salutem perditorum hominum som-  
 „ niis addictam habere, & de re omnium maxima  
 „ ex paucorum aut inscitia, aut scelere statuere non  
 „ pudeat? Ergo Catholicæ Ecclesiæ contemnetur  
 „ auctoritas, cum qua Deus ipse futurum se vsque  
 „ ad consummationem sæculi, nec portas inferi  
 „ prævalituras adversus eam est pollicitus? Usurpa-  
 „ tores isti verbi Dei, & nominis ejus dignitate ad  
 „ fallendos imperitorum animos abutentes audien-  
 „ tur? Qui & ipsi arripiunt, & aliis faciunt potesta-  
 „ tem sacrorum librorum dicta flectendi, torquen-  
 „ dique, quò cujusque animi aut error, aut libido  
 „ tulerit? Hi non eo, quod plures de Deo, deque  
 „ Dei verbis, ac ne, quod omnes quidem censue-  
 „ rint, consenserintque, teneri se velint, verbum  
 „ Dei ipsi opponant, assidueque jactent, quod in-  
 „ de in quam placitum fuerit sententiam detor-  
 „ queant, eoque stari oportere, vnúmque habere  
 „ disceptatorem pugnent; justos ejus rei judices re-  
 „ fugiant, ac detrectent, atque insuper iniquitatis  
 „ insimulent? Quod perinde esse, ac si non Regem,  
 „ non Senatum, non Judices audiendos, sed jussa  
 „ legum spectanda, atque iis parendum esse con-  
 „ tendatur, quæ inde quisque ad voluntatem fin-  
 „ gat, & quocumque cupido tulerit, detorqueat;



quid verò id esse aliud, quàm omnes leges, om-  
 ne discrimin, omnia jura confundere, omnem  
 tollere hominum societatem? Nec finem vllum  
 his malis, diffidiisq̃ imponi velle? id adeò no-  
 vorum Magistrorum scelere, atque fraude fieri,  
 qui quò vulgi studia retineant, ab omni pacis, &  
 concordia mentione, vt à peste abhorrent: quip-  
 pe quibus in eodem versari, mergique errore  
 multitudinem expedit, & reconciliatâ populo-  
 rum cum Catholica Ecclesia gratiâ, pace, & tran-  
 quillitate constitutâ, sedatâ, atque compositâ  
 Republicâ, nullos se fore intelligant. Ergo has  
 lites, & controversias serunt, aluntque, atque eò  
 maledicendi, atque evertendi omnia libidine  
 provehuntur, vt nullum inter homines relictum  
 Ecclesiæ suæ Caput, ac Rectorem, nullum cer-  
 tum Magistratum, ac Judicem, ad quem dubiis,  
 difficilibusque de rebus referatur, datum esse con-  
 tendant, pugnaciterque defendant: & quod vitii  
 ne humanarum quidem legum latores, aut vllius  
 quantumvis barbaræ Reipublicæ conditores, si  
 habeant, ferendi sint, id cælesti Numini, divi-  
 næque rationi obicere execrandi homines non  
 verentur: Ecclesiâque morte, ac sanguine JESV  
 CHRISTI Dei ad salutis spem revocatam, nec  
 hominum consiliis, sed ejusdem Dei sapientiâ  
 constitutam, veluti navem sine gubernatore, cœ-  
 tum sine rectore, corpus denique sine mente re-  
 lictum aiunt: quod haud satis sciri, vtrum contu-  
 meliosius dicatur in Deum, an hominibus exitio-

fius futurum fuerit. Commemoravit inde clades multorum Regnorum, Provinciarúmque Christiani nominis, quas obiens ipse proximis annis oculis aspexisset suis, & quot intestinas seditio- nes, quot motus armorum, quot bella, quot cæ- des, direptiones, vastationes, quot sacrilegia, quot sacerdotum à templis, sedibúsque suis ex- pulsiones, quot denique conversiones, atque adeò everfiones Regnorum, ac Rerumpublica- rum hæ pravitates opinionum peperissent, multis verbis luculenter, atque accuratè disseruit; ipsius quoque Poloniæ vulnera aperuit, ab hac eadem peste imposita, pristinam ejus gentis tranquilli- tatem, religionem, consensionem, atque ex eo vim, & robur, florentémque eorum omnium sta- tum cum præsentibus incommodis, ac perturba- tione comparavit: Hortatúsque inde est ad reti- nendam patriæ dignitatem, geminámque glo- riam iis à majoribus relictam Catholicæ pietatis, & bellicæ virtutis incumberent; quæ ad id vnica esse ratio, viáque videatur, æcumenici Concilii scita, decretáque susciperent; ex iis remedia san- nandis eorum animis, atque tot Reipublicæ in- commodis haurirent: atque hæc tam varia, tam multiplicia sacra, tot, ac tam dissimiles, ac pu- gnantes opiniones, quas paucorum improbitas invexit, plurimùm aut error, aut levitas, aut li- centia aluit, propagavit, & vt malorum omnium segetem, vt morum pestem, & omnis bene con- stitutæ Reipublicæ tollerent. Postremò contesta-



tus Deum est, se, quæ saluti eorum vtilia essent, & privatim sæpè, & tum publicè monuisse Pontificis Maximi verbis, eadem supremo illo vniversitatis casu, atque vltimi iudicii die, cum omnes homines ad Tribunal Dei aperti, nudique, ac nullis tecti involucris constiterint, objecturum iis, atque testaturum, atque hæc dicens reddidit Regi librum. Quæ quidem omnia tantâ vi, tantâ gravitate, atque contentione peroravit, vt non commoverit modò Senatum, & maximè seniores, qui & pristinam Regni valetudinem, & ejus initia morbi recordabantur, sed ipsos quoque hæreticos obstupescerit. Ego quidem, qui præsens pone ipsum aderam, librum manu ferens, affirmare possum, plerosque lacrymantes me animadvertisse. Cum finem dicendi Commendonus fecisset, vellétque Senatu abire, manere eum Rex iussit. Haud enim, inquit subridens, minùs liberè apud linguæ nostræ ignarum, quàm si abesses, sententiæ à nobis dicentur; ac statim exquiri cœptæ sententiæ. Ucangius Archiepiscopus Gnesnensis, qui primus rogatur, ab ingenio suo non discedens, cum magno honore verborum, & Pontificis Maximi studium, & Patrum Tridentinorum sapientiam extulisset, accipiendum quidem in præsentia librum, sed Commendono respondendum censuit, Regem posteaquam illa decreta cum suis legerit, quid sententiæ habeat indicaturum: Cum Episcoporum, & Catholicorum omnium fremitu aspernantium orationem ejus

T iij

est auditus, quâ sub arbitrium Regis, Senatûsque revocari scita Concilii videbantur. Tum Rex non expectatis aliorum sententiis, quas ex murmure perspexerat, satis scire se dixit eam à Commendono orationem ex tempore habitam, cùm accersitu suo eâ die in Senatum venisset, neque ita futurum divinare potuisset, ut quæ tantâ vi, atque ordine pronunciaisset, ea divini numinis instinctu magis, quàm præmeditatione, aut facultate suâ dixisse, ac monuisse eum existimari posset. Itaque sibi placere, ut Concilii œcumenici jussa accipiantur, iisque, ut convenit, & decet, obtemperetur. Atque in hanc sententiam per Vicecancellarium, ut mos Regi, responsum Commendono est redditum, deque eo Rex, Senatûsque multis inde, & gravibus verbis est ab ipso collaudatus.

*De ejus studio peragrandi Poloniam.*

CAPUT XII.

**I**NDE ab dimisso Varsaviensi conventu Commendonus consilium ceperat Poloniam omnem perlustrandi, præter insitum ingenio ejus videndi, ac peragrandi studium haud rebus ipsis inutile ratus, singulas obire Provincias, cum Ecclesiarum Præsidibus colloqui, & singularum noscere incommoda, quo iis, quantum posset, mederetur, & ultimis quoque gentibus, queis nun-



quam antea visus Apostolicæ Sedis Nuncius esset, specimen sui ostendere. Vistulâ nobili Sarmatiæ flumine Dantiscum ad Balticum mare descendit, & ex itinere ad Plotiam, & Uladislaviam, & Culmam Episcopales omnes vrbes ad ripam fluminis sitas appulit. Dantiscum frequens est, ac celebre oppidum ad Vistulæ ostium, ac nobile Septentrionalis plagæ emporium portu maximè inclytum, quem Vistula lato se ore in mare effundens efficit, vbi sæpe sexcentæ naves majoris formæ ex Livonia, Suecia, Dania, Germania, Belgia, Britannia, Gallia, atque Hispania varias ferentes, petentisque merces videri dicuntur. Præter hunc duo sunt in Prussia portus ad Albingam, & Chinispergam, sed nullus celebritate cum Dantiscano conferendus, quamquam Albingensis magnas habere opportunitates dicitur. Iis ex Regnis vinum, oleum, saccarum, atque aromata, & lanci panni, & serici advehuntur, exportantur frumenta, vinum, oleum, mella, cera. Hanc urbem loci opportunitate ducti Teuthonici sodales condidere paulò postquàm in ea loca ad res contra Prussos gerendas à Pontifice Maximo missi venere, quæ cùm postea injuriis coacta se in Polonorum potestatem tradidisset, ab iis mutata fidei præmium libertatem cum legibus suis vivendi accepit, quam miscendo se inde alienis discordiis sæpe auxit, interdum etiam omnem amisit, sed pecuniâ, atque auro omnia damna sarcivit; quo quàm armis validior civitas, tectiorque

semper fuit, frumenta enim, aliâque quæ Poloni ad eorum urbem deportant externis mercatoribus, aut omnino alteri, quàm Dantiscano civi vendere per leges eorum non licet, quo fit, ut iis parvo veneant, quæ inde ipsi quamplurimo vendunt. Hinc magnæ illis, & privatim, & in commune divitiæ, quibus adhuc suam retinent, ac tuentur libertatem, atque urbem publicis, & privatis ædificiis egregiè nobilem incolunt. Et est Prussia ferme omnis, quàm Polonia ædificata elegantius: nam raræ apud Polonos è lapidibus domus, è ligno, suppetentibus facilè materiam vastis, & frequentibus sylvis, extruunt, nec id genti studium laxè, aut ornatè habitandi. Prussia Germanis ferè incolitur, vnde cuncta illic Germanico more, quamquam pastores, cultorésque agrorum nec Germani sunt, nec Germanicè sciunt: reliquiæ antiquorum Prussorum esse putantur, nec hos Lutherana hæresis omnes, ut urbanos, traxit cum linguæ commercio discretos, tum quâ semel imbuti erant, religionem constantius retinentes. Ne autem omnis à prisca pietatis cultu, in novas, diversâsque sectas Prussia abierit, maxime virtus obstitit, ac vigilantia vnius Hosii Cardinalis. Is & suam ditionem (nam pluribus oppidis Varmiensis Episcopus imperitat) à contagione ejus labis prohibuit, & inductum in Prussiam Jesuitarum Collegium Brumspergæ, veluti in statione adversus hæreticos collocavit, & multos sanctitas viri, innocentiaque continuit, ut quam-



quamquam latè in omnes fufum id malum fit, tamen inter ipfam nobilitatem nonnullæ in Ecclefia fide familiae permaneant. Pruffi vt dicti à veteribus fint haud fatis ne inter ipfos quidem conftat: partim Germanis adfcripti, partim Sarmatis videntur, & hodie utrâque mifti sunt gente: fed tum nulla cum his populis commercia, ideo ne cogniti quidem fatis; fub Nerone profectum Pannoniâ Equitem Romanum ad emenda fuccina in ea loca penetrafle vt miraculum referunt. Prufforum nomen à Boruffis accepere, qui è Scythia, vltimisque Europæ terminis, quâ ortum Tanais habet, profecti eam regionem vastatam, defertamque à Gothis infedère: ibi diu patrio ritu, nullis ædificiis, nullo agrorum fructu, nifi quem terra fponde ferret, nullo aut in Deos, aut in homines cultu, denique nullo imperio, aut lege egere, melle quod paffim per fylvas apes fundebant, & lacte, & fanguine equorum, & ferarum carnibus vefcentes; tanta barbaries inerat, vt fine vllo conjugii nomine, aut difcrimine fœminas in quafcunque, aut fors, aut libido impuliffet, brutorum ritu inirent. Ex tam prompta, & promifcua venere ingens brevî propagata multitudo, quâ prægravante, ne anguftiæ inde finium vrgerentur, infantibus, quæ fœminæ ederentur, necatis, mares tantum fufcipi, nutritique inftituerunt, nec vlla toto biennio muliebris ftirps fervata. Graves accolæ finitimis jam erant, nihil circâ non infestum latrociniis, ac rapinis

juventute eorum relincente, nec ipsis moderat.  
facilius erat nullo rectore, aut lege agentibus.  
Ob id cum de Republica aliquando coivissent,  
vnus Barbarorum haud sanè stolidi ingenii, no-  
mine Viduutus, qui piraticam faciens nonnihil  
» etiam opibus eminere inter eos cœperat, Quin,  
» inquit, ab iis apibus, quarum quotidie pascimur  
» fructu, vivendi quoque exemplum capimus? An  
» videtis, vt illæ vni parere didicerunt, vt ab eo  
» æquo jure habeantur, vt inertes ad laborem co-  
» guntur, strenuis, atque industriis optimæ in suis  
» cavis sedes dantur? Dictis assensere omnes, atque  
ipsum Broterum suum esse Regem apum, ipsi  
suâ linguâ sic vocabant, jusserunt. Non defuit  
illi animus, atque indoles Regis, ab illa promi-  
sua cum qualibet se miscendi consuetudine revo-  
cavit, conjugiaque, & discrimina liberorum in-  
stituit, & aliquod quoque legum frænum Barba-  
ris iniecit; sed ante omnia Deorum metum, opi-  
nionemque incussit, quâ plusquam vllis legibus  
multitudo continetur, sumpto à finitimis Samo-  
gitis, atque Lithuanis more, serpentes, rarum  
in frigida regione animal, vt Deos vereri docuit:  
deinde feras quoque, quas in victum antè assi-  
duè venabantur, quò iis parceretur, sylvarum nu-  
mina esse dixit: postremò sylvas ipsas quasdam  
consecravit, & divisos inter omnes agros colere  
jussit. Sed vicinis populis eò terribiliores Barba-  
ri erant, quòd sub Regibus disciplinam viribus  
addiderant, cum Massovios (Poloniæ populi sunt)



populationibus, cladibúsq; fatigatos in magnum metum suarum rerum coniecissent. Conradus eorum Rex ad Pontificem Maximum Romam confugit, adhibitis Germanorum quoque, & maxime Saxonum precibus, qui & ipsi ægrè Barbaros à finibus suis submovebant. Ab eo, quia Christiani à contemptroribus Dei oppugnabantur, missi in Prussiam sunt Teutonici sodales, qui tum maxime Syrià à Saracenis pulsi, novam sedem militiæ à Pontifice Maximo expectabant. Ii ad xxx. millia hominum fuisse dicuntur, Germani omnes genere; cæteræ enim omnes nationes eâ societate excludebantur, quæ paucis orta initiis, aucta, confirmatâque Pontificum Maximorum auctoritate ad magnam dignitatem, opesque pervenerat. In Prussiam profecti sedes accepere citeriorem Vistulæ ripam, Culmensémque omnem tractum, multosque annos vario Marte cum Prussis bellarunt. Postremò secundis aliquot præliis attritis Barbarorum rebus, & magnâ multitudine eorum interfectâ, omni Prussiâ potiti sunt. Gens Christiana sacra accipere coacta, missis à Pontifice Maximo, qui eos in Christianæ disciplinæ ratione erudirent, quam adeò Barbari aspernati initio sunt, ut Aldebertum Balemum Archiepiscopum, virum, quem sanctitas morum, & miraculis affirmata religio in Divorum retulit numerum, ad eos à fædo cultu bestiarum avertendos Româ profectum, sacra facientem aggressi obtruncarint; & sæpè, quam metu, & simulatio-

ne susceperant, Christianam religionem exuerint. Sed Pontifices Maximi Provinciam omnem in Episcopatus diviserunt, datis Episcopis, qui eos regerent. Horum operâ paulatim mollitâ Barbarorum mentes, & ad pietatis studium traductæ sunt, violatis eorum lucis, serpentibusque, & aliis diis interfectis, atque abolitis. Mansit ergo Prussia in Teutonicorum sodalium dititione, & Romanæ Ecclesiæ fide usque ad memoriam nostram, & vires, atque imperium in eam amplitudinem propagarunt, ut aliquando cum sexaginta millibus equitum in aciem descendisse dicantur, ad eorum præfecturam viri Principes Regio quoque orti sanguine summis studiis aspirarent, magnûmque decus, ac titulum in familiam se intulisse putaret, qui iis præpositus cum imperio fuisset; ipsi Magistrum appellabant, & Regiâ præditum potestate Regio quoque cultu habebant. Quamdiu ille ferus, & internecinus hostis exercuit, mansit ei integra disciplina, cujus vnus est custos optimus timor, qui vbi domitis, ac debellaris Prussis decessit, in omnem præcipites licentiam, luxuriâque decidere, elatiquæ successibus, nec jam Prussiæ dominatu contenti, animo ad vasta, atque immodica adjecto, sæpè Samogitios, atque Lithuanos armis tentarunt. Sed longè atrocissimum, maximèque diuturnum cum Polonis bellum gesserunt, quorum in primis rogatu in ea loca missi fuere. Cum iis per centum & quinquaginta annos vario eventu de potentatu



contenderunt. Postremò à religione, sacrisque Romanis desciscentes, cum Catholica fide etiam imperium amisere. Pervasit enim velut continens incendium omne Germanicum nomen exitialis Lutheri doctrina, atque hos Prussia, & Livonia sodales (nam in ea quoque gente objecti Barbaris erant) tantus furor incessit super novitatis studium insitum mortalium mentibus, stimulante animos cupiditate occupandi, & hereditarias sibi, suisque faciendi praefecturas, quas à societate habebant, ut non abjecerint modò cruces, quas in signum institutae adversus Catholicam religionis hostes militiae collo suspensas, ex lege societatis assidue gestare antè consueverant, sed eas per summam Christianae pietatis contumeliam, atque ludibrium, figerent pro signo, telisque incescerent, & sclopiis collimantes trajicerent, ac perfringerent. Iustà igitur læsi Dei irâ factum est, ut ea nobilitatis subsidia, atque industriae præmia Germanico sanguini, ac nomini erepta interierint. Nam Albertus Brandenburgus societatis Magister per speciem finiendi diutinum cum Polonis bellum, quod ægrè jam sustinebat, sublato omni societatis jure, ac nomine, cuius ipse suffragiis ad eum honorem pervenerat, publicas opes ad privatam potentiam vertit, & Romani Pontificis, & Germani Caesaris spectatâ auctoritate, partitâ cum Polonis Prussia, se in fidem, ac ditionem eorum dedit, cum eo, ut Dux Prussiae appellaretur, atque concessi sibi imperii

jus filios quoque, posterósque ejus sequeretur. Ipse immemor religionis, votique, quo se Deo obstrinxerat, per licentiæ magistræ disciplinam Lutheri, ad quam transierat, uxorem duxit, filiúmque propè septuagenarius suscepit. Hunc ipsum Albertum ego, cum obirem Prussiæ partem eam, quæ Regni illius est, apud Chinisbergam vidi, & ut externus, & qui cum Romano Legato in ea loca venissem, (nam Commendonus apud Cardinalem Varmiensẽ Hedspergi substiterat) benignè, atque hospitaliter sum invitatus, & cœnæ adhibitus, in qua ipse medius inter duas matronas, quæ illi cibum ministrabant, interdum etiam ori admovebant, discubuit; erat enim confectus ætate nonagesimum annum agens. Sermo ejus comis, & ut fermè senum, multum de temporum suorum rebus, quæ mecum, aut à me intelligi volebat, Latinè loquebatur, sed adeò inconditè, ac barbarè, ut pleraque me fugerent, præterquam quòd lenta ob senium, ac parum explicata oratio ejus erat.

*De Prussiæ feris.*

CAPUT XIII.

**A**B EUNTEM, datis qui ad septa fèrarum visenda ( hac enim potissimùm causâ veneram ) deducerent, quæ quinque inde millia passuum apud novam domum ille habet, multa



cum humanitate verborum dimisit. Ferarum, quas Prussia habet, paucas narrasse sat fuerit: cum id mihi susceptum non sit, nec desint scriptores, quibus id solum propositum. Ex omnibus maximè differunt à nostris Uri, ac Biffontes, sylvester vterque bos, vtrique natura ferè eadem, sed species diversa, etsi plerique auctores nullo discrimine eos tradidère. Vis, velocitas, feritas, magnitudo vtrique pæne paria, sed forma in nulla re à domesticis bobus, præterquam pilo differt, qui horridior belluæ, & subniger nonnihil, & mole corporis bovis magnitudinem excedit. Julius Cæsar paulò infra Elephantes posuit. In Mazoviæ sylvis circa Ravam armenta eorum esse feruntur, nec ferè alibi in Polonia Uros capi, seu natura loci gignit, sive alibi venatu agitati, pulsique eò congregantur, vbi capitale fuerit præterquam ex auctoritate Regis eos violasse, aut omnino in ea loca venatum isse. In Prussia vitulos vidi, quos stabulo emissos celeri sanè motu concursantes, & lascivientes spectavi. Horum carnibus vescuntur Poloni, & Principum convivii adhibent, paulum frigoribus antè maceratas; & ipsi edimus, nec mihi à veri bovis carne magnopere distare sunt visæ. Fertur sylvestris, ac fera bellua agrestes vacas inire interdum: verum nec genitum ex his vivere, & pelli armento, qui se alienis miscuerunt: cingula quoque dissecto ferè corio fiunt, quæ juvare mulierum partus dicuntur. Biffontibus & vis, &

figura atrocior, pandâ, atque latâ cervice, deducta cornua, ac majora, quàm Uris torta, ut Taurorum, erectâque ad ictum, & acuta, colore nigro, tactu lenia, intus cava, aures parvæ, ut juvenis, grandes oculi, rubentes, atque ignei, torvo intuitu, ac truci, cum irascitur, flat minaciter naribus, mento ut barba penderet juba, eadem collum omne, armosque vestit, & anteriora crura hirsutis villis, & nigris: à collo super humeros declive tergum, graciles clunes, posterior omnis pars strigosior. Cauda ut Tauri, quam per iram in cursu erigit, vibratque. Rariùs hunc, quàm Urum conspiciunt. Biffontem ego in Alberti septis vidi juvenem, cui cum sepimentum ingressus, in quo ille claudebatur, temerè contemplandi cupidus appropinquarem, admonitus ab eo sum, à quo ducebar, pedem ut referrem; si fera impetum fecisset, spatium ad recipiendum me in tutum extra septa non habiturum, quamvis passus non ampliùs viginti progressum, & bellua pæne ad lapidis ictum abesset, tantùm ei inesse aiebat pernicitatis. Pascebatur vnà agrestium boum armentum, à quo ille non abscessit, sed in nos versus intentus, & ferox respiciebat. Neutra ferarum facilè aut conficitur, aut capitur; Biffonti eam vim esse ferunt, ut vnà equum, fessorumque ictu cornuum sublimes tollat, & celeritatem, ut si porro concitus insequatur, nullius equi quantumvis pernicis ope effugias. Qui capere vivos volunt, quod rarò accidit, foveis insidiantur,



fidiantur, sed non faciliè quò velis impellas, vltro in hostem irruentem duplex aggrediendi ratio. Sagittandi periti in equis disponuntur, qui etiam averfi, & fugientes tendere arcum Scytharum ritu, ac mittere jacula norunt, in quem primum fera canibus excita impetum dederit, is coniectis telis capeffit fugam: insequentem magnâ vi excipit alius, in hunc priori relicto avertitur, ita subinde pluribus subeuntibus, ac repentibus pugnam, atque illo in eum ferente semper imperum, qui se ei novissimus obtulerit, fatigata, ac sagittis confixa concidit. Est & alia adoriendi via. Venatores deligunt arbores non magnitudine, ne circumeundæ cursu sint, sed aptas corporibus ab ictu belluæ tegendis, & quas levi motu corporis ambiant. Ad has consistunt crebris circa stationibus, fera canibus, & missilibus irritata, in quem primum conspexit accensa fertur: ille arbore tectus declinat ictus, & inferentem se venabulo appetit, bellua in arborem, velut in hostem sævit, & percita rabie, & evulsura radicibus submittit cornua, tantòque atrociùs furit, quanto interea graviùs à venatore foditur: in eo certamine haud minùs quàm cornu bestię, linguam, caudamque timendam esse venatores aiunt, quam exertam injicit, & quā est asperitate abripit, vel si summam modò vestem apprehenderit, qui amovere ab arbore, seque, ac feram, & quietem capere voluerit, rubrum è capite projicit pileum, in quem illa vesano impetu ruit,

vel à tergo vlulans , telúmque conjiciens alter in se avertit , ac pari ratione ex arbore pugnam ciet , donec lassitudine , ac vulneribus confecta cadit . Capitur item iisdem sylvis animal , cujus consimilis cervo figura , nisi quòd paulùm magnitudine antecedit , cornua vt cervis magna , & ramosa , eo tantùm differunt , quòd non erecta consurgunt , sed flexa reclinantur in dorsum , nec teretes eorum rami , sed lati , ferme vt pedum anserum palmæ junguntur ; data ad pugnam non videntur : nec fera ipsa invadentes canes cornibus , sed calce petit , interdum lethali ictu ; capitur ferè validis circumdatis plagis , in quas à tergo clamoribus , aut canibus acta præceps cursu se induit : si catulos suscipias , alæque vti cervæ mansuefiunt , atque ad homines assuescunt , vngulâ eorum curari comitalem morbum constans est ferè apud omnes opinio . Quidam omnibus vngulis eandem esse vim , quocumque tempore , aut modo cæsis contendunt , quidam dexterâ posteriori crure viventi abscissum oportere esse tempore , quo maximè ardore libidinis sævit . Correptos morbo comitali , cùm visu , sensûque ablato affligantur , vngulæ parte , quantumvis parvâ tactos excitari credunt ; anuli ferme ex ea fiunt , quos item qui in digito habent , corripere eo morbo negant , & vulgò feruntur . Itali Bestiam magnam ab corporis mole vocant . Poloni Onagrum , recentes scriptores Alcem indidère nomen . Onagri sylvestres sunt



Asini, quos Asia, & Africa, & præcipuos Phrygia, & Licaonia ferunt; nec huic simile quidquam. Alcibus Julius Cæsar Caprarum maximè formam, & varietatem tribuit, & mutilas cornibus esse, & crura sine nodis, articulisque habere scribit, & ne quietis quidem causâ procumbere, sed applicare se arboribus, quas subruì à venatoribus solere, ut cum se fera in eas reclinaverit afflictiis pondere arboribus vnà concidat. Quorum rerum huic visæ à nobis Alci nihil convenit. Plinius Alcem in Septemtrionalibus oris gigni jumento similem, nisi proceritas aurium, & cervicis distingueret, tradit. Et feros equos in Alberti septis vidi, qui in vastis Prussiæ, & Samogitiæ nemoribus capiuntur nullum ad usum: nam præterquàm quòd parvi sunt, ac deformes, & domari, & sessorem pati ob infirmitatem curium posse, & omnino mansuescieri negant; ab hominis certè conspectu statim refugiunt; carnibus eorum, ut reliquarum ferarum incolæ vescuntur.

*De Succino.*

CAPUT XIV.

**I**N Prussici maris littore Succinum legitur inter reliqua maris purgamenta rejectum, & quibus ea cupiditas est, etiam inter fluctus scrutantur, & vel arenâ obrutum, limòve eruunt. Captura

X ij

ejus publicè præconi subjicitur, & cupidè, & sæpe magno redimi pluribus licentibus solet, nec levis quæstus ex eo, quamquam non quantus antea fuit, & Romanis olim tanto fuisse in prærio, luxúque videtur, ut petitos bello hos populos Domitiano Cæsare ob Succinum memoriæ proditum sit, & Barbaros mirantes rem nullius usus tanti à Romanis æstimari, non insulsè tradito, quod vilissimum apud eos, & belli causa erat, pacem recepisse; & Plinius tradit, quantumvis parvam hominis è Succino effigiem vivorum, & valentium hominum pretia excessisse. Minuit, & minuta majestas religionis hoc sæculo illi pretium, cum antea in Dei, Divorúmque imagunculas formatum à piis hominibus magnâ mercede pararetur, fingeretúrque vis ingens in parvos globos, quibus filo trajectis preces numerantur, quæ ad Virginem Genitricem propitiandam tradito à majoribus ritu fiunt, crebróque ad certum numerum repetuntur, quas ab quadam similitudine coronas appellamus, iisque haud minùs nostræ fœminæ, quàm cætero ornatu, quo nitere, ac splendere student, lætantur. Nunc capta ea gens novis erroribus, hæresibúsque ab religioso usu vertit in ludicra, latrunculos, coclearia, vasculósq; fingens, caveas quoque, quibus concinentes aviculæ includuntur, vidimus affabre factas, sed nullo usu ob fragilitatem: hoc fit, ut nec appetatur, ut antea, nec tanti vaneat. Quæ illi natura, aut ex quo gignatur nondum



COMMENDONI CARD. 165

fatis compertum, quamquam non incuriosè qua-  
situm à multis, variantque de eo auctores, non  
veteres solùm, sed etiam nostri. Credibile est  
in Septemtrionis insulis, sive scopulis, sive arbo-  
ribus manare liquorem, vt cerasis gummi, &  
mox concrefcere gelu, ac in mare delapsum du-  
rari aquis, expuìque inde fluctibus in contrarium  
littus. Hoc gigni modo argumento sunt quis-  
quilæ, aliæque quæ in pellucidis cernuntur: nam  
culices, apes, muscas, araneos ipsi vidimus, quas  
liquenti adhæsisse humori, inque durefciente  
inclusas existimare licet, nullâ parte sui corru-  
ptâ, læsâve. Martialis ludere in omnia versicu-  
lis solitus non apem modò, & formicam, sed vi-  
peram quoque Succino interceptam: ipsos ver-  
siculos subicere non pigebit.

A P I S.

*Et latet, & lucet Phaëthontis condita gutta,  
Ut videatur apis nectare clausa suo.  
Dignum tantorum pretium tulit illa laborum,  
Credibile est ipsam sic voluisse mori.*

FORMICA.

*Dum Phaëthontea Formica vagatur in umbra,  
Implicuit tenuem succina gutta feram.  
Sic modò quæ fuerat vitâ contempta manente,  
Funeribus facta est nunc pretiosa suis.*

X iij

## VIPERA.

*Flentibus Heliadum ramis dum vipera serpit,  
 Fluxit in obstantem succina gutta feram.  
 Quæ dum miratur pingui se rore teneri,  
 Concreto riguit vincta repentè gelu.  
 Ne tibi Regali placeas, Cleopatra, sepulcro,  
 Vipera si tumulo nobiliore jacet.*

*De Russia.*

## CAPUT XV.

**D**ANTISCO Commendonus Elbingam, atque inde Varmiam petiit, fuitque plures cum Stanislao Hosio Cardinali Varmiensem Episcopo dies, ut supra diximus. Visâ Prussiâ regressus in contrarium latissimè patentis Regni latus, quâ maximè in meridiem vergit, multis peragratis populis, Roxolaniâ, hodie Russiam vocant, transit, adito, ut docuimus, ad Parzoviam Rege: à quo dimissus Lublinum, atque inde per Chelmiam, & Belzam Leopolum venit. Caput hæc Russiæ est ejus, quæ Polonorum imperio paret, Archiepiscopali honore nobilis, quin quod rarò ulli civitati accidit, duo sunt Archiepiscopi; nam præter Catholicum, & Romanæ Ecclesiæ cultorem, cui civitatis, & sacrorum cura mandata est, Armeniorum natio suum in ea



civitate Archiepiscopum habet. Ea Turcarum pressa servitio sedibus suis relictis, cum Euxinum transmisisset ab hostio Danubii per Valachiam in Russiam transgressa permissu Regum ibi confedit, vsuque sunt Armeni Russis, quod dediti mercaturæ cum Turcis, Persis, & aliis Euxini accolis negotiantur, externaque multa in Poloniam inferunt, & immunitatem vectigalium inter Barbaros habere dicuntur datam iis à Mahomete, quem Turcæ, multaque Orientis nationes relatum inter cælestes pro Deo colunt. Hunc educatum in Armenia, & ab iis benigne habitum, postquam ad magnum imperium pervenit, verasse ferunt vllum ab Armenis portorium exigi. His Leopoli, sacrisque eorum Archiepiscopus præest, magnusque ei cultus, honorque ab illis habetur. Is advenientem Commendonum extra urbem obviam egressus, præcipuâ gratulatione accepit, eumque demissè admodum, & humiliter est veneratus. Armeni in Romanæ Ecclesiæ fide se esse prædicant, & Pontificem Romanum in jus Divi Petri Apostolorum Principis successisse, ac divinæ potestatis inter homines vicarium esse consentunt, sacra tamen ab Armeniorum Patriarcha petunt, & Patriarcham ipsum à Romano Pontifice ex eo aiunt non petere, quod remissum id illi à Pontificibus Maximis, irrogatumque hoc genti Armeniorum privilegium sit, tum ob longinquitatem itinerum, tum ne eâ re Turcas offenderent, magisque in se irritarent.

Hæc differentes ipse audiui, & graviter ferentes, si quis secretos ab Ecclesia Romana eos diceret, cuius se in fide, ac ditione esse contendunt. Sed credibile est, ut in externos ritus degenerarunt, ita errores quoque in mentes eorum multos irrepsissent. Matrimonia ipsa magnâ religione habent, rem divinam facientem ego Archiepiscopum eorum spectavi eodem ferme cultu, quo nos, ac pari collucens circum luminum, ac vestimentorum apparatu, quæ ne formâ quidem magnopere à nostris differunt. Azimum panem, ut nos, immolant, sublatamque manibus sacramentum hostiam populo adorandam nostro more præbent, sacrum omne magnâ religione conficiunt: leges, carminaque divinarum rerum Armenicis scripta litteris, ac linguâ habent, sed ea præter sacerdotes pauci intelligunt, vulgò ipsi Scythicâ, & Turcicâ linguâ loquuntur, Latine nesciunt, sed Latinos scriptores divinarum litterarum interpretes aliquot in Armenicum versos habent, plurimumque auctoritatis iis tribuunt. Ephrem Armenium inter Divos relatum colunt, scriptisque ejus maximam fidem habent. Præter Armenios, qui ferè Leopoli, & Carmenesii habitant, fusus totâ Rusiâ est ingens hominum numerus in sacrorum disciplina Græcorum rationem, atque instituta sequentium, Rutheni vocantur, & Chiovia (quæ civitas est ad Boristhenem in citeriori ripa sita, & latè caput earum gentium olim fuit) Antislitem, atque Principem sacrorum habent, quem



quem ipsi Metropolitanum Græco vocabulo appellant, dictoque ejus audientes per Russiam, Vallachiam, Lithuaniam multi Episcopi sunt, & aliquot etiam trans Boristhenem in Moscorum Regno. Ipsi Constantinopolitani Patriarchæ imperio, ut reliqui omnes in eadem secta sunt, continentur. Chioviæ Metropolitanus fuit Isidorus, qui cum splendido comitatu centum equitum è Russia Florentiam vocatu Eugenii IV. Pontificis Maximi ad clarum illud orbis terrarum Concilium venit, ad quod non Græci tantum, atque Armenii cum Patriarchis, & Præsulibus suis convenere, sed cum Pontifice Maximo Imperator ipse Græcorum à Constantinopoli classe advectus interfuit, in quo cum diu de veteribus inter nostros, & Græcam nationem controversiis disceptatum esset, postremò causâ, & rationibus victi Orientales in Catholicæ Ecclesiæ sententiam omnes concessere: honorique gentis datum ab Eugenio est, ut duo eorum doctrinâ, & dignitate præstantes in Cardinalium Collegium legerentur, quorum alter Bessario Nicænus ætatis suæ vir religione, & virtute longè clarissimus. Alter Isidorus Chiovensis Antistes fuit. Sed Græci assensu magis sunt in præsentia Concilii auctoritati, quàm inde decretis paruerint. Et Isidorum apud Moscos Catholicæ pietatis disciplinam, vniuersæque Ecclesiæ consensionem prædicantem Barbari spoliatum omnibus fortunis, injuriis abire provinciâ, ac redire Romam coegerunt, ubi

Y

Pontificum Maximorum liberalitate sustentatus, reliquam vitam suam egit. Rutheni præter ea, quæ sacerdos rem divinam faciens ex ipso sacrificii loco de sacris recitat libris, nullas de religione, & cælestium rebus conciones ad populum habent; scilicet multitudinem piè colere acceptam de Deo fidem, non difficultatibus, & captum ejus excedentibus quæstionibus agitare, impellique eorum mentes volunt. Hinc retinentissimi suorum sacrorum, & depravatis variâ hæresi tot circà populis, cum quibus ipsi & lingua, & rerum omnium commercia habent, incorrupti manent, nec ullis se novis opinionibus infici patiuntur. Judæorum quoque hæ gentes admixtam multitudinem habent, non ut in plerisque locis inopem vitam fœnore, & servilibus operibus tolerantium, quamquam ne hoc quidem genere quæstus abstineant, sed qui & agros possideant, & mercaturam faciant, & litterarum quoque studiis, maximè Astrorum, & Medicinæ se excolant, & ferè vectigalibus publicis præsent, ac ad honestam fortunam perveniant, ut non æquentur modò ingenuis, sed interdum etiam imperent: nec tegumento capitis, ut apud alios, aut ullâ omnino insigni re à Christianis distinguuntur, quin arma ferunt, & cum telis incedunt, & planè æquo cum aliis jure vivere videntur. Commendonus ab Leopoli Camenetiâ progressus Cotthinum Vallachorum oppidum in ulteriore ripa Tyræ aspexit: atque deflectens inde ad or-



tum per ultimos Polonorum fines, & loca paucis antè diebus Scytharum incurfione vastata ad Boristhenem circumiit, & relictâ ad dexteram Chioviâ, vbi vetustæ, ac nobilis vrbs vestigia, ruinæque visuntur, per Ostrorogum, & Luxicum Leopolim rediit ab Alberto Lescio Polonicæ juventutis tum facilè principe cum egregia equitum manu deductus: inde Jeroslaviâ, Prismiliâ, Tasnaviâ aditis, vbiq; summis studiis, atque officiis, & publicè, & privatim à Regulis, & Principibus cultus in Poloniam, atque Petricoviam contendit: quò Rex Concilium gentis indixerat, frequentèsque adesse Principes jusserat.

---

*De Podolia, deque ejus frequentanda consilio  
Regi allato.*

## CAPUT XVI.

**A**DVENIENTEM Rex benignè, amantèrque accepit, multa super populis Regni sui, quos obivisset, ab eo sciscitans, qui Podoliam (pars hæc est Russiæ) locaque incolunt inter Tyram, & Boristhenem, quæ flumina Nieper, & Niester Polonis vocantur, atque altero à Vallahis, altero à Moscis, Scythiisque dividuntur, latissimos agros, & summæ fertilitatis habent; versâ leniter terrâ semen jaciunt, nec deinde amplius sementem, nisi cum falce secandam rev.

Y ij

sunt, adeò nullam culturam bonitas soli desiderat, & quidem acceptum tanto cum fœnore reddit, ut ex vno frumenti sextario quinquaginta atque ampliùs gignat; quin fama est, si paulùm modò in metendo spicas decusseris, ex granis, quæ deciderint, sequenti, atque item tertio anno ibidem messem habiturum, nihil arato agro, nihil culto. In vasta planitie, vbi terra intacta omni culturâ suo ingenio parit, tantâ fœcunditate luxuriant herbæ, ut maximæ superare altitudine hominem dicantur: latèque odorem fundere, & pecora, quibus illi magis, quàm arvo student, abigi pascuis, ne pabulo nimio intereant. Haud minùs totâ illâ regione copiam mellis mirere, ne id quidem vllo incolarum labore, aut industriâ quæsitum: sponte suâ per omnes sylvas fusa apum examina arboribus insident, & sicubi cavi aliquid repperint, spargunt mella, quin rimis quoque terræ, hiatisque se condunt, passimque vim ceræ, mellisque fundunt. Advenientia examina (nam mos apibus se invicem pellere, acribusque præliis, veluti justis aciebus inter se concurrere, agrestes prohibent, quò veteribus, veluti hæreditariæ suæ sedes maneant: hic vnus cultus illis habetur; plurimùm mellis irreptum, neglectumque perit, incolæ ex eo multum efficiunt radicis succo acri admixto, quo nimiam dulcedinem coërceant, atque hoc potu Podolii, Russique, & vndique accolæ gaudent, eoque magnâ intemperantiâ se ingurgitant. Ver-



num longè optimum putant, Lipiezum ipsi appellant, nec alius mellis vsus ferme apud eos, sed & frumenti non plusquam quantum abundantia eorum satis sit, serunt: sunt & crebri per Russiam, Podoliàmque lacus, quidam etiam de industria, opere, & manu facti, magnique proventus ex iis: certare fecunditate cum terra aqua videntur, tanta vis editur piscium. Optimi omnium Lucii, & magnitudine reliquos excellunt. Sale condiunt, vicinisque populis imperiunt, nec aliud ferè vberius illis vectigal. Quibus propinqua, ac plures piscina, secernunt genera, nec promiscue habent: fortasse ne mutuâ consecratione, aut metu minùs subolescant. Piscantur maximè hyeme, cum frigor vi rigent omnia, & flumina, & lacus haud secùs, quàm marmora sic duruerunt, vt non homines modò, equosque, sed ingentia quoque plaustra onusta ferant; tunc crebras veluti fenestras dextrâ, sinistraque perforatâ glacie aperiunt, paribusque spatiis ad perticarum modum, quas in introitu laeas sub glaciem vtrinque immittunt; has ab sua quisque parte per proximum foramen exceptas furcis transmittunt ad aliud, atque deinceps aliud, donec ad vltimum, quod opportunè perfossum in diuersa parte est, coeant. Perticis suspensa retia toto lacu, aut per quantum ipsi spatii complexi foraminibus fuerint, explicantur, pandunturque, & cuncta subtrus converrendo, quantum est piscium trahunt, idque fit siccis pedibus, &

Y iij

nullo labore. Hoc loco rem vix fidem habituram pigeret referre, nisi gravissimos viros permultos, & ipsum quoque Regem auctorem haberem, qui omnes vidisse se sanctè affirmarunt: Accidit aliquando hiberno tempore, cum ita piscatur, ut ab imis lacubus involutum retibus extrahatur in littus globosum quid molle, & informe, quod videatur madidis, diuque maceratis plumis compactum, sed ne id quidem satis dispici possit, uti esse caro recenti vrsæ fœtus dicitur, nisi quod hoc nigrum, & majus; si moveas, projiciasque inanime dicas: at idem si in hypocaustra, in quibus ferè Poloni ob magnitudinem frigorum agunt, calidâque admodum habent, intuleris; paulatim calore recreatas, excitatasque reviviscentes, & mox etiam avolantes hirundines cernas. Hæ aves adventante hyeme magno numero coire, unâque vnguibus rostro inter se complicatæ mergi aquis dicuntur, atque in fundum delatæ terræ tepescentis vapore foveri, atque intolerabili rigentis cæli frigore defendi, totâque hyemem, aut humore, aut ipso veterano nutriri: vere novo emergere, avolaréque; an spirent sub aquis volucres, & ademptâ spiritus mittendi, recipiendique facultate, ut vivant, quærant, quibus cordi est scrutari abdita naturæ: nos rem apud eos minimè dubiam retulimus. Lacum quoque esse in ultimis Podoliæ finibus haud longè Ciazovia ferunt nomine *Cołbein*, cujus aquæ æstivis siccata solibus in salem omnes ab-



eunt, asportarique eum à Russis quotannis co-  
 cto magno plaustrorum numero. Sed sæpè acci-  
 dere, vt occurſu Scytharum, qui prædæ simul  
 hominum, simul jumentorum infidantur armis,  
 ac prælio cum iis contendant, nec rarò Scythas,  
 coniectis in fugam custodibus prædâ potiri. Id  
 quoque è Scythiæ miraculis non omiserim, quod  
 tamen ego à nullo, qui se vidisse diceret, accepi;  
 scriptores prodidère, multique fidem iis affir-  
 mant. In fluminibus, maximè Boristene, & Boc-  
 cho per æstatem noctu gigni vim magnam ver-  
 mium: hos manè aquis supernare, meridie in-  
 natis pennis circum ipsas volitare, cadente sole  
 omnes occidere, & circa Belzam, & Chelmiam  
 sylvestres pinus, quas ferè Poloniæ sylvæ habent  
 cæſas, aut sponte ad terram delapsas in humum  
 putrescentes, intra biennium lapides fieri. Sed  
 hæc nos paulò ab instituto abduxerunt. Uberri-  
 mi Podoliæ agri partem maximam, quæ Pontum  
 Euxinum aspicit, deserta, atque vasta solitudo te-  
 net; quòd & infesta loca sunt Barbarorum excur-  
 sionibus, & suas fruges quò asportent, habita-  
 tores non habent: neque enim ipsi vt reliqui Po-  
 loniæ populi, aut Vistulâ, aut in Vistulam in-  
 fluentibus amnibus frumenta, & reliquos terræ  
 fructus devehere Dantiscum, atque inde per Bal-  
 ticum mare in externas mittere terras possunt:  
 quorum flumina ab Russiæ finibus ad meridiem  
 versâ omnia in Euxinum ferunt. Commendonus  
 igitur satis exploratis inquirendo rebus Augusto

ostendit posse fertilissimam Regni sui partem non  
coli tantum, & frequentari, sed ad magnam  
quoque opulentiam pervenire, auctorque conan-  
di fuit. Venetorum urbem amplam, & maris la-  
te potentem, maritimarumque rerum scientiam,  
usuque longè exteris præstantem in medio stare  
mari, ducentisque amplius millibus hominum  
habitari, celebrarique nullo circà proprio agro,  
quem colat, neque ad tantam multitudinem al-  
lendam sæpe sufficere, quod à vicinis populis con-  
vehitur: posse Venetias frumenta è Russia depor-  
tari, nec longinquitate itineris, nec aliis, quæ  
se primò ostendunt, difficultatibus deterri de-  
bere: nihil enim Regi, si adsit industria, stu-  
diumque, insuperabile fore. Ante omnia agen-  
dum cum Turcis esse, ut metu, atque auctorita-  
te imperii sui Vallachos, & maximè Scythas à  
latrociniis contineant, quod Turcas credi liben-  
ter esse facturos, quippe ex crebro illo navium  
commeatu, & eorum portus celebrari, & vecti-  
galia augeri, & pacem iis cum Polonis pariter,  
& cum Venetis esse: tum ad ripam Tyræ loco, qui  
visus maximè opportunus fuerit, deligeret op-  
pidum, atque novam urbem conderet, ubi tutam  
mercatoribus stationem præstaret, ne subitis in-  
cursionibus finitimorum pateret, vel levi muni-  
mento, ac ligneis mœnibus, ut est mos iis in  
terris oppidum firmasse, sat fore adversus Barba-  
ros inermes, & nullis belli instrumentis, quæ  
septa modò loca tentare audeant, instructos, &  
infcios



infcios ejus rei, affuetósque tantùm in latissimis «  
 campis excurrere, brevique certamine, aut in fu- «  
 gam vertere, aut fugere hostem, venturas Vene- «  
 tiis naves, portúmque ad Bialogradum in ostio «  
 Tyræ, aut alibi, vt commodum fuerit, capturas, «  
 frumentáque secundo flumine devecta ad mare «  
 Ægeum in Adriaticum invectas sinum Venetias «  
 redituras; nec Venetis hominibus novum id «  
 iter, aut mare futurum, fuetis paucis antè annis «  
 longiorem illam navigationem ad Tanam urbem «  
 Tanais amnis ostio sitam suscipere mutandarum «  
 causâ mercium, & ex iis ipsis Podoliæ campis ad «  
 inficiendas lanas semina quædam exportare, quo- «  
 rum fructus, qui cum eo commercio desierunt, «  
 repeti possent. Vinci omnia superarique spe, & «  
 cupidine lucri, multáque diem, atque vsum in- «  
 venturum, queis quotidie negotium proclivius, «  
 expeditiúsque reddatur: nec frumenta solùm, «  
 sed vbi procedere res cœperit, vim magnam «  
 mellis, ceræ, piscis, cinerum, pellium, quæ nunc «  
 neglecta sine emolumento habentur, Venetis mer- «  
 catoribus vendituros: eosque ipsos varias, varií- «  
 que vsus, quas Venetiæ ferunt merces, quarúm- «  
 que indiga Polonia est, vltro advecturos, nec «  
 dubium frequentem novam urbem brevi ipsum «  
 quæstum, vtilitatémque effecturam, molliturám- «  
 que, & mansuefacturam feros quoque Barbaro- «  
 rum animos, qui & ipsi mercari, quæ externa navi- «  
 bus subvehuntur, & sua exhibere, & denique «  
 commercio, & fructu advenarum lætabuntur. «

Z

» Ita coalescere rem, & coli, habitarique regio-  
» nem salubrem cælo, vberem solo, ac situ oppor-  
» tunam posse, ex quo ingens, & publicè, & pri-  
» vatim emolumentum Polonia esset captura. Cùm  
» magnopere probata Regi res esset, relataque  
» ad Concilium suorum approbatione omnium ac-  
» ciperetur, magnæ ob id Commendono gratiæ  
» actæ, vehementerque ex eo incitata sunt homi-  
» num in illum studia, quem & amantem gentis  
» suæ, & de commodis eorum Reipublicæ cogitan-  
» tem omnes prædicabant. Ipse quoque hæretici  
» diligebant, ac reverebantur eum, nec palam mi-  
» nori, quàm Catholici cultu, & honore digna-  
» bantur; ventitabant etiam domum, & consuetu-  
» dine, & sermonibus ejus commoti quidam sese  
» collegere, & resipuere, minúsque jam eorum a-  
» cres in Ecclesiam impetus erant. Cæterùm de  
» Podolica re cùm appellasset Turcarum Regem  
» per Legatos Augustus, nec ille abnuït, & Vene-  
» ti ultro gratias ei, Commendonóque egerunt.  
» Sed Palatinus Russiæ, aliique quibus datum ne-  
» gotium circumeundi, lustrandique eam omnem  
» oram, & maximè Tyram amnem inspiciendi erat,  
» retulere à Camenetia aliquot dierum iter secun-  
» do flumine provectis occurrisse vada saxi ingen-  
» tibus impedita, nec vltra pervium navigiis am-  
» nem fore, nisi iis aut amotis saxi, aut cæsis lo-  
» cus aperiretur; nec opus esse parvi laboris: ve-  
» rùm, etsi Commendonus ostenderet posse, quod  
» difficile, atque impeditum naturâ videretur, con-



filio, atque arte superari, nec omnino magnâ mole illa confringi, aut amoliri saxa; tamen huic præter spem objecto scopulo negotium hæsit, ac tum dilatum, pòst etiam totum omissum est.

---

*De Rege cupiente divortium cum uxore facere,  
per Commendonum ab tali consilio  
abducto.*

## CAPUT XVII.

**A**D cætera intestina mala, quibus vrgeri Polonia videbatur, accessit aliud gravius multò, ac periculosius, vnde tragici illi Angliæ motus, & ex pari causâ par quoque exitium haud dubiè iminebat, si in Commendono, aut minùs fidei, aut minùs industriæ, animique inventum fuisset. Regem pugnacem in vitiis suis ingens cupido incefferat vxoris repudiandæ, cujus in matrimonio decimum jam annum agebat. Primum huic cum Isabella Ferdinandi Cæsaris filia conjugium fuerat, ne id quidem ipsum satis concors, aut diuturnum, quæ cùm sine liberis decessisset, Barbaram, de qua suprà mentionem fecimus, amore ejus, atque illecebris irretitus, ipsâ maximè adversante matre, sibi copulavit, brevique amisit, quòd mulier meretriciis imbutâ artibus, dum assiduis medicamentis, sibi conciliare partum studet, pro fœtu morbum concepit, eoque absum-

Z ij

pta interiit. Hujus desiderio Rex diù in mœrore, luctuque fuit, ac ne perseveraret in cælibatu, magis suorum hortatu, & aliquâ cupiditate liberorum, quàm sponte sua fecit, quo indignitas proximi cum privata, ac famosa connubii levaretur, & simul inopia non dispari se jungendi, Legatos ad Ferdinandum Cæsarem vnam ex sororibus Isabellæ prioris vxoris petitum misit: nam Ferdinando fœcunda proles vndecim filiarum erat; ac ne ipsi quidem facile singulis ob multitudinem invenire viros Majestati suæ non indecoros. Sed quia matrimonia in tam arcta affinitate scitis, & jussis Ecclesiæ prohibentur, postulatum à Julio III. Pontifice Maximo est, vt lege solverentur; quod cùm difficulter impetrarent, tergiversante Pontifice rari, & parum fausti rem exempli inducere, tandem summis ab vtroque Rege adhibitis precibus, summè conducere vtriusque Regni rationibus eam renovari affinitatem contendentibus, annuit Pontifex, atque legis veniam dedit. Ita Catherina vidua, quæ antea Federico Mantuanorum Duci nupta fuerat, ad Augustum in Poloniam, atque in sororis thorum deducitur. Omnino communi errore in matrimoniis jungendis laboratur, vt non mores, non ingenia pensentur eorum, quibuscum agenda omnis vita fit; sed vna commodorum, aut inconsulti, & citò desituri amoris ratio habeatur: Hinc plenæ discordiarum domus. Id cùm privatis adversum, tum ferè Regibus vsu venit, quibus non solum



cognitæ, aut visæ nunquam sunt, quas in lecti,  
 in liberorum, in vitæ, & fortunarum, & rerum om-  
 nium societatem asciscunt: sed plerumque lon-  
 ginquis in terris natæ, sermone, ritu, institutio-  
 ne diversæ ad eos adducuntur, vt mirum videri  
 non possit, si qui more, ac pæne naturâ inter se  
 dissimiles sunt, non faciliè inde sensibus, & volunta-  
 te jungantur: atque adeò evenit sæpe, vt vn-  
 de necessitudo, atque amicitia quæritur, inde o-  
 dia, inimiciæ, ac interdum sæva etiam bella o-  
 riantur. Augustus recentibus novæ nuptæ ample-  
 xibus, obsequiisque delinitus primò lætari novo  
 conjugio est visus. Mox vbi satietas ex multa co-  
 pia orta, & suo vterque vivere, & nosci ingenio  
 cœpère, paulatim digredi, ac secumbere, nec illa  
 mariti amores, ac incontinentiam tacita ferre,  
 & ipse eo in dies magis alienari, donec non Regni,  
 non fortunæ consors, non itinerum comes, de-  
 ferta, spretâque Radonii seponitur: tertium-  
 que jam annum separati agebant, quotidieque  
 dissidium, quâ Reginæ questibus, quâ pervica-  
 ciâ Augusti augebatur. Et Ferdinandi Cæsaris in-  
 juriâ filia querentis, & interdum minarum a-  
 culeos in generum jacentis crebræ litteræ, lega-  
 tionésque non remedium, sed irritamentum ad  
 Augusti animum cupiditatibus suis mirè cedentem  
 fuere. Causæ tam alienati ab ea animi Regis variæ  
 traduntur. Vulgò ferebatur Augustum muliebre  
 mundum atque omnem vestium apparatus, qui  
 Barbaræ fuerat, cujus desiderium in animo ejus

novæ non extraxerant nuptiæ, Catherinæ munus danti, quàm accipienti gratius obtulisse : ab illa negante turpis, atque impudicæ ornatum, cultumque veram decere Reginam, mariti donum, quamquam magni pretii rejectum, altiùsque id in Augusti animum penetrasse, atque inde ortum initium dissidii. Plerique alii aiebant non convenisse mores, & Polonos, Germanosque pæne naturâ dissidere : ac Polonos quidem, quemadmodum in aliena terra, alieni ritus, linguæ, vestitus, toriùsque vitæ consuetudinis mirus est imitator, statimque se ad eorum format, atque fingit arbitrium, vsumque, apud quos vivit, ita in sua peregrinum non faciliè admittit, aut patitur, morem, & tam ipse apud externos, ne rideatur, moribus patriis abstinet, quàm inter suos ridet, atque aspernatur alienos. Rex præter hanc ingeniorum dissimilitudinem, quam utique se toleraturum fuisse aiebat, comitali morbo visu, oréque fædo, ac deformi eam corripi solere affirmabat, ejus morbi se non aspectum solùm, sed cogitationem quoque ipsam horrere. Præter hæc fides quoque ejus in gravi suspicionem, atque culpa ponebatur, quasi ementiri partum, suppositumque alienum filium alere pro suo tentasset. Alii medicamentis partum abegisse sibi mariti, atque gentis odio insimulabant : quamquam id quidem nec Rex ipse pro comperto affirmavit unquam, & spectata probitas, & innocentia Reginæ satis refellere videbatur : de co-



initiali morbo constantior fama erat : cæterum probri vllius insimulare eam adeò nemo vnquam est ausus, vt veram pudicitia laudem præconiũ-que & Rex, & cæteri omnes illi semper tribuerint : sed siue ab iis causis, siue fato aliquo, seu iusto numine peccata eorum vlciscente, à consuetudine ejus, suprà quàm existimari, aut credi potest, Augustus abhorrebat. Adeò vt de via, & ratione, si qua inveniri posset, amoliendi illam matrimonio suo occulta consilia habere cœperit. Non desunt vnquam, qui Regum quantumvis pravas cupiditates acuant, incitentque, ignavi assentatione pessimâ, & vitiorum altrice, & gratiæ parente, alii quò difficilem, & præcipitem in locum deductos obstringant sibi, atque obnoxios habeant. Augustus & cum intimis rem coquebat, & hortatu eorum cum Ucangio Archiepiscopo Gnesnensi, & Painevio Cracoviensi Episcopo communicaverat ; vtriusque consiliis implicito ancipiti curâ, negotiòque Rege opus erat. Sed Ucangius etiam novis, ac turbidis rebus lætabatur ; atque ab hoc maximè fora Regis spes additusque ad audendum est animus. Ratio agendæ rei composita, vt Rex idoneos præpararet homines, qui Equitum nomine, in cujus ordinis manu Respublica Polonorum est, palam in senatu ab se postularer, quando maximè interesset Reipublicæ Regem filios procreare, vt aut cum Regina habitaret, liberisque operam daret, aut promeretur causam cur ab ea tam diu sejunctus age-

ret. Cùm Rex impediri religione se respondisset, quòd iustum sibi conjugium cum vxoris suæ sorore non esse intellexisset, tum ex auctoritate gentis Legati ad Pontificem maximum dirimendo matrimonio mitterentur. Hæc quamquam studiosè occultabantur, ne quid antea emanaret, quàm omnia, vt res poscere videbatur, instructa essent, tamen & comperta Reginæ erant, & Commendonum ipsum nihil fugiebat, qui Anglicam tempestatem animo prospiciens, tantàmque sibi molem negotii imminere, intentissimâ in id curâ excubabat. In eo verti negotium omne rebatur, si res in apertum non erumperet, & illa ad Pontificem Legatio non decerneretur. Nam si palam Rex in causam descendisset, publicam suorum auctoritatem, postulatúmque ferens, tanto præterea studio hæreticorum adiutus, qui se locum aut gratiâ, & opibus apud Regem crescendi, aut eum à Pontificis maximi amicitia, fidéque avertendi nactos rebantur, quomodo sisti res posset, non cernebat. Rex ipse hunc maximè suis inceptis adversarium timebat, in multis aliis expertus quàm cum acri, & intento res sibi esset futura. Tentare fidem, quòd omnia summâ religione, atque constantiâ septa, obfirmatâque antea senserat, non ausus, tantam viri vim lenire, omnique cum humanitatis, atque officii genere sibi devincire contendebat, beneficiis quoque ac liberalitate demereri: sed nullus apud Commendonum largitioni locus fuit: professus



fessus enim gratiam recipere, rem constantissi-  
 mē semper remisit. Rex inde studio ejus magis  
 incitatus per Petrum Miscovium Plocensium Epi-  
 scopum designatum, quo intimo consiliorum  
 ministro utebatur, Commendono institit suam ad  
 Cardinalatum commendationem offerre diligen-  
 tem, accuratāque, & addebat ad persuadendum  
 Miscovius, cū aliorum Regum rogatu externos,  
 & Romanæ civitati ignotos in illum ordinem  
 Pontifices Maximi sæpe cooptassent, haud du-  
 bium videri, quin Regi Poloniæ hominem ma-  
 gnis in Rempublicam meritis commendanti  
 gratificaturus Pontifex foret, præsertim quòd ex  
 quo regnare Augustus cœpisset, nemini eum  
 honorem petiisse constaret. Quin & missurum de-  
 ditā operā Romam, qui hoc summis precibus  
 à Pontifice contenderet, Regem pollicebatur.  
 Ille haud magis cupidine honorum, quàm antea  
 munerum suam labefactari constantiam est pas-  
 sus, & qui in ipsa Urbe suffragatores nunquam  
 quævisisset, ne Regis quidem vsurum commen-  
 datione respondit ad eum honorem, cui se pa-  
 rem non duceret. Et cū vni Pontifici Maximo  
 operam, & fidem obligasset suam, non alterius  
 quàm Pontificis judicio sua merita, seque existi-  
 mari debere; vetuitque verbum vllum ea de re  
 Romam scribi, in eoque ita perstitit, vt Miscovius,  
 qui eum præcipuā benevolentia colebat,  
 mecum sæpe questus sit, eum dignitati suæ in-  
 ptē deesse, qui vltro sese offerentem fortunam

A a

contumaciter repelleret: non sanè parvo moderationis, & abstinentiæ documento, cum neque dubia spes ostendi, neque adversari mos videretur, & plura, & recentia exempla extarent eorum, qui Regum gratiâ in eum dignitatis gradum ascendissent, & tum quoque niti quidam dicerentur. Sed is mos tantum abest, ut probandus, imitandusque Commendono videretur, ut dicere soleret non aliunde graviora, aut plura detrimenta Romanæ rei esse importata. Dum enim quidam ejus, ad quem venerint, non à quo missi fuerint, gratiæ serviunt, & in rem missi publicam, suam agunt privatam, eos non solum liberè, ac fortiter mandatum munus non obire, sæpe de fide, atque officio decedere, sed semel cupiditate, atque ambitione prolapsos, ipsam quoque Rempublicam prodere, per cujus opes crescere animo destinarunt. Quod Pius Quartus Pontifex Maximus serò quidem post lectos ab se in Senatum quosdam suspicionis ejus maculâ aspersos, sed aliquando sensit, decretòque scivit, ne cui Regis, aut Principis, ad quem Legatus fuisset, ejus ad honores commendatione vti liceret; qui fecisset, ei noxæ esset. Augusto quanto admirabilior hæc integritas, invictusque adversus omnem cupiditatem, & gratiam animus erat, eò acrius objecturum se conatibus suis eum suspicabatur. Laudibus igitur eum ferre, industriam, prudentiam, fidem, pietatem omni sermone prædicare; traditos; commendatosque ab



eo augere, ornareque, hæreticos edictis coërcere; denique ut cum Senatore Regni sui de Republica conferre, consilium exquirere, & plerumque vii. Hæc incusserant metum Regina, ne Commendonus ad iuvandum inceptum Regis suscepisset, quam illi suspicionem malevoli quidam inculcaverant; cuius ignarus Commendonus rediens à Russia Radomiam, ad visendam eam, etsi suspectum id Regi intelligebat, divergit. Benignè admodum hospitio acceptus, post epulas remotis arboris Regina omnia, quæ machinari Regem senserat, Commendonum edocuit, quæque sibi objicerentur refutavit: inde quantâ injuriâ, & quàm indignè afficeretur, multis cum lachrymis exposuit: Regis nomen nunquam aliter quàm summo cum honore usurpans, omnemque ab eo culpam in quosdam, qui plurimum gratiâ malis artibus quæsitâ apud eum valerent, avertens. Commendonus bonum animum habere eam, & causæ, & innocentie suæ fidere jussit, sibi & ante omnia explorata, & præparatos è Catholicis probos, & recti amantes, qui si moliti aliquid adversus eam hæretici fuerint, se eis audacter opponant, nec vlla in re officio suo se defuturum. Hac mota oratione Regina simpliciter aperuit quæ delata ad se de illo essent. Per eum cum Pontifice Maximo de suo dirimendo matrimonio agi jam cœptum, atque ipsum, quo Regi gratificetur, huic rei favere, neque si adversaretur tanto in honore, at-

A a ij

que dignitate apud impotentem cupiditatis hujus futurum, quæ tamen nec credita ab se esse, cum contraria famæ sint, quæ de ejus integritate, ac religione circumferretur, nec celare eum voluisse. Pauca adversus hæc Commendonus: atque illud primum sanctè affirmat, se cum Rege ea de re verbum nullum vnquam esse locutum; cæterum ad se quod attinet, sic vitam instituisse, vt non opinantium, aut obtrectantium sermonibus, sed rectæ mentis conscientia staret, & in omni negotio fidem suam rebus quam verbis purgatam, probatamque mallet: Quæ Cæsari fratri, quæ familiæ vniuersæ cum Pontifice Maximo gratia, & benevolentia intercederet, & cum parente suo viro optimo, & sanctissimo intercessisset, satis quidem ab hoc metu securam eam reddere debuisse. Sed Pontificis ipsius fide multò securiorem esse eam debere, qui quod divinam vim, atque sanctitatem habet, id vt rescinderet, nullius mortalis gratiæ, aut dignitati daturus vnquam esset. Tum verò Regina dextram ejus amplexa effuso fletu, per sacerdotium, quo præditus esset, per virtutem ejus, nomenque, & existimationem, quam partam apud omnes bonos haberet, per parentis sui memoriam, cui charus ipse in primis fuisset, orare eum, atque obsecrare instituit, vt sollicitudini suæ subveniret, seque indignè proditam, desertam, abjectamque ab omnibus vnus pro officio, & fide sua tuendam susciperet, atque hæc adeò demissè: & tam



crebris inter fletum, lacrymâsque singultibus e-  
git, vt Commendonum tam claræ, tantique  
fastigii feminæ miseratio confunderet. Consola-  
tus eam, suamque illi fidem, studium, diligen-  
tiam non defuturum pollicitus discessit. Petrico-  
viæ Rex cum frequens Concilium convenisset  
per eos, quibus data provincia erat, quod antè  
diu concoxerat, occulteque habuerat, consi-  
lium proferre institit. Bifariam Poloni de Repu-  
blica coeunt. Rex cum Senatu, in quem Episco-  
pis, Palatinis, Castellanis (hæc sunt honorum,  
& magistratuum vocabula apud eos) jus est ve-  
niendi, centum & quinquaginta ferme homini-  
bus, cum omnes adsunt, quod haud scio an  
vnquam accidat, consultat. Equites, quo ex or-  
dine Senatores leguntur è singulis regionibus (in  
plures autem Poloniæ Regnum dividitur) binos,  
ternosque, aut plures etiam Legatos ad Conci-  
lium mittunt, qui de Republica in medium con-  
sultant (terrestres Nuncios ipsi appellant) ii separa-  
tim conveniunt, & quæ visa fuerint ad Regem,  
& Senatum referunt. Hi nuncii initio ad id mo-  
dò mittebantur ad Concilia, vt decreta Senatus  
domum ad suos renunciarent: sed sub Augusto  
novam, & veluti Tribunitiam potestatem inva-  
serant, cum ex licentia sacrorum audaciores ad  
omnia facti fuerint, ipso fovente eos Augusto,  
minuere dignitatem Senatus oprante, & ipse cu-  
piditatibus suis licentiùs indulgere. Hinc citiùs,  
quàm ipsi sperassent, omnis ferme Respublica

Aa iij

sub arbitrium Equitum iit : non tributa decerni , nisi accepissent , non leges fieri , quas ipsi non probassent , nihil denique pati in Republica , nisi ex auctoritate , & libidine eorum agi , omnibus aliis intercedere ; nec dicto audientem fore nobilitatem denunciare. Ipse interdum Senatus , penes quem publici Consilii majestas , correptus , atque acribus verbis objurgatus ab iis est. Quin Senatorum quidam omisso amplissimo ordine transire ad Equites , crearique Nuncii malebant , quò populares haberentur , plúsque in Republica pollerent , & vnus , qui cohibere vim eorum poterat , Rex , incitabat. Inter hos Commendonus è Catholicis acerrimum , atque optimum quemque familiaritate , & benevolentia conjunctum habebat , à quibus & de rebus , quæ religionis causam attingerent , edocebatur , & ipsi consilia cum eo conferebant. Itaque cum referente Ostorogio quodam diserto homine , ac nobili in primis viro , & summo hæretico , de Regina agi cœptum esset , quâ sterili , ac filios non gignente Reipublicæ opus non esse injecerat ; adversantibus , qui à Commendono instructi erant , magnis contentionibus est certatum. Ad extremum & hæretici tenuere vt rogaretur Rex , vt in gratiam cum Regina rediret , cumque ea conjunctè , & amanter viveret , neque liberorum spem suis præcideret ; & Catholici , vt omnis repudii , dirimendique matrimonii mentio omitteretur. Ut ventum in Senatum est ( in quo Rex



de industria adesse noluit, seu pudore abstergitus, five ex dictis Nunciorum, quæ respondenda sibi essent, meditaturus) idem Ostrorogius summam Reipublicæ agi præfatus, copiosâ oratione Senat-  
 um est adhortatus, Ut non præsentibus modò re-  
 bus consulerent, sed longè in posterum, quod sa-  
 pientiam eorum deceret, prospicerent. Vivo Re-  
 ge non alium rectorem desiderare Rempublicam,  
 sed hominem eum, & progressum ætate, & mor-  
 ti etiam obnoxium: Rempublicam æternam esse  
 oportere, quam, si quid Regi humanitus acci-  
 deret, in cuius manus venturam? Sic eum de se,  
 sic majores ejus meritos, vt non ipsum modò re-  
 gnare, sed in ipsius manere domo Regnum ve-  
 lint, quod quî fieri ipso filios non suscipiente  
 posse? Filios porro qui suscipiat tertium jam an-  
 num sepositâ, & procul habitâ vxore? ipsorum  
 esse partes, qui parentum sanctitatem apud Re-  
 gem meritò obtinerent, eum in gratiam cum Re-  
 gina reducere: eodem tempore & Poloniæ po-  
 pulis spem propagandæ Regiæ stirpis ostendere,  
 & exemplum parum integrè culti conjugii ab ho-  
 minum oculis amovere; ne spretum inde in ma-  
 lum publicum erumperet. Et paucos hæc quò  
 spectaret oratio, fallebat, quòd gravis jam esse  
 hujus rei fama cœperat, & vt assentatio, & ne-  
 gligentia publicè ferè prævalent, etiam qui Re-  
 ginae injuriâ movebantur, respectu Regis ulebant.  
 Ucangius, qui Senatus ob Archiepiscopalem di-  
 gnitatem erat princeps, sequenti die in Senatu,

quæ Equites movissent, exposuit Regi, adiecitque Senatus verbis, quæ apta rei sunt visa. Rex ad mœsticiam compositus posse ab se & Reipublicæ occupationes opponi, quibus curis distentus per hoc omne tempus fuit, & morem majorum, quibus placuisset Reginas à publicis consiliis abesse, questôsque sæpe multos matrem suam, dum vixit, nimis se publicis rebus immiscere solitam, quòd ferè secuta virum, filiumque Concilia Regni habentes sit, sed prompturum se apud eos simpliciter, quæ animum obturbant suum. A probis, & in scientia divinarum rerum apprimè versatis hominibus injectam sibi religionem esse, negantibus iusti conjugii jus sibi esse cum Regina, cujus sororem antea in matrimonio habuisset. Hinc se vehementi consiliari curâ, ne incestis implicitus, & pollutus nuptiis, Dei iram in se quotidie magis incitaret, petere ab iis, ut se consilio juvarent. Responsum ab Ucangio rem non esse huiusmodi, de qua statim dicendæ sententiæ viderentur. Ita spatium ad cogitandum, componendumque consilium est sumptum. Ucangius Episcopos omnes, qui tum præsentés erant, & præterea ex sacerdotum ordine quicumque aliquam doctrinæ opinionem in sacrarum litterarum studiis haberent, convocavit in Templum, & ad Commendandum misit simul significatum, de qua re id Concilium esset habiturus, simul quæsitum, an ipse adesse veller, qui cùm maximè velle responderet,



diffet, sequenti die manè summo in Templum perrexit: Ventum ad certamen, idque vni sibi excipiendum, sustinendumque esse existimans, quando Episcoporum in aliis animus, & audacia, in aliis fides desideraretur. Confedit medius inter Episcopos Commendonus, in eum omnium oculis, auribusque intentis. Tum Ucangius Regem cum se solvi non potuisse existimet, divinâ lege, quæ est de matrimoniis inter conjunctos affinitate, quanta illi cum Regina esset, non ineundis, statuisse cum ea sibi divortium faciendum esse. Hæc dicentem Nicolaus Volcius Uladislaviensium Episcopus interpellavit, negans Regem ita esse locutum. Tum Padnevius Cracoviensium Episcopus Regem ait admonitum à suis, oratumque, ut cum Regina pro conjugii sanctitate, quo obstricti inter se essent, viveret, obesse religionem, quâ se diceret deterreri, propterea quòd vereretur, ne lege, quæ matrimonio inter se tam propinquos jungi verat, ita tenerentur mortales, ut eâ exsolvi vlllo modo ipse potuerit; proinde Episcoporum de eo sententiam rogasse, ut eorum potissimum consilio vteretur, qui divinarum rerum, & sacrorum interpretes sunt constituti. Id excipiens Ucangius Commendonum oravit, ut ipse eos doceret, quid consilii ad Regem super tanta re afferrent. Ille nihil cunctatus, ac si rem in tam celebri, ac frequenti cœtu explicuisset, seque palam indicasset, si sti vel ruentem jam posse sperans. Et rem Rex,

Bb

» inquit, rite, & sapienter fecit, qui de quo illi  
» incussa religio fuit, haud alios, quàm Episcopos  
» consulere elegit; & ego à vobis statim ei occur-  
» sum, omnémque ex animo ejus scrupulum con-  
» tinuò erutum mallem, quàm de re minimè du-  
» bia deliberando speciem dubitantium præbere,  
» & Regis augere hæitationem: Matrimonium  
» rem inter mortales sanctissimam esse, & JESU  
» CHRISTI voce sancitum, & præceptum, ut  
» quos Deus conjunxit, homo non separet. Pau-  
» lum hîc orationem interpellans Ucangius: Re-  
» ctè, inquit, sed, ut ego audiui, est apud Juris-  
» consultos, quod initio constare non potuit, id  
» ne tempore quidem perfici, aut invalescere. At-  
» qui, inquit Commendonus, hæc inter propin-  
» quos conjugia maximè constare, & jungi initio  
» poterant, nullo enim vel Dei jussu, vel naturæ  
» lege, sed tantùm instituto, ac decreto Ecclesiæ  
» prohibentur, cui cùm in honorem duorum Re-  
» gum Pontifex Maximus jam derogavit, tum  
» ipsos illo decreto ampliùs non teneri: nam quod  
» Levitico præcepit Deus, Sororem vxoris tuæ in  
» pellicatum non accipies, ad hanc rem non per-  
» tinere; subjecisse enim illico Deum, Non rele-  
» vabis turpitudinem ejus adhuc illâ vivente: & il-  
» lud in Evangelio, Non licet tibi habere vxorem  
» fratris tui, eandem rationem habere vetantis vi-  
» væ conjugis sorori corpus miscere, aut detractam  
» fraterno lecto vxorem sibi incestis nuptiis con-  
» jungere. Ergo, inquit Ucangius, ad eundem



Pontificem Maximum est Regi confugiendum ,  
 qui quos lege solvere potuit , quâ jus ineundi ta-  
 le conjugium adimitur , profectò dirimendi quo-  
 que ex auctoritate sua conjunctos potestatem ha-  
 bebit. Longè verò aliter se res habet , inquit  
 Commendonus , nam postquàm legis , ex qua  
 jus connubii non erat , sublatâ vi , maritali se fœ-  
 dere junxerunt , tum verum , & justum inter-  
 cedit matrimonium , quod dirimi , aut solvi nul-  
 lius mortalis ope jam possit , tantâ est religione ,  
 ac sanctitate ab ipso Deo munitum , & confirma-  
 tum ; & potestatis quidem Pontificis fuit iis ve-  
 niam legis dare , sed devinctos jam matrimonii  
 vinculis dissolvere , nec Pontifex Maximus , nec  
 mortalium quisquam potest , quemadmodum o-  
 leum si in ignem non injicias , non incenditur ,  
 at idem si in ignem effuderis , continuò concipit  
 flammam , nec jam voluntate , & permissu a-  
 lieno , sed sponte , ac naturâ suâ ardet , sic ut ex-  
 imi , aut vindicari ab incendio nullo modo pos-  
 sit , nisi aut ipsum absumptum , aut ignis extin-  
 ctus fuerit. Pari ratione matrimonia inter con-  
 junctos iniri non posse Ecclesiæ lege interpositâ ,  
 sed legem si sustuleris , oleum in ignem injeceris :  
 tum rectè conjunctum conjugii fœdus naturam ,  
 aut vim suam assequitur , quæ est hujusmodi , ut  
 abrogari , aut rescindi nullâ re , nisi morte pos-  
 sit. Mulier alligata est legi , quanto tempore vir  
 ejus vivit ; quòd si dormierit vir ejus , liberata  
 est à lege , cui vult nubat. Iis qui matrimonio

Bb ij

» juncti sunt , præcipio non ego , sed Dominus ;  
» Qui uxorem suam dimittit , & aliam duxerit , a-  
» dulterium committit super eam ; & si vxor dimi-  
» serit virum suum , & alteri nupserit , mœchatur :  
» quod quâ fieret , si per remissum vxori nuncium  
» matrimonii vis solveretur ? Propter hoc dimittet  
» homo patrem , & matrem , & adhærebit vxori  
» suæ , & erunt duo in carne vna. An hac potest  
» necessitudine obstringi quidquam arctius ? Atque  
» hæc divino sunt consilio , atque voce sancitæ ma-  
» trimonii leges : quibus nemo mortalium manus  
» attulerit. Secundum hæc Anglicas tragœdias ,  
» ferôsque illos casus , atque eventus Angliæ , quos  
» ipse cognitos habebat , recensendo ordine mul-  
» tis verbis copiosè , vehementer , & propè tragi-  
» cè exposuit , sic vt qui aderant magnopere ani-  
» mis commoveri , atque exhorrescere viderentur.  
» Adjecit , atrocia quidem hæc , & auditu gravia ef-  
» fe , sed eo magis deplenda , quòd Ecclesiasticis ho-  
» minibus , & Insulæ Archiepiscopo auctore Hen-  
» ricus maximè ad cupiditatem dimittendæ vxoris  
» esset incitatus , qui dum Regis studiis obliti mu-  
» neris sui blandiuntur , & ad ejus voluntatem lo-  
» quendo gratiam aucupantur , nolle se commemo-  
» rare quas pœnas singuli Deo persolverint. Id tan-  
» tum dicturum , non ipsos solum dignitate , atque  
» fortune , spoliatos , sed omnem inde Ecclesiasti-  
» cum ordinem strage ingenti afflictum , fundituf-  
» que eversum in Anglia fuisse. Adjecit inde duos  
» Henricos ætatem nostram Reges , alterum Angliæ ,



alterum Galliae tulisse: hos dispares animis par ad  
 imitandum, cavendumque exemplum homini-  
 bus praeuisse, insigni utrumque iudicio Dei no-  
 bilitatum. Gallum quidem fidei in matrimonii  
 sanctitate non violanda, quam adeo constanter  
 coluit, ut cum uxorem familiam longè infra ma-  
 gnitudinem suam positam duxisset, eaque quintum  
 jam annum nullum enixa partum, haud dubia  
 signa sterilitatis dedisset, nec fratres Regi essent,  
 quorum liberi exciperent, & intra domum con-  
 tenerent Regnum, & Gallia omnis charitate  
 Henrici stirpem ex eo precibus, votisque expo-  
 scere vehementer sollicitaretur, & ipsa uxor non  
 gravatè cessura thoro, seque in septa sacrarum  
 virginum abditura fuerit, ne spem, optataque  
 tot populorum una diutius moraretur; tamen  
 omnibus rebus antiquiorem religionis, & con-  
 jugii fidem habuit, nec admittens quidem auri-  
 bus cohortationes eorum, qui aliter consulebant.  
 At Henricum Anglum, quem ex summo, & vir-  
 tutum ingentium gloria, & fama rerum gestarum  
 viro in saevum, atque importunum tyrannum, at-  
 que adeo in teterrimam belluam unius sceleris fu-  
 ror commutavit, satietate uxoris, in cuius consue-  
 tudine, & convictu duodetriginta annos, liberis  
 quoque susceptis, egerat, ortam clarissimo æta-  
 tis ejus Rege matrimonio suo expulisse, agita-  
 tumque libidinum furiis, brevi aliis necatis, a-  
 liis repudiatis uxoribus sextis usque nuptiis jura  
 conjugii violasse. Quid ergo evenit? huic ex tot

B b iij

» conjugii nullam superesse prolem; illi vnicam, &  
» diu sterilem egregiam septem liberorum sobolem  
» peperisse, quos ille moriens superstites omnes re-  
» liquisset; non enim effrænata libidine liberos, sed  
» iusti, castéque culti matrimonii conjunctione  
» procreari, quam Deus non ad propagandum mo-  
» dò genus instituit, sed illius societatis, quâ ille  
» Ecclesiæ suæ arctissimè copulatur, & conjungi-  
» tur, signum, atque indicium, id est, sacramen-  
» tum esse voluit; in quo suscepti filii veri numinis,  
» veræ fidei, & pietatis cultores educantur. Proin-  
» de mitterent ipsi has consultationes de re, quæ  
» dubitandi, aut deliberandi causam non habet,  
» quibus alitur id malum, non discutitur; & ab  
» initio præciderent hanc in Regis animo cogita-  
» tionem, & radicitus evellerent, ne stirpes rena-  
» sci vnquam possent, quas qui ferere conantur,  
» eos improbos, & Regis, & Reipublicæ, & bo-  
» norum omnium hostes ducerent: dum enim per  
» speciem religionis fallaces, & importuni homi-  
» nes revocari student à falsi flagitii, peccatiquæ  
» conscientia Regem, efficiunt, ut verè, & publico  
» periculo peccet, piaculòque gravissimo se, Re-  
» gnùmque obstringat. Regum cupiditates frænari,  
» non incitari oportere; tanto enim majore vi  
» ferri, quanto ex altiori dignitatis fastigio erum-  
» punt, nisi amicorum occurrat fides, quæ eos ve-  
» luti fræno contineat, regâtque; quòd si pestifer  
» aliquis assentator præcípites porro impulerit,  
» haud secus quàm saxum ex edito monte per de-



clive evolutum nullâ vi, aut conatu sistas, donec ad  
 imum vallis cum magna rerum strage pervenerit.  
 Quo magis iis cavendum, providendumque esse  
 id moliri, ac impellere saxum improbi assentato-  
 res ne possint; docerent ipsi Regem nihil esse, cur  
 animum variâ religione sollicitum habeat, quan-  
 do in ejus, & Reginae conjugio vitii nihil sit (quæ  
 æquitas, & pietas ipsius est) cùm quanta sancti-  
 tas, & quàm indissolubile vinculum ejus, intel-  
 lexit, absistet molestis se afflictere curis, & in  
 Dei voluntate, & Ecclesiæ placitis acquiescet. Hoc  
 quo Regis animus stimuletur scrupulo erepto,  
 omnique dubitatione ejus sedatâ, futurum ut in  
 pristinam cum Regina gratiam rediret, vnâque  
 concorditer, & conjunctè, ut eorum necessitudo  
 postulat, viverent. Verùm si ab recenti hoc dissi-  
 dio in convictum, & consuetudinem ejus reduci se  
 continuò Rex non patietur, vim illi afferendam  
 non videri: Tempus, Deumque; rationem, ac  
 viam reconciliationi eorum aperiturum: ipsi piis  
 utrumque precibus Deo commendarent, atque in-  
 terea darent operam, ut si qua incommoda opinio,  
 si qua offensio hæsit in Regum animis, ea stu-  
 dio, ac sedulitate eorum tolleretur, atque sanare-  
 tur. Adjecit postremò, ut cogitarent, quàm a-  
 lieno tempore tam periculosas, & inutiles res  
 moverent, cùm & gravi bello à Moscis pre-  
 merentur, nec vlla circa satis fideli à finitimis  
 populis pace niti possent, & multis præterea in-  
 testinis incommodis ægra, atque afflicta eorum

» Respublica esset. Hæc cùm Commendonus compositè, copiosèque, & summa cum gravitate, quæ propria omnis sermonis, actionisque ejus semper fuit, disseruisset, omnium non approbatione solùm, sed admiratione constantiæ, integritatis, & prudentiæ accepta oratio est; qua & rem ipsam perspicuè, & distinctè enodatam expedivisse est visus, & perstrictos qui Regi suasores, adjutoresque exitiosi consilii putabantur, egregiè deterruisse, atque caput ipsum hujusce mali recidisse. Nullius præterea rogata sententia est, & tergiversante, & nutu magis, & motu corporis, quàm dictis assentiente Ucangio, Padnevi gratias Commendono, suo, & aliorum nomine amplissimis verbis egit, atque ita prorsus facturos, quemadmodum ipse censuisset, dixit. Sequentibus diebus separatim optimus quisque, qui illi concilio interfuerunt, domum ad eum venire, gratias, laudesque habentes, ejusque virtute liberatam eorum Rempublicam, discussumque ingens periculum prædicantes. Miserat Rex accitum eum ad se postquam à Nunciis res in Senatum adducta prodierat, & antè quoque sæpe injecerat, habere se, de quo magnopere colloqui cum eo vellent. Eo plus negotii Commendono in mitiganda, sedandaque Regis perturbatione fuit, quòd rationem omnem aspernabatur ægritudo  
» animi sui non potentis. Præfatus id illud esse,  
» de quo multo antè agere cum eo statuisset, cujus  
» & prudentiæ tribueret meritò plurimum, & pietatem



tatem in Rempubicam, & in se studium, ac benevolentiam, & omni re fidem, ac religionem spectatam, cognitamque haberet, à cruciatu, quo se dies noctesque aiebat torqueri, à lachrymis, à desperatione exorsus omnia perpeti supplicia, omnia adversa paratum subire, famam, vitam, Regnum amittere facilius posse, quàm cum illa vivere. Præterquam quòd ingenia, quòd mores non congruerent, ab illa se fœditate committialis morbi, ut à peste, & morte abhorrere, & quo haud minùs terreretur, non ab vno sibi, sed à pluribus spectata fidei, atque doctrinæ viris affirmarum, verum inter eos matrimonium non constare. His animum confici, ac lacerari assidue suum. Ab ipso pro amore, quo complexus eum inde ab initio adventus ejus in Poloniam esset, pro fide, quam ei rerum suarum omnium quantam vix ulli ex intimis amicorum habuisset, petere, orare, obtestari, ut viam, & rationem, quæcumque esset, eripiendi se huic miseriæ aliquam inveniret: iterum sibi vitam, iterum datum Regnum existimaturum: aut ab ipso liberari se, aut à nemine posse. Nihil verò postulatum à se, nihil factum, nihil obtentum, nisi ritè, ac de Pontificis maximi voluntate, & concessu velle. Quæ cum diceret, non in vultu modò dolor animi ingens eminebat, sed crebræ etiam oculis emanabant lacrimæ. Animadvertere hîc libet, quantam fortuna facultatem Commendono in manus tradidit, Regem sibi immortalis beneficio devin-

ciendi, si modò blandiri paulùm cupidini ejus, fovere spem, & offerre operam, & studium polliceri sultinuisset: sed ejus non tam abstinentia, constantiaque tentata est, quàm ipse simul dolore, simul difficultate hæc audiens afficiebatur. Tam amanter animum profundenti in se Regi adversari durum, atque inhumanum, adeò impotentem, inflammatumque, ac propè affectu nimio amentem mitigare, ad rationem, ad consilium revocare maximè arduum, & spissum videbatur. In re tam ancipiti ab integritate, atque fide sua subsidium petiit; & summis humanitatis meritis Regis in se prædicatis, nec ulli se, qui majorem ex casu ejus dolorem caperet, professus concedere locum, qui sibi vnicus daretur, gratiam ei aliquam referendi, & suam in eum fidem & pietatem testandi, prætermitti à se non debere, Reges quò majore potestate, & copiâ rerum omnium cæteris hominibus præstent, eò ferè magis ab amicis, à quibus vera audiant, inopes esse. Nam probos quoque, & constantes viros subigi cupidine, aliisque auctoritate, & opibus, quæ Regum gratiâ parantur, excellendi, & nulla re faciliùs, quàm ad alterius voluntatem loquendo, assequi. Hinc omnia auribus dari, nihil veritati: Hinc sæpe magnos Reges in summa veri ignorance versari, atque ex eo innumerable peccata oriri, validissimæque Regna sæpiùs perniciosis adulantium illecebris, quàm hostium armis esse subversa. At sibi stare cum Regem,



cujus tanta haberet benignitatis & amoris offi-  
 cia, blandâ, & ad gratiam compositâ oratione  
 non fallere. Si res facultatem haberet, cujus ille  
 studio tam vehementi teneretur, nullius operam  
 illi promptiorem fore, cùm verò ejus ne fingi  
 quidem spes vlla possit, cur eam alat cogitatio-  
 nem, quæ Regi & curam, ægritudinēque augeat,  
 & periculum creet? cur ut placitura loquatur, ve-  
 ra, atque vtilia fileat, in quo & ipse à fide, at-  
 que officio discederet, & Regem humanissimè  
 de se meritum non turpi solùm, sed pestifera as-  
 sentatione decipiat? In ipsos inde Nuncios acri-  
 ter est invectus, negans eos aut Regis, aut Rei  
 publicæ studio hæc movere, sed locum turban-  
 di præsentem rerum statum quærere: Nuncios  
 eos appellari, quia legati à sua quisque civitate  
 ad Concilium sint, cùm certis præfinitis, atque  
 etiam scripto comprehensis mandatis, quæ mu-  
 tare, à quibus discedere illis jus non esse. Jube-  
 ret eorum sibi mandatorum ab singulis com-  
 mentaria exhiberi, facilè deprehensurum nihil  
 illis publicè à suis ea de re imperatum. Labem  
 perfidiæ proximam non solùm de eo, quòd jus-  
 si non sint contra civitatum voluntatem re-  
 ferre ad Senatum ausos, sed ex sua libidine Re-  
 gem ipsum arguere, ei vivendi leges ferre, atque  
 ejus intima domûs, & lectum ipsum genialem  
 scrutari, & si quid rixæ sibi cum vxore sit, inquit  
 rere, denique rem periculi, atque offensionis  
 plenam ciere non veritos, qui si Reginæ vicem

Cc ij

» dolebant, aut Regem cupiebant ab inclementi in  
» illam animo, aut etiam ab errore aliquo revocare,  
» an non prius, quod nos divinæ docent litteræ,  
» ipsum solum admonitum, & precibus cum eo  
» actum oportuit? statim nullâ modestiâ, nullo  
» more, nullo majestatis ejus respectu penè accu-  
» satoriè palam in Senatu Regem perstrinxisse; ni-  
» mirum eos aliud spectare, turbas quærere, &  
» quâ audaciâ religionem, & omnium sacrorum  
» jura violarunt, eâdem occasionem novandi in Re-  
» publica res captare, & moturos aliquid, quod  
» deinde fisti sine magno negotio non possit, nisi  
» ipse effrenatæ eorum licentiæ obviam ierit, & in-  
» tra muneris sui fines manere coëgerit. His in-  
» cusatis eadem illa repetiit, quæ nuper apud Epi-  
» scopos disseruerat de vi, ac sanctitate matrimo-  
» nii, quod semel ritè initum infringi, aut dirimi,  
» nisi morte, non potest, iis ab eo vinculis, eâ im-  
» mutabili lege esse constrictum: nec ipsum affini-  
» tate, quæ illi cum Regina erat, à conjugio ejus  
» prohiberi, quando ex auctoritat e Pontificis Ma-  
» ximi antè de jure Ecclesiastico derogatum fuerit.  
» Quod non datum à Deo (nam sic quidem attin-  
» gere, aut solvere scelus inextinguibile foret) sed ab  
» Ecclesia scitum, quo periculis, quæ maximè in  
» convictu, & domestica propin quarum consuetu-  
» dine esse videbantur, occurreretur, & peccandi  
» licentiam hominibus reprimeret, & cohiberet.  
» Aut ergo imperitissimos divinarum litterarum,  
» aut improbissimos mortalium esse, quicumque



animum ejus turbare vanâ religione his injectis  
 dubitationibus conati essent; nimirum callidos  
 homines rimatos esse Regis sensum alienatum,  
 abhorrentemque ejus à Regina animum intellexisse,  
 atque hunc ineundæ gratiæ locum nactos  
 protinus invasisse. His falsis ægri animi medicis  
 haud aliam mercedem deberi, quàm si Regi æstu,  
 ac febri ardenti gelidam aquam obtulissent, eam  
 depellendo morbo, & recreando corpori esse affir-  
 mantes: quâ avidè epotâ multò inde gravius,  
 vehementiusque, quod ferè fit, affligeretur, at-  
 que etiam in magnum salutis, & vitæ discrimen  
 adduceretur. Quæ pœna sive temeritati, sive ma-  
 litiae negetur deberi? an ut gratiam levatæ pau-  
 lum in præsentia sitis capter, aliquis Regem suum,  
 & in Rege Rempublicam prodat, atque in ex-  
 tremum periculum adducat? an quis mihi pu-  
 blico periculo ludat? Næ hos non amicos, non  
 salutis, non tranquillitatis suæ studiosos duxerit,  
 vanum incutientes timorem, ubi non est timor.  
 Angliæ deinde recensuit ruinas, atque Henricum  
 pari assentatorum peste corruptum, & cum  
 nobilissimo Regno perditum, ad ultimumque e-  
 xitium præcipitatum fuisse; idque ipsum postea  
 eum inter suos aliquando questum constare, &  
 quanta commutatio morum ejus secuta esset,  
 quem inter omnes ætatis suæ Reges clarissimis  
 virtutum laudibus longè præstantem, & ab tali-  
 bus corruptoribus depravatum, atque inductum  
 in tam ferum evasisse monstrum, ut truculentio-

» rem Tyrannum ne veteres quidem scriptores me-  
» moriæ prodiderint, & quæ natura Tyrannorum  
» est, cùm cædibus suorum, rapinisque grassaretur,  
» haud secus, quàm si expilandum, vastandumque  
» suum ipse Regnum suscepisset, adeò suspectam  
» omnium fidem habuisse, ut ne vxoribus quidem  
» suis, quas singulis propè annis pari incontinen-  
» tiâ dilexit, & inconstantia abjecit, fideret; ac ne  
» ipse quidem minùs se suspectum omnibus, atque  
» execrandum esse sentiret. Quin Gallorum ipso-  
» rum, & quorundam Germanorum, quorum amici-  
» tiâ se, ac fœdere junxerat, insidias timere soli-  
» tum, & cavere omnia, & circumspicere, tam-  
» quam si terrarum orbis ad eripiendum ei Re-  
» gnum, & immania scelera, queis se contamina-  
» verat, vindicanda, conspirasset, ad omnia pave-  
» re, & in mediis voluptatibus, in quibus assiduè  
» volutabatur; interdum subitis terroribus corripe-  
» retur, tantisque curis, angoribus, sollicitudinibus,  
» suspicionibus diuturnis, nocturnisque adeò  
» fatigaretur, interdum ut professus inter amicos  
» sit, nihil sibi accidere posse mortè optabilius.  
» Audivit hæc attentè Augustus magno silentio,  
» nec dicentem interpellavit vnquam, sed gemitus  
» crebros, & suspiria ab imo pectoris subinde mit-  
» tebat, ut faciliè appareret vinci magis veritate  
» eum, quàm suam ab ipso cupiditatem vinci pos-  
» se. Postremò, Et mihi, inquit, mori satius est,  
» quàm cum illa vivere: cui malo privato vnquam  
» nuptiæ infeliciores contingere? Conjugem non



habeo, & conjugii vinculis adstrictus teneor, & cum præter me nulla tot Regum in Polonia stirps reliqua sit, mihi ætate, & valetudine integrâ præcisam spem liberorum cerno, quod vnicum, & domus, & vitæ solatium, & Reipublicæ stabilimentum erat, & vnà mecum Regum stirps, nomen familiæ est interiturum; vnus infinitæ, atque intolerandæ miseriæ, nec remedium, nec modum, nec finem invenio, cum vxore cælebs, & maritus sine vxore, prodigium, atque ostentum matrimonii futurus perpetuò sum. Hæc ingenti motu animi cum dixisset, iterum orare, atque obsecrare Commendonum institit, vt si qua ratio iniri posset, sibi & Regno consuleretur; nam ad cæteram infelicitatem suam accedere studium popularium suorum, vt ipse suscipiat liberos, iisque operam det, deque eo sæpe molestas voces auribus suis accidere. Commendonus cum adeò impotentem cerneret, vt quas refellere rationes nequireret, eas tamen per mollitiem, atque infirmitatem respuerit, iterum hortatus est eum, Ut animum ad constantiam, firmitatēque revocaret, neque huic ægritudini ita succumberet, vt se de rationis, & prudentiæ statu dejici pateretur, reputaret omnino quanta, & quàm ad multa pertinens res moveretur, & quæ nunc fortuna, quæ conditio Regni sui esset: quanto intestino morbo laboraret turbata, & pravis opinionibus, erroribusque omni sacrorum disciplina, & audaciâ, atque licentiâ Magistratum, atque legum ma-

» jestate convulsâ, & multis Principum alienatis de  
» eo decreto, quo publicis vectigalibus, bonisque  
» cedere eos coëgisset. Ad id tot propè hostes cir-  
» cumstare Poloniam, quot circâ essent finitimi  
» populi. Imminere Russiæ Vallachos, Tartaros  
» populari Podoliam, Lithuaniam gravi Moscorum  
» bello vrgeri: Regibus Suetiæ, Daniæque, Litua-  
» niam carpi, Germanos naturâ infensos ereptam  
» Prussiam fremere. Cæsarem ipsâ illâ suspicione  
» sollicitari, quòd armis se à Transilvaniæ Regulo  
» petrum Rege auctore opinetur, questumque de  
» eo apud suos ipsum non ignorare. Quid si hæc  
» insuper ignominia non illi solùm, sororique,  
» sed vniversæ Austriæ familiæ imponeretur? Ab-  
» sisteret iis consiliis, queis se gravi curâ, & Re-  
» gnum ancipiti discrimine implicaturus esset, &  
» desineret ea sperare, quæ humanas vires exce-  
» dunt, in quo gravius ipse, quàm Anglus Henricus  
» esset peccaturus, quòd de eo perfectum iudicium,  
» sancitæque lex fuerit, ejusque tam recenti, tam  
» insigni, atque exitus tam funesti exemplo deterreri  
» omnes possint. Hæc se ei tam liberè nunquam fuisse  
» dicturum, quæ insolentia, graviæque auribus ejus  
» fore meritò suspicari posset, nisi pari & officii fi-  
» de, & pietatis studio erga ipsum afficeretur. Gra-  
» tiam se quidem ejus maximi facere, sed pluris  
» salutem, atque incolumitatem æstimare. Po-  
» stemò Augustus, quamquam perturbatione, ac  
» dolore disrumpi videretur, tamen vim, inquit,  
» afferre insuperabilibus equidem, Commendone,  
nolo:



nolo : meo infelici fato, quando ita necesse est, «  
 parebo. Tu autem cave putes tuâ me oratione, aut «  
 libertate offendi : nam vt mihi gravis, atque a- «  
 cerba res sit, de qua differuisti ; tuus tamen in «  
 me animus, & hæc fides, & religio non iucunda «  
 esse non possunt. His sermonibus sedatus non- «  
 nihil est Regis animus, atque in præsentia om- «  
 nis ejus rei mentio omiſſa ; neque datum Nunciis  
 responſum, neque ab iis petitum ; ita compreſſum  
 eſt oriens illud incendium, quod ſi vires cepiſſet,  
 ſi Commendonus paulum modò cupidinem Re-  
 gis foviſſet, aut loci aliquid ſpei ei reliquiſſet,  
 haud dubium erat, quin conflagraturum validum,  
 ac nobile Regnum, interiturumque fuerit. A Cæ-  
 ſare paulò poſt hac ipſâ de re Legati venêre im-  
 buti eâdem de Commendono ſuſpicionem, quam  
 ei faſſa de ſe Regina fuerat, eorundem malevo-  
 lorum, atque obſectatorum artiſciis. Cæſaris au-  
 ribus inculcatâ. Sed brevi ab Legatis ipſis non  
 deprehenſa ſolùm calumnia eſt, ſed omnem e-  
 rumpentis ejus flammæ impetum vnum excepif-  
 ſe, vnum reſtinxiſſe compertum : & magnæ ea  
 de re actæ à Cæſare, Legatiſque gratiæ ; nec ab  
 iis cœptum inde quidquam, aut actum in ea re,  
 niſi de conſilio ejus eſt : qui cùm antea pertinen-  
 taſſet Regis animum, excuſato comitali Regi-  
 næ morbo, nec perpetuum eum, nec incurabilem  
 eſſe oſtendens, adeo à conſuetudine ejus averſum  
 animadvertit, vt auctor Legatis fuerit non ſolùm  
 vt de concubitu, ſed ne de convictu quidem

Dd

210 DE VITA J. FR. COMMEND. CARD.

mentionem ullam facerent, ne Rex si se vrgeri ad id sentiret, quod mortis instar exhorreret, præceps inde ad divortii consilia revolveretur, omnique abjecto pudore, omni spreto periculo ruere iterum inciperet. Ab Regina obsequiis, & officiis deliniendum, permulcendumque esse, donec tempore quoque ipse animus ejus molliretur, ac mitigaretur. Et parvè quidem consilio ejus Legati. Cæterum Regina impatiens contumeliæ non multò post per speciem visendi suos, egressa Regno Viennam se ad fratrem contulit; quod à nobis inferius suo loco tradetur.

FINIS LIBRI SECUNDI.







ANTONII MARIÆ  
GRATIANI  
*DE VITA*  
JOANNIS FRANCISCI  
**COMMENDONI**  
*CARDINALIS*  
LIBER III.

*De eo in Cardinalium Collegium cooptato.*  
CAPUT PRIMUM.



B his rebus magnum Commendo-  
ni in Polonia nomen, magna om-  
nes ceperat admiratio, cum viri fi-  
des, religio, & constantia morum  
in ore erat, tum verò virtutem, in-  
dustriam laudibus ferebant. Ante  
omnia miraculo erat eum, & Regem ab tam ef-

Dd ij

frænata, atque impotenti cupiditate cohibere potuisse, & eundem ei aditum, eundem amicitiae locum manere, adeò quidem integrâ gratiâ, ut etiam aucta existimatio ejus apud Augustum, majoréque in honore, ac dignatione haberi videretur, & cum hæc, tum præterea impetus hæreticorum in religionem egregiè repressi ab eo, Sacerdotes, qui perculsi, abjectique videbantur, erecti, protectique. Ad hæc multas ab illo ordine studio, ac sedulitate ejus prohibitas, ac propulsatas injurias esse; nunc ipsos excitando, animandoque Episcopos, eorumque causâ Catholicos adjungendo; nunc Regem variâ arte tractando, continendoque ne ab officio discederet; nec parum exemplo innocentiae, religionisque ex crebris cohortationibus ejus ad Ecclesiasticæ disciplinæ cultum, quæ pæne jam omnis interciderat, obsoleveratque, profectum esse passim homines sermonibus celebrabant. Haud Romæ minor fama de præclaris hisce actionibus percrebuerat, cum ipsorum prædicatione, ac litteris Polonorum, qui ad suos hæc perscribebant (est enim genus omne perquam curiosum, & loquax, miræque omnia observitant, nec segniùs cujusque seu bene, seu malè facta sermonibus disserunt) rum etiam ipsis Pontificis Maximi testimoniis, qui cum de susceptis à Rege, gentéque, ut supra docuimus, Tridentini Concilii decretis litteras à Commendono accepisset, recitare in Senatu apud Patres jussit; atque eas ipse verbis am-



plissimis est prosecutus; eo quippe gravior, celebriorque res erat, quo plus habituram difficultatis rati erant in Regno, ubi nec vni omnia parent, nec vniuersis eadem mens, idem de sacrorum jure sensus, ac plerisque etiam auersus ab Ecclesiâ, veróque animus esset. Necdum quid cæteræ Provinciæ fecissent, allatum erat, ut inde initium probandi, accipiendique Concilii leges ortum, vnde minùs tam promptum obsequium sperari poterat, læti, & Pontifex, & Romani Patres acceperint. Subsecuta & reliquarum fama actionum, & metus, quousque Rex tantâ libidine dimittendæ vxoris incensus processurus esset: & mox idem ipse metus vnus virtute, constantique prudentiâ, ac sedulitate sublatus; quâ vnâ re fatebantur omnes magno non negotio solum, sed etiam periculo Rempublicam fuisse liberatam: & actæ ob id Pontifici Maximo à Cæsare gratiæ, qui repulsam, prohibitamque ab seque, ac sorore, & Austria familia iniquissimæ contumeliæ injuriam vnus se fidei, industriæque debere testabatur. Itaque Commendoni virtus, atque excellens in difficillimis rebus administrandis, explicandisque consilium, solertiâque in magna laude, & prædicatione erant. Sed ex præclaris hisce, & maximis pro Republica laboribus ad eum plurimum gloriæ, nihil fructus redibat, ut ferè virtus laudatur, & alget. Quod ferè agrius amicos, & industriæ præmia ambiciosi, diuitibusque intercipi querentes sæpe ri-

Dd iij

debat Commendonus, ipsa rectè facta, eorūque conscientiam probis, ac modestis viris satis magna esse operæpretia differens, & mereri honores, quàm eorum assequi ornamenta pulchrius esse. Ut initio ostendimus, eam ipse secutus viam, rationemque in Republica fuerat, ut in nullius se clientelam, aut fidem traderet, probatissimi cujusque Patrum amicitias appeteret, studens eorum sibi gratiam, & benevolentiam decori, atque ornamento esse, adjiceret tamen se nemini. Eo fiebat, ut qui probarent, laudarent, diligenter etiam, atque ornatum cuperent multi: qui susciperet, proferret, enixèque commendatione, ac studiis contenderet (quod sæpè pro iis fit, qui fortunam suam alterius opibus applicarunt) esset prorsus nemo, ut in Principum amicitias plus splendoris illi, quàm opis esse videretur; sed qui verâ virtute, ac religione nituntur, & nullas sui secuti spes charitate Reipublicæ communi saluti cum fide consulunt, ii nimirum in Dei tutela sunt, qui quamquam vera merces maximis meritis ipse sit, ne tamen hoc quidem carere splendore dignitatis, atque præstantiæ eos patitur: atque hinc Commendonus, & absens, & nihil petens, quem nec opinari poterat laudum, & honoris sui fautorem est nactus. Pio I V. Pontifici Maximo fratris prius fortunâ, deinde suâ ex obscuro, atque infimo loco ad altissimum, atque summum mortalibus gradum dignitatis evecto, in tanta felicitate, proventuque



rerum nihil felicius contigisse existimare licet, quàm quòd Carolum Borromeum sororis filium habuerit, quo rerum, atque consiliorum interprete, ac ministro vteretur. Hunc ipse adolescentem claro genere, honoratâque, ac principe familiâ Mediolani ortum ab simplicitate ingenii, probitatêque tantâ charitate, atque benevolentia complexus est, ut primis Pontificatus sui diebus lectum in amplissimum ordinem, vnum rerum summâ praposerit: qui quidem in maximâ potestate tantâ modestiâ, ac religione egit, ut avunculi studium in eo ornando, augendôque, ingentibusque instruendo opibus nimium ipse magna ex parte cohibuerit. Idem Federico fratre, quem Pontifex ad immodicam potentiam effusâ indulgentiâ efferre videbatur, defuncto, cum se sermonibus hominum successorem fratris fortunæ, regisque inde nuptiis commutatâ vitæ ratione destinari sensisset, nec ab tali consilio alienum Pontificis animum suspicaretur, statim sacris initiari, obstringique antevertit, atque ex eo tempore cum totum se pietatis studiis dedisset, ad perfectam illam Christianæ disciplinæ laudem pervenit, quam admirati magis homines sunt, quàm imitari potuerunt: Nam & vivo avunculo cum in summa gratia, & auctoritate, quâ longè omnes anteibat, summâque copia, atque affluentia rerum omnium tot eum circumstarent illecebræ voluptatum, quæ vel progressam, & confirmatam ætatem pellicere, ac labefactare potuif-

sent, adolescenti ad edenda virtutum specimina incitamenta fuere, qui se adedò ab omni luxuria, & avaritiæ omniq̃ue intemperantiæ contagione integrum præstitit, vt in moribus ejus clarum innocentia, modestia, ac religionis exemplum eluceret. Et mortuo deinde Pontifice ad suum munus Mediolanum profectus (erat enim civitatis ejus Archiepiscopus) omnes quibus eum largè, ac munificè avunculus cumulaverat, aut egentibus elargitus est opes, aut sacrarum rerum cultui erogavit: ipsa etiam beneficia, quæ per multa, atque vberimorum vectigalium habebat, novo Pontifici remisit, quo liberior vni Episcopalis officii, & sacrarum curæ vacaret: neque hæc, vt quidam per ambitionem, & gloriam; sed constanti decreto, & prorsus quomodo fieri nisi ex animo non potest, quippe huic humanarum rerum contemptioni consonam, & æqualem vitam egit, ne cum divitiis honorum quoque insignia abjiceret, haud vllâ re deterritus, quàm quod ea sibi ad exequenda Episcopalis officii munia adjumento fore putavit: quo vel maxime declarasse est visus, non famæ, atque gloriæ servitum, sed populi, quem curæ, atque fidei suæ traditum regendum suscipiebat, commoda tantum ab eo esse spectata. Atqui hujus Episcopalis officii, quod est longè omnium inter homines gravissimum, atque maximum, adeò inde omnes partes implevit, non solum sanctitate morum, ac vitæ disciplinâ, & sacrarum cultu, quibus pu-  
rè,



re, castéque, & summa cum religione quotidie operabatur, sed templis restituendis, ornandis, excolendis, novis ædificandis, & populorum corruptis moribus, pravisque consuetudinibus, quas temporum superiorum perversitas induxerat, & aluerat indulgentia Episcoporum, abolendis, & ad veterum institutorum rationem, normamque revocandis, ut in civitate vasta, & corruptelis referta, & diuturno peccandi usu à prisca tum vivendi, tum sacra colendi religione desuefacta, non modò libidini, luxui, ingentibusque ex omni genere vitiis, quibus præcepta illa ferebatur, fræna injecerit, sed tantos exemplo virtutis, & sanctitatis suæ amores pietatis excitavit, ut nusquam plures invenias ex omni ætate, sexu, ordine, qui piis, & Christianis officiis se, operamque suam devoverint; nusquam templa frequentiori populo celebrentur, aut divinus cultus, aut sacrarum ædium administratio majore religione, sanctioribusque ceremoniis habeantur, nusquam denique Ecclesiastica disciplina sit intentior. Sed ne singula (quod longum esset) percenseam, tantus vir cum in suo persequendo, atque explendo munere, tum in omni laude, & officio Christianæ religionis colendo evasit, ac tanto in iis studio, cura, labore, diligentia, assiduitate, tantoque omnis gratiæ, invidiæ, offensionis contemptu est versatus, ut illorum virorum imaginem temporibus nostris retulerit, quos propagatæ Christianæ fidei gloria, & veræ virtutis, atque in-

Ee

nocentiae opinio divino numine contestata in  
caelestium Concilium sublato consecravit. Huic  
igitur dum sub avunculo rerum potiretur, cum  
Commendone non plus benevolentiae interces-  
sit, quam quantum fama, atque opinio, quae in  
civitate de illo erat, adjungere illi potuit; usus,  
& familiaritas certe nulla, nam praeterquamquod  
Commendoni animus ambitiosam illam ratio-  
nem per assentationem insinuandi se in gratioso-  
rum, & potentium amicitiam respuebat, iis, quas  
commemoravimus, legationibus obeundis, to-  
tum ferme tempus Pii Pontificatus ab Urbe, at-  
que Italia abfuerat. Sed Borromeo inerat recti,  
honestique amor, cujus laudem vel in eo cole-  
bat, mirabaturque cum quo sibi nullum necessi-  
tudinis jus esset: virtutis quippe ea vis est, ut  
ignotis quoque studia, ac benevolentiam concil-  
liet: Itaque apud eum ratio dignitatis, quam am-  
bitiosa in se observantia major ducebatur, & spe-  
ctata arduis rebus, probataque fides, atque con-  
siliium Commendoni, quamvis absentis, pluris  
erant, quam multorum fucata studia, à quibus  
quotidianis deducendi, salutandi, affectandique  
officiis colebatur. Ad hunc Borromeum pro mune-  
re, cui praepositus ab avunculo erat, referebant  
omnes, quicumque aliquid publicae rei gerendum  
accepissent. Ad eundem cum litterae quoque à  
Legatis, Praesidibusque Provinciarum publice mit-  
terentur, summum huic rei studium, curamque  
Commendonis est impartitus, ut quantum reli-



gionis in rebus verè, & ex fide præscribendis, tantum in explicandis diligentia adhiberet, eo quidem magis accuratè, cogitatèque, quòd eo studio teneri, delectarique magnopere Borromeum à suis erat certior factus. Genus orationis secutus est (vt id quoque hoc loco attingamus) quod rebus congrueret, grave, ac ferium, ab omni fūco, pigmentisque, & inani ornatu verborum longè abhorrens, quibus vsitatis, ac de medio sumptis non exquisitè delectis utebatur: In ordine, & collatione rerum, & sententiarum, vt nexæ inter se, aptæque aliæ ex aliis essent, elaborator, quàm in ipsa expolienda, exornandaque oratione fuit. Nulla verò in iis prædicatio, sui, nulla operæ, aut industriæ venditatio, in quo sæpe intemperanter, ac molestè jactare se quidam solent: quæ bene, atque vtiliter gesta mandatis responderent, ea ad Pontificis ipsius consilium, gloriàmque vt minister referebat, studium in agendo, in renunciando verecundiam retinens, quod cæteris additum ejus laudibus fidei, integritatis, abstinentiæ, religionisque omnium sermonibus commendabatur, incredibiliter Borromei animum in Commendonum accendit, qui pariter & in administrandis rebus, & in enarrandis prudentiam, atque ingenium ejus enitere prædicabat; nec id quidem præterire juvenis consilium volumus, qui iis rebus, virtutibusque incitatus, cum ad eam voluntatem incubuisset, vt Commendonus Cardinalis crearetur,

E e ij

idque pro gratiâ, quâ apud avunculum pollebat, haud difficile fore sibi existimare posset, tamen sive à quibusdam magnæ potentiæ, atque auctoritatis viris Commendoni laudibus senserat invideri, quos conatui suo adversari volebat, seu tantum ei Reipublicæ spectata utilitas sit, nullâ sibi propriâ quæsitâ gratiâ, cogitationem hanc suam tam altè compressit, ut animadverti à nemine potuerit, ac ne ad ipsum quidem Commendonum suspicio, aut indicium ejus rei ullum permanere; cujus ne habita quidem vlla ratio fuerat in quotidiana beneficiorum largitione, cum in tenui fortuna ægrè dignitatem suam tueretur; præmia, & beneficia sæpè cupidis quibusdam, atque ambitiosis auferentibus, qui omnibus occasionibus, temporibusque imminentes, omnia tendiculis circumdata egregii aucupes habent, nihil ut effugere avidas eorum manus possit. Quin Commendono tot itineribus, sumptibusque exhausto non modò pecuniæ nullum supplementum est missum, sed illa ipsa menstrua pensio ducentorum aureorum, quæ in victum est Nunciis constituta, sæpè dilata, interdum etiam nonnisi magnâ suorum diligentia à quæstoribus exacta est: adeò nihil illi ad spem ejus honoris, quo mox est affectus, ostendebatur. Sed eum haud dubiè occultâ vi divinum Numen provehebat: sub illo enim Pontifice ad amplissimum gradum pervenit, qui nec ante Pontificatum vllis sibi officiis propriè cultus, ynde jus aliquod, aut



aditum ad eam spem præsumendam habere posset, nec in Pontificatu ipso aliter illi, quàm absens per ministeria esset cognitus; scilicet, ut honor nec petenti, nec præsentì, neque ad eum ullis amicitiiis, aut ullis suffragatoribus nitenti ultro delatus insigniori gloriâ decoraretur, & dignitati habitum honorem, non gratiæ aut opibus tributum omnes faterentur. Pridie ejus diei, quo habita Cardinalium comitia sunt, commendanti hunc Borromeo perquam accuratè, illustratque ejus merita in Rempubicam permulta memoranti, haud aliud respondisse Pontifex dicitur, Quàm tu verò mactè virtute es fili, qui talium virorum dignitati, atque honori favens, ipsum te omni honore, ac dignitate dignissimum præstas; statimque assensus describi referrique in eorum jussit numerum, quos ex ingenio suo delegerat cooprandos, & fassus pudore affici se, qui alieno admonitu ad eum ornandum indignisset: eo libentiùs sibi suscipi illum dixit, quòd cùm quosdam minùs probatos sibi invitùs, coactùsque summis Regum precibus, studiisque esset renunciaturus, eo minùs apparitura indignitas foret, hujus velata tectaque dignitate. Nec ullius nomen majori Collegii totius approbatione est acceptum, aut pluribus laudibus ab optimo quoque Patrum cumulatam, quorum vna propè omnium vox, sententiæque fuit non plus Commendoni ex eo honore accepisse decoris, quàm ex virtute ejus excellentibusque animi, atque inge-

E e iij

nii ornamentis ad ipsos, qui dedissent, redun-  
 re. Unus omnino Patrum fuit (cujus nomini,  
 quando jampridem fato est sanctus suo, parcere  
 placet, dum astutissimum, & pessimum genus  
 obrectandi bonis, eosque ipsorum laudibus op-  
 pugnandi prodere non pigeat) is lividi animi vi-  
 tio Commendoni honori acriter invidens, nec  
 palam ausus tantæ universi ordinis consensionis,  
 studioque obviam ire, propius ad Pontificis so-  
 lium accedens, (ut est callida sui occultatrix ma-  
 litia) Commendonum quidem, ait, habere eas  
 „ ingenii, doctrinæ, integritatis laudes, ut nullus  
 „ honor tantus sit, qui habitus ei ante tempus vi-  
 „ deri possit; sed tamen gravissimo tempore Rei-  
 „ publicæ in tanta eorum inopia, qui spectatâ fi-  
 „ de, atque industriâ mitti publicè extra Italiam  
 „ quò, & ad quos posceret usus, possent, virum,  
 „ & tractandi Regum animos, & exterarum rerum  
 „ longè peritissimum flore ætatis, & robore vale-  
 „ tudinis quantivis laboribus, aut negotiis parem  
 „ præmaturo studio honestandi egregia ejus meri-  
 „ ta non revocandum à præclaro, & multis mor-  
 „ talibus salutari industriâ, atque gloriæ cursu, ma-  
 „ joresque ex tam insigni virtute, ac pleniores fru-  
 „ ctus esse præcipiendos, & aliis interim remune-  
 „ rato ornatōque præmiis honorem purpuræ, ut  
 „ non negandum viro tali, ita Reipublicæ causâ  
 „ nonnihil differendum esse videri. Ne lecturum  
 „ quidem tam impudens nocendi argumentum si-  
 ne risu, ac stomacho arbitror quemaquam. Pon-



tificem certè & ingenii hominis, & harum artium  
 haud ignarum veterator non fefellit, qui eo per  
 risum sine responso dimisso de Commendoni Car-  
 dinalatu retulit adeò magnificis verbis, ut non  
 ornatorem modò ipsum ordinem amplissimum  
 illius viri dignitate, & decoribus futurum, sed  
 munitiorem etiam, ac firmiorem tantæ virtutis  
 fultum præsidio diceret: atque hac ille viâ, hoc  
 maximè modo Cardinalis est factus IV. Idus Mar-  
 tii M. D. LXXV. ætatis suæ altero & quadagesimo.  
 Ipse apud Polonos ignarus fortunæ muneri suo  
 intentus agebat: nihil minùs quàm honores, &  
 purpuram meditans, qui debitam sibi in necessa-  
 rias impensas menstruam pecuniam vix atque  
 ægrè exprimere esset solitus, ac sæpè domesticæ  
 difficultatis curis, tædiòque angeretur, jamque  
 & rebus, & sumptibus fessus de reditu in Italiam  
 cogitabat, oraverátque per litteras Borromeum,  
 ut sibi successorem impetraret, & secessum sibi,  
 & Patavium, & otium spe, ac animo fingeat, &  
 reditum in gratiam cum litteris, & studiis suis,  
 quorum consuetudine aliquot jam annos publi-  
 cis rebus, curisque distentus perinvitus caruerat:  
 flagrabátque otio, ac studiis obsequendi deside-  
 rio, & fortè sermonem mecum ipsis de rebus in-  
 stitutum jucundè (ut optata memorantur) habe-  
 bat, cum ei nunciatur adesse Viennâ à Zaccha-  
 ria Delphino Episcopo Pharenfi missum cum lit-  
 teris, qui festinans adire ad ipsum posceret. Del-  
 phinus tum pari Nuncii munere apud Maximi-

lianum Cæsarem fungebatur, fuerátque iisdem comitiis Cæsaris ipsius commendatione Cardinalis renunciatus. Introductus ille Commendonigenua amplexus Cardinalem eum salutat, litterasque cum eadem appellatione ipsi à Delphino tradit. In iis erat, tabellarium ad se ab Urbe magnâ celeritate venisse, qui se, & Commendonum in Cardinalium Collegium xv. Idus Martii fuisse coopertos nunciavit, idque illi Delphinus multis verbis honorificè, atque amicè, ut mos, gratulabatur. Commendonus lectâ epistolâ paulum cogitabundus constitit: deinde latari quidem se pro amicitia Delphini honorem magnopere dixit: cæterum de se, quando non solum litteræ sibi nullæ ab Urbe; sed ne suspicio quidem ejus rei antè allata vlla esset, efferri eam priusquam tabellarii sibi à Pontifice Maximo, aut Borromeo Cardinali venirent, nolle: nunciûmque comiter acceptum, & filere jussu ad curandum corpus dimisit, prorsus vultu eodem, ac nihil quod notari posset animo motus; quin me tam latè, tam improvisi, atque inopinati nuncii miraculo defixum, ac propè attonitum cernens primò irrisit, mox perfusum voluptate, & gaudio juveniliter gestientem corripuit, abiréque, & monere illum, qui venerat, ut planè rem tegeter silentio jussit. Posterâ die, ne si quid aliunde emanasset celare ipsum Regem videretur, ire me, ac nunciare illi jussit omnia ut allata sibi Viennâ essent, & ut tacitè haberet, donec ex Italia tabellarii



larii venirent, orare: adeò lætus audivit ea Rex, ut quamquam maximis Commendoni meritis multò antea debitum eum esse honorem intelligeret, lætari se tamen diceret delatum ei fuisse, ut potissimum in suo Regno acciperet. Supprimendi autem rem, ne efferretur Commendonus, ut erat ad omnia cautus, hanc habuit causam; quòd nec auctori Delphino satis fideret, quem sæpè æmulatione, atque invidiâ obtrectasse sibi compererat, nec erroris suspicio abesset, aut rei, aut nominis, quando nullum indicium ad se talis rei perlatum antea foret. Quintus ab adventu Viennensis Nuncii dies præterierat, mèque ejus moræ sollicitudine anxio vehementer, & propè jam spe dejecto, ipse haud aliud, quàm suo consilio silendæ rei lætabatur. Tandem adventu tabellariorum, & Fulvii Rogerii Bononienfis à Pontifice missi cum purpureo capitis indumento, primòque Cardinalatûs insigni, quod biretum vocant, res pervulgatur, ad eumque concurritur, cui à sacris, quibus operatus erat, Pontificis Maximi, & Borromei litteræ redduntur, honorificentissimis in se scriptæ verbis, quas tristitiæ propior, quàm gaudio legisse observantibus vultum ejus est visus. Inde gratulantium studiis benignè susceptis, cùm se domum, atque in conclave recepisset, me quidem, qui solus cum eo remanseram, & amplecti dexteram, & effundere gaudium, quod animo capere vix poteram, ardebam, severitate, & constantia vultûs deterruit;

FF

nec aliter ipse stantem, tacitumque est affatus;  
 » quàm, Nobis verò, inquit, optati Patavini otii  
 » spem præcisam vides, & jam agimur, vbi alieno  
 » arbitrio vivendum, & longè à portu danda ven-  
 » tis in altum vela sunt. Deum precare, vt cursum  
 » tenere possimus, & fluctibus, tempestatibúsque  
 » ne obruamur. Tum Senatores duo à Rege missi  
 adfuere, qui Regem, si fratri suo is habitus honor  
 esset, non plus lætitiæ capturum fuisse, quàm ex  
 amplificatione illa dignitatis ejus cepisset, dixe-  
 runt. Secuti inde Episcopi, reliquique Principes  
 gentis, etiam ex hæreticis plerique, nec ferme  
 quisquam fuit ex omni nobilitate, quæ in illo  
 conventu frequentissima aderat, quin gratulatum  
 domum ejus veniret, tanta omnes studia in il-  
 lum proficentes, vt plura nec à civibus quidem,  
 aut propinquis suis expectanda ei fuisse videren-  
 tur. Ipse gratias quidem omnibus egit, sed oris  
 » habitum minimè lætantis ferens, tranquillis quo-  
 » que, & quietis Ecclesiæ temporibus gravem, diffi-  
 » cilémque muneris ejus functionem esse aiebat, per-  
 » turbatis verò, ac turbidis, qualia tunc essent, longè  
 » gravissimam: itaque Deum orandum, oneri feren-  
 » do impar ipse ne esset. Atque in hanc sententiam  
 gratulantium quoque litteris respondit; vt nihil  
 ab gaudio dissolutum, nihil elatum, aut ab cæ-  
 tera gravitate ejus, modestiæque alienum in di-  
 ctis, factisve ejus existeret, prorsúsque rem ita  
 acciperet, vt eam suâ vi, ac religione, non tan-  
 tum specie, ac splendore honoris metiri videre-



tur. Facta autem illi singularis gratulatio non ab Collegis suis modò summis viris, sed ab omnibus Regulis, & Principibus Italiæ; & ab ipso etiam Cæsare perhonorificè, amantèrque scriptæ litteræ sunt allatæ, qui quidem Cæsar non contentus eâ significatione litterarum, vocato ad se Venetorum Legato, gratulari se civitati ejus dixit, ad quàm non parvæ pars laudis ex Commendoni Cardinalatu rediret, cui vni confessione omnium præter virtutem ad eum consequendum honorem nihil suffragatum esset: quod cùm Legatus publicè ad Senatum scripsisset, magno ea res Commendono apud cives suos decori, ac dignitati fuit. Regis Poloniæ verba ipsa huc transferam excerpta ex ejus ad Pontificem Maximum epistola. In hoc, inquit, Joanne Francisco Com-  
 mendono; quem nuper in amplissimum Ordinem  
 legisti, incredibiliter sum lætatus respondisse opi-  
 nioni, & cupiditati meæ judicium tuum: Nam  
 ego maximis ejus virtutibus addictus, fueram eum  
 tibi quàm diligentissimè commendaturus, & pro  
 summo beneficio à te petiturus, uti eum hoc ipso  
 honore, qui mihi præstantibus ejus meritis vi-  
 debatur deberi, rogatu quoque meo honestare  
 velles; sperans tuâ fretus benignitate te hoc mi-  
 hi non negaturum, nisi huic voluntati, ac studio  
 meo moderatio ipsius, & in recusando perseve-  
 rantia obstitisset. Quo mihi jucundius accidit, sa-  
 pientiam tuam simul & dignitati ejus, & desi-  
 derio meo occurrisse. Ego verò non tibi solùm, &

» sed ipsi Ecclesiæ , ac Reipublicæ gratulor , ad  
 » quam non parum præsidii , atque ornamenti ex  
 » viri tantis ingenii , atque animi bonis excellen-  
 » tis , ac tot jam veræ virtutis experimentis specta-  
 » ti , ac cogniti honore videtur accessisse.

*De discessu ejus ex Polonia , & legatione ad  
 Germanos.*

CAPUT II.

**S**EXTO post Cardinalatum mense jussus à Pon-  
 tifice Germanorum obire concilium , quod  
 Augustæ apud Vindelicos à Cæsare indictum erat,  
 è Polonia discessit , Rege , ac Principibus gentis  
 certatim officiis , atque honore abeuntem prose-  
 quentibus. Pragam ( Bohemiæ caput est ) adve-  
 nienti obviam progressus Archiepiscopus Pragen-  
 sium , Pium IV. Pontificem Maximum ad v. Idus  
 Decembris diem suum obiisse nunciavit , & mox  
 tabellarius ab Urbe magnâ celeritate missus à  
 Carolo Borromeo , & Marco Altempsio Cardi-  
 nalibus , Pontificis sororum filiis cum litteris af-  
 fuit , quibus magnopere illi à Commendano pe-  
 tebant , ut omnibus rebus posthabitis , Romam  
 ad comitia adcureret. Censentibus omnibus eun-  
 dum , protinûsque eâdem nocte iter cum paucis  
 expeditis arripiendum ; ipse quidem utrumque  
 cupivisset , & interesse comitiis , & perstudiosè



vocanti parere Borromeo : sed & Germanos ex occasione molituros adversus jura sacrorum aliquid in eo conventu rebatur, & Cæsarem, nisi custos ei aliquis, ac monitor esset appositus, haud satis per se impetum eorum propulsatum existimabat, & antea dissimulationis, & negligentiae in ea re suspectum, & tum etiam obnoxium Germanis, quorum opem implorabat ad arcendam Turcarum vim, à quibus sævo bello ab Ungaria petebatur. Deliberanti privatis rationibus, officioque Respublica antiquior, potiorque fuit; statuitque non antè redire in Italiam, quàm Cæsarem convenisset, & privatim, quando Legati auctoritas Pontificis morte interciderat, eum & muneris sui defendendæ religionis, & consiliorum, quæ hæretici haberent, admonere. Triduum Pragæ agendi, colendique causâ diem natalem Christi commoratur; inde profectus, superatis Hircinæ saltibus, quibus Boemia omnis ambitur, & nivibus, quibus oppletæ, impeditæque per sylvam viæ erant, agrestium operâ amotis, in Germaniam ingreditur, Baviarumque petit, sperans ibi occursum se Cæsari iter Viennæ Augustam ad conventum habenti; atque ita accidit, ut eò paulò ante Cæsarem veniret. Regnum in Bavaria tenebat Albertus, vir dignitate, opibusque, & affinitate Cæsaris, cujus sororem in matrimonio habebat, & Cæsareæ familiæ honore inter reliquos Germaniæ proceres eminens, & studio avitæ pietatis, & fidei in

Romanam Ecclesiam; & Catholicam religionem  
longè eminentior. Cum hoc Commendonus  
indè ab superiori legatione, quâ Germanorum  
gentem obivit, institutam benevolentiam habe-  
bat, quam & coluerat absens omnibus officiis,  
& Albertus ipse huic amicitia plurimum semper  
tribuerat, & tum novâ dignitate ob virtutem  
auctum ad se venientem quam potuit comiter,  
atque splendide hospitio accepit; ipsâ quoque  
opportunitate adventûs ejus lætatus, cum domum  
suam initurus Cæsar adventaret. Cum igitur  
Commendonus cum Alberto de Republica con-  
silia contulisset, & ab eò vehementer collauda-  
retur, quod non statim neglectâ, ac posthabitâ  
religionis causâ, cupidè Romam ad comitia pro-  
perasset, Cæsar advenit magnificentissimo hospi-  
tio ab Alberto acceptus; qui quidem equo dis-  
cedens, cum opperientem se in vestibulo Regiæ  
Commendonum aspexisset, ultro ad amplecten-  
dum eum accurrens, & perquam familiariter ap-  
pellans, Tu verò, inquit, hæc frigido in cælo  
» nobiscum moraris, at Romæ interea magno æstu  
» comitia calent; apprehensâque ejus dexterâ per  
gradus unâ in ædes, atque in cubiculum ascen-  
dit, nec destitit eum, quamdiu ibi mansit, pa-  
lâm magno in honore habere, cum eodem  
recto uterque, iisdem quoque epulis, mensâque  
quotidiè utebantur, cui præter ipsum, & hospi-  
tem Albertum nemo adhibebatur: cum unâ &  
uxor Cæsaris, & soror, & filia duæ nobiles ac-



cumberent, quarum paulò pòst altera Philippo, altera Carolo Hispaniarum, & Gallia Regibus nupsere. Peracto convivio, & amotis arbitris in conclave idem Cæsar, Commendonus, & Albertus ad colloquium secedebant, multasque horas vnà quotidie erant, cum multa de Polonicis rebus, de sororis suæ cum Rege dissidio quæret Cæsar, deque eo quod ipse debere se Commendono profitebatur, memoraret, cuius studio, curaque effectum esset, ne quò impotenti cupiditate rapi videbatur, præcepseret. Multa quoque de Turcico instanti bello communicavit, rationemque cum eo iniit, quâ salvis fœderibus, quæ Regi Poloniae essent cum Turca, aliquot ex ea gente turmae equitum ad id bellum conduci possent. Ante omnia illum Commendonus de consiliis hæreticorum, quæ compererat, docuit, & commodâ oratione muneris eum sui admonuit, tantò tum intentius suscipiendum avitæ religionis patrocinium, tuendamque sacerdotum jura illi esse differens, quantò incommodiori tempore aggressuri ea adversarii essent, cum Pontificis Maximi morte, præfide suo, ac rectore Ecclesia, & Christiana Respublica careret, atque in eo maximè Concilio, quod ipse primum post adeptum Imperium haberet, dandum sui specimen, ac documentum, quantumque in illo spei bonis esset ponendum, indicandum. Per hæc confirmato Cæsare, eoque non passurum ab se desiderari officium suum prolixè

pollicente, quartâ post adventum ejus die, cum eâ die Commendonus esset post convivium discessurus, lavantibus manus, ut accumberent, celeritatis plenus tabellarius Cæsarem adiit, litterasque à Cosmo Medice Florentinorum Duce reddidit, quibus Michaëlem Ghislerium Alexandrinum Cardinalem Pontificem Maximum ad VIII. Idus Januarias esse renunciatum, & Pium V. appellatum scribebatur. Cæsar lectâ epistolâ, quamquam ipse & alium ex iis, quibus studiosè favebat, & quamvis alium, quàm Alexandrinum fieri Pontificem maluisset, cujus acres spiritus in sua dignitate tuenda, vindicandâque religionis majestate antea rumore, atque famâ acceptos, minimè opportunos consiliis, & cogitatis suis existimabat, quem quæstionibus adversus hæreticos præpositum, eas severè, atque integrè exercuisse cognoverat; tamen dissimulato animi sensu, Commendono creationem Pontificis læto vultu enunciat, litterasque legendas tradit. Cum discubissent, sermôque de novo Pontifice esset institutus, Commendonus (senserat enim ictum eo nuncio Cæsarem) à primordiis ejus vitæ exorsus, de maximis ejus sanctitatis, atque innocentie laudibus, quibus nullo ipsius non solum ambitu, sed ne studio quidem, per omnes honores ad summum rerum humanarum fastigium provectus esset, ita copiosè, aptèque disseruit, ut omnes in admirationem, & venerationem ejus adduceret, omniumque animos magnâ ejus spe, ac expectatione



tione repleret; quo facto ipse statim è convivio  
 equos ascendit, Romam magnis itineribus, ut Pii  
 initiis adesset, contendens. Cæterum vix tridui  
 iter progresso ad Oenipontem Nuncius à no-  
 vo Pontifice missus cum litteris occurrit Ger-  
 manicam ei legationem decernentibus; nam  
 Pius antequam è comitiorum conclavibus e-  
 grederetur, cum omnia strepitu, concursatio-  
 ne, turbâque miscerentur, nihil illo supremæ  
 potestatis honore ullam in partem animo excus-  
 sus, (tantum illi inerat roboris) jam tum curam  
 in Rempublicam intendit, litterasque extemplo  
 ad Commendonum dari jussit, quibus ostendit  
 sibi placere, ut Germanorum conventui interes-  
 set Legatus. Quinquaginta Cardinales ea comi-  
 tia habuerunt, in quibus erant summæ dignita-  
 tis, & omnium virtutum excellentes viri, quo-  
 rum nemo non eum honorem legationis, munus-  
 que mandari sibi cupivisset, singulorumque tan-  
 tum, ac tam recens in Pium extabat meritum;  
 tamen consensu, & approbatione omnium ad  
 Commendonum ea delata provincia est, tum o-  
 pinione industriæ, prudentiæque, quæ summa de  
 illo erat, tum quod vnus maximum gentis ejus  
 habere usum existimabatur. Reversus igitur Au-  
 gustam Commendonus, ibi cum novæ legationis;  
 Cardinalatus quoque sui insignia, purpureum gale-  
 rum à Pio missum de Othonis Truxii, qui idem Au-  
 gustæ Episcopus erat, manibus solemniter inter sa-  
 cra de more suscepit, Alberto Bavaro cum vxo.

re, ac liberis, multisque præterea principibus viris adstantibus, qui honestandi Commendoni, & celebrandæ rei causâ convenerant. Indixerat cum conventum Maximilianus, cum aliis de causis, tum maximè ut auxilia à Germanis impetraret adversus Solimanum Turcarum Regem, qui Ungarici Regni reliquias persequens, & Austriæ ipsi jam, Viennæque magnopere imminens, ingentes peditum, atque equitum copias, quibus à Constantinopoli in Maximilianum ferretur, parabat; quo majus religioni periculum impendere ab solitis licentiæ jura pretio mercari videbatur. Præter id ingravescentibus multis Germaniæ morbis, ut remedio occurreretur, id erat coactum concilium; quorum tamen ea vis, ea desperatio erat, ut ne remedia quidem ferre posse viderentur. Cum publicè in eo conventu de religione agere propter nimias hæreticorum opes, & pertinaciam tutum non videretur, Commendonus domi suæ Catholicorum concionem habuit, missis, qui singulos Principes convocarent; nec illi gravatè parvere, quòd erat ejus apud Germanos magnum nomen, magna ab superiori legatione integritatis, religionis, eloquentiæ fama. Primæ dignitatis in iis fuere Cardinales duo Otho Truxes, & Marcus Altempsius, alter Augustæ, alter Constantiæ Episcopus; & tres septemvirali honore præfulgentes, quos ipsi Electores appellant, Moguntinorum, Colonienfium, & Trevirorum Archiepiscopi; & præter hos ma-



gnæ nobilitatis, & potentia viri Albertus Bava-  
 rorum, & Gulielmus Clivensium, & Henricus  
 Brunsvicensium Reguli, multique præterea libe-  
 rarum civitatum, & absentium Episcoporum, ac  
 Principum Legati. Ad hos orationem habuit,  
 quâ primùm eos ad tutandam prisca religionis  
 integritatem, propulsandósque impios hæretico-  
 rum conatus magnopere est adhortatus. Id autem  
 fore iis haud difficile, si consentientibus studiis,  
 constantibusque animis sese adversariis opposuis-  
 sent, quos hætenus tam socordia, atque inertia  
 nostra, & dissociata consilia, quàm vires eorum fir-  
 miores, validioresque adversus nos fecissent.  
 Hanc verò voluntatem, animorumque consensio-  
 nem, & mutuam de salute, atque incolumitate  
 alterius curam cum præsentibus rebus salutarem  
 fore: tum esse laudem Christianorum hominum  
 propriam, & veram solidamque virtutum omnium  
 radicem, ac fontem ignotum cæteris gentibus,  
 nobis ab ipso Christo Deo indito, charitatis vo-  
 cabulo proditum, cuius vim nec veteres affecu-  
 tos esse humanæ sapientiæ doctores, nec nisi ab  
 iis intelligi, qui eadem in Deum fide, eodem  
 sensu, eodem studio, atque mente conjuncti, ve-  
 luti corpus vnum vni præsentī capiti, parentis Ec-  
 clesiæ Catholicæ gremio continerentur. Maxi-  
 mè autem ejus esse virtutis expertes, hæreticorum  
 omnes factiones, qui nomen modò charitatis suis  
 immanibus flagitiis prætendentes, rem ipsam ex-  
 ploderent, rectè faciendi necessitate sublatâ, &

Gg ij

» ab illo capite, quod Vicarium suæ potestatis con-  
» stituit inter homines Deus, sese præcipientes,  
» omnia societatis, & mutæ necessitudinis vincu-  
» la refringerent, concordiam, pacemque illam  
» abrumperent, quam terras relinquens, in cælum  
» abiens Christus tantopere nobis commendavit.  
Cum multa in hanc sententiam, quare magno  
» animo, communibusque consiliis obsistendum,  
» atque obviam eundum audaciæ hæreticorum ef-  
» fect, & majestas religionis, & sua ipsorum liber-  
» tas, dignitasque piè, fortiterque defendenda, di-  
» xisset, orationem ad Concilium Tridentinum  
» flexit. In eo cum sacrorum, & fidei rationem  
» egregiè explicatam, atque institutam esse, tum  
» morum, ac vitæ disciplinam ad prisca sanctita-  
» tis consuetudinem revocatam, acerrimamque  
» telum adversariorum manibus ereptum, atque  
» in ipsos per summam omnium flagitiorum, ac  
» turpitudinum licentiam degentes retortum, pa-  
» ritèrque & impiè dicta in Deum, & improbè ja-  
» ctatas in bonos obtrectiones repulsas, ac refuta-  
» tas esse. Susciperent ergo salutare leges, & quod  
» sanandæ maximè Germanorum genti tot per an-  
» nos, tantis sumptibus, tanto ab ultimis quoque  
» terris Patrum, doctorumque virorum concursu  
» habitum Concilium esset, ejus decretis Principes  
» ipsi parerent, ex eorum jure rem Ecclesiasticam  
» regerent, sancirèntque, consensum cum bonis  
» ostenderent; impios & hæreticos contumaciæ,  
» ac discordiis suis relinquerent, donec aut tædio



diffidendi, in novásque, & contrarias quotidie  
 sectas transeundi refipiscerent, aut in illa pravi-  
 tate perseverantes justas pervicacis animi pœnas  
 Deo penderent. Germani cùm paulò inter se con-  
 sultassent, Moguntinus Archiepiscopus, qui di-  
 gnitate cæteros anteibat, de reliquorum senten-  
 tia gratias Pontifici Maximo, atque ipsi Com-  
 mendono egit, quòd de Germaniæ salute, deque  
 eorum rebus tantam curam gereret, easque stu-  
 dio, operâ, consiliis juvaret: Quæ apud ipsos de  
 animis, voluntatibusque jungendis, item quæ de  
 Concilii Tridentini legibus graviter, copiosèque  
 differuisset, scire vera esse, & se adnixuros, ut  
 vulneribus suis ea maximè remedia adhiberent,  
 quæ ipse commemorasset. Scita Concilii accipe-  
 re ipsos, sanctèque omnes polliceri ejus se jussis  
 obtemperaturos in iis, quæ fidem, & sacrorum  
 cultum respicerent, sine exceptione vlla, aut du-  
 bitatione: in disciplinæ ratione quædam esse ca-  
 pita, quibus excipi cuperent; quod in tam de-  
 pravatis hominum moribus, tantæque licentia,  
 ac perturbatione Germaniæ nec vtile foret tum  
 revocari, nec tutum; ad id pacatius, magisque  
 tranquillum esse tempus opperiendum. Quæ apud  
 ipsum eo libentiùs profiterentur, quòd sibi cum  
 prudentissimo Germanicarum rerum esse sermo-  
 nem scirent, quo etiam ab eo peterent, ut susce-  
 ptum erga Germanos studium retineret, postu-  
 latisque eorum publicis, privatisque apud Pon-  
 tificem Maximum auctoritate suâ, gratiâque ad-

Gg iij

” esset, atque in praesentia, ut cepisset, tegeter;  
” tuereturque; tantorum ejus in gentem suam of-  
” ficiorum perpetuam apud Germanos mansuram  
” esse memoriam. At haeretici in omnem semper  
occasionem intenti more suo multa moliebantur:  
ante omnia Maximilianum ipsum magnis polli-  
citationibus sollicitabant, ut tandem sententiam  
proferret, palamque in partes transiret. Nam pau-  
cis ante annis haeticorum partim spe, partim  
consuetudine corruptus, alienatus a Catholica pie-  
tatis fide animi haud ambigua signa dederat,  
qui & sacris eorum interfuerat, & quemdam pro-  
fligatae doctrinae magistrum domi aluerat, habue-  
ratque in honore, & Viennae in templis de divinis  
rebus concionantem frequenter audierat, nec nisi  
magno studio, atque cura Ferdinandi patris, impri-  
mis pii, & religiosi hominis, denunciantis, eo ab-  
dicato, ad alium se filium inatu minorem Impe-  
rium, atque nomen Caesaris delaturum, a nefa-  
riae opinionis professione est revocatus. Post mor-  
tem inde patris affecutus Imperium ita vixit, ut  
dum spem sui utrique parti facere studet, omni-  
bus aequè suspectus, neutrorum gratiam tenuerit.  
Tum quidem haeretici promissa exigentes vehe-  
menter urgebant, ut jungeret se illis, & mentem  
aliquando nudaret, ac propterea extorquere ab  
eo conabantur, ut foedera concordiae, pacisque  
anno M.D. XLV. inter ipsos, & Catholicos Passa-  
vii constituta, violata saepe ab iis, tum penitus  
rescinderentur: eo enim anno quemadmodum à



Ferdinando Cæsare ab simili periculo Turcici belli copiarum, ac pecuniæ indigo expresserant, ut quibus libuisset, sacrorum ceremonias ex Augustana formula colere, atque habere jus esset; ita additum fœderi fuerat, ut qui à prisca sacrorum ratione, & Catholicæ Ecclesiæ sensu deficerent, aut omnino dissentirent, ii ne vectigalia quidem vlla, aut honores Ecclesiasticos obtinerent, aut potiri possent. Id ut antiquaretur, summis studiis hæretici contendebant; item illud, ne qui disciplinæ eorum sectatores Catholicorum imperio, ac ditioni subiecti essent, paterna bona vœnum exponere, & excedere patriâ, atque exulare cogerentur: cùm ne graviori pœnâ in eos animadverterent, ejusdem pacis legibus cautum esset. Quibus hæretici stare jam ab insita animis arrogantia, atque contumacia detrectabant, & impiè pariter, atque impudenter postulabant, ut potestas omnibus foret, quam quisque probaret opinionem habendi, & pro sua cuique religione Deum colendi, vel, si hæc non placerent, concilium ( Nationale quod appellant ) haberetur, ad quod coactum omne Germanicum nomen de vniverſo jure sacrorum inter se constitueret. Harum rerum vtram tenuissent, amittenda Germania erat, & cuncta prædæ hæreticis futura, cuncta confuso omni humano, ac divino jure pessumitura videbantur. His conatibus, tantoque ad exitium, atque vltimum impietatis gradum ruentium hæreticorum furori vna opposita erat

Commendoni prudentia, atque industria; nec ipse rei gravissima defuit, aut sui dissimilis fuit, admirabili solertiâ indagando, investigandoque omnia, & auctores cujusque consilii, fautoresque, & quod eorum rationes, cogitatâque spectarent, vt si eorum cœtibus interesset, exploratum, cognitumque habebat, & summa cum curâ, atque studio omnibus eorum machinamentis, nunc hortando, monendoque Catholicos, & aduersariorum dolos, fraudesque enudando, nunc deterrendo, continendoque occurrebat: tantumque oratione, atque auctoritate cum apud alios, tum apud Cæsarem ipsum valuit, vt & Catholici nunquam se commodiore, aut causæ æquiore Maximiliano vfos esse prædicarent, & ille negaret vnquam antea firmiores, vehementiusque inter se consociatos Catholicos expertum esse. Ita hæreticorum spe, consiliisque frustratis, nullâ novâ re decretâ, conventum æquabiliter habitum dimisit, impetratis quæ petierat ad arcendum Germaniæ finibus Turcam, auxiliis: & Pius Pontifex quinquaginta millia nummorum aureorum tribus pensionibus solvenda Maximiliano ejus belli causâ dono dedit, quam pecuniam Commendonus Augustam ad se missam ad concilii finem, eo dimisso, omnem simul, consulto tamen prius Pontifice, Cæsari representavit.



*De*



*De reditu ejus in Urbem.*

## CAPUT III.

**G**ERMANIA Venetias Junio mense venit, acceptus, cultusque à civitate cum publicè, tum privatim omnibus honoribus; nam & Princeps cum Collegio, magnaque Senatûs parte domum ad visendum eum venit, & frequentia omnium ordinum, quamdiu Venetiis fuit, est celebratus. Quamquam haud dubiè nobilium plerique livore, atque invidia vrebantur, insueti alibi, quàm apud Patricios decora illa aspicere, & quidem Romæ æmulatione improbâ nitenti per virtutem adversati fuerant. Reliquam inde æstatem vitandis caloribus, atque animo ab assiduis curis, laboribusque recreando, Patavini agri villas obiens egit. Ineunte autumnò Romam vocatu Pontificis proficiscitur: quo concursus, atque officia amicorum falleret, Urbem noctu, nec expectatus ingredi cupivit: sed vetuit Pius non decere ferens tot gentibus tanta cum fama sapientiæ, atque innocentiae peragratis, tam bene gestâ Republicâ redeuntem, novo insuper honore fulgentem, sine solita celebritate, & obviâ itione Urbem inire. Itaque Senatu ad portam occurrente, maximè celebri comitatu in Vaticanum, atque inde ad Pium in Pontificio solio, ut mos, opperientem deducitur: magnaque fit illi ab omnibus gratu-

H h

lario. Prædicabant vetustissimi, Romanæ aulæ neminem vnquam in eum Ordinem paribus, atque ipse, itineribus pervenisse; alios divitiis, alios claritate generis, alios gratiâ, & commendatione Regum, alios potentium studiis proventus: vnum suapte vi, ac virtute omnia adeptum, nullo aliunde præsidio, & quod mirabilius est visum, nullâ cupidine, nullo ambitu, nihil petenti vltro omnia obvenisse medio ætatis, & valetudinis flore: quæ læta maximè bonis erant, patefactum in eo virtuti aditum cernentibus. His sermonibus quantâ ante eum meminerant neminem expectatione, atque opinione virtutis celebratus, Romam est ingressus. Et Pius egregius dignitatis fautor addidit hominum inclinationi magnum momentum, nihil, quo singularem animum, atque benevolentiam testari posset, omittens. Vetus est Pontificibus Maximis mos, vt quæque incidit res, cuius aut consultatio, aut cura deleganda amicis sit, delectis è Cardinalium numero quot, & quos placitum fuerit, negotium mandare; ii, vt res poscit, ad eum, qui ordine inter illos antecedit, ad consultandum conveniunt, atque hi cœtus ab re congregationes appellantur. Post Commendoni adventum, vt expectatus videretur, septem Pius congregationes variis de rebus, vt visum è publicæ rei vsu est, instituit, singulisque Commendonum addidit: adeò vnum ad omnia ingenio validum duxit. Nec minùs frequenter arcanis consiliis summis de re-



bus adhibuit. *Ædes* in *Palatio* *laxas* imprimis ,  
 & *menstruam* *pecuniæ* *pensionem* in *necessarios*  
*rerum* *usus* attribuit , donec *peramplis* quoque ,  
 ac *ditibus* *sacerdoti's* *adauxit*. Et *cum* *cæteri* *fe-*  
*rè* *Patrum* , nisi per *Magistrum* *cubiculi* *antè* *con-*  
*stituto* , ac *dicto* *tempore* , ad *Pontificem* non *ad-*  
*irent* , ne qui per *ambitionem* *conclavibus* , *fo-*  
*ribusque* *assisterent* ; ( quod *majestati* *eorum* *inde-*  
*corum* *Pius* *rebatur* ) vnus est *exemptus* *Com-*  
*mendonus* , eique *haud* *secus* , quàm *Alexandri-*  
*no* *Cardinali* *propinquo* *suo* *quoties* , & *quando*  
*veller* , *nullo* in *ea* *re* *Cubiculariorum* *arbitrio* ,  
*aditum* *ad* *se* *esse* *Pius* *iussit*. Itaque *versa* *conti-*  
*nuò* in *eum* *omnis* *civitas* , *frequentari* *domum* ,  
*observari* *egressus* , *deduci* , *coli* , *appeti* , vt *quis-*  
*que* *industriâ* *notus* *aditum* *ad* *amicitiam* *quære-*  
*re* , in *eius* *se* *fidem* *conferre* ; *commendari* , *pro-*  
*bari* , *testimoniis* *juvari* *ab* *vno* *maximè* , *vel* *an-*  
*te* *omnes* , qui *litterarum* , & *doctrinæ* *laudem*  
*haberent* , *ad* *eum* *confluere* , *eum* *alumnum* *bo-*  
*narum* *artium* , *veluti* *auctorem* *fortunæ* , ac *pa-*  
*tronum* *adoptare*. At *ipse* *tantis* in *se* *hominum*  
*studiis* , tam *secundâ* *fortunæ* *aurâ* *nihil* *efferi* ,  
*amicis* *fidem* , *omnibus* *modestiam* *præstare* ,  
*quos* *veris* *ingenii* , aut *animi* *laudibus* *probasset* ,  
*iis* *ultro* , atque *enixè* *favere* , *adeò* *navatam* *ope-*  
*ram* *non* *ostentans* , vt *multi* *studio* , & *com-*  
*mendatione* *eius* *aucti* , *ornatique* *sint* *ignari* *per*  
*quem* *crevissent*. Nec *ille* *suarum* *virtutum* *visus*  
*constantius* *vllam* *amplecti* , quàm *rectè* *facto-*

Hh ij

rum conscientiam, non gloriam petere. Sic officiorum in amicos fructum in beneficentia, non in gratia ponebat, quorum cum plerique hortarentur tempore uti, & quantum se offerret potentia, capessere, firmare se opibus, devincire, fovere clientelas, & quamplurimos beneficiis amplecti; repulit consilium, præterquam quod moderatio moribus ejus magis congrueret, gnarus nihil tam fluxum, ac lubricum, nihil tam omnium obtrectationi, atque invidia propositum, quam magnorum Principum gratiam non modestè, ac temperanter habitam, & qui modicè utitur rebus, hunc fortunam in potestate habere, & incerta casuum consilio subjicere: sin prosperis ferri te sinas, sæpè in adversa, atque præcipitia rapiare. Hinc quantò Pii amor intensior in dies, illustriorque, tantò ipse parcius uti, non, nisi res posceret, ac plerumque vocatus adire, ac publicis ferè de rebus munera, beneficiæque aliis pro cujusque dignitate, sibi, quod perpetuum illi fuit, nihil unquam petere. Rarò per Urbem; sæpè curru tectus, hortos, aut in abditis locis templa invisens, cœtus salutantium declinabat, aut domi studiis tempus transigebat. Quoties aut in Senatum veniendum, aut ad Pontificia sacra prodeundum esset, turbam deducantium præmaturo egressu antevertens plerumque vitabat, modico, ac domestico comitatu contentus: & quod omnem suspicionem cupiditatis, ambitionisque extinxit, singulis annis per causam valetudinis, vi-



tandique ætate calores vrbanos, Urbe excedebat, magis non negante, quàm non ægrè ferente Pio, qui tamen cuncta illi in modestiam vertens, gratiorem vel ex eo habebat, quòd gratiam minimè affectaret; atque ille per hæc & premere invidiam, & occurrere satietati, quam plerumque assiduitas affert, & gratiam desiderio tueri, & redintegrare videbatur. Æmulationem cum Michaële Bonello Cardinali Alexandrino, quem Pius ob morum, atque ingenii indolem in summum Ordinem cooprauerat, non tam ipsius sponte juvenis, quàm aliorum instinctu motam non lenivit solùm hac moderatione, & prudentiâ; sed ita discussit, vt suis quoque in rebus Alexandrinus consiliis ejus vteretur, ac præcipuum studium erga illum præ se ferret, appeteretque illius auctoritate, ac testimonio laudem sibi, & commendationem apud Pontificem tribui. Cæterùm Pius, si qua gravior res incidisset, ad absentem quoque per epistolam referri, & sententiam exquiri jubebat. Nec si causa publicæ legationis, quæ Cardinalis personam posceret, incidisset, alterius operâ est vsus. Ter id munus, quod longè gravissimum, honestissimùmque habetur, illi a Pio nunquam præsentis est mandatum.



*Secunda legatio ejus ad Cæsarem.*

## CAPUT IV.

**M**AXIMILIANUS Cæsar, sive animum Lutheranæ superstitionis labe infectus, eam sectam occultis studiis fovebat, sive spe ingentis pecuniæ, quam ei Austriæ populi, usurpato antea exemplo mercandi pretio à Regibus, quam mox Reges in ipsos exercerent, licentiam, pollicebantur, tribuere iis jus ex ritu Augustanæ formulæ sacrorum ceremonias colendi statuerat. Inceptis  
» impiis titulum honestum prætendebat: Lacera-  
» ri opinionibus rem Christianam, dirisque reli-  
» gionibus convelli, infirmarique priscæ pietatis  
» fidem, eoque impunitatis ventum, ut novis er-  
» roribus nullus finis, aut modus fieret, & præstare,  
» datâ vnius veniâ, cæteros submovere vi Regum,  
ac prohibere, quàm omnibus simul premi. Hæc  
vbi nunciata sunt Pio, advocat Senaturn, &  
quanta res moveretur edoctis Patribus, flectit ad  
Commendoni laudes, vnumque maximis Rei-  
publicæ negotiis fide, industriâ, vsu parem edisse-  
rens, omnium consensu Legatum deligit, ac primo  
quoque tempore transire in Germaniam, & perge-  
re ad Cæsarem jubet, & se pestilentibus consiliis  
obicere, misso celebri tabellario, qui hæc ad eum  
perferret. Commendonus æstatem apud Veronam  
egerat, & instante jam autumnno, ex consuetu-



dine redditum in Urbem parabat, cum ei Senatus consultum, & mandata Pontificis redduntur. Paucos dies adsciscendis comitibus, instruendoque itineri absumpsit; inde accepta de manu Augustini Valerii Episcopi Veronensis argentea cruce, quod est legationis insigne, Veronam profiscitur. Eadem die ad Volariam duodecimo à Verona lapide festinus à Cæsare Nuncius cum literis occurrit, quibus magnopere petebat ab eo Cæsar, ne longius progrediretur: missurum se ad Pontificem Maximum, qui ostenderet, quam non opportunum Reipublicæ hoc tempore Cardinalem Legatum ad se mitti: tantisper opperiretur, dum de eo, quæ Pontificis voluntas esset, cognosceret. Erant qui gerendum Cæsari morem, mandatúmque Pii Veronæ expectandum censerent: sed Commendonus negavit sibi mutare quidquam de Pontificis iussis ad alterius, quam Pontificis ipsius nutum licere, ac misso protinus Romam, qui à Pio sciscitaretur, quid se facere iuberet, ipse viam perrexit, moderans iter, ut qui missus esset, ad Oenipontem se assequeretur: oppidum in Rheticis Alpibus quatrivium iter à Tridento, Italiæque finibus dislitum; ita se mandatum munus non deserturum, & Pontificis nihilominus integram de se deliberationem fore. Oeniponti apud Ferdinandum Cæsaris fratrem esse Archiepiscopum Salisburgensem, & Albertum Ducem Baviaræ audierat; cum iis interea collocuturum, acturúmque maximè cum Alberto,

cujus auctoritatem non nihil revereri Cæsar credebatur, ut eum ab inceptis Germaniæ pestem allaturis revocare conaretur. Et dedere quidem illi ex Commendoni voluntate graves ad Maximilianum litteras, & Albertus id quoque inculcavit, quod Commendonus questus apud se fuerat, adeo præposteris vivi moribus, ut commodius plerique, ac melius consilii religiones à quovis machinatore putent, quàm ex Pontificis Maximi auctoritate constitui, qui sacrorum cultos, interpretæque ab ipso Deo hominibus sit datus; & Turcarum, & Barbarorum Oratores accipi cum honore, Româ venientes Legatos, amplissimæ viros dignitatis gravatè, & repugnanter admitti. Sed Pius interea, cum pariter Commendoni & firmum adversus gratiam animum, consiliûmque non parendi Cæsaris litteris, neque iter inceptum intermittendi, & in se constans, atque immortum obsequium multis verbis palàm extulisset, factumque id maximè ad voluntatem suam ostendisset, ire porrò eum, & exequi jussum imperavit. Qui inde statim profectus, navigiis ad Halam conscensis Oeno flumine, Danubiôque devectus, octavo die Viennam appulit, omnibus, quâ transiret, perditam spem, & frustra fore quemvis conatum denunciantibus, progressum esse Maximilianum, unde receptus ad pœnitentiam non esset; siquidem pactione pecuniæ, & promissis devinctâ fide nihil sibi integri fecisset. » Postridie aditus Cæsar, qui prior non ideo optaf-

se



se ait , ne Cardinalis Legatus ad se hoc tempo-  
 re veniret , quòd eam legationem abnueret ,  
 quam ipse sibi honorificam fateretur ; sed ne ea  
 in tanto Belgarum tumultu , motuque animo-  
 rum , quibus immixti plerique Germaniæ populi  
 essent , incommodam aliquam suspicionem affer-  
 ret , veritum : id quando Pontifici Maximo non  
 probasset , lætari advenisse eum , apud quem ra-  
 tionem consilii sui exponeret , quo adductus Au-  
 strios in sacrorum ceremoniis Augustanæ formulæ  
 ritu , atque jure uti passurus esset. Visum id sibi ,  
 ut in malis salubre imminentium remedium ,  
 quod pridem illæ sibi Provinciæ usurpassent juris ,  
 ac licentiæ vivendi , opinandi , statuendi ex cu-  
 jusque arbitrio de fide , & cultu sacrorum , id  
 eas permissu suo certis obstrictum legibus habe-  
 re , quæ ingruentibus quotidie novis errorum  
 monstris aditus aliquando obstrueretur. Etenim  
 tantâ tam turbulentorum errorum , ac sectarum  
 multitudine elevari omnem auctoritatem religio-  
 nis , omniâque divinarum rerum jura perverti.  
 Delectam ex cunctis à se Lutheranæ familiæ ra-  
 tionem , quòd ea minùs à Catholica pietate ,  
 propiùsque à vero abesse videretur : additurum ri-  
 tus , cultumque , & formam ceremoniarum sum-  
 ptam maximè à nobis : sic finem impiæ libidini  
 novas in singulos dies opiniones comminiscen-  
 di , dispergendique impositurum ; & faciliùs ad  
 sanctitatem revocatum iri , si , ne longiùs à no-  
 stro more recederent , provisum foret : quippe

» depulsis aliis pestilentibus, ac mortiferis morbis,  
» expeditam vnus haud vehementissimi curatio-  
» nem futuram. Nec se tamen ad id consilium, ni-  
» si necessitate descendisse, quòd neque quam in-  
» iret, aliam remedii viam inuenisset, neque infinita  
» illa licentia tolerari, ac sustineri diutius jam posset.  
» Versari enim se assidue in metu, ac periculo gra-  
» vis alicujus seditionis, quæ inde haud dubiè im-  
» penderet: nec novum id à se incipi, antè à Ca-  
» rolo patruo, & Ferdinando patre, optimis Impe-  
» ratoribus, ac Romanæ Ecclesiæ, & Catholicæ fi-  
» dei reverentissimis factum; nec verò, quòd po-  
» pulis illis semel concessum adimi non posset, id  
» quemquam arbitrari esse, qui satius non duce-  
» ret adstrictum legibus, modòque, ac specie ali-  
» quâ religionis adhibita eos habere, quàm per  
» summam impunitatem polluere, inquinare, com-  
» mutare, confundere quotidie omnia, & Provin-  
» ciam Austriæ portentorum omnium, ac scelerum  
» sedem, & receptaculum fieri, tantàmque mate-  
» riam discordiarum, tantum intestini belli semen  
» inclusum sinu fovere. Postremò testari Deum,  
» non aliud sibi propositum, quàm ut à suorum men-  
» tibus superstitio depelleretur, omnesque ad pri-  
» scam avitæ pietatis, & Romanæ Ecclesiæ fidem  
» redirent. Hæc ferè Cæsar. Commendonus id qui-  
» dem laudare, quòd reducendos ad fidem Roma-  
» næ Ecclesiæ popularium animos, mentesque per-  
» versis erroribus exolvendas suscepisset, idque  
» propositum consilium ab se initium haberet, mo-



dò ne falsis remediis , contrariisq̃ue insisteret ,  
 quæ augerent , & foverent , non tollerent , aut  
 levarent morbum. Cælestium fidem nullam nisi  
 incorruptam , perfectamq̃ue esse , & pietatis ratio-  
 nem cultu , & sanctitate constare , vt religioni re-  
 medium non aliter afferatur , quàm eam intemera-  
 tam in sua integritate , nitoreq̃ue habendo ; aut si  
 quid alieni moris , opinionisq̃ue irrepsit , purgan-  
 do , abolendóque putare ejus sit , qui nequaquam  
 res suâ vi , ac pondere metiatur. Dei certè jussis  
 violandis , ac multitudinis semper imperitæ , & vbi  
 legum venerationem excussit , & à vero , rectóque  
 deflexit , pessimo cuique parentis cupidinibus ob-  
 sequendo , nihil aliud , quàm affinem se culpæ fe-  
 ras , & sceleri eorum , furoríque alimenta subji-  
 cias ; cujus rei non esse longè petenda exempla :  
 quid enim hoc malum parvis ortum initiis aluif-  
 se , & ex tam parvo , & vix animadvertendo igne  
 tantum , ac tam latè fustum incendium fecisse ,  
 nisi quòd primò neglectum , deinde cùm occur-  
 sum , atque obviàm itum oportuit , præbita ma-  
 teria est ab iis , qui populorum desideria indul-  
 gentiâ leniendâ , captandâque esse putaverunt ?  
 Carolum , & Ferdinandum cum iis ipsis Luthe-  
 ranis de eadem Augustana formula certis pactio-  
 nibus concordiæ causâ transegisse spe , vt credibi-  
 le est , & ipsi ferebant , cohibendi , sistendique  
 flagrantium impetum , & quotidie nascentium  
 novarum sectarum contagionem averrendi : sed  
 eventu tristi , & calamitoso ; quippe cùm omnes

» omnium disciplinarum , atque opinionum sectæ  
» in Augustanæ formulæ nomine , atque auctorita-  
» te facillè delitescerent , cuncta ex eo depravata  
» brevè , ut nulla gens totius Germaniæ integra , nul-  
» lius diligentiam prohiberi , ne illa passim grassare-  
» tur pestis , potuerit. Atque hæc quidem sic fieri ,  
» divino numine consilia nostra humanis imbuta  
» cupiditatibus in pœnam nobis , remedia in per-  
» niciem vertente. Neque hos ipsos Imperatores  
» tamen cum iis pactiōem ullam fecisse , qui pro-  
» priæ ditioni eorum subjicerentur , sed cum va-  
» lentissimis Regulis , populisque , quorum consen-  
» tientium vim , atque arma etiam timuisse non ex  
» vano videre poterat. At ejus quid simile habere  
» consilium , qui Austriis , vni non minimæ Ger-  
» maniæ genti , & ejus privatim imperio subjectæ  
» id ultro obtulerit ? At enim exclusâ multiplicium  
» sectarum multitudine , facilius sub vnam Augusta-  
» næ formulæ disciplinam coacti ad fidem inde Ca-  
» tholicæ pietatis redigentur. Jam primum om-  
» nium ab illa regula divinitus nobis tradita non  
» esse discedendum , quâ præcipitur , ne quid ma-  
» li quorumvis bonorum spe faciamus ; quam le-  
» gem cum ad omnia pertinere , tum maximè re-  
» ligionem , & res sacras complecti , quæ cælesti  
» vi , non humanâ sapientiâ continentur : deinde  
» quod semel inutile foret , atque adeò exitu fœ-  
» dum , & perniciosum in aliis expertus sit , cur id  
» iterum in se , suisque periclitari velit ? Verum mit-  
» tenda exempla , ubi efficacior ratio adsit. Qui ,



inquit, hoc juris, ac licentiæ à te expetunt, si  
 omnes Lutherani sunt, & placita Augustanæ for-  
 mulæ ultro complectantur, quid permissione istâ,  
 & sanctione est opus ad eos in illam sententiam  
 adducendos, aut cæterarum prohibenda, pellen-  
 dâque hæresum inventa, quæ nulla sunt? Sin, quod  
 ais, animos diversæ, & aliis aliæ tetriores sectæ  
 perturbant, distrahúntque, tum tibi ea consul-  
 tatio prima occurrit, jubenti-ne sacrorum leges  
 dicto audientes futuri sint, aut, si imperium de-  
 trecent, suppetant- ne ad cogendum vires; nam  
 si tantum vel nervorum tibi, vel auctoritatis  
 apud eos est, ut quò velis flectere, aut repugnan-  
 tes vi subigere possis, haud dubium, quin tibi  
 ex illis intestabilium opinionum, atque errorum  
 tenebris eruti, ad veritatis lucem, id est, Catho-  
 licæ Ecclesiæ revocandi sint. Verum si illi con-  
 tumaciores sint, quàm ut parere tibi velint, &  
 plures, quàm ut tutum adhibere vim videatur;  
 tum ne sub vnus quidem Augustanæ formulæ jus  
 redigere eos possis. Neque enim illi minùs a-  
 cerbè inter se, quàm nobiscum dissident. An  
 Calvinianos, confidentissimum, ac pervicax ge-  
 nus, qui nunc maximè obsolescente in dies Lu-  
 theri auctoritate florent, tuméntque, adduces, ut  
 alterius cuiusvis placita suis præferant? aut eos no-  
 bis credis infestiores, quàm Lutheranis ipsis, aliis-  
 que ab eorum ratione discrepantibus esse? Idem  
 de Trinitariis, idem de reliquis licet judicare.  
 Sed esto, concedant omnes, consentiántque Lu-

» thero, quod nemo speret, qui hæreticorum inge-  
» nia norit, & Augustinæ formulæ nomine cenferi  
» velit: quem tu ex eo capias fructum? Ut quid  
» ægro, & pluribus morbis graviter affecto ad salu-  
» tem profuerit alios depulisse morbos, si remediis  
» eorum gliscens reliqui vnus mortifera vis perin-  
» de laborantem extinguat? Quemadmodum pro-  
» fundo in pelago pereuntem si extrahas quidem  
» ad summum, sed mergi tamen, atque obrui aquis  
» sinas, nihilo magis vitæ ejus subvenias, quàm si  
» absorberi voraginibus, fluctibusque patiare. Si tui  
» hæretici, expertesque Christianæ pietatis sunt, ex  
» Ecclesiæ navi (quâ vnâ qui vehuntur, salutis tene-  
» re cursum, atque intrare portum queunt) aut ex-  
» ciderunt, aut se ejecerunt, nec magni refert,  
» cujus sectæ vndis involuantur, submerganturque.  
» Nec tu aliter salutem eorum consulas, quàm si er-  
» rorum æstibus ereptos in navim receperis; nam  
» eos cælesti irâ in ultionem sceleris summis de re-  
» bus discrepantes in concordiam, quæ non veri-  
» tate nitatur, cogere nec vnquam assequare, nec  
» tibi fas esse arbitreris. Quod enim manifestius vl-  
» lum Dei numen, quàm à quo immissus in istos  
» hic est dissidii furor, ut propriis odiis, senten-  
» tiisque inter se digladiantur, & conspirati adver-  
» sum nos de eo ipsi minimè conveniant, quo nos  
» oppugnare contendunt? Æternam hanc hæreti-  
» corum dissensionem Ecclesiæ pacem Augustinus  
» summus sapientiæ atque sanctitatis auctor appel-  
» lavit: & nos reducere eos in gratiam, concor-



diámque conemur, & Dei voluntatem, cuius illi «  
vi, atque irâ agitantur, venire contra non vereâ- «  
mur, & animis, rebúsque pugnantes, ipsi con- «  
sistentium speciem induendo, vltro confirme- «  
mus, & veluti armemus adversus nos, Ecclesiám- «  
que, à qua desciverunt, quam vnam impugnant, «  
in quam omnes omnium eorum impetus ferun- «  
tur? Quid ergo si à te, tuóque imperio defecif- «  
sent hi populi, & alii vi, atque ferro, alii aliâ viâ, «  
omnes pariter te oppugnarent, tuæque vitæ, ac «  
dominationi insidiatum irent? Utrum tandem iis «  
discordantibus inter se, nullo certo duce, cui pa- «  
rerent, nullo signo, ad quod coirent, eóque minùs «  
tibi validè incumbentibus, vltro impietatis du- «  
cem, ac signiferum præbiturus ipse esses, an con- «  
scindi, collidique, & confici suâ ipsos discordiâ «  
passurus? Tu verò etiam sponte consentientes vt «  
arte, atque consilio disjungeres, dissociarésque, «  
curam, operámque intenderes, nec quiescere pos- «  
ses, donec amotis seditionum auctoribus, multi- «  
tudinem sub leges redigeres: adeò nostra nos ma- «  
gis movent, & acres nostri vltiores, quæ in Deum «  
patrantur, lentè, negligentérque accipimus. Pa- «  
tere, quæso Cæsar, me salutis tuæ imprimis, & tot «  
circà gentium causâ nihil reticere eorum, quæ «  
palàm homines loquuntur, & apertè, ac liberè «  
apud ipsum te omnia effari. Ipsi hæretici hoc jus, «  
hanc licentiam ex lege, atque ritu Augustanæ «  
formulæ vivendi pretio empram se habere, pró- «  
que ea vigesies centies mille aureorum nummûm «

» in tres proximos annos dare tibi pactos esse, ita  
» non obscurè ferunt, vt etiam, quâ sunt insolentia,  
» tanquam exprobrantes jactent; nec te tuâ  
» voluntate aut consilio, sed hujus tam grandis pecunia  
» spe captum, illectumque esse, auctores hujus corruptelæ,  
» & accusatores produnt: necdum  
» vlla firmata privilegio tua promissa habent, &  
» hos illusores, & criminatores dignitatis tuæ modo  
» destè quicquam, aut obedienter acturos, & ab  
» insita arrogantia, atque contumacia discessuros  
» speras? Hos vt concilies tam perniciosi exempli  
» rem induces? cujus vel solam famam quantum  
» animorum motum in finitimis Germaniæ populis  
» fecisse, facturamque in omnibus putas?  
» quantum cupidis irritamentum, quantam bonis  
» desperationem allaturam, vt non corruptæ modo,  
» & aliquâ ejus mali contagione affectæ nationes  
» accendi, irritarique, sed integræ quoque,  
» atque intactæ ad cupiditatem novarum rerum conciri,  
» & sollicitari vno hoc facto posse videantur?  
» Quid quod non solum non opportunum huic malo,  
» adeoque contrarium, atque exitiosum remedium  
» initum abs te est; sed hujusmodi, quod alterius  
» propè gravioris facinoris culpam sustineat,  
» usurpationem muneris, atque juris alieni?  
» Neque enim, Cæsar, tibi, aut vlli Regum hæc data  
» potestas est ordinandi, disponendique, aut omnino  
» attingendi res sacras, quarum jus, atque arbitrium,  
» quantum capere mortalitas potest, vnum penes esse  
» Pontificem Maximum Deus iussit:



fit : aliorum nullæ , nisi parendi sunt partes , & tuæ præterea , Regumque cæterorum tuendi , defendendique. Id nos non divinis modò litteris , monitisque docti sumus ; sed magnis , & quæ ter- rere omnes debeant exemplis , à Deo est affirmatum. Proditum memoriæ est in sacris libris , cum plaustro veheretur Arca Dei , & inquietatione boûm , qui trahebant , decussa pænè concideret , Ozam vnum è rectoribus currûs , quò casum ejus averteret , manum Arcæ admovisse. Idque crimen , quia ille Sacerdos , & Levita non erat , & alieni muneris officium invaserat , visum est à Deo dignum , quod ille statim morte lueret : adeò divinas res non egentes humanæ opis , nec attrectandas prophanis manibus , consiliisque esse testatum , sancitumque apud posteros Deus voluit. Magnum hoc , & triste abstinendi se contactu sacrarum rerum , ac vitandæ cælestis iræ documentum ; sed haud minùs severum illud , & propriè ad Reges pertinens. Sublatus ex humili loco ad Regni fastigium à Deo fuerat Saül , ita partitis inter ipsum , & Samuelem muneribus , ut huic religionis , & sacrorum jura , illi Imperium , & belli , & pacis jus essent : imminente cum innumerabilibus copiis Philistæo hoste , indictum populis solenne sacrificium , sacrificiique dies dictus fuerat , quo divino propitiando Numini certæ hostiæ , ut tum mos , immolarentur ; neque enim religiosa gens sumptura aliter arma , & prælium initura erat , nisi antè placato patriâ ceremoniâ Deo. Con-

„ venerat juxtà omnium multitudo, quæ cùm diu  
„ expectasset, nec Samuel ad constitutum adesset,  
„ dilabi porrò domum, atque omnes abire cœpe-  
„ rant. Tum Saül ne tanto instante ab hoste peri-  
„ culo, à suis defereretur, rem divinam ipse pere-  
„ git, paratásque victimas aris admovit, & sacri-  
„ ficavit. Id ob piaculum, electo paulò antea ad  
„ Regnum, clarísque victoriis nobilitato, per eum-  
„ dem Samuelem denunciari illico jussit Deus, Re-  
„ gnum se illi, liberísque ejus adempturum, aliám-  
„ que in domum translaturum: nec multò pòst vi-  
„ ctus prælio, occisúsque, excidio domûs suæ cæle-  
„ stibus minis fidem affirmavit. Regnum ad Da-  
„ vid æmulum ejus est delatum, quem ipse pulsum,  
„ abjectúmque, & fugâ se, ac latebris à vi, atque  
„ injuria ægrè tutantem sæpè interficere conatus  
„ erat. Te oro, Cæsar, obtestórque, vt hæc cælestia  
„ præscripta, documentáque nobis erudiendis divi-  
„ nis tradita monumentis tecum reputes, & ani-  
„ mum ab novis, præcipitibúsque consiliis ad salu-  
„ brioribus cogitationes, ac tuâ majestate, tuo loco,  
„ tuâ familiâ, téque denique ipso dignas recipias.  
„ Hoc genere orationum convincebatur quidem Cæ-  
„ sar, vt quibus féque, rémque obtegeret, illi ver-  
„ ba non suppetarent: sed contrà nummorum cu-  
„ pidine, & hæreticorum postulationibus recepta  
„ flagitantium, & præterea intimo, quanquam oc-  
„ cultâ, ingentíque simulatione involuto in Luthe-  
„ ranos studio vehementer animo distrahebatur. Id  
„ haud ignotum Commendono eo impensius cùm



ipse instare vrgeréque; tum Legatos Regum, qui aderant, submittere communem causam communibus agendam studiis docens. Et Pius Pontifex, ut erat acer religionis vindex, & ubi ea ageretur, impatiens humanarum artium, litteras ad Commendonum dederat, quibus si cunctaretur Cæsar, neque inceptis desisteret, factâ re divinâ, & eo Evangelii capite recitato: Quicumque non receperint vos, neque audierint sermones vestros, exeuntes foras de domo, vel civitate, excutite pulverem de pedibus vestris, & ipse abscedere Viennâ, atque inde Nuncium abducere, & Maximiliano renunciare amicitiam jubebatur. Non dum præcisa omnis Commendono spes erat, nec maturum ad tam abrupta consilia tempus videbatur, ex quæis oriturum haud dubiè magnum, & periculosum rerum motum prospiciebat: sed hæc Pii mandata dissimulans ipse, Maximiliano clam enunciari, deferrique per alios curavit, quo & gratiam, opinionemque temperati, & quantum per mandati muneris fidem liceret, refugientis benevolentiam inter Cæsarem, & Pontificem abrumpere, & Cæsari ipsi curam injecit nihil temerè agendi, cernendique rem sibi cum Pontifice haud segni, obnoxiove, sed Deo, causæque fidenti, & facilè contemnenti humanas rationes esse. Et labi jam pertinaciâ cœperat, cum Commendonum omnia molientem, omnèque undique machinas ad expugnandum admoventem etiam casus juvit. Adfertur nuncius

K k ij

conjugem Philippi Regis Hispaniarum decessisse, nullâ virilis sexûs prole relicta. Confestim in Cæsaris Regia ortus differtur in omnes sermo Annam majorem natu filiarum ejus Philippi matrimonio destinantium, avunculo neprem, nam Philippi sorore genita puella erat: unde jungi illi, ni Pontifex Maximus nuptiis annuisset, per leges non poterant; & Maximilianus, ac numerosa filiorum soboles Hispanicis rebus incumberebat, latissimo regno cupidine, & spe imminens, si Philippus sine liberis fato concessisset: eò & filios in Hispaniam educandos miserat, & Hispanos omnes officiis, Regem obsequio demereri studebat, & ad novam spem ex non opinato exortam sibi filiam in Philippi matrimonio collocandi animum magnoperè erexerat. Arripuit occasionem Commendonus, atque hinc Hispanos, quibus tum maximè grave bellum in Belgis perfidiâ, ac defectione hæreticorum, duce Aurangio excitatum erat, docebat quantum ea Cæsaris in Lutheranos inclinatio, & permissi Augustanæ formulæ ritus addituri ponderis, momentique hæreticorum rebus essent: hinc Cæsarem monebat non alienandum tali tempore à se, domoque sua Philippi animum; quod fieri necesse esset, si, qui minimè deberet, adversarios ejus, eosdémque Catholicæ Ecclesiæ hostes fovere, confirmareque indulgendo eorum furori, & pænè causam approbando videretur. Et nactus Viennæ Philippi Legatum, hominem Belgam, priva-



tim Aurangio, & factioni illi inimicum, eamque valescere auctu malarum opinionum intelligentem, perpulit denunciare Regis verbis Maximiliano, ne consilia admitteret, quæ vim, atque opes Hispaniarum hostibus adjungerent; ne suum quidem Regem existimaturum fraterno, & mutuo in se Maximilianum esse animo, rebûsque suis, quando ab eo proderetur, quem haberet propinquitate, ac sanguine conjunctissimum, aliter consulturum. Adjecit idem Legatus Commendoni instinctu, si Pontificis Maximi auctoritatem ea in re non quanti deberet, fecisset, nunquam ab eo impetraturum, ut filia nuptias cum Rege approbaret, & quò fieri ritè possent, eos legibus solveret: quod ipsi haud paulò pluris, quam popularium suorum pollicitationes, & quantæcumque pecuniæ conditionem esse debere. Hæc plus ponderis apud Maximilianum, quàm religio, atque ratio habebant. Itaque quem jus, quem fas, quem officium nequiebat permovere, ut totum negotium omitteret, cùm maximè & hæretici ut in confecta re exultarent, & boni spem omnem abjecissent, vocato ad se Commendono, in auctoritate Pontificis Maximi esse se pronunciavit. Quod quidem Pio adeò accidit optatum, ut in Commendoni extollenda industria, memorandisque apud Senatum laudibus precatus Deum esse dicatur, ut cùm ipse naturæ concessisset, aut illum, aut illius similem sibi successorem in Pontificatu daret: ad ipsum litteras

Kk iij

suâ manu amantissimè scriptas misit, in quibus sæpè filium appellans, gratias illi egit, virtutemque ejus quàm potuit amplis, atque honorificis verbis collaudavit.

---

*De negotio illi dato ordinandi rem  
Ecclesiasticam.*

CAPUT V.

**P**OST hæc Pius, qui tum maximè corruptis hominum moribus emendandis, collapsæque Christianæ disciplinæ non Romæ solùm, sed per omnes Provincias ordinandæ animum, curamque intenderat, conandi in eo aliquid apud Germanos negotium Commendono dedit; apud quos omnia prisca moris instituta aut intermissa obsolevisse, aut polluta, perturbatæque hæresum contagione, ac licentiâ esse didicerat. Sed ea maximè aspera, ac difficilis res fore videbatur, cùm imbecillitate hominum malâ, ac diuturnâ consuetudine depravatorum, arctasque apud veteres vivendi leges laudantium magis, quàm re imitantium, tum Principum, atque potentium iniquitate, qui maledictis incessere licentiùs viventes, quàm corrigi malle videntur: seu potentiæ, ac dominationis munimenta popularem nequitiam esse putant: sive humanis ingeniis par libido inest reprehendendi vitia, atque habendi; certè iidem illi turpes, & flagitio-



us  
 n-  
 is  
 —  
 is  
 e-  
 ,  
 ,  
 a-  
 ;  
 n-  
 ie  
 r.  
 e-  
 l-  
 a-  
 s,  
 o-  
 i-  
 :  
 o-  
 l-  
 -  
 o-

fos homines vniverfos assidue increpant, & singulos sæpè pertinaciter tuentur. Horum erat Viennæ magnus numerus, ac multi in ipsius domum Cæsaris irreplerant, fugitivi ex Italia plerique omnes: nam vt quosque in sacerdotum sodalitiis, monasteriisque legum, institutorumque tæderet, aut ob vitæ probra iudicii metus ageret, haud ferme aliò confugiebant, & suæ disciplina desertores aliorum quoque inquinabant mores, eo liberiùs in omnem se luxuriam, dedecusque demittentes, quo plus licentiæ, atque impunitatis erant nacti, infamiæque, & sordibus eorum etiam boni, atque integri aspergebantur; eratque omnis propterea sacerdotum ordo in odio, & contemptu omnium, neque tam tritum, ac popolare quidquam, quàm invehì in eorum nomen. Cùm ea aboleri macula, & vsus priscæ innocentiae revocari, nisi civitate improborum illâ, ac perditorum hominum colluvie purgatâ, non posse videretur: incredibile memoratu est, quot ex omni genere reperti fautores eorum sint. Ipsi ante omnes hæretici tuebantur, qui iidem maximè strepere, obrectare, insultare turpitudini eorum, & nobis objectare consueverant. Horum gratiâ, atque instinctu ipse quoque Cæsar excusando alios, aliis testimonium impartiendo omnes tegebat. Præterea & Vienna ipsa, & multæ civitates Episcopis carebant, aut si qua habebat, perinde officium eorum desiderabat; quòd illi aulam, Maximilianumque affectantes,

& ambitioni suæ , aut pecuniæ , aut certè longè aliis procurationibus intenti , negligebant sacrorum curam. Id adeò malum plerisque in Provinciis grassatur , in quibus Episcoporum nominatio est Regibus tributa , concessione dicam , an socordiâ Pontificum Maximorum. Nam antè , aut à Pontificibus dabantur , aut à sacerdotum collegiis , ut quisque innocentiam , ac dignitate inter eos excelleret , justis suffragiis legebatur. Ita bonis quisque artibus nitebatur , adeptique honorem etiam munus implere , ac præstare suum studebant. Nunc longè alio ex genere hominum sumuntur ; sæpè bello exercitis , veluti militare præmium , Episcopatus datur : sæpè gratiosis , aut potentibus ; interdum & fœminis adulantes Episcopi fieri merentur , quibus nullum doctrinæ , nullum pietatis studium , nulla aut scientia , aut usus earum rerum , quarum causâ is est in Christiana Republica Magistratus Deo auctore institutus. Atque ex hoc maximè fonte manasse illa pestis satis creditur , quâ multa hodie Regna deformata hæresibus , vastata civilibus bellis , & quædam etiam everfa , ac propè funditus excisa esse cernimus : quippe Episcopis officii sui aut ignaris , aut negligentibus , continuò & populorum mores prolabuntur , & laxatur Ecclesiastica disciplina , & religionis cultus , quo status Rerum publicarum continetur , omnis exolvitur , convellitur , destruitur. Hinc hæresum , ac pravarum opinionum turba in Ecclesiæ claustra veluti incustodita ,



dita, & patentia irrumpit, odio, ac discordiâ,  
 & mox cædibus, seditionibus, armis cuncta per-  
 miscet. Commendonus cum hæc apud Cæsā-  
 rem sæpè disseruisset, Strigoniensibus Archiepi-  
 scopis, & Viennensibus, & aliquot Ungariæ  
 civitatibus Episcopi ut darentur, obtinuit. Fugi-  
 tivos, & maculosos aulâ, atque vrbe ejicere  
 multò operosius fuit; aliquod tamen confiden-  
 tiæ, & vitæ eorum frænum est inditum, & au-  
 dacia nonnihil eo metu repressa. Templâ inde,  
 sanctiorâque delubra adiit; cultum, ritumque  
 sacrorum, item sacerdotes ipsos, & templorum  
 ministros recognovit; vasa, libros, vestem, om-  
 ne instrumentum, atque apparatus rei divinæ  
 conficiendæ, rationem denique omnem haben-  
 di, administrandique res sacras inspexit: in qui-  
 bus quàm multa vitiosa fierent reprehendere,  
 quàm emendare facilius fuit. Ipse quidem in sin-  
 gulis fanis convocatos sacerdotes aprâ oratione  
 appellavit, quæque in rem esse visa sunt, monuit,  
 multaque exemit, quædam etiam sivit, atque  
 ad veteris normæ, ritûsque formam ordinavit.  
 Sed omnia, quia exactor inde eorum nemo exti-  
 tit, neglectui fuere. Nam Maximilianus vnicum  
 remedium esse ægræ, ac perturbatæ Reipublicæ  
 emendationem morum, & prisce disciplinæ re-  
 stitutionem palàm verbis prædicabat; occultè  
 nec corrigi, quæ pravè, ac perperam fierent, nec  
 omnino mutari quicquam patiebatur: ut labi, &  
 ruere Ecclesiasticam rem velle ab non ignaris in-

genii, atque intimi animi ejus crederetur. Profectus Viennâ Commendonus diœceses Passaviensem, & Salisburgensem, per quas illi iter fuit, curâ, ac diligentia eadem, fructu, ac opere pretio majore lustravit, quod in vtraque Episcopi probi, ac religiosi homines præerant, qui Commendoni studio non solum adversari non sunt, sed etiam adjumento fuere; & Salisburgensis quidem Archiepiscopus etiam Concilium Provinciæ suæ, rem diu antè intermissam, illius instinctu, atque hortatu habuit, in quo multa salubriter decreta, & sancita sunt. Ad reliquos Germaniæ Episcopos litteras ex auctoritate Pontificis dedit, quibus ad usum, cultumque antiquæ disciplinæ renovandum multis, atque accuratis verbis eos est adhortatus.

---

*De fœdere per Pontificem adversus Turcas  
icto, & opera in id à Commendon  
dono impensa.*

#### CAPUT VI.

**R**EVERSUS inde Urbem sub finem sequentis anni, qui fuit M. D. LXXIX. excepit bellum, quod Selimus Rex Turcarum libidine Cyprum insulam ditioni suæ subjiciendi terrâ, marique Veneris intulit. Cui propulsando bello Pontifex Pius haud secus, quam si eo ipse peri-



tus esset, animo, conatúque incubuit, non studio erga Venetos, quibus ad id locorum subiratum fuisse constat, sed amore Christianæ rei, quam carpi in dies, atteríque impotentibus prævalidæ gentis armis cernens, ingenti dolore, curâque sollicitabatur. Cúmque eâ tempestate Philippus, debilitatis domestico malo Gallis, vnus omnes Christianos Reges longè opibus anteiret: quippe non vniversâ modò Hispaniæ dominabatur; sed omne Belgarum nomen, quod latè multas, ac bellicosas gentes complectitur, in ditione habebat, & in Italia cùm Neapolitanum, tum Mediolanense Regnum, firmum vtrumque, atque opulentum, obtinebat, & maximè opportuna parandis, alendisque classibus Sicilia, Sardiniaque, & Baleares insulæ imperio ejus parebant, & Corsica etiam, & Ligurici maris ora, civitatique Genuensium auctoritatem ejus sequebatur: Africæ quoque injecerat manus, ædificato haud longè à ruinis antiquæ Carthaginis castello, cui ab freti faucibus, quibus impositum erat, Golettæ nomen fuit, magnóque munito opere, & Tunetum frequentem urbem regionis ejus in fide habebat, & vicinos populos Siciliam, atque Hispaniam contra sitos à maleficio continebat. Sed præter hæc, quæ commemoravimus Regnadia, & viris, armisque potentia, multò maximum Imperium vltra Oceanum in Occidente propagatum habebat, quod patrum nostrorum memoriâ, Christophori Columbi Liguris inge-

Ll ij

nium, & humano captu major audacia aperuit. Ejus Imperii terræ ignoratæ veteribus in tantam magnitudinem patere dicuntur, ut eis novi orbis nomen scriptores nostri indiderint, ex quibus auri vis ingens ad Philippum per immensa vastissimi maris spatia quotannis navibus advehebatur. Hunc igitur Regem tantis subnixum opibus ut sibi, Venetisque ad Turcicum bellum fœdere, ac societate ante omnes adjungeret, Pius initio statim est aggressus: nec ille magnopere abnuit; nam & Pontificis Maximi auctoritatem, quantum Christianum, & pium Regem decebat, reverebatur, & amplitudine suâ indignum, & sibi invidiosum fore intelligebat, si tanto impendente Christiano nomini de Barbaris periculo, ipse Reipublicæ defuisset; & præterea Pium sperabat facturum sibi potestatem ex ditibus Hispaniæ sacerdotiis pecuniam corrogandi: ita bellum gloriæ sibi magis, quàm impendio vlli, aut sumptui futurum. Quòd si Philippo vafra, & dominandi cupida Hispanorum ingenia respondissent, acri, atque huc maximè intento Pontifice, magnâ, nec dubiâ spe victoriæ gesturi cum Turcis id bellum fuisse videbantur: sed illis non tam cordi erant, ut vincerentur, aut procul Venetorum cervicibus submoverentur Turcæ, quàm ut id alerent, ducerentque bellum, cujus morâ, onerêque pressi, attenuatîque Veneti ipsi opportuni sibi Italiæ Regnum affectantibus fierent. Id cum Venetos Patres non falleret, antea quoque sub Carolo



Philippi patre Hispanorum artes, & ambitiosa, atque callida consilia æquè difficili suæ Reipublicæ tempore experti, inviti, ac reluctantes adducebantur, ut se vlllo fœdere cum Philippo alligarent, pacemque quamvis gravibus conditionibus redemptam Hispanorum societati præfererant. Sed hæc seniorum mens erat. Juventus injuriâ, perfidiâque Barbarorum incitata decertare, ac dignitatem suam armis tueri præoptabat, fœderique favebat, de quo Romæ apud Pium ab utriusque Legatis agebatur; in quo Commendoni singularis industria, prudentiâque enituit, multique difficiles nodi expediti per eum, explicatique sunt. Nam & Veneti Legatis suis imperaverant, ut omnia cum eo communicarent, illiusque consilio maximè uterentur: & Pius neminem magis intimis rebus adhibebat. Consenserant tandem Veneti, Hispanique in certas fœderis leges, & ad eas sancendas ad Pium utrique convenerant, cum Regii Legati præsentem excipere annum cœpere, quo non satis sibi superesse temporis ad paranda, præstandaque, quæ ex pactæ societatis conditionibus deberent, aiebant. Id verò adeò stomachum Venetis Patribus movit, ut à belli cogitationibus ad consilia pacis protinus converterentur, ac per speciem commutandi captivos Constantinopolim mitterent, qui cum Turcis de compositione ageret. Pio eâ re incredibiliter anxio, perturbatoque Commendonus auctor fuit Marcum Antonium Columnam Ve-

netias mittendi, qui & dux à Pontifice classis delectus fuerat, & vir erat non rei militaris peritior, quàm civilibus artibus, naturalisque facundiâ ad pertractandos animos hominum instructus. Ipsum verò Columnam à Pio statim proficisci jussum monuit omni ope contenderet, ut de suis postulatis ad Senatum referretur, & belli, pacisque deliberatio à decemvirum collegio, paucisque senibus mentionem omnem belli horrentibus abducta ad Senatû cognitionem traduceretur: plus ibi ardoris, animorumque ad rem armis decernendam, ineundumque fœdus futurum. Nomina quoque Senatorum, per quos id conaretur, edidit, & Columna cùm Venetias venisset, Commendoni præceptis ita obtemperavit, ut re in Senatum deductâ tenuerit, ut abruptâ spe pacis, Veneti strenuè bellum capefferent, ac fœdus summâ Pontificis, ac totius Italiæ lætitiâ feriretur. Unde nobilis illa navalis pugna, victoriâque est parata, quæ si quantum gloriæ Christiano nomini, tantundem fructûs, atque emolumentum attulisset, non adeò nunc immanem Barbarorum potentiam timere cogeremur. Quis hujus belli imperator eligeretur multum, diuque est disceptatum. Veneti Philippi gratiam respicientem, ex ejusque pendentem fide ducem antea adversum rebus suis experti, ut Cardinalium aliquis classi præficeretur, postulabant magnâ spe, quia Pontifex Commendono vni ex omnibus Patribus plurimum tribuere videretur, nullamque



rem esse tantam, quæ ejus ingenio, ac prudentiæ non rectè committeretur, prædicaret, fore ut eum potissimum summæ rei præesse juberet; ita bellum è re publica, suæque administratum iri. Sed neque Hispani Venetum imperatorem facile accipiebant: & Commendonus ipse militare imperium planè aspernabatur, Piumque dubitantem, & deliberantem monebat, quàm ea procuratio, tractatioque armorum ab hominibus togatis, & sacrorum ministris aliena, abhorrensque esset. Ita res à Cardinalibus est rejecta, & ad Joannem Austriam Philippi fratrem, si præsens bello interesset, quod Hispani pollicebantur, imperium delatum.

---

*De nova ejus ad Cæsarem, & Polonos  
legatione.*

## CAPUT VII.

COMMENDONO aliæ impositæ partes gerendæ Reipublicæ, unde illi magnorum laborum, sed magnæ item laudis materia est orta. Post junctum cum Philippo, & Venetis fœdus, cupiens Pius omnes in Barbaros concire, ac sollicitare Reges, & ante alios Maximilianum Cæsarem, & Augustum Regem Poloniæ, qui finitimi Turcarum Imperio, maximè opportuni inferendis à terra armis, atque distinendo hosti habere

bantur, & Maximilianus à Turcis Ungariæ pulsus Regno imminere vindictæ, si daretur fortuna, videbatur, Legatum ad utrumque Commendonum creavit. Ipse ex superiorum annorum instituto vitandi vrbanos calores, initio æstatis discesserat Româ, nec minùs quicquam, quàm nova itinera, novas legationes meditabatur. Et cum Pius paucis antè diebus sexdecim præstantes viros in Senatum legisset, superiorum Pontificum secutus morem haud aliis, quàm quos ipse amplissimo honore affecisset, mandaturus tam claræ, tam appetitæ legationis munus credebatur. Sed Pio omnibus rebus antiquior Reipublicæ vsus, atque utilitas semper fuit, & præterquam quòd Commendonum haud secus, quàm si ab se Cardinalis factus esset, in suis habebat, nec illi fidei, industriæ, prudentiæque laudibus quemquam anteferebat, ipsum notitiâ illarum gentium, Regûmque, ad quos mittebatur, facile omnes antecellere intelligebat. Acceptâ itaque Pontificis Maximi voluntate, comitibus, rebûsque comparatis, Commendonus Veronâ, quò ad æstatem agendam concesserat, transiit in Germaniam, ac Viennam ad Cæsarem contendit. Lætatus impensè moro à Turcis in Venetos bello Maximilianus fuerat, versam aliò eam tempestatem cernens, quæ ne in se, suumque Regnum ingrueret, vehementer timuerat. Et quemadmodum fœdus vt Veneti, & Pontifex cum Philippo jungerent, studiosè operam dederat; ita abstinere se armis, & quietem  
agere,



agere, bellúmque non tam ope, quàm spē sui fovere, atque alere decretum habebat. Nam & ipse imbelli corpore erat, & animus ejus ad magna discrimina fatiscens calliditate, & consiliis certare, quàm vi, ac ferro contendere promptior habebatur: & neque eæ vires regni sui erant, quibus tam validum hostem aggredieretur, & Germanorum auxiliis precariis, nec vnquam in tempore coeuntibus parum fidebat; quægens nec crescere Cæsarum opes creditur velle, & propulsando, quàm inferendo bello alacrior habetur. Cùm antè de fœdere Veneti eum appellassent, nunc induciarum, quæ sibi cum Turca essent, vt dies elaberetur, expectandum sibi, nunc vt eos spē lactaret, cupidum se belli ferens, petebat, vt quæ auxilia fœderati missuri ad se essent, si bellum susciperet, promerent. Commendonus cùm ad sic affectum venisset, adventûsque sui expositâ causâ hortatus eum esset, ne occasionem, quæ ei divinitus offerretur, tot graves injurias, tot incommoda, damnâque à Turcarum gente sibi, familiæque suæ illata vlciscendi perderet, aliâque quibus permoveri eum posse arbitratus est, facundè disseruisset, benignè quidem, & cum assensu est auditus. Sed Maximilianus consilio suo insistens, varias proponere difficultates, atque eandem induciarum causam prætere, earum fidem jurejurando firmatam violare homini Christiano nefas esse dicere. Postremò expectandum sibi aiebat, quid Poloni, quid reliqui Christiani Prin-

M m

» cipes statuerent. Id verò vt præposterum argue-  
» re Commendonus, vt Cæsarem ducem se, at-  
» que auctorem aliis Regibus adversus Christianæ  
» Reipublicæ hostes præbere, non eorum expecta-  
» re consilia debere, quippe & ejus maximè inter-  
» esse retundi, ac reprimi Barbaros, & eundem ti-  
» tulo honores reliquos anteire; vt si cessaret eo  
» tempore Pontifex Maximus, partes ipsius fuissent  
» Christianos populos litteris, legationibûsque ad  
» bellum concitare. An Polonos ab se Pii verbis ap-  
» pellatos non illico quæsituros, quid Cæsar animi,  
» quid apparatus habeat? Quibus si secuturum eum  
» aliorum consilia narret, jam nunc existimari pos-  
» se, quam ab iis spem esset relaturus. Sed quid,  
» inquit, inanes Polonorum, aliarumve gentium  
» spes, si segnis ipse sis, moliamur? Veneti ipsi, ubi  
» verba dari sibi, deferique à te accendente nuper  
» eos ad arma, & non defuturum communi Rei-  
» publicæ causæ pollicente senserint, & Turcas ter-  
» restri metu liberos, totâ mole virium in classes,  
» ac navale bellum incumbere, magnitudini peri-  
» culi succumbent, territique suis rebus pro tem-  
» poris necessitate consulent, & quibus poterunt  
» conditionibus cum hoste paciscuntur: nec majore  
» rem quisquam proditæ Reipublicæ, & abrupti  
» novi fœderis culpam, quàm idem tu sustinebis.  
» Nam quod præterea de induciarum fide prætexere  
» libuit, id facillimè refellitur. Ac primum quidem  
» meminisse debes, sæpè te questum apud me esse,  
» & in omnibus Germanorum conciliis professum,



nomen modò tibi induciarum cum Turcis esse, «  
 re continens bellum manere, cùm Barbari quot- «  
 annis non prædatum modò in tuos fines excur- «  
 rant, sed justâ peditum, equitùmque manu ipsas «  
 quoque vrbes, ac præsidia invadant; plurimùm. «  
 que negotii te in iis arcendis habere. Deinde «  
 cùm illis nullum fidei jus sanctum, cuncta com- «  
 modo, ac libidine suâ metiantur, quid attinet «  
 mentionem jurisjurandi toties ab hoste violati, «  
 neglectique objicere, nisi quòd bellum pro de- «  
 fendenda religione susceptum sit, ab eo jureju- «  
 rando religione deterreri te prædicare velis? His «  
 orationibus cùm se Cæsar vrgeri, ac è simulatio- «  
 num latebris erui in apertum sentiret, & Com- «  
 mendonus insuper denunciaret, se omnia vt re- «  
 sponfa sibi essent, Romam, Venetiâsque rescri- «  
 pturum, verens id, quod futurum apparebat, ne «  
 Venetis ardor ad bellum restingeretur, animi- «  
 que frangerentur, si eorum spem destituisset, spa- «  
 tium novæ deliberationi à Commendono postu- «  
 lavit, atque eò confugit, vt diceret futurum qui- «  
 dem se in Pontificis Maximi auctoritate, fœde- «  
 rique accessurum; sed cùm vnus maximè hostium «  
 injuriæ pateret, ne quâvis antè in se ingrueret, «  
 quàm instructum bellum esset, cupere, vt prius- «  
 quam consilia emanarent, promerent fœderati, «  
 quæ, quantâque sibi auxilia missuri essent, vt sci- «  
 ret quarum fiduciâ virium in eam aleam esset «  
 descensurus. Atque hæc ita pollicebatur, sperans «  
 antequam focii ex tam longinquis locis consule-

M m ij

rentur, exituram æstatem, parique arte sequentem quoque annum se elusurum. Commendonus id jam laudare, quod occasione uti, seque Reipublicæ accommodare statuisset, nec dubitandum, quin æqua omnia à fœderatis esset impetraturus; sed quæ cuperet, edere jam nunc ipsum debere, non ut à sociis definiantur, expectare. Id verò facturum se Maximiliano negante, & in eo utique perstante, ut priores locii, quâ se ope adjuturi essent, ederent, At sic quidem, inquit » Commendonus, in easdem revolveris suspiciones, quas nuper vitandas esse intellexisti: quis » non videat moram te, ac dilationem quærere, ut » antè rerum gerendarum tempus elabatur, quàm » quæ tibi socii esse tribuenda censuerint, cognosci » possit, quæ tu inde dum aut augeri, aut mutari contendes, res novis subinde dilationibus trahatur? Quin tu simpliciter promis, quid tribui tibi » æquum censes, si veram spem tui facere Veneris, & eorum ad consilia belli firmare animos vis? » Etenim quæ cupias, quæque opus habeas, & unus » profectò optimè nosti, & ea verius est abs te judicari, quàm statui ab aliis. Diu contendit Cæsar, nec omnino facile ex illa consiliarce se dejici est passus: sed tandem victus Commendoni oratione cessit, ac viginti millia peditum, quatuor equitum, quorum pars dimidia Germanis constaret, à sociis postulavit; hac se copiâ si juvissent, in partem belli venturum, armæque Turcis ab Ungaria illaturum est pollicitus, aliâ viâ,



quando hæc non processerat, promissa daturus. Hoc expugnato responso, in quo adeò pugnans Maximilianus fuerat, ut extortum à Commendono magnopere & reliqui omnes, & imprimis Veneri Legati mirarentur, qui sæpè cum eo iisdem de rebus verba contulerant, cuncta, ut acta erant, ad Pium rescripsit, missis celerrimis tabellariis, qui litteras perferrent. Et paulò post læti de Christianorum victoria allati nuncii vim Commendoniconatibus addidere. Nam Christianæ classes cum è Sicilia soluissent, propectæ in Græciam ad Echinadas insulas ante fretum Corinthi obviam Turcarum classem habuere, congressæque nobilem de hostibus victoriam retulere, captis ad centum, & triginta longis navibus, ac nonaginta prælio absumptis. His nunciatis postulavit à Cæsare Commendonus, ut supplicationes decernerentur, solennibusque sacris Deo grates redderentur, simul quò alacritas populis adversus Barbaros adderetur, juberet ignes, aliæque quibus publicum gaudium significari solet, fieri. Id Cæsar, ne Turcis in suspicionem veniret, si adversis eorum rebus veluti insultasse videretur, negavit; & tantum rei divinæ, quam in ipsius Regiæ templo ejus victoriæ causâ solenni apparatu Commendonus ipse fecit, cum vxore, & liberis interfuit. Pius eodem ferme tempore & victos Turcas ad Echinadas, & ex Commendoni litteris traductum in partes Maximilianum accepit: utroque impensè lætatus, cum

Mm iij

Commendonum laudibus apud Patres extulisset, consultis celeriter sociis, renunciari Maximiliano iussit, missuros ei auxilia, quæ postulasset. Sed non multò post discessum Commendoni refrigere promissa Cæsaris, & secuta mors Pii cuncta pervertit.

---

*De causa magni Ducis Etruriæ per eum  
apud Cæsarem acta.*

## CAPUT VIII.

**E**A tempestate exortum dissidii aliquid inter Pium, & Maximilianum erat ex appellatione magni Ducis Etruriæ, quam Pius Cosmo Medici Florentinorum Principi tribuerat, viro, in quo efferendo certasse fortuna cum industria videri potest. Is non privato solùm loco Florentiæ erat natus, sed patrimonium tenue à patre acceperat, atque id ipsum parum constitutum, & propè ambigui juris, de quo certè lis ei à potente, & gratioso adversario gentili suo intendebatur, cum ipse adhuc puer amisso patre in tutela matris ageret. Pater fuit Joannes Medices insignis ætatis ejus bellator, & inter claros duces audaciâ, & fortitudine, ac militaribus facinoribus habitus: mater Maria Salviata, Jacobi filia, Joannis Salviati Cardinalis soror, fœmina lectissima, & in tuendis filii fortunis pari diligentia, atque fide. Rem Florentinam Alexander Medices ha-



bebat Dux civitatis paulò antè armis subactæ  
 à Clemente VII. Pontifice Maximo impositus.  
 Huic juveni vel moderato, atque intento non  
 facilis dominatio futura fuit in civitate ne liber-  
 tatem quidem propter acria, atque indomita in-  
 genia modicè ferente; luxuriosus, & incautus  
 fraudi facilè patuit. Insidiator (adeò nihil tu-  
 tum alienæ libertatis oppressoribus est) ex ipsa  
 familia Medicea, atque ex intima familiaritate  
 ejus extitit Laurentinus Medices, qui Princi-  
 pi voluptatum diu minister, & ex eo apud im-  
 providum summam fidem nactus, dum domi suæ  
 spe dilectæ matronæ potiundi intempestâ nocte  
 opperientem habet, somno oppressi jugulum gla-  
 dio profecuit, vno conscio, atque adjutore servo,  
 cui Scorunconculo fuit nomen, protinùsque me-  
 tu, ac scelere territus, vrbe aufugit. Cædes Ducis  
 antè ab amicis Mediceorum est cognita, quàm  
 populus, aut suspecti cives sentirent. Itaque spa-  
 tium firmandi præsidio, continendique à seditione,  
 ac tumultu civitatem fuit; nec aliud præsentium  
 remedium est visum, cùm nulli Alexandri liberi  
 essent, quàm novum ex eadem familia Princi-  
 pem constituere, itumque ad Cosmum est vix-  
 dum octavum ac decimum annum egressum,  
 eumque è villa fortè redeuntem, nec minùs  
 quicquam cogitantem in Prætorium abreptum  
 Principem creant. Nec adolescens segniter se oc-  
 currenti fortunæ tradidit. Ita accidit, vt quem  
 Laurentinus paulò antè Alexandri gratiâ fretus

judicio, ac lite exagitabat, eum potissimum infandi facinoris ultorem habuerit, neque enim ei non antiquissimum fuit, pœnas à proditore expectere, qui cum se fugâ Venetias recepisset, ibi submissis à Cosmo percussoribus est interfectus. Par in invadendo, firmandoque inde sibi dominatu Cosmi indoles fuit. Qui rem ad eum detulerant, quò proniores civium animos haberent, majorque species libertatis, ac Reipublicæ maneret in præsentia, sublato Ducis nomine, cui odium dominationis inerat, eum non alio, quàm Principis vocabulo insignem fecerunt. Atque ille id quoque modestiâ, & humanitate lenire studebat. Et cum nihil nisi de seniorum consilio ageret, cunctaque ad Magistratûs curam, auctoritatemque rejiceret, mirè spem sui, atque indolem probavit, tantumque gratiæ apud omnes ordines inivit, ut bello mox ab exilibus magnæ viris potentiæ petitus, egregiâ populi voluntate, ac studio adversus eos sit usus, quibus pari facilitate victis statum civitatis pacavit. Tum paulatim exurgens, quotidieque magis convalescens, cuncta ad se trahere, donec Ducis quoque assumpto nomine, omni abolito Reipublicæ jure, & vanis modò sine re Magistratuum relictis nominibus, veram dominationem, imperiumque occupavit. Ac Petro inde Strozio viro forti, & militiæ claro, quo iterum exules Gallorum armis fulti ad repetendam patriam duce utebantur, acie superato, atque Etruriâ pulso, Senam opulentam



lentam urbem domitam armis Imperio suo ad-  
 cit; atque ita duplicato propè Regno, longè re-  
 liquos Italiæ Principes dignitate, atque opibus  
 anteire cœpit. Verùm ut nunquam præsentibus  
 contentum humanum ingenium altiora vsque  
 appetit, Cosmum ipsius jam Ducis nominis in-  
 fra suas opes positi pigere cœperat, animùmque  
 elatum secundarum rerum proventu vastâ cupi-  
 ditate ad Regis appellationem adiecit: sive ut  
 quem honorem potentiâ impleſſe videri poterat,  
 ejus quoque titulo insigniretur: sive ut vi, armis-  
 que possessa jure quoque addito in posterum ma-  
 gis firmaret. In hanc cogitationem omnibus stu-  
 diis ad demerendam Pii gratiam cùm animum  
 intendisset, obsequio, ac religionis cultu, & a-  
 crius adversùs hæreticos quæſtionibus, quibus  
 maximè rebus Pium senserat capi, brevè est af-  
 ſecutus, ut ei eſſet chariſſimus, & mox ut ma-  
 gnus Etruriæ Dux, quod Regiæ dignitati proxi-  
 mum eſt viſum, appellaretur, ab eo obtinuit:  
 ac Romam frequenti, ac pernobili comitatu  
 adveniens, duorum Cardinalium occurſu à Pio  
 honorifico hoſpitiſ acceptus, in ſolennibus inde  
 ſacris de Pontificis ipſius manu inſignia novi ho-  
 noris ſuſcepit. Maximilianus Cæſar eâ re minui  
 dignitatis ſuæ jura, nec Pontifici Maximo licuiſ-  
 ſe eam appellationem Cosmo tribuere, qui in  
 fide, ac ditione Cæſarum eſſet, neque omnino  
 tales impartiri honorum titulos ad alium, quàm  
 ad Cæſarem pertinere ferens, honorem ipſum

N n

Cosmo abrogaverat, questumque ea de re Legatos Romam ad Pontificem miserat; qui cum non impetrassent, ut, quod magnopere postulaverant, in Senatu audirentur, privatim ab adfidentibus aliquot Patrum auditi, atque etiam redarguti coram fuerant. Cum igitur & Cosmus liberi juris suum esse Regnum, nec se ullam clientelam Caesari esse obstrictum affirmans, nequaquam respectu ejus eam appellatione abstinere, & Pius non modo factum suum constanter tueretur, sed Maximilianum id non licuisse sibi ausum dicere aegre ferret, res ad non leve dissidium spectare videbatur, mandatque propterea Commendono fuerat, ut de hac componenda, sedandaque controversia, quae agitata magnam flammam datura videbatur, curam susciperet. Cum igitur ad spem jungendae contra Turcas societatis Caesarem, ut supra ostendimus, adduxisset, & forte inter se quantae foederatorum, quantae Italiae Principum vires essent, expenderent, prior Maximilianus mentionem Cosmi intulit, eumque vehementer accusavit, quod eum honorem ab alio, quam ab se petiisset, penes quem unum potestas tribuendi esset, neque defutura voluntas fuisset, ni Cosmum princeps ambitio impatientem morae, & necessitudinis, & officii immemorem fecisset. Se tamen memorem muneris, ac dignitatis suae fore, neque passurum, ut imperante se, Caesarum jus, & potestas minueretur: invitum quidem in ullam cum Ponti-



fice Maximo discepcionem descendere ; sed ipsum quoque credere probaturum , officii sui partes ab se non deferi. Præter hæc Philippum Regem Hispaniarum , & Principes Germaniæ , quos eadem causa attingeret , objiciebat. Commendonus ubi Cæsarem paulum oratione demul-  
 sisset , & quàm alieno Reipublicæ , quàm ipsi , familiæque ipsius minimè apto tempore ea moveretur quæstio , ostendisset , culpam ab ipso in consultores avertens , totum de legatione Romam missa , querelâque exposita factum reprehendit. Ac si querelas , inquit , ordiri volumus , vter tandem justius de altero queratur ? Pius Cosmo , & viro , & Principi ornatissimo , ac tibi ipsi animo , ac necessitudine conjuncto , qui domus sue nurum sororem tuam habeat , merenti appellationem magni Ducis tribuit : tu tributam ab illo abrogasti , Legatôsque , qui hoc Pontifici Maximo negarent licuisse , Romam misisti. Liberi juris esse Cosmus , civitasque Florentinorum , ac se Cæsarum potestati pecuniâ exemisse dicitur , & diploma remissi juris à Rodolpho auctore gentis tuæ , atque hujus amplitudinis , quâ inter omnes eminet familia vestra , conditore ostenditur ; tui nuper Legati omnem Etruriam ditioni tuæ subiciebant , immemores prorsus magnam partem ejus Provinciæ Pontificum Maximorum jure contineri. Quantum hæc habent odiorum , ac dissidii irritamentum , ni Pius Reipublicæ necessitates inanibus contentionibus præverteret , &

N n ij

» te patrio animo complectens, patriâ quoque be-  
 » nignitate agendum tecum censeret? At tibi,  
 » aut adeò his, quos in consilio habes, quî venit  
 » in mentem dicere, hoc Pio non licuisse? An du-  
 » bia Pontificum Maximorum potestas est, non  
 » Regum modò appellationes, sed ipsa quoque  
 » Regna, atque Imperia tradendi, adimendique,  
 » ut cujusque meritum in rem Christianam fuerit?  
 » Huic ipsi Etruriæ, quam tui vendicant tibi,  
 » nonne Clemens IV. Carolum Andegavensem,  
 » Neapolis Regem, rectorem dedit? Nonne quoties  
 » usus fuit, & visum è Republica est, eam Ponti-  
 » fices Maximi ordinarunt? Caroli, atque Etruriæ  
 » mentionem feci, quia de illa agitur. Sed ut à  
 » longinquis ad propinqua, magisque illustra e-  
 » xempla transeamus; in Ungaria neque obscura,  
 » neque vetustissima res est, ortam de Regno con-  
 » tentionem inter Vincislaum Bohemum, & Dira-  
 » chinos Pontificem Maximum diremisse, qui  
 » cum judicium ad se totum avocasset, & senten-  
 » tiam tulit, & valuit jus, quod Pontifex dedit.  
 » Opponebas nuper & Philippum Regem Hi-  
 » spaniæ, eumque socium tibi causæ adungebas;  
 » at ille Navarra Regnum in Pyreneis saltibus con-  
 » junctum Hispaniæ tenet, non alio scilicet jure,  
 » quàm quod Julius II. Pontifex Maximus Joanni  
 » Alibreto, quia se causæ impugnantium Roma-  
 » nam Ecclesiam junxit, ademptum dedit. Quòd  
 » si Pontifici hoc licuisse neges, alterutrum sequi  
 » necesse est, ut aut reddat Philippus Vandomiæ



familiæ Alibretorum hæredi nunc maximè repo-  
 scenti Regnum, aut iniustitiæ vincatur, qui  
 contra Christiani, & boni viri officium, ac re-  
 ligionem, quod suum non sit, per vim, atque  
 injuriam occupatum possideat. Dies me deficiat,  
 si memorare velim quoties, quibûsve in locis Ro-  
 mani Pontifices supremæ potestatis jus suscepe-  
 runt; quoties ortas de Regno contentiones, li-  
 tésque non auctoritate solum composuerunt,  
 sed jurisdictione, ac judicio decreverunt. Verum  
 ut de his ipsis appellationibus, quarum scilicet  
 tribuendarum facultate tui, si Deo placet, Pon-  
 tifices Maximos privarunt, cognoscamus: Al-  
 phonso sextus Hispaniæ Rex Henricum Lotha-  
 ringiæ Comitem, ob res præclarè adversus Mau-  
 ros in Hispania gestas generum ascitum, & Lu-  
 sitaniæ parte donavit, quæ Portugallia dicitur.  
 Hunc haud multò post Henricum ob spectatam  
 virtutem, & egregia in rem Christianam meri-  
 ta, Alexander III. Pontifex Maximus Regem  
 appellavit; neque Alphonsus, quamquam æqua-  
 tum dignitate sibi generum ægrè ferret, adversari  
 est ausus, aut de Pontificis jure disceptari, ambigi-  
 que est passus. In Polonia verò, gente cum am-  
 plitudine Imperii, tum bellicæ laudis gloriâ im-  
 primis nobili, utriusque rei, & adempti, & reddi-  
 ti honoris exemplo Romanorum Pontificum jus  
 nititur. Quo enim tempore maximè Cæsarum au-  
 ctoritatem Poloni agnoscerent, Boleslaum Re-  
 gem, quia Stanislaum, Episcopum Cracoviensem,

Nn iij

» virum innocentiae, & sanctitatis famâ clarum im-  
» piè occidisset, non solum ipsum Regno, sed Re-  
» gnum quoque vetustâ appellatione Regis multa-  
» runt Romani Pontifices, in perpetuumque eâ abs-  
» tinere jusserunt; eorumque imperio ita obtempe-  
» ratum est, ut per ducentos inde & quadraginta  
» annos, non aliter illi se, quàm Duces appellarint.  
» Neque tum negligens aliquis, aut secors, aut  
» plus æquo Romanæ Ecclesiæ deditus Germaniæ  
» Imperio præsidebat, sed vir acerrimus, Pontifi-  
» cibusque Romanis longè infensissimus Henricus  
» I V. nec tamen aut ipse, aut qui ipsi successerunt  
» eodem ingenio Cæsares, Pontifici Maximo id li-  
» cuisse aut negarunt vnquam, aut factum infrin-  
» gere conati sunt. Post tot inde annos, cum pri-  
» ſci honoris desiderium rediisset Polonis, meritî-  
» que egregiis pro Christiana re facinoribus essent,  
» ut eorum ratio haberetur, missâ in Galliam lega-  
» tione, vbi tum sedem Romani Pontifices habe-  
» bant, impetrarunt à Joanne XXII. ut Dux eo-  
» rum de integro Rex appellaretur. At quis tum  
» quoque Romano Imperio potiebatur? Nempe Lu-  
» dovicus Bavarus hostis, atque insectator perennis  
» Romanæ Ecclesiæ. Is tamen non invidit Polonis  
» restitutionem Regii nominis, neque id ab se non  
» petutum, aut traditum à Pontifice Maximo est  
» questus. Neque, ut arbitror, aut Pio V. jus fa-  
» ciendi, quod Joannes, cæterique Romani Ponti-  
» fices jure fecerunt, est ademptum, adimique ab vl-  
» lo mortalium potest, aut tibi plus quicquam addi-



tum,quàm Henrici,quàm Bavari habuerunt, aut «  
 tua erga Pontifices Maximos fides, & cultus «  
 cum illorum odio, & contumacia conferri po- «  
 test. At in Germania, at in ipsa Austria tua «  
 nonne idem juris Pontifices Maximi exercuerunt? «  
 nec Rodolphus, nec Albertus, nec Fridericus «  
 Cæsares majores tui, qui quererentur, Romam, «  
 sed qui gratias agerent, Legatos miserunt. Ve- «  
 rum ut omissis aliis, ipsam aliquando juris tui ra- «  
 dicem attingamus, Cæsaris, ac Imperatoris no- «  
 men, quo se tantum Germania supra cæteras «  
 Christianas nationes extollit, unde tandem ac- «  
 cepistis? Quis Romanum Imperium, cujus Bi- «  
 zantium translata majestas, ac vis omnis in O- «  
 rientem verterat, cum suâ jam mole laborans, «  
 neglectas Occidentis Provincias vastandas Bar- «  
 baris reliquisset, divisit primum, deinde divisi par- «  
 tes ad Germanos detulit? Nemo, ut arbitror, «  
 tam impudens veri inficiator, nemo tam aver- «  
 sus à Romanæ Ecclesiæ dignitate fuerit, qui Ro- «  
 manorum Pontificum id beneficium esse neget. «  
 An ergo ademptam Græcis dimidiam Romani «  
 Imperii partem, vobis cum Cæsaris, atque Im- «  
 peratoris appellatione tradere Romanis Pontifi- «  
 cibus licuit, Reges, ac Duces appellare non li- «  
 cet? An quod tradere vobis potuere, ipsi non ha- «  
 bebant? Equidem in eam interdum sententiam «  
 venio, ut suspicer, ne qui tibi auctores tam no- «  
 vi, tam intempestivi consilii sunt, aliud quàm «  
 quod præferunt, & cupiant, & agitent animo, «

» téque velint cum Pontifice Maximo alienissimo  
» tibi, & Reipublicæ tempore, committere. Ad  
» hæc Maximiliano haud sanè quidquam, quod  
» magnopere responderet, succurrebat. Id modò  
» afferebat, quas sibi partes Cæsaris nomen injun-  
» geret, ad eas tuendas, religione se, atque officio  
» cogi. Atqui, inquit Commendonus, qui jus Im-  
» perii tui tantopere defendendum esse tibi existi-  
» mas, idem certè concedere æquo animo Pontifici  
» Maximo debes, vt ipse juris, ac muneris sui ne-  
» gligens ne sit, quod quale sit, jam profectò in-  
» telligis. Postremò cùm Maximiliani animus eò  
» scilicet spectaret, vt concessi honoris mercedem  
» quamplurimùm à Cosmo pecuniæ exprimeret,  
» eum finem hæc tum disceptatio habuit, vt Cæsar  
» velle se, ac cupere ostenderet, vt Commendo-  
» nus ipse viam, rationémque exquireret, quâ ea  
» res componi, salvâ Cosmo magni Ducis appella-  
» tione, posset. Hoc autem totum ne tum transige-  
» retur negotium, Commendoni discessus à Cæsare  
» fecit, quem novi de Poloniæ Rege nuncii, &  
» iussu Pii abire protinus magnis itineribus in Po-  
» loniam coëgerunt. Sed non multò pòst & Cos-  
» mus vitâ est functus, & Maximilianus idem hono-  
» ris, quod Pius dederat, auctius etiam, cumula-  
» tiúsque Francisco filio acceptâ pecuniâ tribuit.



De



*De nova legatione, & profectione ejus  
in Poloniam.*

## CAPUT IX.

**C**AUSA properandi in Poloniam Commendonis fuit, quòd & rumor in dies percrebrescebat, & multorum afferebantur litteræ, Augustum Regem veteri suâ repudiandæ vxoris cupidine agitatum nova per hæreticos moliri consilia, nobilem puellam insigni formâ è sororis gynæceo abductam seposuisse, & per absentiam vxoris liberiùs jam novo conjugio viam sternere. Nam Regina, vt suprâ demonstratum à nobis est, cùm nullis precibus suis, suorumque impetrare à viro potuisset, vt in domum, conjugalemque convictum reciperetur, pertæsa contumeliæ excesserat Regno, seque in Austriam ad Maximilianum, fratresque contulerat, atque Lintzii in fraternæ ditionis oppido, cultu modico, & paulò supra privatæ vitæ modum agebat, cùm præsentis mœrore, ac sollicitudine afflicta, tum anxia futuri, nec effrænata Regis cupiditatis, nec eorum quæ tum maximè moliretur, ignara. Cùm secundo Istro navigans Viennam descenderet Commendonus, Lintziùmque visendi causâ Reginam appulisset; (est enim in ripa fluminis situm) illa multis cum lacrymis, precibusque se ei, famam, salutemque suam commendaverat, quæ-

O o

De

que de novis Regis adversum se machinationibus cognoverat, edocuerat. Quidam studio assentandi, seque in Regis gratiam insinuandi, sopitam spem ejus exsuscitaverant iterum, & cui rei vehementer Commendonus se semper objecerat, eò adduxerant, ut & litteras ad Pontificem Maximum tentandi causâ animum ejus daret, & litteras secuturi mox Legati fuerint, qui sterilitatem Reginæ, inopiam liberorum, necessitates Regni, populorum studia, precésque afferentes, dirimi matrimonium postularent. Profectus igitur Commendonus ad v. Kal. Decemb. maximè sævo anni tempore, agrè superatis nivibus, quæ in frigidissimis regionibus omnia tenebant, in Poloniam pervenit. Et quanquam multi Principum ex veteri amicitia affines illi testandæ benevolentiae, atque officii causâ præsto fuerunt, à quibus pleraque de præsentis statu rerum accepit; tamen antequam pergeret ad Regem, qui Varsoviæ in Regno erat, substitit apud Petricoviam, simul corporibus suo, suorumque ex longinqui, maximèque incommodi itineris labore reficiendis; simul quò certiùs omnia exploraret, omniumque gnarus in Regiam veniret. Interea qui salutem Regi, adventumque suum nunciarem, multaque, quæ antè statuenda, præparandaque erant, curarem, Varsoviæ me antecedere jussit. Omnibus demum satis exploratis, comparatisque, ipse aliquot post dies advenit omnibus honoribus, qui deberi ejus fastigii viro videbantur,



acceptus, cultusque cum à Rege ipso, tum à Principibus gentis. Et Rex quidem quamvis ex recenti morbo infirmus, & podagræ doloribus ægrè pedibus consistens, tamen intranti Regiam scipione nixus per scalarum gradus occurrit, comiterque congressus, ei latere dextero honoris gratiâ cessit, atque inde quoties aut in Regia, aut in templo congressi sunt, semper cum supra se collocavit. Jam antè ad primos adventantis ejus nuncios constituerat Rex cœptis de divortio consiliis tantisper, dum adesset Commendonus, absistere, atque omnem rei mentionem opprimere, satius ratus, quia non diu moraturus in Regno credebatur, discessum ejus opperiri, expertus antea quàm cum acri matrimonii propugnatore res sibi futura esset. Et tum implicitus amore vulgaris scorti, faciliùs novarum nuptiarum dilationem erat toleraturus, & affectâ valetudine, in ægro, & vitiato corpore etiam cupiditates animi languidiùs commovebantur. Sed Commendonus rem in præcipiti cernens; quippe designatos Legatos, qui Romam mitterentur, Cæsarem ipsum, ne adversaretur, lactatum spe oblatâ vnum è liberis ejus adoptandi, præparatos hæreticos, totam denique rem, ut vsus posceret, instructam, compositamque esse, nihil sibi statuit dissimulandum, ac tempore apto ingressus, quæ rumoribus differrentur, quæque ad se multi detulissent, Regi ostendit, eadèmq; illa, quæ aliquot antè annis apud eum de matrimonii jure, ac sanctitate disseruerat, re-

O o ij

petiit, ac frustra adiri Pontificem, frustra vias, rationesque exquiri in re, quæ humanâ ope expediri non posset, monuit; nec mortalium quemquam libentiùs, studiosiùsque navaturum ei operam fuisse, nisi res esset huiusmodi, quæ exitum habere nullum posset; & ipsum, licet multas gentes, populosque imperio suo contineret, meminisse tamen debere, se hominem esse, & Reges humanis fortasse legibus exsolui posse, at divinis jussis perinde ac reliquos mortales teneri. Proinde liberaret animum suum, cogitationemque, cui par non esset, & quâ in nullam spem dies, noctesque nequicquam cruciaretur, aliquando abjiceret. Ac Rex quidem ea negans vera esse, quæ de Legatis, deque adoptione circumferrentur, rumorem omnem ex suorum ait studio ortum, à quibus ipse assidue sollicitaretur, ut liberorum procreandorum curam susciperet: iis se dare verba, eorumque solari desideria sæpè cogi. Cæterum sibi in animo esse infelicitatem suam patientiâ vincere, quando solus eâ miseriâ premeretur, quæ remedii expers esset. Apparebat neutrum his contentum fore, quæ dicebantur, ni rem haud dubiè in publicum malum erupturam discussisset tandem Deus, illis ipsis fortè diebus allato nuncio, Reginam mortem obiisse, quam curis, ac dolore fessam, cujus vindex existeret nemo, repentinus morbus oppressit. Tum Rex atrata in veste, maximèque pannosa ingentem luctum præferens prodiit, & apud ipsum Com-



mendonum fœminæ probitatem, innocentiamque testatus, etiam fortunam ejus, quam ipse fecisset, profusis lacrymis est miseratus; quas tamen lacrymas nemo erat, qui veras putaret. Cui enim credibile videretur, quam nuper non contentus conjugali toro, domo, Regno exegisse, ipso quoque matrimonio dejicere, vel vitæ suæ, Regni que discrimine moliebatur, ejus extinctæ desiderio commoveri? At ipse & nuncium mortis, & funeris diem non mœrore solùm, ac lugubri cultu, sed propè muliebri fletu est prosecutus; & quod haud minùs mirere, nulla jam ampliùs tum ab ipso, tum ab suis audita novarum nuptiarum mentio est, nulla procreandorum liberorum, nulla firmandi in familia Regnum, quæ antea alternis propè verbis jactabantur: sive concubinæ, quam nuper in Regiam transtulerat, blanditiis delinitum, ejusque amoris deditum novi conjugii pœnitere cœperat: sive hoc inest humano ingenio vitium, ut ad verita impotenti impetu feratur, eadem adepta contemnat.

---

*Actio cum Rege, & Polonis de fœdere.*

C A P U T X.

**D**E Turcico bello, deque jungendis adversus eam gentem armis egit vehementer cum Rege Commendonus, multaque quæ apta

O o iij

rei visa sunt, accuratè apud eum differuit. Sed res erat multis, ac propè inexplicabilibus involuta difficultatibus. Rex ipse mulierculæ amorì deditus, suis addictus voluptatibus, ingenio imbellis, & vacuo curis otio gaudens, animo, & corpore æger, minimè opportunus belli consiliis erat: ita tamen loquebatur, vt Christianorum consensui adversus Christianæ pietatis hostes non defuturus videri vellet, & omnia ad concilium suorum, quod tum maximè Varsoviâ cogebar, rejiceret; siquidem pacis, ac belli jura legibus Polonorum sunt penes id concilium. Polonis antiquum fœdus, ac pax cum Turcis manebat, eâque lætabantur, neque vt abrumperent, & cum prævalido hoste in certamen descenderent, adduci se passuri vllâ spe, vllis promissis videbantur. Omnibus in ore erat Varnensis clades, memoriâque ejus & vulgò horrebant, & vrgenti Commendono, ac ne vni resides in communi causâ adversus communem hostem esse vellent, hortanti sæpè opponebant. Uladislaus Tagellonis filius ab Ungaris, Polonisque pariter Rex expetitus vtrique genti imperitabat, & florebat eâ tempestate Ungarica res armis, virisque, & Regni fines in Thraciam vsque extenderat. Et Turcæ latè parto in Asia Imperio, multis clari victoriis, tum maximè Bizantio, Europæque imminebant, ac Amurates eorum Rex, ne pluribus simul bellis distineretur, & vt majori inde mole in Constantinopolitanum Cæsarem verum



hostem suum incumberet, pacem cum Uladislaao composuerat. Sed Eugenius IV. Pontifex Maximus, veritus ne si gens bellicosa, & imperii avida, & infensa Christiano nomini Constantino-  
polim oppressisset, par inde periculum non Græ-  
ciæ solum, finitimisque Provinciis, sed Italiæ  
quoque, & Christianæ Reipublicæ vniversæ crea-  
retur, Cæsarinum Cardinalem ad Uladislaum  
misit, quanti Ungariæ, Poloniæque interesset  
arceri Europâ Barbaros, illamque pestem finibus  
Regnorum suorum summoverti monens, & hinc  
Constantinopolitano Cæsare magnis copiis Thra-  
ciæ claustra occupante, hinc Venetis, Genuensi-  
busque mare classe tenentibus, posse nimirum jam  
in communem perniciem crescens malum, ante-  
quam maiora incrementa caperet, opprimi, nisi  
ipse vano pacis nomine deceptus victoriam mo-  
raretur; perpulit juvenem, vt repudiâtâ pace,  
quam paulò antè cum Amurate pepigerat, eum  
bello aggredieretur, infelici prorsus exitu. Nam  
apud Varnam collatis cum eo signis ita conflixit,  
vt victor quidem ab dextero cornu, in quo ipse  
constiterat, Turcas in fugam averterit: sed ho-  
stes victores alterius Christianorum cornu ab ter-  
go adorti Regem interfecerunt, ac magnam in-  
de cædem nostrorum, amisso Rege, effuse fugien-  
tium ediderunt. Hujus memoriam cladis Polo-  
ni omnibus sermonibus vsurpantes à pace, atque  
amicitia Turcarum ne discederent inter se co-  
hortabantur, & præterea haud ineptè differe-

bant, breuem Venetorum, Hispanorūque societatem fore, quā solutā Polonis solis, & violatā semel fidei reis, cum valentissimo Rege Asia, & Europæ opibus subnixo dimicationem haud quaquam suarum virium subeundam. Commendonus quam in consensu gentis nullam habebat, aliquam tamen arte, atque industriā spem ipse effecerat: nam è Principibus, qui multi domum ejus (fuit enim semper ab illa gente mirè cultus) frequentabant, acerrimum quemque traxerat in sententiam, alios spe adipiscendi militares præfecturas, alios famæ, & propagandi nominis, alios prædarum cupidine illiciens, ut si res ad disceptationem Senatūs deducta forer, haud negligenda factio belli auctorum futura fuerit. Quod erat consilio comparatum, etiam casus adjuvit. Valachiam finitimam Polonis gentem, & Turcarum vectigalem Bochdanus Alexandri filius traditam à patre habebat. Huic adolescenti Polona virgo insigni formā è Tarlorum familia nobili, atque opulenta apud Russos nupserat; ad quam deducendam, relicto Regno, Bochdanus in Russiam transierat. Iratus Regulo, infensūque magnopere erat Christophorus Sborovius Polonus, ferox juvenis, & genere, & opibus suis, suorumque elatus; iræ causa erat, quòd in Valachiam ad spem sororis nuptiarum à Bochdano accitus, inde ex juvenilibus causis orto inter eos dissidio spretus, ac ludibrio habitus domum redierat. Is cognito Bochdani in Russiam adventu, occul-



occultus in proxima loca cum delectis juvenibus concesserat, intentusque inimicum observabat. Et Bochdanus trajecto Tyrâ flumine, quo Valachia à Russia dividitur, nihil suspicatus hostile, juvenili impetu, quò se inopinatum conjugii offerret, cum paucis celeri rhedâ prævectus antecesserat suorum agmen; quâ re cognitâ Sborovius incautum juvenem insidiis excepit, ac duobus vulneribus faucium in oppidum suæ ditionis abduxit. Id verò vbi in Valachiam est perlatum, gens ingenio ad omnem novæ spei auram mobili, nec unquam fida Regibus suis, & Bochdanum paternæ sævitæ memoriâ perosa, alium sibi Principem legit, qui missis celeriter Bizantium Legatis, hinc criminandò Bochdanum, quòd res novas cum Polonis, Christianisque moliretur, hinc pecuniâ, ac largitione, quæ omni jure potentior est, apud venales Barbarorum animos tenuit, ut rata esset voluntas Valachorum, atque ipse in Regis fidem acciperetur, ad præsidiumque Regni aliquot ei equitum turmæ mitterentur: perlatâque in Poloniam erat fama, acceptâque, ut cuncta in majus differt rumor, illum quò plus gratiæ apud Turcas iniret, animum ad eorum quoque superstitionem, sacrâque traduxisse, eorumque ritu, ac ceremoniâ circumcidi se passum. Bochdanus, cum Sborovii facinus, à quo se pecuniâ redimere coactus fuerat, in summa invidia esset, partim miseratione tam indigni casus, partim Tarlorum gratiâ, studiisque adjutus,

P p

Polonos ad consilium reducendi se in Regnum concivit. Neque enim non suarum rerum interesse illi rebantur, Provinciâ finitimâ Russiæ hominem suum potius, quàm Turcarum beneficium agnoscentem potiri. Coactâ igitur manu, ac trajecto Tyrâ impetum in Valachiam fecerunt, & haud magno negotio novum expulsuri Principem erant, ni Rex Poloniæ, Senatúsque cùm Turcarum militum præsidium esse cum Valacho accepissent, in magnum coniecti metum, ne Turcicum inde bellum conflaretur, properè suos ab incepto revocarunt, eosque vi, atque armis abstinere, ac tantùm dare operam, vt reconciliarentur Bochdano popularium animi, illorùmque voluntate in Regnum rediret, jusserunt. Sed ipsis quoque Turcis ea res suspicionem incusserat Polonici belli, cujus concitatorem esse apud Regem Pontificis Maximi Legatum non ignorabant, & magnopere querebantur initium violandæ pacis à Polonis fieri. Convenerant interea frequentes Varsoviam ad concilium Poloni, nec aliud quominus Commendono Senatus daretur, quàm Regis morbus distinebat; nam Senatum adire, absente Rege, dignitatis suæ Legato non videbatur. Cùm ingravesceret in dies morbus, nec res diutiùs differenda videretur, decursum eò est, vt delecta Senatús pars ad audienda Legati verba domum ejus veniret. Venerunt Archiepiscopus Gnesnensis, Ordinis ejus Princeps, & Episcopi tres Cracoviensis, Plocensis, & Presmi-



liensfis, cum Palatinis sex, & Castellanis octo, &  
 Cancellario Regni, & Marefciallo, (nomina hæc  
 Magistratûs sunt, quibus Polonorum Senatus  
 conſtat) qui quàm potuit, honorificè, & comiter  
 à Legato accepti cum conſediſſent, pro omni-  
 bus Cancellarius eſt locutus: Regem, quia venire  
 ipſe in Senatum, ad quem de Pontificis Maximi  
 poſtulatſis eſſet referendum, valetudine impeditus  
 non poſſet, legiſſe viros gentis ſuæ Principes,  
 qui ad eum ſuo, Senatûſque nomine adirent,  
 dictâque exciperent; petere, ut cum iis, in qui-  
 bus Senatûs inſtar eſſet, tanquam cum præſente  
 ſe de omnibus rebus loqui ne gravaretur. Com-  
 mendonus præfatus graviter ſe ægrè ferre Re-  
 gi minùs bene eſſe, eique celerem morbi de-  
 pulſionem, ſalutemque ominatus, ſe quidem li-  
 bentiffimè fuiſſe facturum dixit, ut Senatum per-  
 ſalutaret, atque alloqueretur univèrſum; ſed quan-  
 do id minùs commodum fuerit, in eorum viro-  
 rum dignitate, atque amplitudine, qui ad ſe  
 conveniſſent, Senatûs ſe, gentiſque totius maje-  
 ſtatem ſibi conſtituturum. Deum deinde teſta-  
 tus eſt, ſe quicquid conſilii, aut deliberatio-  
 nis iis afferret, eâ mente, animoque eſſe factu-  
 rum, ut ſi de ipſius patriæ ſuæ ſalute conſulere-  
 tur, fide, ac religione majori ſententiam non eſſet  
 dicturus; ita enim & meritos de ſe Polonos eſſe, &  
 ſuum perpetuum, ac ſingulare in eam gentem  
 ſtudioſum poſtulare. Hæc cum dixiſſet, ſilentio fa-  
 cto, oculi, aurèſque in eum omnium defixi, in-

» tentique sunt, & ille ita est orsus: Exarsit, viri.  
» Poloni, ingens nobiscum & Turcarum gente bel-  
» lum, & nisi Barbarorum artes, quibus singuli,  
» disjunctique appetimur, maturè intelligantur, pe-  
» riculofum Christianæ Reipublicæ; neque enim  
» illata Venetis arma, non æquè aliis indicta Chri-  
» stianis populis esse existimari debet, cum illi  
» haud Imperio, quàm sacris, ac religionibus no-  
» stris infestiores hostes sint. Quod sentiens Pius  
» quintus Pontifex Maximus, cujus hæc est pro-  
» pria cura, publicæ incolumitati, salutique prospici-  
» cere, non solum ipse cum Philippo Rege Hispa-  
» niæ, & cum Venetis fœdus percussit, sed reli-  
» quos quoque Reges, populosque invitatum, sol-  
» licitatumque in hujus societatem fœderis misit.  
» Et vos imprimis, Poloni, gloriosi, ac pii belli so-  
» cios expetit, cum propterea quod virtuti vestræ plu-  
» rimùm fudit, tum quia vos quantò propiorem,  
» magisque expositam hosti terram incolitis, ma-  
» jorque inde salutis, ac libertati vestræ periculum  
» imminere intelligitis, tantò promptius cum cæte-  
» ris juncturos arma sperat, quæ sponte vestrâ ob-  
» jecta semper, atque infesta Barbaris, ac sævis na-  
» tionibus pro Christiano nomine habuistis. Non  
» enim animum vobis, Poloni, profligandi bello  
» Turcas, atque hanc pestem lateri vestro adhæren-  
» tem extinguendi, non studium propagandi fidem  
» Christianæ pietatis defuisse vnquam scimus; sed  
» tempus, ac fortunam expectatam, cum Chri-  
» stiani nominis Reges, populique viribus, animis



que conjunctis ad opprimendum tandem com-  
munem hostem confurrexissent. Hæc nunc vo-  
bis optata occasio offertur. Selimus ingenitâ stirpi,  
ac sanguini ejus in Christianos rabie, perfidiâque  
abruptâ pace, quam paulò antè sanctissimo jure  
jurando (si quid modò sanctum Barbaris est) cum  
Venetis renovarat, Cyprum insulam bello est ag-  
gressus; sperans scilicet Christianos propriis ut  
antea distinctos odiis nihil se commoturos, ita si-  
bi facultatem Venetos aliorum auxiliis destitutos  
opprimendi futuram. Verùm adnitente Pontifi-  
ce Maximo, Philippus cujus opes per se sustinen-  
do bello sunt pares, arma secum, & cum Venetis  
consociavit, Cæsar, Germanique idem parant,  
Sebastianus Rex Lusitaniæ ultro se socium piæ  
militiæ offert, neque Galli, quamvis longè di-  
stant à Turcis, eorumque fœdere attineantur,  
non magnam spem sui faciunt. Ad hæc navali  
prælio attritæ hostium vires sunt, & multi Græ-  
ciæ, ac Macedoniæ populi post victoriam Chri-  
stianæ classis sustulere animos, & nisi nos ardori  
eorum defuerimus, rebellionem pollicentur; ut  
si hanc elabi è manibus occasionem Christiani  
patiamur, tum existimare sit iratum nobis Deum  
mentem eripuisse. At pax Polonis, atque amici-  
tia cum Turcis manet mutuo jurejurando firma-  
ta, à qua neutris salvâ religione discedere fas est.  
Quâ fide Turcæ amicitias colant, semperque co-  
luerint, docent domitarum ab ea gente Provin-  
ciarum annales, quas dolo, ac perfidiâ plures,

» quàm armis subegisse satis constat: & ne vetera  
» scrutemur, dicerem Venetos, quantum Barbaro-  
» rum fidei credendum sit, documento nobis esse  
» posse, nisi vos ipsi aliis esse possetis. Nec recen-  
» sebo nunc Bialugrodum, frequens ad ostium  
» Tyræ oppidum, vobis injuriâ, ac fraude Turca-  
» rum ademptum, & duo item oppida in ipsa Po-  
» dolia contra fœdus capta, ac permunita. Antiqua  
» hæc sunt; præsentia, ac nota pendamus. Supe-  
» riori anno ante navalem pugnam, causati nescio  
» quam tributi (sic enim ipsi in nominis vestri con-  
» tumeliam appellant) pensionem non solutam à  
» vobis Scytharum Regi esse, Scythas ipsos in Polo-  
» niam immiserunt. Ipsi scitis, quam vastitatem  
» fertilissimis Russiæ, ac Poloniæ agris rapacissimæ  
» feræ intulerint, quot captivorum millia in fœdam  
» servitutem abduxerint. Idem facturi hoc quoque  
» erant anno, nisi navalis victoria intercessisset; nam  
» quadraginta millia eorum in vltiori ripa Bory-  
» sthenis confedisse, omnes nuper nuncii attulere,  
» quos transitu fluminis, non hyemis expectatio, sed  
» novum Selimi imperium nihil postamissam clas-  
» sem in Polonia irritandum ducentis prohibuit.  
» Scythico bello dilato, quo turbari apertè fœdus vi-  
» deri poterat, Valachiam occupare aggressi sunt, vn-  
» de legitimo Principe expulso, nullius criminis,  
» præterquam nimii in Polonos studii, ac fidei reo,  
» nequissimum servorum Tyranni, desertorem Chri-  
» stianæ pietatis, infelici Provinciæ dominum im-  
» posuere, Turcarum non profanos modò colentem



religionis ritus, sed crudelitatem, avaritiam, li-  
 bidinem exercentem, &, quod vestra quanti in-  
 terfit profectò vos intelligitis, illorum iussis, nu-  
 tibúsque servientem. Sigismundus pater, Rex om-  
 nibus sapientiæ laudibus clarissimus, magnam sem-  
 per curam habuit, ut is Valachiæ imperaret, qui  
 non modò Christianarum partium, si quando  
 hæc fortuna incidisset, futurus esset, sed qui sibi,  
 atque huic Regno certis fœderis legibus obstrin-  
 geretur; & sui fines à Turcarum finibus illâ interje-  
 ctâ Provinciâ determinarentur. Hanc Valachiam  
 qui obtinet, non addictus modò Turcis est, sed  
 prorsus inimicus, infensúsque Polonico nomini;  
 quippe quem non fugiat, Bochdanum æmulum  
 suum præsidio vestro fultum ad se oppugnandum  
 nuper Tyram trajecisse, ac vestris Nunciis, litte-  
 risque nunc maximè Valachos in se sollicitari.  
 Hoc loco utrumque vobis pendendum est, vio-  
 laverintne Turcæ pacem, qui contra fœderum  
 pacta hominem circumcisum Valachiæ dominum  
 fecerint, eique militare præsidium, quo se, Re-  
 gnúmque adversus vos tutaretur, miserint: an vio-  
 lata culpam in vos rejecturi sint, qui Bochdanum  
 vi, atque armis reducere in Regnum conati estis.  
 Labare certè jam pacem constat, cùm illi post re-  
 ductas è Valachia vestras copias, ultro in Russiæ fi-  
 nes incurrerint, captivos, prædas, incendia, aliá-  
 que hostilia fecerint. Jam vobis edendum erit, pu-  
 blicóne consilio, an privatâ necessitudine Boch-  
 dano exercitum ad recipiendam Valachiam tra-

» dideritis : si publico decreto factum fateamini,  
» turbata pax, eversumque haud dubiè fœdus est ;  
» sin à publica fraude omnem in privatas necessi-  
» tudines culpam contuleritis, ne ipsi quidem Turcæ,  
» cùm commodum fuerit, sanctum id fœdus habi-  
» turi sunt, quod privatis turbasse noxæ non fuerit.  
» At Nuncii post id factum à Selimo ad vos missi,  
» litteræ solito etiam clementius scriptæ, atque om-  
» nia pro pristina amicitia facta sunt. Id verò quam  
» in partem interpretemini etiam atque etiam, Po-  
» loni, considerate. Unde enim hæc repenti Bar-  
» baris comitas ? Quò tumidis, & suprà mortalita-  
» tis modum efferre se superbiâ, ac vaniloquentiâ  
» solitis blanditiæ ? Scilicet vestrum hoc, non suum  
» esse tempus norunt, verentur, ne eo utamini,  
» avertere à vestra occasione, & ficto amicitia no-  
» mine sopire vos volunt, & quos bello non au-  
» dent, pace oppugnare student. Quò blandius  
» agunt, quò magis sui dissimiles sunt, eò majorem  
» irarum molem pectoribus claudunt, suumque tem-  
» pus cauti opperiantur, vestrum vobis eripere stu-  
» dent. Interea Regni vestri claustra occupant ; ne-  
» que enim Valachiam per se peti ab illis existima-  
» re debetis, cujus Regulos multò antè stipendiarios  
» habuerunt. Hunc in Poloniam gradum sibi fa-  
» ciunt, & ne quid auctoritatis in ea Provincia vos  
» habeatis, præcavent. Hinc illa expulsio innoxii  
» adolescentis, cui quid præter vestram amicitiam  
» objectum est ? Nolite, Poloni, expectare, dum Co-  
» thino occupato, munitoque, vos non solum  
Va-



Valachia spe excludant, sed Camenitio timere «  
assidue cogant; si enim, quod vos non fugit, pro- «  
ximis annis Alexandrum hujus Bochdani patrem «  
ad recuperandam Poveriam sollicitarunt, quid «  
facturos putetis, cum Valachiam ipsi in potesta- «  
te habebunt? Et quis prohibet, si vos desides, & «  
nihil commoventes viderint, quin Transsylvaniam «  
quoque in eandem servitutem trahant, ac Re- «  
gnum inde vestrum ita cingant, ut savissimos, «  
& cupidissimos hostes assidue in cervicibus ha- «  
bere cogamini? Hæc cum ita sint, etsi bellum «  
expetendum non est, sapientius tamen facere vi- «  
dentur, qui ejus impendentem necessitatem an- «  
te capiunt, suoque tempore utuntur, quam qui «  
cunctando, ac prolatando suam occasionem ho- «  
stibus tradunt; prudentium enim est imminen- «  
tia prospicere, ut occurrant, impendensque ma- «  
lum remediis antevertant. Data vobis occasio «  
est, qualem majores vestri sæpè expetiverunt, eam «  
si abire pariamini, (fallus utinam vates sim) valdè «  
vereor, ne serò vos nimii quietis, atque otii studii «  
pœniteat, serò me vera monuisse prædicetis. Sigis- «  
mundum quidem patrem ultimâ senectâ dicere «  
solutum accepi, nihil se in vita magis optasse, «  
quàm ut hunc diem videret, cum consentientes «  
Christiani Principes Turcas bello aggrederen- «  
tur; tum profecto se omnibus hominibus testa- «  
tum fuisse facturum, voluntatene, an necessitate «  
Turcarum amicitiam coluisset: huic voto illam «  
ab amantissimo suorum Rege subiectam fuisse «

Qq

» vocem, florentissimum quidem se, atque multis  
» auctum rebus, sed immanibus Turcarum opibus  
» obnoxium, expositumque Regnum filio tradi-  
» turum. Nimirum inveterata prudentia senex in-  
» tellexit, nunquam Polonos in stabili, ac tuta li-  
» bertate futuros, dum gentem natura hostem,  
» tempore modò non inimicam, tam infidam, tam  
» validam, tam propinquam haberent, & versu-  
» ram aliquando in hoc Regnum Barbarorum tem-  
» pestatem, quam hactenus varii temporum, & cu-  
» piditatum impetus aliò averterunt. Hoc peracuti  
» senis vaticinium vel charitate optimi Regis, vel  
» auctoritate sapientissimi viri plurimum apud vos  
» ponderis habere debet, ad oblatam divinitus fa-  
» cultatem frangendi nimias importuni Tyranni  
» opes non omittendam. Nec duci vos, fallique  
» specie falsa societatis patiendum, quàm tantisper,  
» dum aliis bellis distinentur, illigatos habere vos  
» illi volunt. Sed ut idem sapius repetam, secum  
» quisque geri existimare debet, quodcumque  
» cum Christianis à Turcis geritur bellum: & om-  
» nibus quidem, & vobis imprimis ipsum commu-  
» nis exitii periculum satis causæ esse videtur, cur  
» arma in communem hostem sumantur. At quid  
» vos moretur, post partam eam victoriam, quàm  
» pulsus possessione maris hostis, terrestrium copia-  
» rum robur maritimis oris, quantum Græciæ,  
» quantum Asiæ, atque Syriæ littora ambiunt, cu-  
» stodiendis, prædiisque formandis dissipaturus  
» sit? ut si quæ classibus, quæ terrestribus exercitiis-



bus ab Ungaria, Polonia, Dalmatia, Christiani  
 aggrediantur, dubitare nemo possit, quin brevi  
 exacturi Europâ Barbaros simus. Sed proponite  
 tum vobis nullum esse inter Christianos fœdus,  
 nullam adversus Turcas societatem, neminem vos  
 ad eam invitare, & Regnum hoc à Turcis bello  
 peri, quod aliquando facturos apparet; vtrum  
 tantas esse Poloniæ vires putatis, quibus per se si-  
 ne aliorum ope sustinere vim hostium possit? an  
 si soli relinqueremini, pares fore vos Turcis non  
 speratis? Si eæ vires vestræ sunt, vt vestris co-  
 piis subire vos Turcicum bellum posse confidatis;  
 quem campum parandæ gloriæ maiorem expe-  
 ctetis, quàm cum à Christiana Republica peri-  
 culosissimum bellum vi, ac virtute vestrâ propul-  
 sare possitis, & cum singulari fama Polonici no-  
 minis Imperii vestri terminos longissimè profer-  
 re? Sin resistere ipsi invadentibus toto conatu  
 belli vos Turcis non posse solos sentitis; profe-  
 ctò ni tam vilis vobis vestra libertas esset, vt in  
 voluntariam concedere servitutem nihil pensi ha-  
 bituri essetis, aliorum imploranda auxilia, & sin-  
 guli adeundi, ac rogandi Reges, & ad societa-  
 tem belli ciendi, inflammandique forent, quos  
 si vobis Deus junctos inter se fœdere offerret,  
 certè pro summa id felicitate duceretis. At non  
 solum juncti fœdere Principes, sed clarissimæ vi-  
 ctoriæ fructus ultro vobis offeruntur. (nam nisi  
 vestro tempore suscipiatis, alieno habituros ali-  
 quando vos cum Turcis bellum dubium non est)

Qq ij

» At cujus victoriæ ? Quâ hostes Imperio maris,  
» quo Europæ Imperium contineri omnium sæcu-  
» lorum judicio constat, depulsi sunt. Cujus si nos  
» victoriæ segni cunctatione fructum corrumpimus,  
» & hostem reficere maritimas vires, & amissam  
» maris possessionem repetere sinimus, haud pro-  
» fectò scio, an non vicisse satius fuerit. Nam ces-  
» sando brevè, & æquè validum, & multò quàm  
» antea infestiores habituri hostem sumus; nec  
» periculo propior quispiam est futurus, quàm qui  
» maximè opportunus terrestri bello fuerit. Et vos  
» salutem vestram præsentì paci ab infidelium ho-  
» stium fide pendenti creditis ? Equidem Deum  
» precor, ut vestra vos credulitas non fallat, sed ex  
» his, quæ gesta nunc in Valachia sunt, magnope-  
» rè vereor, ne aut opinione vestrà maturius trans-  
» isse Tyram Turcas accipiat, aut motum in eo-  
» rum jam animis bellum tandiu non sentiat, nec  
» donec tanquam ignis cuniculo admotus, paulatim  
» serpens in magnum mox incendium, ruinamque  
» erumpat. At multa vos à suscipiendo tanti disci-  
» minis bello deterrent. At primùm nulli magno  
» negotio aggrediendo non multæ oboriuntur dif-  
» ficultates, quas ipsum postea agendæ rei studium  
» tollit: deinde cùm incensa ardet domus, & vr-  
» gens constrepat flamma, nemo se ut ornet, ut  
» comparet, moratur; sed quisque vel nudus, vel  
» æger quantum potest, se periculo proripit. Hostis  
» in finibus est, intrat etiam, & populatur vestros  
» agros; sive progrediatur longius, & facere vim



pergat, prohibendus; siue inhibeat, & se Vala-  
 chiâ contineat, timendus eò magis, quòd tan-  
 quam aries, major ex ipso receptu impetus infe-  
 retur: vt vestra nunc deliberatio esse videatur,  
 non an verum bellum cum Turcis habeatis, sed v-  
 trum vestro, an illorum tempore geratis; vtrum  
 impendenti de libertate, ac salute vestra certa-  
 mini obviâ eatis, dum distractâ, comminutâ-  
 que hostium vires haud dubiam victoriam polli-  
 centur; an dulcedine præsentis otii capti, even-  
 tum alieni periculi spectantes, sine ullius gratia  
 victoris præmium sitis. Habendum aliquando est  
 vobis, Poloni, bellum, neque differendo avertitis,  
 sed vt cum paratiore, ac validiore hoste geratis,  
 facitis. Quò magis miror esse, qui præsentem, et  
 si dubiam, nec diu duraturam pacem ita antefe-  
 rant belli consiliis, vt pro hac ipsa brevis, ac  
 solliciti temporis vsura nihil cogitent, in quantam  
 se curarum, ac discriminum molem conijciant.  
 An ergo bellum, bellique curas ita, Poloni, hor-  
 rebitis, vt salutem vos alienæ libidini obnoxiam  
 ducere non sentiat, & si sentitis, non servitu-  
 te gravius feratis? An verò libertatem vestram  
 vel morte vindicandam non putatis? An id agi-  
 tis, vt dum ipsi præsentis pace fruamini, nihil pen-  
 si habere credamini, si omnem belli tempestatem  
 in liberos vestros rejiciatis, quod ipsum tamen  
 consecuturi non videmini? An in privato pater  
 quisque familias, vt patrimonium filiis explica-  
 tum, constitutumque relinquat, & ne qualis, ne

Qq iij

» qua controversia eos turbet, tanto studio, operé-  
» que sollicitus laboret? Senatus, qui patriam cu-  
» ram omnium gerat, ut communium liberorum,  
» ac posterorum incolumitati, salutique prospicia-  
» tur, ac tuta iis, atque integra libertas relinqua-  
» tur, non æquè anxius curret? Sed esto, nullum sit  
» à Turcis præfens periculum, quod est tamen ma-  
» ximum, certam, exploratamque Poloni habeant,  
» habiturique sint pacem. Ipsa est Respublica ve-  
» stra ita ad belli artes, ad militiæ studia omnis  
» instituta, ut isto amore nimio pacis jam depravari  
» cœpta, verendum magnoperè sit, ne diutino  
» otio penitus corrumpatur; ut enim validum, ac  
» robustum corpus si in ignava, ac inerti quiete  
» habeas, contabescit, gravésque contrahit morbos:  
» ita Respublicæ nisi in eadem disciplina, iisdém-  
» que artibus retineantur, ad quarum usum insti-  
» tutæ sunt, tanquam humana corpora ægrotant,  
» & luxu, & licentiâ corruptæ graves seditionum,  
» ac discordiarum morbos contrahunt; cuius mali  
» magna Poloniam concepisse semina, vos ipsi sine  
» mea commemoratione intelligitis. Horum om-  
» nium medicinam belli, atque armorum studium  
» diuturnâ vobis disciplinâ, ac propè naturâ infi-  
» tum præbebit. Hoc enim Poloni vestrum est cur-  
» riculum, hæc gloriæ materia, hæc exercitatio,  
» his studiis convaluistis, his robur, hoc tot Provin-  
» ciarum in vnum Regnum, corpusque subacta-  
» rum assumpsistis. Scilicet majores vestri à quibus  
» parta hæc sunt, non in compotatione, & convi-



COMMENDONI CARD. 311

viis, sed in equis, in laboribus juventutem ha-  
 buere. Non vter plus vini simul ebiberet, majo-  
 ráque exhauriret pocula, sed vter cursu alios an-  
 teiret, vter arcu certiùs figeret, vter equis, ar-  
 misque præstaret, certamen erat. Non denique  
 domi per voluptates, sed in castris per virtutes  
 opes, honorésque parabantur, nec aliam laudem,  
 laudisve præmium vllum norant, quàm militiæ mu-  
 nera impigrè, fortitèrque obire. His artibus ad  
 dignitatem, ad hanc bellicæ virtutis famam ma-  
 jores vestri pervenere, quâ Polonicum nomen  
 & finitimis nationibus terribile, & longinquis  
 clarum, illustréque fecerunt. Verùm si ne hæc  
 quidem revocandi priscam disciplinam, & Rem-  
 publicam in quibus crevit, artibus retinendi sa-  
 tis justa causa videtur, cur in publicam Christia-  
 næ fidei causam pro communi salute non de-  
 scendatis? Tum illud cum animis vestris reputate,  
 vestrane intersit vincere, aut vinci Christianos.  
 Nam si iis victis, subactisque, ne vos quidem sal-  
 vos fore intelligitis, bellantes certè non ipsorum  
 solùm, sed vestrâ etiam causâ juvare ope, auxi-  
 lioque debetis, ne cadentibus illis, vnâ vestrum  
 Regnum eodem casu impulsus ruat. Si autem  
 victores nos hujus belli futuros creditis, cur non  
 multò libentiùs, promptiùsque eadem arma,  
 eumdémque conatum ad victoriæ societatem con-  
 feratis, quem fulciendæ ruinæ adhibitori fuisse-  
 tis? Proinde memores rerum à majoribus vestris  
 gestarum, memores beneficiorum, quæ à Deo

» accepistis, memores salutis, dignitatisque vestrae,  
» hæc corporum, hæc animorum robora, tantam  
» virorum, equorum, commeatum copiam grati  
» Deo ipsi reddite, Deum jubentem capeßere pium  
» bellum adversus Christianæ pietatis hostes, vo-  
» bisque præclaram testandæ virtutis, propugnan-  
» dique Imperii occasionem aperientem audite. At  
» si deferere patriam, deferere parentes nefas duci-  
» mus, reputemus animo, quo nos scelere obliga-  
» turi simus, si JESU CHRISTI causam neglexeri-  
» mus, si ejus sacra, cultum, numen oppugnantibus,  
» feris, atque internecinis hostibus non ob-  
» stiterimus. Ego quidem ipsum oro, atque obse-  
» cro JESUM CHRISTUM Deum, ut vestras,  
» Regisque mentes in tantæ rei deliberatione ira  
» regat, ut nihil, nisi quod cum ipsius Dei majestate,  
» cum vestra, vestrique Regni amplificatione, ac de-  
» nique cum Christianæ Reipublicæ utilitate conjun-  
» ctum sit, statuatis, ut aliquando non infidam, &  
» alieno arbitrio obnoxiam pacem habeatis, sed  
» libertate stabili, suisque nixâ viribus & ipsi frua-  
» mini, & posteris vestris tradatis. Oratio Legati  
» ipsis quoque qui Turcica arma, bellumque horre-  
» bant, pudorem, dubitationemque injecerat, & si  
» res relata ad Senatum fuisset, rejici bellum sine ma-  
» gnis contentionibus non poterat; adeo multi  
» quotidianis Commendoni sermonibus imbuti  
» Christianorum fœderi, ac societati studebant. Sed  
» Regis morbus in dies ad tabem, periculumque  
» vergens omnium animos, ac ipsius quoque Com-  
men-



COMMENDONI CARD. 313

mendoni curam ab aliis rebus in se avertit, quòd neque liberi Regi, neque ex Regia stirpe certus successor, si fato Rex concessisset, ullus erat. Et eodem tempore Pii V. Pontificis Maximi mors sanè importuna Reipublicæ intercesserat. Et quamquam Romani Patres salubri festinatione Gregorium XIII. postridie quàm se conclavibus incluserant, Pontificem Maximum renunciarunt; tamen contraxerat ea res, suspenderátque novi Principis expectatione omnium animos, atque ipsorum quoque Venetorum spes, ardorque ad bellum morte Pii magnoperè resederat. Sed Gregorius statim certis tabellariis per dispositos equos in Poloniam missis, Commendono scripserat, ut & causam fœderis ne defereret, & nunciato per eos dies Romam Augusti morbo, si mori eum contingeret, ut ipse novi Regis comitiis interesset, ac si Poloniâ jam decessisset, ejus rei causâ regrederetur, præceperat.

FINIS LIBRI TERTII.



R r



ANTONII MARIÆ  
GRATIANI  
DE VITA  
JOANNIS FRANCISCI  
COMMENDONI  
CARDINALIS  
LIBER IV.

*De Sigismundi Augusti Regis ultimi Jagel-  
lonie familia morte.*

CAPUT PRIMUM.

**A**UGUSTUS captus formâ, (erat enim insignis) illecebrisque ascitæ nuper in Regiam pellicis, aded se abutendum ipsi, matrique permiserat, ut commoda, honores, publica, privatæque munera, nisi qui fidem



mulieribus obligassent, non acciperent, quorum assentatione ad spem usque conjugii, Regisque nominis animos extulerant. Et Rex adeo perditus amore, ac libidine erat, ut affectum, atque ægrum corpus vix trahens, nihil tamen quotidianis amplexibus temperaret, spretis domesticorum, medicorumque precibus, monitisque vitæ suæ periculum instare ex tam assiduo veneris usu denunciantium. Cum ingravescente morbo ne tollere quidem lecto defessa membra jam posset, tamen raro, atque ægrè admissâ sorore, cæteris omnibus exclusis, curam valetudinis, suique iidem mulieribus commiserat, quæ rejectis aliis consiliis, sagam anum veneficiis, cantionibusque salutem promittentem curationi ejus adhibuerunt. Igitur destitutus medicorum ope, corpore luxuriâ exhausto, confectoque, ac nugatoriis mulierum artibus nihil levatus Nonis Julii animam egit, nullis relictis, nec unquam susceptis liberis; ita cum eo Jagellonis virilis stirps omnis interiit, quæ ducentos propè annos Regnum in Polonia tenuerat. Jagello auctor generis Lithuanos imperio rexerat, quo tempore ipsi, quibus sylvestria animalia, serpentisque, quos domi innoxios alebant, præ numinibus erant, Christianorum instituta, sacræque famâ magis, quam opinione aut cultu acceperunt. Tantæ tum simplicitatis fuisse dicuntur, ut virgines suas simul ac pati virum posse viderentur, cupientibus inire exponerent, nec illibata vlla nupsisset, neque ipsum inde ma-

Rr ij

rimonium sanctius haberent, cum matronis honori amatorum multitudo esset. Poloni, mortuo Ludovico eorum Rege, ad unicam filiam ejus, nomine Heduvigim paternum Regnum detulerant cum eo, ut virum quoque cui nuberet, dotaleque Regnum ferret, ipsi eligerent. Regnum, nuptiasque Heduvigis Gulielmus Archidux Austriae magnoperè appetivit, atque in hunc puellæ ipsius voluntas inclinavit specie juvenem, & ætate florentem, cujus etiam accitu Cracoviam venit, nec abfuit suspicio clam eos concubuisse. Sed Poloni, coacto redire domum Gulielmo, Heduvigis conjugio Jagellonem destinarunt, pacti ut Lithuaniae adjungeretur, idemque Rex utriusque gentis esset, & Jagello, & Lithuani omnes, inanum deorum abolito cultu, Christiana sacra, fidemque sacrorum susciperent. Ita Cracoviam deductus Jagello Poloniae Rex constituitur. Ei duo filii fuere, Uladislaus, quem Turcico bello adversa ad Varnam pugna interfectum supra attigimus, & Casimirus, qui fratri occiso in Regnum successit. Hic egregiâ quindecim liberorum sobole est auctus, quorum fœminis novem finitimis Germaniæ Principibus collocatis, multos populos affinitate, amicitiaque est complexus. Filiorum natu minor, Casimirus nomine, ætâ innocentissimâ vitâ, magnam moriens primâ juventâ sanctitatis opinionem reliquit, quam etiam miraculis affirmatam Poloni tradidere. Federicus quoque alter filiorum sacerdos factus, Archiepi-



scopatui Gnesnensi, & Cracoviensi Episcopatu præfuit, & ab Alexandro sexto Pontifice Maximo honoris causâ in Cardinalium collegium est cooptatus. Uladislauum Bohemi primûm, deinde etiam Ungari ultro Regem adsciverunt. Huic filii duo fuere, Ludovicus, & Anna: Ludovicus, cui post mortem patris Ungariæ Regnum obtigerat, admodûm adolescens, temere cum Turcis congressus, fatali familiæ suæ casu victus in fuga occubuit. Anna Ferdinando Austrio Cæsari nupsit, eumque aviæ fecunditatem æmulata quindecim liberorum parentem fecit. In Polonia post Casimiri mortem, paternum Regnum Joannes Albertus maximus natu filiorum, & post eum Alexander frater suscepit. Uterque liberis caruit. His vitâ functis Regnum Sigismundus obtinuit, qui in magna filiarum copia virilis stirpis vnicum filium reliquit hunc Sigismundum Augustum, cujus mortem suprâ tradidimus, in quo genus, ac nomen Jagelloniæ familiæ defecit.

---

*De perpetratis à Commendono pro Regis  
Catholici electione.*

CAPUT II.

**P**OLONI etsi Reges nisi ab se creatos non ferunt, nec hereditatis, aut nascendi legi

Rr iij

Regnum, sed sibi acceptum ferri, suumque beneficium facere, agnoscique volunt; tamen secuti aliarum gentium morem, rarò quemquam Regum suorum filiis prætulerunt, mansitque ferè in iisdem familiis Regnum, quandiu è Regio sanguine virilis stirps superfuit. Et Reges ipsi, ne filiorum dignitas in dubio, ac discrimine esset, quicumque primus iusto matrimonio eis nasceretur, (nam pellicibus orti vix agnoscuntur) eum vel infantem Regem, successorémque sibi designari haud magno negotio impetrabant, devinctis beneficio, comparatisque nobilitatis Principibus, qui rem perficiendam susciperent: ita plus gratia, & præsens respectus Regis in comitiis, quàm libertas valebat. Extincto demum Augusto, repetitam ex longo intervallo libertatem nemini jam vllâ verecundiâ, metuque obstrictam avidè invaserunt, quæ brevè, vt nulla tenere modum multitudo novit, in pravam, periculosamque licentiam vertisset, ni seniores salubri moderatione præcipitem sustinuissent. Nam vbi Rempublicam sine imperio, sine rectore esse, & filere leges, quarum exactor nemo existeret, sensere, primum singulæ Provinciæ pro se quæque consiliis habitis publicæ pacis servandæ leges sanxerunt; deinde collatis in commune consiliis nobilitas omnis in id datâ fide conspiravit, vt pro hoste patriæ haberetur, impune occideretur, quicumque per interregni tempus vim, injuriâque alteri intulisset. Et omnes quidem

fateb  
Com  
se,  
mult  
mun  
Cuju  
tum  
Sbor  
opib  
publ  
Regi  
eo an  
sumi  
in su  
à pa  
Calv  
qui  
ter e  
bueh  
Com  
vfu,  
ab v  
donu  
cept  
de m  
veni  
pand  
men  
pûto  
Sed



fatebantur maximè ad eam rem vsui præsentem Commendoni auctoritatem, prudentiàmque fuisse, quòd cum illo plerique Principum liberiùs multò, quàm inter se consilia, resque omnes communicabant, atque ipse paci maximè studebat. Cujus rei vnum ipso statim initio interregni datum documentum fidem omnibus affirmaverit. Sborovii fratres Martini filii, qui tum genere, opibus, ætate, gratiâ, clientelis plurimùm in Republica pollere videbantur, ad primum extincti Regis nuncium Cracoviam armati convenerant eo animo, vt pulso Firleio Palatino, quocum summas simultates gerebant, arcem, vrbémque in suam redigerent potestatem. Hi juvenes inde à paterna disciplina pravis imbuti erroribus in Calviniana hæresi omnes erant, præter Andream, qui medius ætate auctoritatem majoris natu inter eos ingenio, atque industriâ obtinebat, tribuebantque ei reliqui plurimùm. Hunc habebat Commendonus non solùm consuetudine, atque vsu, sed plurimis benevolentix officiis devinctum, ab vnòque maximè colebatur. Is ad Commendonum, quâ die Cracoviâ profectus fuerat, & acceptâ Regis morte apud Tegnitium decem inde millia passuum substiterat, intempestâ nocte venit, illique suum, ac fratrum consilium occupandi Cracoviæ arcem aperuit, sperans Commendonum, quia Firleius Palatinus hæreticus, caputque hæreticorum erat, rem consilio adjuturum. Sed Commendonus veritus ne ça res veluti si-

gnum omnia vi, atque armis agendi daret; & primus impetus ab egentibus, ac prædarum cupidis in templa, sacerdotésque fieret, cunctaque audacia, & temeritas, consilio, ac ratione exclusis, haberet, & Regnum inde aut pessimo cuique per malas artes pateret, aut lacerum plures occuparent, vehementer huic se consilio objecit; & cum Andræ ostendisset, quantam invidiæ flammam eorum familiæ conflaturi illo facinore essent, quantum de multitudinis gratia amissuri eo tempore, quo non retinenda solum, sed summo conatu captanda, conciliandaque omnium studia essent, quantam denique vim adversariis suis addituri, juvenem de sententia deductum eadem nocte ad continendos in officio fratres ab se dimisit. Jam inde ab ingravescenti Augusti morbo, cum timeri mors ejus cœpisset, Commendonum major jam futuri Regis, quam societatis Turcici belli cura incescerat, cujus & præcisam eo statu rerum spem cernebat: & hæreticos, quorum neque in Senatu, neque ad multitudinem negligendæ opes erant, occultis cōitionibus multa senserat contra Rempublicam moliri, & ut corporis sui aliquem ad Regnum pertruderent, agitare. Ipsa enim capita consiliorum enunciata illi ab consciis fuerant, quorum erat primum, ut Rex non nisi hæreticus crearetur, aut certè qui omnibus liberam de divinis rebus sentiendi, differendique, & quæ quisque probaret, sacra habendi facultatem permetteret: ac præterea, ut quæ



quæ de Catholicis hæretici occupassent, ea repetendi jus nemini esset; utque Ministris sacrorum suorum templa toto Regno paterent, in quibus suo ritu rem divinam facere, ac de divinis rebus ad populum conciones habere liceret; aliæque item haud absimili furore: atque in hæc eos conjurasse, & egregiè consentientes esse didicerat. Quibus rebus eò magis movebatur, quò imparatiores ad omnia Catholicos esse intelligebat, qui quamquam & numero, & genere, & opibus, & causâ longè præstarent, tamen somnus ad hæc eos quidam ac torpor invaserat; & hæreticos plerique, quasi nihil aliud agerent, quàm sacerdotum potentia, quæ ferè in invidia est, adversarentur, lentè ferebant, nec eos ut eversores Christianæ pietatis, rerumque publicarum turbatores oderant; quin mixti plerique hæreticorum factionibus, consiliisque, studia quoque eorum in Republica aut sequebantur, aut trahebant: quo fiebat, ut Catholicorum vis omnis magnopere hebesceret. At Commendono utrumque cordi erat, & ut Catholicus Rex, & ut pariter per Catholicos crearetur. Id una assequendi ratio erat dissipatos, ac nihil in medium consulentes reconciliare, & jungere Catholicos; hæreticorum diffidia alere: horum capita erant Joannes Firleius, & Petrus Sborovius, claris uterque familiis, uterque primos in Republica magistratus gerens. Sborovius Palatinus Sandamiriensis; Firleius ad Mareschialatum Regni (Præfecturæ id est nomen) Palati-

Sf

natum Cracoviensem quoque nuper adjecerat; eaque dissidii origo inter eos erat. Nam Sborovius hunc ipsum Palatinum sub Regis mortem summis studiis petens, cum suffragatorem Firleium sperasset, æmulum, competitorémque fuerat expertus; & Rex præterito Sborovio, honorem ad Firleium concubinæ gratiâ commendatum detulerat; quæ res Sborovium suo-pte ingenio vehementem, ac concitum, nec unquam animi satis potentem ad hostiles iras, odiâque in Firleium accenderat; atque hæc simul-tas opportunè deduxerat hæreticorum vires, maximumque ad Catholicum Regem creandum momentum attulisse satis constat. Et Commen-donuseam è Republica esse palam ferens omni arte fovit, aluitque, ac Sborovium per Andream fratrem monuit, adverteret animum ad Firleii consilia; in ejus domo occultos cœtus ha-beri; & haud dubiè illic coqui, ac per idoneos, & callidos homines (nec erat aliter) conciliari Regnum. Hoc metu injecto, Sborovius, quò ini-micum omni spe dejiceret, apertè pro Catholico Rege creando Catholicis se junxit. Inter Cartholicos qui honore, divitiis, auctoritate cæteris anteibant, Episcopi à Senatu se, publicisque muneribus ad privatarum rerum curam receperant, clamoribus hæreticorum, audaciâque deterriti haud cum iis consilia miscuerant. Nam Franciscus Crasinius Episcopus Cracoviensis, qui paulò antè mortuo Padnevio successerat, se Firleio tradide-



rat; Petrus Miskonius Episcopus Plocensis, magnæ vir prudentiæ, eloquentiæque, tædio (vt ferebat) turbarum, desertâ Republicâ pecuniæ suæ incubabat; Ucangii Archiepiscopi mores, ingeniûm - que suprâ tradidimus: reliqui Episcopi hos ferè sequebantur, aut inopiâ, inopiæve simulatione domi attinebantur. Unus erat Stanislaus Carnovius Episcopus Chioviensis, qui neque adversâ famâ in Republica versabatur, & pro sua fide mansurus in bonorum partibus, nec pecuniæ, nec labori parsurus, vt sui specimen tempore tam necessario daret, videbatur, atque in eo, & vsus Reipublicæ, & promptus, aptusque tenendæ multitudini sermo erat prorsus, vt bono publico futurus popularis videretur, nisi videri ipse nimis cupivisset; ita enim ferri se interdum secundo favore vulgi patiebatur, vt à bonis etiam consiliis abduceretur, modûmque non facillè teneret, animo nunc erecto, & confidenti, nunc fracto, ac demisso, vt flaret, resflaretque multitudinis aura; sed famæ cuiuscumque dum magnæ avido, major tamen bonæ cupiditas inerat. Is sponte suâ Commendonum reverebatur, vnique maxime probari actiones suas optabat, & Commendonus ita dexterè hominis ingenium tractavit, vt perstudiosum sui semper habuerit, ac sæpè gloriæ æstu abreptum continuerit. Erat & in Catholicorum Principibus clarum Alberti Laschii nomen. Is paucis antè annis privato sumptu, consiliisque comparato exercitu, tentatâ Valachiâ ex-

S f ij

perientis, ac providi ducis famam tenuerat, & largè, profusèque donando, maximè militares viros trahebat, ac ne in concionibus quidem, & in conciliis infacundus haud parvam nobilium juvenum gratiam collegerat; inter primos Regno destinatus, si repudiatis externis Regibus, proceres suos Poloni respexissent. Inter hunc, & Commendonum inde à prima legatione ejus instituta amicitia, usu, & benevolentia in omnia familiaritatis jura pervenerat. Nam Laschius & adventanti in Poloniam extra fines Regni occurrerat, & sive in Regia, sive in via præter cæteros omnibus cum officiis coluerat; nec in Republica quicquam, non consulto prius Commendone, cœpisset. Hunc & Chioviensem Episcopum certis amicitia fœderibus ita conjunxit, ut uterque datis coram ipso dexteris, fidem jurejurando obligarent, neminem, nisi quem alter quoque probasset, Regem accepturum, arbitriumque Commendone detulerint, si ipsi de eo non convenissent. Addidere, ut consilia de Rege omnia, & inter se uterque, & cum Commendone communicarent. Qui in magno inde negotio habuit quamplurimos Catholicorum, & ante omnes Andream Sborovium huic fœderi, cujus ipse sequester esset, adjungere; quo factum est, ut è Catholicis ad hæreticorum vim, audaciâque coercendam duces non defuerint, & Regis non nisi Catholici creandi explicata, constitutâque consilia essent, & Commendonus ipse omnium non particeps solum, sed veluti rector, & moderator fieret;



*De consiliis ejus Regnum vni è Cæsaris  
filiis conciliandi.*

## CAPUT III.

**A**TQVE hæc sic comparata, præunitaque in Polonia Commendoni curâ, ac industriâ fuerant. At in Lithuania (pars hæc altera Regni est magis fœdere, ac legibus, quàm animis Polonia adjuncta) etiam certiora creandi Regis consilia habebant. Duæ in ea gente familiæ longè cæteras opibus, ac dignitate tum anteibant; Radgivilia, & Corchevicia, atque hæ (quod ferè fit) æmulatione potentiæ in Republica dissidebant. Harum principes erant Nicolaus Christophorus Radgivillus, & Joannes Corchevicius: Nicolai hujus pater Catholicæ Ecclesiæ adeò infensus, infestusque fuerat, ut opes, quibus reliquos Regni Principes longè est supergressus, ad evertendam Christianæ pietatis fidem omnes contulerit, hæcque nuper conflatas de sacrorum ratione opinioniones non invexerit modò in Lithuaniam primus; sed per omnes Poloniæ provincias vnus maximè disperferit. Filii huic quatuorfuere; natu majorem Nicolaum admodum adolescentem in Germaniam, ut in Calvinii doctrina, quam ipse maximè sectabatur, institueretur, misit. Sed juvenis ubi sapere per se aliquid cœpit, incon-

Sf iij

stantiâ sentiendi hæreticorum offensus, averterat à paternis erroribus animum, & confusus opinionum varietate, magis tamen quid fugeret, quàm quid sequeretur inveniebat. Nam Catholicæ disciplinæ rudis planè, atque expers erat. Sic affectus, patre mortuo, cum lustrandi studio cæteras nationes in Italiam, Romamque venisset, ac subjecisset oculis, quæ longè secus tradita ab impietatis magistris acceperat, cum aliorum proborum hominum, tum maximè Commendoni consuetudine, sermonibusque commotus, adeò Catholicæ fidei placita mente amplexus est, ut in patriam reverso nihil prius fuerit, quàm sublatum à patre veræ pietatis cultum restituere; & suas sacerdotibus res, honorémque, ejectis novitatis doctoribus, reddere; fratresque inde ita imbuere bonis opinionibus, ita in priscæ pietatis studiis educavit, ut alter eorum, Georgius nomine, sacerdos, & Episcopus Vilnensis fuerit, & mox à Gregorio Pontifice Maximo, petente Stephano Rege, in Cardinalium numerum relatus: & primus Lithuanorum eum honorem in familiam, patriamque suam intulit filius, cujus pater ad conturbanda sacrorum jura, divinasque ceremonias polluendas, pravissimarum opinionum, atque hæresum disciplinam primus importarat; atque eum honorem ita gessit, ut innocentiae, probitatis, totiusque sacerdotalis vitæ specimina egregia dederit. Cotchevicius eadem hæresis labe infectam primam juventam egerat, maturior



ætas faniozem attulerat mentem, & ab eodem  
 Commendono penitus cum Ecclesia matre in gra-  
 tiam fuerat reductus; quibus obstrictus pietatis  
 vinculis vterque ei, vt decuit, parentis cultum;  
 atque observantiam exhibebat; inter ipsos nulla  
 propria similtas, disjuncti magis familiæ, quàm  
 suo dissidio erant. Hos, in quorum manu sita  
 Lithuanica res esset, jungere amicitia; gratiaque  
 Commendono iam magno negotio fuit, assecutus-  
 que est, vt etiam diligerent inter se, & ex eo cum  
 Nicolao quoque patruo Vilnæ Palatino, à quo  
 hostiliter dissenserat, in gratiam Cotchevicius re-  
 diret. Cum hos igitur Commendonus haberet  
 sui per studiosos, ac nihil non tutò committi ab  
 se eorum fidei intelligeret, sæpè vivo adhuc Au-  
 gusto, sed iam graviter decumbente, cum utroque  
 separatim ab altero occultos sermones de Catho-  
 lico creando Rege, deque obviàm eundo hæreti-  
 corum conatibus, si Augustum morbus extinxisset,  
 contulerat; & cum quærendum externum Re-  
 gem conveniret, quando neminem esse è popula-  
 ribus appareret, cui se cæteri subiecturi essent, sa-  
 tis exploratis eorum sensibus, mentionem de Ma-  
 ximiliani Cæsaris filiis intulit, eos esse adolescen-  
 tes longè nobilissimâ totius Europæ stirpe Re-  
 gum, Cæsarumque genitos, indolis probæ, atque  
 eâ ætate quam facillè ad Poloniæ mores forma-  
 turi essent. Maximiliano enim egregia soboles  
 sex filiorum erat, quos Maria mater (Philippi hæc  
 Regis soror erat) sanctissimâ disciplinâ institue-

rat, permittente viro conjugii omnem educandorum filiorum curam, & charitate ejus, & Philippi respectu, cui suam suspectam religionis fidem esse sciebat. Primus Radgivillus, cujus familiæ vetus erat in Austrios studium, nudavit animum, monuitque Commendonum eodem Cortcheviciu perducere posse, vel auctoritate ejus, vel metu Moscorum Principis, cum quo graves inimicitias gereret, & quem antea ab Augusti orbitate ad Poloniæ res sciret aspirare. Cum is quoque Commendono esset assensus, via, ac ratio perficiendæ rei ineunda, statuendaque erat. Dicitur dies, quâ omnes simul in colloquium venirent: & quia res premenda silentio erat, ne si ad Commendonum convenissent, productus, quod necesse videbatur, in multas horas sine arbitris sermo, suspicionem præberet, proximam deligunt sylvam, in quam Commendonus per dies æstivos exire paucis comitatus animi causâ solebat. Eò uterque Princeps cum singulis servis à pedibus venit, & Commendonus ipse, me vno assumpto comite, quem solum conscium consilii habebat, rhedâ vectus ad conditum tempus adfuit. Servis traditis equis, atque opperiri cum auriga jussis, in maximè abdutum sylvæ locum est secessum, datâ, acceptaque fide, & à me quoque exacto jurejurando, postquam diu collocuti omnia satis expendissent, tandem in hæc est ab omnibus consensus: ut Lithuani vnum è Cæsaris filiis, quem ipse dedisset, Magnum Ducem; sic enim suum ipsi Regem appell-



pellant, Polonis non expectatis statim crearent; procreato, si res posceret, viginti quinque millia equitum in armis haberent; (nam rudes illæ gentes ad pedestrem militiam, tantum equestri bello habiles sunt) neque enim dubium habebant, quin Poloni Lithuanorum præjudicium secuti, quod antè in Sigismundo primo, aliisque factum esset, eundem Regem & ipsi acciperent. Cupiverunt Lithuani non creare solum sibi separatim à Polonis Regem, sed etiam habere, memorantes detrimenta, quæ passa eorum Respublica ab hostibus suis esset, ex quo se Polonis junxissent; proque eo vehementer contenderunt. Sed Commendonus, si hæ gentes in duo dividerentur Regna, neutrum satis firmum fore ratus, ac veritus præterea, ne mutuis inde se bellis attererent, tenuit, ut ejus rei arbitrium Cæsari permitteretur. Privatim illi sibi nihil cautum voluerunt, publicè hæc postularunt: ut Lithuanis salvæ suæ leges inviolatæque manerent; Lithuaniae magistratus, præfecturæ, publicæque alia munera nemini, nisi Lithuanis mandarentur, externi omnes excluderentur: quod agri paulò antè Augustus Lithuaniae ademptum Polonici juris fecisset, id Lithuanis restitueretur: Episcopos non Princeps daret, sed Canonici prisco more repetito liberis suffragiis eligerent. Id juris suaserat Commendonus adimi Regibus, expertus non optimos, & scientiâ divinarum rerum, & religione spectatos ab iis, sed quos gratia, aut ministeria aulae com-

mendassent Episcopos dici solere ; unde eos non custodes legum , errantiumque Regum monitores , quod antea fuerant , sed beneficio , speique obnoxios , plerumque Regum ipsorum nutibus , cupiditatibusque , nihil discernentes æquæ an iniquæ essent , servire : ex quo maxima Ecclesiastica res damna , detrimentaque accepisset. Hæc omnia , sicuti acta , statutaque inter ipsos erant , rogatur Commendonus , ut in Italiam rediens ad Cæsarem , quem ex itinere conventurus erat , referret. Si Augustus mortem antè obiisset , quàm ille è Polonia decederet , tum me qui hæc eadem ad Cæsarem perferrem , Viennam statim mitteret , ipse omiſſa protectione , futuri Regis comitia in Polonia opperiretur : sive autem me , sive Commendonum ire ad Cæsarem contingeret , ipsi statim aut per eundem me , aut per litteras , quibus conventum erat , notis scriptas , ac certis hominibus , qui tutò perferrent , datas de Cæsaris voluntate edocerentur. Quò dictis fides fieret , uterque chirographo suo promissa firmaret ; atque ita à colloquio est discessum. Nec multò post Augustus Varſoviâ Chnifinum ad fines Lithuaniae deferri voluit , ubi aggravante morbo , ut suprà docuimus , vitâ excessit. Et Commendonus Varſoviâ profectus lento itinere , ipsum opperens venerat Cracoviam , ubi illi præſto Andreas Sborovius , aliique fuere amici , orantes ne imminente casu Regis , Poloniam relinqueret , cum illius maximus gravissimo Reipublicæ tempore vſus eſſet futurus.



Commendonus aliquot moratus dies, ne diutius tere-  
 rere frustra tempus, ac mortem Augusti captare  
 videretur, Cracoviâ est profectus. Vix duarum ho-  
 rarum iter progressum nuncius excessum afferens  
 Regis assequitur. Ergo apud Tegnitium, mona-  
 sterium (id est, decem millia passuum à Craco-  
 via) substitit, & ut constitutum cum Lithuanis  
 habebat, eâdem nocte me ad Cæsarem proficisci  
 iussit. Profectus magnis itineribus, septimâ die at-  
 tigi Viennam, quò tamen mortui Regis fama,  
 quâ nihil est in talibus rebus celerius, meum ad-  
 ventum antecesserat. Deductus ad Cæsarem, &  
 cupidè ab eo, & perhumaniter acceptus, quæ a-  
 cta, constitutâque cum Lithuanis erant, quòque  
 modo, quâque solertiâ Commendonus & junxis-  
 set amicitia inter se, quos vetus æmulatio didu-  
 ctos haberet, & in eam sententiam perduxisset,  
 & quos præterea è Polonia proceribus in idem  
 consilium præparatos haberet, exposui. Executûs-  
 que inde alia de statu rerum, quæ factiones, quæ  
 factionum capita, quò cujusque spectare confi-  
 lia crederentur, qui certi competitores Regni,  
 quibus cujusque petitio niteretur, denique qui  
 maximè Cæsari, quâqueratione conciliandi essent,  
 differui. Addidi postremò Commendoni verbis  
 consilium, legationem quamprimùm quàm ma-  
 ximè splendidam mitteret, Legatos homines spe-  
 ctatos, nec nisi Catholicos deligeret; ad Catho-  
 licos enim, & per Catholicos rem motam dirigi,  
 agique oportere: Laschium pollicentem operam,

T t ij

misso statim nuncio, litterisque liberali oratione confirmaret; pecuniæ quoque aliquid ei, quâ ratione maximè militares viros cogere posset, submitteret: aut ipse Viennâ Uratislaviam (Silesiæ hæc est vrbs imminens Poloniæ finibus) transiret, aut Ernestum filium (huic enim Regnum petebatur) cum aliquot equitum turmis mitteret: ante omnia maturaret Cotchevicio, & Radgivillo mentem aperire; si enim hinc occuparent Lithuani Regem renunciare, hinc in Polonia Laschius cum valida factione consurgeret, & Cæsar ipse, aut filius ex propinquo arma, opemque faventibus promptam ostentarent, antè filium ejus Regem futurum, quàm alii commovere se, aut explicare sua consilia possent, & quod alterius Regni instar esset, de manu Catholicorum liberum, nullis novis pactionibus, nullâ novâ lege, contra quam hæretici molirentur, obstrictum Regnum habiturum: sed cuncta prævertenda celeritate esse, dum nova, nec satis cognita libertas, & turbatæ, & immaturæ res opportunam intento, audentiq; occasionem præberent, atque in eo verti totius consilii summam credere Commendonum; si enim multitudini spatium trahendi sub arbitrium suum Rempublicam daretur, difficiliora omnia fore, à Germanorum enim nomine, Austriôque vulgò mirum in modum abhorreri. Cæsar non attentè solùm, sed avidè etiam omnia audivit, mèque ad quintum Viennæ diem percontando quotidie, quarendoque de singulis de-



tinuit. Postremò cùm effusè gratias Commendono egisset, missurum se dixit propediem in Poloniam Legatos, vt ille monuisset, iis de omnibus rebus mandata daturum, futurâque omnia cum eo communia, neque se ab ipsius consiliis sapientiæ, & fidei plenis discessurum. Cum hoc dimissus responso, non quâ veneram, sed longè diversis itineribus mihi penetrandum in Poloniam, atque ad Commendonum fuit, quòd omnes jam in Regnum aditus certis militum stationibus vndique custodiebantur. Hi non arcebant modò aditu exteros, sed excutiebant etiam, ac scrutabantur omnia. Et mihi cavendum illud quoque erat, ne mea ad Cæsarem profectio vulgaretur, nequa inde incommoda de nobis suspicio multitudinem, quæ tum sola dominabatur, incesferet. Comparatis pecuniâ ducibus, maximè deviiis, ac sylvestribus viis, itinere facto, in Sirdiensem Palatinatum, quò se Commendonum recepisse acceperam, tutus, inobservatûsque perveni.

---

*De legatione ad eum ab hæreticis missa.*

CAPUT IV.

**R**EGIS mors edita in vulgus maximè omnium concivit hæreticos, quorum vis omnis in licentia, atque impunitate est. Hi silen-

Tt iij

tibus legibus, Magistratibúsq;e, priusquam se Catholici excitarent, atque ad capeſſendam Rempublicam exurgerent, petulantia, atque audacia laſciviebant, nec uſquam plures, aut validiores, quam circa Cracoviam erant: eam maximè partem vicinitas, & commercia corruperant Germanorum. Audito Regis caſu, partim à Firleio evocati, ne imparatus, ſi quam ſibi Sborovii fratres afferre vim tentarent, eſſet, partim à Sboroviis iſſis adducti, partim ſpontè ad conſultandum de communibus rebus frequentiffimi Cracoviam concurrerant. Semper ii acrem conatibus ſuis adverſarium Commendonum experti fuerant, ac uti magnoperè lætabantur, ſub id potiſſimum tempus, Regno eum, ut crediderant, abiſſe; ita ubi auditâ Regis morre, reſtituiſſe, nec plus decem millibus paſſuum Cracoviâ abeſſe nunciatum eſt, » vehementer percuſi, fremere, ac ſi eum intereſſe » Regis comitiis paterentur, plus vnius externi hominis calliditatem valituram, quam ſua ſuffragia » inter ſe indignari. Neminem ignorare, quam multorum ſtudia vnus complecteretur, fore inter Equites, fore in Senatu, qui id ſenſuri, id pro » ſententia dicturi eſſent, quod edocti ab eo, » atque inſtructi fuerint. Finitum morre Regis jus » legationis ejus, datúmque ad ea, quæ Pontificis » nomine actum veniſſet, reſponſum; quid nunc » moretur? quid ſe alienæ Reipublicæ privatus immiſceat? Abeat Romam ad renunciandam legationem ſuam, atque ibi ſuâ fulgeat purpurâ, & Re-



gibus se honore æquet, ac tandem Romanis fal-  
 laciis, præstigissque Poloniam liberet. Hæc in  
 concilio Equitum regionis ejus, quod primum  
 post mortem Regis est habitum, more suo vociferantes, quamquam Firleius ipse, cohibita illorum linguæ licentiâ, perhonorificâ Commendonum oratione sit prosecutus; tamen tenuere, ut Legati ad eum decernerentur. Missi ex Equitum Ordine sunt Dulschius, & Ossoschius. Jam Commendonus discesserat Tegnatio, pacatiora ab hæreticis loca, ac interiora Regni petiturus, ubi & conveniri ab amicis, & dimittere ipse suos, quod usus posceret, commodius posset. Iter habentem eum quindecim millia passuum longè à Cracovia Legati sunt adepti, præmonitum antè ab amicis de illorum adventu. Accedentes Commendonus comiter appellatos in eundem currum, quo ipse vehebatur, recepit, ac nihil intermittens iter dicere ad quid venissent jussit. Summa eorum orationis fuit, morte Regis perturbatam eorum Rempublicam, occupatosque omnes imminentium comitiorum esse curâ: nec Cardinali Legato colendo, habendoque pro illius dignitate vacare rum posse, nec ipsi in tam suspectis rebus facile fore multorum vitare offensiones, & in tanta rerum licentia haudquaquam tutò eum videri in Regno versaturum, periculúmque esse, ne quid ex eo tumultûs existeret. Itaque à Senatoribus, Equitibusque, qui Cracoviæ de Republica convenissent, missos se ad eum esse rogatum, ut ex-

» tra fines Regni aliquò se tantisper reciperet, ne  
» gravaretur, dum ipsi novum sibi Regem creaf-  
» sent. Id præterquam quòd ei ita conduceret, &  
» consentaneum esset eximio studio, ac voluntati,  
» quâ gentem Polonam complecteretur, futurum  
» publicè Polonis omnibus longè gratissimum. Sa-  
» tis mitem legationem, etiam ingenium haud dis-  
» par Legatorum magis lenivit. Quibus Commen-  
» donus subridens, ac vultu læto, placatòque ita  
» respondit: Et vera esse, quæ ipsi de præstanti suo,  
» ac singulari erga Polonorum gentem animo nar-  
» rassent, & ob id sibi curam, quâ illi tam diffi-  
» cili tempore afficerentur Reipublicæ, gratam ac-  
» cidere, haud minùs quàm quòd vicem quoque  
» suam timerent: verùm sperare se non tutò so-  
» lùm, sed etiam cum dignitate in Polonia futu-  
» rum, ac utique præstaturum, ut non modò tu-  
» multûs nihil suâ causâ oriatur; verùm ut intelli-  
» gant omnes, se vnum omnium maximè concor-  
» diæ, atque pacis auctorem esse. Cæterùm quod ad  
» postulatum eorum attineret, si secum ea de re  
» Senatûs, atque Ordinum Regni nomine egissent,  
» habiturum se quod responderet, cum vnius Pro-  
» vincia consilio separatim sibi negotii nihil esse.  
Hoc illi rejecti responso, & haud dubio pudore  
perfusi humaniter, ac benignè habiti discesse-  
runt. Commendonus iter perrexit suum, ac pau-  
cis diebus Solioviâ Siradiensis agri monaste-  
rium, peropportunum tali tempore mansioni suæ  
locum se recepit, atque ibi à me Viennâ redeun-  
te est inventus. *Quomo-*



*Quomodo Caesar petitionis suæ rationem  
omnem everterit.*

## CAPUT V.

**M**AXIMILIANVS, me cum eo, quod suprà memoravimus, responso dimisso, longè aliam quàm oportuit, atque ostenderat, petitionis viam est ingressus; ab iis primò in errorem inductus, quibus mos est omnia ad voluntatem Principis loqui, quique grata, quàm vera afferre auribus malunt; tantùm enim spei assentatores fecerant, ut propè expectarit, ut priores ad se Poloni Legatos mitterent, Regémque sibi ab eo dari postularent. Id adeò persuaderi sibi est passus, ut cum ego adhortans eum ad rem accelerandam plerisque dicerem alieni ab eo animi indicia dedisse, & nomina etiam quorundam ederem, ipse simulare eos mihi responderit, quia rogari ab se, & carius æstimatam operam suam venditare vellent. Deinde si ve tantas Catholicorum opes haudquaquam esse crederet, quibus niti petitionis suæ spem vellet, seu pronus in hæreticorum causam animus rebus eorum faveret, hos promissis pellicere, atque omni conatu adungere sibi constituit. Sed totum consilium nihil æquè ac tarditas ejus, & procrastinatio turbavit; naturâ enim cunctator

Vu

rem tantam, nisi prætentatis, exploratísque omnibus, incipere non ausus, celeritatem, in qua perficiendi negotii vnica spes erat, ita omnem remisit, vt & multos dies expectando novos è Polonia nuncios, qui certiora afferrent, movere quicquam distulerit, & morantibus iis, quia clausa omnia, nec intrare fines, nec egredi vlli per custodes licebat, certos ipse homines de suis in omnes Provincias cum litteris, & mandatis ad primores cujusque regionis tentatum, exploratumque animos miserit. Jam antè Cracoviæ in eodem concilio, à quo Legatos ad Commendonium missos ostendimus, initium nudandi animos erat factum; ausus enim Joannes Miskovius pro sententia dicere, à Cæsare vicino, ac finitimo Principe, & Polonico nomini amico in tam dubiis rebus perendum consilium esse, adeò averfis auribus auditus, adeò à tota concione increpitus fuerat, vt parum abfuerit, quin à concilio ejiceretur. At eorum, quos Cæsar ad explorandum miserat, alii cùm in stationes militum custodiendis finibus dispositas incidissent, capti, ac proximis traditi Senatoribus sunt; alii ab iis ipsis, ad quos adiverant, callidè caventibus, ne quid proprii consilii cum externis habere crederentur, quod tum maximè invidiosum ad multitudinem erat, in concionem producti, dicere palam ad quid venissent sunt coacti. Qui enim aut accepisse litteras, aut separata colloquia cum illis habuisse dicebantur, ii in ma-



gna invidia , ac suspicione erant , vt etiam Cæsaris fautores litteras proferre , ac nunciorum verba prodere necesse habuerint , ne omni inde apud multitudinem auctoritate dejecti jacerent. Et eodem tempore Monachus Cisterciensis, Cyrus nomine , qui multos annos apud Augustum Maximiliani Orator fuerat, cum deposito Monachi cultu in militari veste , ne noscicaretur , ple-rosque Principum prehensando circumiret , à Joanne Costea in Prussia comprehensus in custodiam est traditus , interceptæque cum eo litteræ, commentariæque publicè sunt recitata , quibus & pecuniarum promissiones , & aliarum pactio-nes rerum continebantur. Hi omnibus Regni partibus deprehenfi nuncii, quasi manifesti cor-ruptores, tantum invidiæ incendium in multitu- dinis animis adversus Cæsarem , Austriamque familiam excitarunt , vt gravi se suspicione onerasset , quicumque ejus, filiorumque mentionem fecisset ; ingentemque multitudinis gratiam Costea, aliique traxerunt, qui nec accepisse litteras, & nuncios à secreto colloquio repulisse ferebantur. Iisdem pænè necessitas imponebatur rem à Cæsare spreto ab se , læsæque avertendi. Toto per hæc errata perverso , & corrupto ordine , atque consilio rei , alienatisque maximè multitudinis animis, mittendæ quoque legationi, dum præmis- si redirent è Polonia nuncii, diuturnam moram interposuit ; vt cum in Regnum Legati ejus vene- re , jam suum cuique staret consilium , initæ-

Vu ij

que & inter se, & cum exteris certæ de Rege  
pactiones, fœderaque à plerisque essent. Legati  
fuerunt præstantes sanè viri, ac Regni Bohemiæ  
longè principes Gulielmus Rosenbergius, &  
Pernestenius, quibus magno, ac splendido co-  
mitum numero in Poloniam adventantibus, ea-  
dem ferè, quæ præmissis antea nunciis, fortuna  
occurrit: cognito enim illorum adventu, Petrus  
Sborovius Palatinus Sandomiriensis (is maximè  
aversus à Cæsare semper fuerat) ex auctoritate Se-  
natûs obviàm ad fines fuit, ac primò eos cona-  
tus est aditu in Regnum arcere, petens ut dum  
gentis concilium, quod comitiorum causâ habi-  
turi essent, cogeretur, in Poloniam ne intrarent,  
quando ante illud tempus audiri ipsi publicè non  
possent. Instantibus tamen Legatis, ut Cæsaris  
mandata utrisque Regnis utilia ad Senatum, Or-  
dinèque afferentibus pateret in Poloniam aditus,  
ita Sborovius assensus est, ut Sandomiriam dedu-  
ctos dissimulatâ quidem, sed diligenti custodiâ  
habuerit, ut nec adire ad eos se incio quisquam,  
nec suos ipsi aliò uspiam dimittere, nisi aut con-  
sulto, aut certè sciente se possent. Id ægrè passi  
Legati, ubi Sborovium senserunt infensorem  
Cæsaris rebus, quàm ut ullis promissis, conditio-  
nibusque vinci posse sperarent, eo fortè ad con-  
ventum, qui ejus Provinciæ Equitum habebatur,  
profecto, ipsi nemine consulto, appellatòque, San-  
domiriâ ante lucem discesserunt. Quod cum nun-  
ciatum Sborovio, Equitibusque, qui convenerant,



esset, missi properè ab iis, qui Legatos ab institu-  
to itinere retraherent : ita vnus diei viam pro-  
gressi, consistere coacti, ac præsidio Equitum  
apposito, datoque negotio, vt alioquin eis ne-  
cessariarum rerum copia suppeteret, ac benignè  
in speciem, atque hospitaliter haberentur, ar-  
ctius etiam quàm antea custodiri sunt iussi. Quæ  
res eos magnis difficultatibus affecit Cæsaris ius-  
sa patrandi, cum jam nec iis inuidiosius, suspe-  
ctiusque esset quidquam, & nemo ob id adire,  
aut alloqui eos auderet. Et quamquam summise-  
re clam aliquot è suis ad sollicitandos maximè  
hæreticorum principes; tamen cum dempto libe-  
ro commercio nec cum Commendono congre-  
di, nec colloqui cum præparatis antea amicis  
possent, quin omnis de Cæsare, filioque spes  
corrueret, sustineri non potuit. At Radgivillus,  
& Corchevicius, qui conventis cum Commen-  
dono staturi, multa in id consilium in Lithuania  
præstruxerant, cognito Commendonum in Re-  
gno esse, ac me statim profectum magnis itine-  
ribus Viennam contendisse, diu quid Cæsar sta-  
tueret, expectarunt, ac prius moram ipsam pro  
re omissa acceperunt: post vbi nuncios ejus pluri-  
bus locis interceptos, Cyrum captum, litteras  
publicè recitatas, Legatos pænè in custodiam  
traditos, abalienatos omnium animos, & Cæsa-  
rem ipsum, & fautores ejus in summa invidia,  
malâque fama esse intellexere; nec tamen sibi  
ab eo litteras, aut nuncios venire, & gravi ru-

Vu iij

more laborare rem, quod vni ante omnes hæretici appellari, ambirique dicerentur, vni que eorum, nomine Zaffagnetio, qui repudiato Senatorio loco, ab Senatu ad Equites transierat, magnæque ob id illius in eo Ordine opes erant, triginta nummum aureorum millia oblata, remissaque ab eo dicebantur, penitus ab inito consilio recesserunt, & ut omnia sibi quam maximè integra essent, operam dederunt. In Polonia autem cum idem de hæreticis percrebuisset, additum iis, quæ supra attigimus, adeo Catholicorum animos à Cæsare avertit, ut Cujaviensis, & Laschius, qui duces se præbituri Ernestum dicentibus Regem erant, spreto se, posthabitoque querentes, mutatâ voluntate cum Sboroviis pro Henrico Galliæ Regis fratre societatem conjunxerint. Itaque cum ventum ad comitia est, & copia fuit Legatis, cum quibus vellent, colloquendi, ne ipsi quidem inficiabantur exiguâ stare spe, quod Cæsar pro non dubio asseverantibus, qui assentati cupidini ejus fuerant, crediderat. Ac tum demum senserunt quàm peccatum ab eo fuisset, qui in re gravissima adulantium somniis decipi se passus, non ex Commendoni sententia omnium studia, consiliisque celeritate avertisset. Tum serò & ipsi, & Cæsar, his cognitis, blandiri Catholicis, quos antea neglexerant, tum litteræ manu Cæsaris scriptæ veniebant, tum magnifica promissa ingerebantur, cum facta in aliam partem inclinatio sustineri amplius nequi-



ret. Ad hæc incommoda, etiam proditi ab suis dicuntur. Nam qui ab Germanorum Principibus iis, penes quos creandi Cæsares jus manet, Legati suffragatum Ernesti petitioni venerant, dehortando privatim quod publicè orabant, contrariis orationibus haud parum offecisse Cæsaris rationibus sunt crediti. Legatos quoque ejus, ut gentis principes, magnus nobilium Bohemorum numerus secutus fuerat. Hi commercio linguæ, quæ eadem est utrique genti, crebros cum Polonis sermones miscebant, unaque convivium celebrantes, & largè vino, ut mos illis, indulgentes, invicem se amicè, ac familiariter colebant. Et Bohemi (credo, conspecta species magnæ libertatis in Polonis, arbitrii que Regem sibi deligendi, desiderium usurpati quondam ab ipsis quoque ejusdem juris, iramque adempti refricabat) memorando pristinam Bohemiæ dignitatem, spoliatisque eam se, & gravibus præterea tributis, vectigalibusque premi querendo, aliisque, quæ ferè populi indignantur, inculando, monebant Polonos, ne in idem jugum ipsi se ultro inducerent. Quæ à sollicitis, ac suspiciosus facillè credita, haud leve momentum ad deterrendos à Cæsare multorum animos habuisse putantur.



*De competitoribus Regni.*

## CAPUT VI.

**C**OMPETITORES erant Regni permulti claro omnes genere ; neque enim sæpè accidit , vt Imperium eâ amplitudine steterit , nullo certo successore alienæ ambitioni expositum , cessurum ei , quem multitudinis favor prætulisset , quæ ne norat quidem , aut viderat vnquam eos , de quibus tantum iudicium factura , quibus summam de se potestatem traditura erat , solam famam , vel ex vano , levibusque auditionibus haustam , vel callidè fictam , jactatamque secutura. Primus sermone vulgi Moscorum Princeps ferri est coëptus , cuius Regnum Polonis finitimum à Borysthene , quo ferè à Lithuanis dirimitur , ad vsque vltimas Septentrionis plagas , ignotasque gentes , & glaciale Oceanum latissimè patet , atque inde à finibus Sueciæ , & Firlandiæ sinu per feras plerasque , ac barbaras nationes ad Caspium mare , Tanaïmque flumen extenditur , Scytharum quoque populos aliquot proximis annis domitos continens. Hunc vota magis , quàm studia hominum expetebant : sicut enim conjunctas sub vnus imperium Regis tot gentes , nationesque habere magnificum Polonico nomini omnes rebantur ; ita Regis ipsius sævum , atque



que atrox ingenium, & impotenti dominatui, omnibusque soluto legibus assuetum reformidabant. Quidam filium ejus respiciebant, dictumque Sigismundi Regis memorabant, Polonis è Septentrione petendos Reges. Sed neque Moscus ab insita superbia Legatos, qui peterent, misit, & utriusque mentionem Cotchevicius, cujus supra meminimus, privatis etiam odiis illis infensus auctoritate suâ discussit. Proximus huic Rex Sueciæ fuit, qui quia sororem Augusti in matrimonio, atque ex ea filios habebat, & peropportunè duo Regna adversus Moscum communem hostem conjuncturus erat, haud vanâ spe in eam petitionem descendere videbatur; atque hunc jam inde à paterna defectione corruptum hæresi hæretici ferè provehebant. Idem ab eadem causa etiam Duci Prussiæ studebant adolescenti, neque ætate satis ad id ferendum onus maturâ, & valetudine mentis ne suo quidem habendo, nedum alieno quærendo Regno habili. Sed neque puerum, neque stolidi ingenii Regem Firleius, compluresque alii videbantur, dum in disciplina contemnenti Catholicæ pietatis jura institutum, & eorum beneficio obnoxium haberent. Quin hunc opportunum rationibus suis vel ob id maximè expetebant, quòd ei nomen modò Regium relicturi, regimen rerum ipsi habituri essent. Quanquam sunt, qui Firleium ex Prussi spe tantum pecuniæ aliquid captasse credunt, cujus & ipse egens tali tempore erat, & ad patranda consilia magnâ vi

opus esse sentiebat. Gentilem quoque hujus Brundeburgium, qui ab oppido Anspachio, cui dominatur, cognomen habet, hæreticorum quidam subijciebant; alii item Augustum Saxonem, magnæ Regulum dignitatis, magnarumque apud Germanos opum: sed utrumque multitudo abhorrens à Germanis, ut ferè finitimarum gentium discrepant animi, respuebat. Injuncta quoque mentio est à quibusdam Stephani Bathorii, qui paulò antè mortuo intra adolescentiam Joanne Transsylvaniæ Regulo, ad Provinciæ illius dominatum popularium studiis fuerat evectus. Sed ille vix dum firmato domi principatu, novum foris quærere Regnum maturum rebus suis non ratus, petitione in præsentia abstinit; atque hic est ille Stephanus, qui biennio post hoc ipsum Regnum est adeptus, cui tantum fortuna, quæ plerumque veræ virtutis est comes, indulgit, ut honesto quidem inter suos genere, sed fortunâ pertenui natus, & contemptum, modico amicitiae gradu, quem apud Joannem Principem ipse sibi per industriam, atque bonas artes fecerat, nec ultra spes suas proferentem, quàm ut rem domesticam sub illo augeret, & partem gratiam, dignitatēque rueretur, ad patriæ prius suæ, deinde ad Poloniæ Regnum extulerit. Joannes in fide Turcarum erat, beneficiariamque ab iis Transsylvaniam habebat, quorum fretus opibus etiam Ungariæ Regem se ferebat; unde illi crebræ cum Maximiliano Cæsare contentiones erant, & ut rarò bellis, ita mu-



tuis in fines excursionibus, latrociniiſque, quibus Ungarorum gens gaudet, ſæpè ſe infeſtabant. Per has occaſiones, vt cuique mala mens, malæque domi ſpes incidiffent, ab vtroque ad alterum frequenter transfugiebant; (& ſunt Ungari fide ad omnia temporis momenta mobili) ſed & Joannes ipſe, & Tranſſylvani omnes pravis religionibus, communi malo hujus ævi, infecti animos, à Catholicæ Eccleſiæ fide deſciverant. Stephano eximium geminæ laudis decus tribuitur, neutram, neque pietatis quam Deo, neque conſtantiæ quam Principi debebat, fidem ſefelliſſe. Adjecerunt etiam Polonorum plerique animum ad Gulielmum Roſenbergium, Bohemum Principem, Legatum Cæſaris. Hic Romano ſanguine, gente Urſinâ ortus, clarâ nobilitate apud Bohemos eminens, genus opibus, opes animo, ac virtute æquabat. Sed illi omni ſpe potior fides, quam Cæſari debebat, fuit, mentionemque ſui vllam in comitiis fieri vetuit. Verùm hos omnes longè & generis amplitudine, & Catholicæ pietatis laude, & præclaræ indolis famâ anteibant duo adoleſcentes, Erneſtus Cæſaris filius, & Henricus Regis Galliæ frater. Erneſtus, & opes patris non magnæ ſolùm, ſed propinquitate ipſâ maximè opportuniæ Poloniæ res affectanti, & Catholicorum ſtudia antè, vt docuimus, à Commendono comparata, facilè vt cæteris præferretur, tenuiſſent, ni ceſſatum à Maximiliano primùm, deinde etiam turbatus ordo agendæ rei, & cuncta a-

liis super aliis erratis corrupta, sicuti demonstratum à nobis est, fuissent. Henricus ad Regnum, quod ei summis omnium ordinum studiis est delatum, pænè per jocum à paucis est accersitus; affirmari certè potest nemini antè cognitum, visumve eorum, à quibus expetitus, creatusque Rex fuit. Venerat fortè in Poloniam è Gallia pumilio quidam Polonus natione, ac natus etiam honestè, (Crasoschio nomen fuit) qui adolescentulus rarà parvitate in Galliam abductus, dono datus Reginae, diu inter oblectamenta Regum fuerat: scitus ipse, & ingenio solertior, callidiorque, quàm pro modo corporis, ita rem suam naviter egit, ut pecuniosus, & locuples paucis annis evaserit. Senex factus revifere patriam, suosque agnoscere, agnoscique cupiens, in Poloniam, vivo adhuc Augusto, redierat, multaque, ut fit, de Regia Galliae, de Regni opibus, de Rege, deque Henricorum fortè Regis fratris exercitus adversus quotannis rebellantes hæreticos Galliae secundà bellicae laudis famà ductante magnificè omnibus conviviis, quibus sæpè à proceribus adhibebatur, prædicabat: & mortuo demum Augusto, cum omnibus propè sermonibus de futuro Rege quæreretur, palam ut Henricum sibi Regem asciscerent, omnes sollicitabat; donec Andreæ Sborovii instinctu ab aliquot nobilitatis principibus, qui consilia cum Sboroviis sociaverant, in Galliam est missus, & datis ad Regem, Henricumque litteris, quibus operam pollicebantur, ire pro-



perè, eòsque ad mittendos Legatos, qui peterent Henrico Regnum, adhortari est iussus. Tantarum alienatio à Cæsaris domo fuit, vt quem in limine Regni, atque in oculis propè suis habebant, Regem Regibus natum, regiâ indole petentem, offerentémque se rejicerent; è Gallia longissimè dissitum, ignotúmque vltro accerferent. Nec homunculus defuit rei, nec Reges aut nuncium, aut nuncii auctores sprevere. Illo igitur eâdem celeritate, quâ venerat, ad Polonos redire, & adfuturos in tempore Legatos renunciare iussu, haud segniter Galli negotio institerunt, æmulatione in Austrios incensi, & magnoperè ad gloriam gentis suæ rati pertinere, si bellicosissimæ nationes ab vltimis Europæ terminis Regem sibi petitum in Galliam misissent. Et Carolus Rex cum fratris potentiam & infringere parum fraternum, parúmque tutum putaret, & ferre grave sibi, Regnóque sentiret, per speciem honoris amoturus Henricum, Galliámque propè altero jam Rege exoneraturus videbatur. In Polonia serpebat quidem in dies magis per hominum ora Henrici mentio; sed locorum, interjectarúmque terrarum longinquitas consistere in illo magnoperè animos non sinebat, & eum Ernesto potiùs objici, quàm veris studiis expeti plerique credebant. At vbi adventare è Gallia Legatos, & mox ingressos fines, est auditum, & vulgata promissâ, commodâque sunt, quæ genti publicè, privatimque allaturum Henricum Legati, fautores.

que eorum studiose disperferant; omnis illa animorum à Cæsare defectio vertit in favorem Henrici, & ipsi etiam Cotchevicius, Radgivillus, Laschius, alique qui se initio Cæsari obtulerant, quâ indignatione adversus eum; quâ præmiis, promissisque ingentibus Gallorum illecti multitudini se junxerunt; adeoque inde inclinatio voluntatum omnis in Henricum incubuit, hinc studio illius, quem summis laudibus efferri à Principibus suis audiebant, hinc alienatione à Cæsare; adeoque hic ardor animorum pariter omnes Senatores, Equites Catholicos, hæreticos traxit, ut si tum habita comitia forent, ne dubitandum quidem esset, quin sine vlla aliorum mentione, vnus omnium suffragiis Henricus Rex fieret: tanto impetu multitudo, venti ingruentis instar, quò semel inclinavit, præceps fertur. Spatio, atque morâ (nam ipsum propè annum interregnum tenuit) ardor paulum elanguit, & Gasparis Colini, multorumque cum eo Ugonotorum in Gallia cædes etiam plerosque hæreticorum ab Henrico avertit. Is enim Colinius cum magnam Galliarum partem novâ religione, & Calvinianæ hæresis pestiferis erroribus opplevisset, cui pro disciplina est legum, Magistratuumque omnium reverentiam exuere, impia sacrorum jura vi, atque armis vindicare, divina, humanaque libidini suæ subjicere, ita se ducem Novantibus inde res, & omnia sævis seditionibus, bellisque turbantibus præbuit, ut totâ civili sanguine conspersâ Galliâ, per fune-



itas patriæ, gentisque suæ calamitates, perque clades, & vulnera robustissimi ante illum Regni, ad eas pervenerit opes, quibus metu sui Regem terret: Regiam certè domum nemo vnquam acrius oppugnavit, nemo exitio vltimo propius adduxit. Hunc sive aliter mederi publicis malis, quàm eo sublatò Galliæ vexatore, non posse Regis mater putaverit, seu ipsum parantem fraude, atque insidiis Regi, fratribusque, ac matri ipsi necem afferre occupavit, opprimere captatum fectâ gratiæ reconciliatione, Lutetiâque cum factionis principibus plectum magna cum omnis generis Ugonotorum cæde trucidari iussit. Eacædes Poloniæ hæreticos (nam Henrico id facinus imputabant, cuius esse insigne in Colinium, sectamque illam odium didicerant) ab eo vehementer alienavit, vt nisi lenisset paulatim rem rumor, & Catholici pro Henrico constanter steterissent, peragi comitia sine magno certamine nequivissent. Hæretici igitur deserto Henrico, rem ad Regem Sueciæ trahere conati sunt: sed vbi consentientibus Catholicis, & alium quàm Catholicum Regem ne auribus quidem admittentibus, non satis ad id opum in sese esse senserunt, aliâ viâ solvere consensionem Catholicorum, & studia in Henricum rescindere sunt aggressi. Omnibus cœtibus, consiliisque monebant, hortabanturque multitudinem, vt spretis alienigenis, & externis Regibus, è sua potissimum gente Rectorem Reipublicæ darent. Tot esse inter ipsos nobilissima-

» rum familiarum procures, seu robore, ac digni-  
» tate corporis, seu vi, atque præsentiâ animi cui-  
» vis externo Regi pares, suæ certè Reipublicæ  
» multò quàm illos peritiores. Deligerent ex his,  
» qui vnà secum eâdem disciplina, eodem more,  
» iisdem sub legibus nutritus, altûsque creuisset,  
» qui hanc terram vt patriam, incolæ ejus vt cives  
» suos coleret, non qui Poloniæ Regnum accessio-  
» nem modò suæ potentiæ existimaret. Majores suos  
» olim destitutos, vt nunc, Regum stirpe, cùm haud  
» facile propter multorum ambitionem in vnum  
» Principem consentirent, potiùs quàm imperium  
» in se alienigenis crederent, ad Piasum illum non  
» humilis modò, sed etiam sordidæ fortunæ homi-  
» nem è caupona abstractum, Regnum detulisse;  
» nec ipsos illius, nec Rempubicam posterorum  
» ejus, in quibus ad multa sæcula propagatum est  
» Regnum, pœnituisse. Cur ipsi se vltro alieni san-  
» guinis Regi subjicerent, petito ex iis gentibus,  
» quibus virtute nunquam concessissent: cur suis  
» alienos præferrent, & quorum cognitam, & bel-  
» lo, pacèque spectatam industriam haberent, iis  
» ignotos, & vanis tantùm rumoribus commenda-  
» tos anteponerent? cur denique Polonicum no-  
» men eâ ignominiâ notarent, idque judicium pro-  
» pè in conspectu orbis terrarum ferrent, neminem  
» Polonum aptum Regno esse? Advenæ ergo. Re-  
» gi, ignaro legum, ignaro patrii moris, linguæ  
» etiam patriæ experti, dedent se veluti pecora nu-  
» tu, ac sonitu regenda: quonam modo parituri ei,  
» &



& dicto audientes futuri sint, quem ne intelli-  
gent quidem loquentem? Quanam illi cura cu-  
stodiendarum legum esse possit, qui leges ipsas  
ignoret? Et quid intelligerent cum peregrino  
Rege peregrina jura, peregrinos ritus, peregrina  
omnia accipienda esse, & patriam disciplinam,  
majorumque instituta, quibus steteret, in eam-  
que amplitudinem crevisset Respublica, obliviscen-  
da iis esse? Hoc genere orationum hæretici distur-  
bare consilia Catholicorum, aperire spei suæ adi-  
tum, & munire sibi ad Regnum viam conaban-  
tur; & movissent haud dubiè multitudinem, nisi  
docta à Principibus fuisset, non posse Regem Po-  
lonici generis fieri, nullius enim ita eminere vir-  
tutem, fortunamve, cui alii cessuri subjecturique  
se essent, neque posse in id descendi certamen si-  
ne gravi, ac propè certo civilis belli periculo, ne-  
que civile bellum sine peste, ac perniciè Reipu-  
blicæ excitari. Quæ quidem de ea re differerent,  
magis verè dici, quàm factu facilia esse. Et eos  
quidem aliò spectare, quorum cogitatis non pa-  
carâ, & concordî, sed divulsâ, ac discrepante Re-  
publicâ opus esset. Et Archiepiscopus Gnesnensis  
apertiùs in eorum impotentem ambitionem, im-  
pudentiamque invectus, qui per hæc sibi ad Re-  
gnum, atque ad vanas, quas affectarent, spes,  
munire viam conarentur: Quem, inquit, nostro-  
rum putatis alteri cessurum? aut si cederemus in  
præsentia, quam auctoritatem ad regendos tot  
populos habiturum novum creditis Regem in pri-

Y y

» vata nuper fortuna conspectum? Semel feliciter  
 » insanitum sic à majoribus nostris, qui quò aliquem  
 » tandem finem discordiis suis invenirent, quem-  
 » dam sibi Hultai (hæc vox Polonicè cauponem si-  
 » gnificat) Regem fecerunt. Non tali rectore Rei-  
 » publicæ tempora egent, sed cui regio genere or-  
 » to, regio cultu, regiis artibus instituto, Regi ipsi  
 » parere nemo dedignetur. Sic agi de comitiis est  
 » cœptum, in quibus non tam de Rege creando in-  
 » ter Principes, quàm per quos crearetur, certa-  
 » men fuit, dum quisque hanc facultatem ad suam  
 » potentiam trahere studet, & auctor quisque, &  
 » Princeps gratiæ apud novum esse vult Regem.

*De impia hæreticorum fraude, quam confede-  
 rationem ipsi appellarunt.*

## CAPUT VII.

**U**T quisque sciret quem in locum, quòdque  
 ad tempus ad creandum Regem conveni-  
 ri essent, (nam suffragii jus vniversa ex æquo No-  
 bilitas toto fusa regno, nullo censu, aut honoris  
 discrimine habet) indicitur ad Kalen. Junii Var-  
 saviam concilium, in quo consultis ordinibus,  
 ex omnium sententia ea res statueretur. Et ad-  
 fuere frequentes Senatûs, Equitèsque. Discepra-  
 tum de vtroque nonnihil est cum Lithuanis,  
 qui, & tempus in Maium mensem rejiciebant,  
 & locum Parzoviam, Lithuaniae oppidum in fini-



bus Russiæ situm destinabant : de tempore concessum iis est, ut non ante Kalend. Aprilis conveniretur; locum mutari non placuit, designatæque jacentes ante Varsaviam campi, quos ab urbe interfluens Vistula dirimit. Hic locus præterquam quòd in ipso propè umbilico est Regni, & inter Polonos, Lithuanosque medius, Commendonus auctor amicis fuerat, ut potissimum eligeretur, quòd in plenissima Catholicorum provincia esset; nusquam enim Nobilitas ab hæresum contagione, ac labe intactior, quàm in Masovia erat. Quæ res usu etiam quàm specie utilior evasit. Masovii enim propinquitate ipsa invitati, frequentissimi comitiis interfuere, quippe quominus omnes confluerent nemini domestica inopia impedimento fuit, cum ex remioribus Regni partibus, nonnisi quibus commoda domi res esset, venire per se facile possent. Ita ipso quoque numero suorum Catholicis animi addebantur, loco dièque habendis comitiis dicta, aliisque quæ præsens exigere tempus est visum constitutis, discesserant Varsaviâ domum quisque suam, priusquàm dimitteretur concilium, plerique Principum. At hæretici, quibus in exigua spe Regis creatio ex suo corpore esset, nec dubitarent, quin superantibus Catholicis, arbitratu eorum sibi accipiendus Rex esset, occultissima inter se consilia habuerant, quonam modo sibi, sectisque, ac rationibus suis caverent, ut si novus Rex patriis legibus, quas seve-

Y y ij

rissimas adversus desertores Catholicæ pietatis Poloni habent, agere secum, & se pœnis, quæstionibusque, quas eadem leges jubent, subijcere vellet, ne posset. Et cum hæ leges ut abrogarentur, postulare ipsis quoque impudens videretur, viam quâ furtim eodem pervenirent, & legum vis sine legum mentione eluderetur, callidè excogitatam iniverunt. Primum ipso concilii initio, ne legationes exterorum ullæ eo tempore Varſaviam accederent, quarum interventus, ambitusque consultantibus de sua Republica moræ, atque impedimento esset, suaserunt, quando eas Aprili mense sub ipsum comitiorum tempus audire antè decretum fuisset; idque ab omnibus est probatum, nemine subesse fraudem suspicante: sed illi eò scilicet spectarunt, ne Commendonum Varſaviæ adesset, quem occulta quoque eorum acutè odorari, ac remediis prævertere solitum scirent. Deinde abeuntibus aliis ipsi frequentiam Senatûs, & Catholicorum aptiorem doloſo consilio arbitrati, dum à Magistratibus conventus dimitteretur, de industria pænè omnes restiterunt. Cum ergo de publica pace custodienda actum esset, decretumque, ut publicè conspiraretur, & omnes se chirographo suo, & jurejurando obligarent pro hoste patriæ habituros quicumque alteri vim attulisset: hæretici ipsi fœderis hujus formulam conscripserunt, cæteris rebus sanè tempori accommodatam, & magnam mutux charitatis, & benevolentix speciem, &



egregium studium concordibus animis Rempu-  
blicam administrandi præferentem. Sed vnum  
erat caput, quo illis in perpetuum cavebatur, &  
ne cui novam ascivisse religionem, ad novasque  
doctrinæ, ac sacrorum rationes animum tradu-  
xisse fraudi esset, scisccebatur, sed cuique de di-  
vinis rebus sentiendi, Deumque quibus placeret  
ritibus, ceremoniisque (dum purè, castèque)  
colendi jus, ac potestas esset. Atque hanc im-  
pietatem verbis adeò aptis occulerant, ut aliqui  
dulci pacis, & concordie nomine decepti prius  
nomen suum decreto adscripserint, quàm dolum  
animadverterint. Cùm deprehensa res esset, ægrè  
tamen Episcopis, qui in concilio aderant, postu-  
lantibus concessum est spatium ad decreti capita  
inspicienda, tanto impetu, clamorèque hæretici,  
ut perscriberetur, institerunt; vociferabantur,  
denunciabantque, nunquam passuros comitia  
creando Regi haberi, nisi prospectum foret sibi, ut  
tutò in communi patria vivere liceret; identidem  
quærentes, an crederent se expectaturos, dum  
eâdem fraude, quâ nuper in Gallia Gaspar Coli-  
nius, totque cum eo præstantes viri cæsi essent,  
circumvenirentur? Atque adeò exarserunt, mi-  
nas, arma, bellum abnudentibus intentantes, ut  
haud procul à vi, atque seditione res abfuerit.  
Episcopi magis se impelli ad rem nefarii exem-  
pli probandam non sunt passi, quàm pro suo  
munere fortiter tam impia audentibus obstite-  
runt, & veriti turbas, alii venire in Senatum

Yy iij

recusarunt, alii Varfaviâ domum discesserunt. Jacobus Ucangius Archiepiscopus Gnesnensis, & Ordinis sui, & Senatûs princeps, de cujus ingenio, moribûsque suprà à nobis est memoratum, biduum dari sibi ad deliberandum rogavit, fassus sibi nihil satis liquere, & variè distrahi, impellique animum suum. Haud inviti hæretici morem Ucangio gessere, satis sperantes, quia is proni in eorum causam animi multa sæpè signa dedisset, metûque magis quàm sponte à nudanda sententia hætenus se abstinuisset, nactum tempus fauturum postularis suis, adjutorémque futurum. Catholici idem magnopere timebant; siquidem ipsam dubitationem in tali re, quid aliud, quàm manifestam defectionem esse? & cum talium consiliorum ex superiori vita auctorem, ac ducem, non solum approbatorem jure timere videbantur posse, & magnum erat periculum, ne si ille gratificatus hæreticis fuisset, grave aliquod, atque insanabile vulnus Respublica acciperet. Aderam ego tum Varfaviæ à Commendono missus, ut quoniam venturus ipse ad id concilium non esset, ad plerosque Principum mandata ejus perferrem, & præsens quæ ut publicè statuerentur, cognoscerem, aut privatim de futuro Rege quæ agerentur, explorarem; cum ad cæteros Episcopos, Catholicosque Senatores, cum maximè ad Archiepiscopum in tam ancipiti re adivi, simul excitans eos ad munus sui partes, simul quò scirent omnes, quod



quisque aut dixisset, aut egisset, perscripturum  
 me omnia ad Commendonum esse, ut saltem  
 aliquâ ejus verecundiâ continerentur. Ac Ucan-  
 gius quidem mecum commodissimè est locutus.  
 Cum tertiâ inde die in Senatum serus, postre-  
 musque omnium venisset, & alii aliter quid actu-  
 rus quâque sententiam dicturus esset, opinaren-  
 tur, & hæretici spe omnes, & expectatione pende-  
 rent, ipse orationem habuit, nequaquam illius  
 Ucangii, qui occasiones novandi, turbandi que  
 res captasset, qui Pontificibus Maximis obtrectas-  
 set, qui nationale concilium machinatus esset,  
 qui Fritium hæreticum domi suæ in præcipuo  
 honore habuisset, qui capita cum hæreticis  
 sæpè contulisset; sed veræ pietatis, atque con-  
 stantiæ plenissimam, qualis ab Stanislao Craco-  
 vienfi Episcopo, qui mortem pro fide, ac reli-  
 gione oppetiit, ac in Divorum numerum sancti-  
 tate, ac miraculis referri meruit, si viveret, ex-  
 pectanda fuisset. Adeò nostræ mentes in manu  
 sitæ sunt Dei, & ubi paulum à contagione huma-  
 narum cupiditatum sevocatæ, ad ipsum se Deum  
 studio veri verterunt, nunquam non ejus sanctis-  
 simo numine ad cognitionem sui illustrantur.  
 Deliberatum à se diu, multumque esse dixit, ut  
 de re tanta maturum consilium patriæ suæ affer-  
 ret, sacrificatum item ab eodem se, ac preces ad  
 Deum factas, sacratas Virgines, ac singula sacer-  
 dotum collegia ad id appellata, omni cibo præ-  
 terquam quo sustentari tenue corpus suum potue-

» rit temperatum, pecunias hujus rei causâ egenti-  
 » bus distributas, omnia denique piè ac religiosè  
 » peracta, quibus placari cæleste numen, ab Deo-  
 » que impetrari posse speravit, ut quod facti opti-  
 » mum in tali re, quodque cum sua, & patriâ salu-  
 » tē conjunctum esset, sibi divino prælato lumine  
 » demonstraret. Postremò adhibitum amicorum fi-  
 » delissimum, ac prudentissimum quemque, nec  
 » denique aliud eo biduo pervolutum, agitatū-  
 » que animo ab se esse. Tandem ita apud se statuit  
 » se salvâ fide, quam Deo homines debent, nemi-  
 » nem posse ei fœderi, decretōque assentiri, quo  
 » Dei majestas, ac numen gravissimè violaretur.  
 » Quid enim aliud esse tantum novarum, ac pra-  
 » varum religionum admittere, quàm totam fun-  
 » ditus evertere, ac tollere Christianæ pietatis ra-  
 » tionem? divina, humanâque confundere, &  
 » Christi Dei cultum, vnicam salutis mortalium  
 » spem, opem, columnen, sine quo constare boni,  
 » rectique ratio non potest, è vita auferre? An er-  
 » go si Mahometanus, atque adeò Epicureus, om-  
 » nisque religionis contemptor aliquis existat, qua-  
 » les gigni ab tali impunitate necesse esset, ne hos  
 » quidem coërcere legibus liceat? istis quoque sua  
 » sentiendi licentia inulta maneat? An concipe-  
 » re animo tantum impietatis virus potuit quisquam,  
 » ista ut postulentur? Multa in hanc sententiam  
 » cum dixisset, & quæsisset etiam ab iis, & quid  
 » crederent stare Poloniæ Regnum, hâc permissâ,  
 » & publico decreto sancitâ licentiâ posse? & an  
 » eam



eam perdendæ communi libertati, ac Reipubli-  
cæ penitus dissolvendæ esse intelligerent? Testa-  
tus postremò est, ita hanc animo stare senten-  
tiam, vt dexteram amputari potiùs sibi esset pas-  
surus, quàm eam ad nomen suum huic decreto  
adscribendum admoturus, nec solùm dexteram,  
sed si res ferat caput ipsum gladiis non dubitan-  
ter objecturum. Quid enim seni exactâ jam æta-  
te; aut salutaris, aut gloriosius evenire posse  
quàm pro patria, pro fide sua, pro sacris, pro re-  
ligione mortem occumbere? & vitam quæ na-  
turæ propediem exolvenda esset, pro civium suo-  
rum salute, ac pro Dei cultu Deo ipsi repræsen-  
tare. Hæc dicens cùm hæreticorum clamoribus,  
minisque incesseretur, adeò furori eorum violen-  
tiæque non cessit, vt in publicas tabulas referri  
decretum vetuerit, & quia per vim relaturi vide-  
bantur, ipse ex sua reliquorùmque Episcoporum,  
ac totius Ecclesiastici Ordinis, & Catholicorum  
omnium auctoritate id decretum contra Rempu-  
blicam paucorum conspiratione, ac fraude con-  
flatum esse edixit, edictumque in publicas refer-  
ri tabulas iussit. Idem postea factum in singulis  
provinciarum conventibus ab Catholicis est; ita  
illa hæreticorum conjuratio nihil publicæ aucto-  
ritatis traxit. Ucangium cùm ego post dimissum  
Senatum domi convenissem, collaudarémque  
eum, & eximiam constantiæ, ac pietatis gloriam,  
quam ea die nomini suo peperisset, illi gratularer,  
fessus agitarum opinionibus diu animum suum

tandem in commonstrata sibi divinitus veritate conquievissse, ab illa approbanda conspiratione, visis etiam, atque in somniis se deterritum fuisse affirmavit. Hæc hæreticorum conspiratio, cui ipsi confederationis indidere nomen, incredibile dictum est, quantum diligentiae, studiique à Commendono positum sit, ut antiquaretur & confutaretur, & in quantam invidiam, execrationemque id factum apud omnes, scriptis etiam, & vulgatis ea de re alieno nomine libellis, vocaverit.

---

*De adventu Commendoni Varsaviam, & consilio illi in castris dato.*

#### CAPUT VIII.

**A**PPETENTE deinde vere Commendonus Varsaviam venire maturavit, & Episcopos, & aliquot Catholicorum Principes, ut idem facerent per litteras monuit, quo spatium communicandis consiliis haberent, antequam advenirent alii, & æstu comitiorum occuparentur animi. Cum plerique in tempore adfuissent, omnes in domum suam coactos magnoperè hortatus est, ut animo, atque religione quantum magnitudo rei, & abhorrens à Christiano nomine scelus hæreticorum posceret, ad resistendum impiæ conjurationi se compararent. Acceperat enim hæreticos, nisi ei fœderi Catholici assentirentur, mori-



turos se potiùs quàm comitia haberi, & Catho-  
licum Regem creari passuros, ferociter minari.  
Episcopi, cæterique pro se quisque polliciti sunt  
daturus operam, ne eorum officium in re maxi-  
mè fidem Christianæ pietatis attingente deside-  
raret. Convenit autem, vt totum negotium con-  
stanter quidem, sed leniter, amantèrque tempo-  
ris causâ tractaretur, ne si in hæreticos ab ipsis  
pari impetu itum esset, ea contentio in periculo-  
sam aliquam seditionem erumperet, comitiâque  
impediret; sinendo eos incassum furere, quàm  
objiciendo se furentibus tutiùs conatus elisuros.  
Privatis inde colloquiis singulorum, de futuro  
Rege sensus explorans, præter admodum paucos  
Henrici esse omnes intellexit. Atque ipse jam  
antè sicuti sponte sua, dum licuit, & integrum  
fuit, rem ad vnum è Maximiliani filiis trahere fue-  
rat conatus, maximè è communi re vtriusque gen-  
tis id esse existimans, ita defectione ab eo, & in-  
clinatione in Henricum perspectâ contraxerat ve-  
la, intelligens sibi ita moderandum esse, vt ne-  
que nimium pro Cæsare tendendo, adversa studia  
multitudinis incurreret, neque damnando Gallo-  
rum spes refragari favori in Henricum crederetur,  
cujus nomen non gloria solùm bellicæ virtutis ex  
victis ter justâ acie, profligatisque magnis hæreti-  
corum copiis commendabat, sed Catholicæ reli-  
gionis eximie laudes illi omnium consensu tribue-  
bantur. Et Commendono vitanda omnis animi vl-  
lis infecti partibus suspicio erat, nec vltra quàm vt

Catholicus Rex crearetur, Pontificis Maximi communis Christianorum Regum parentis Legato curæ esse videbatur debere, & repulso Cæsare, si Henricus quoque spe dejiceretur, nullus qui fieri posset, Catholicus alius è petentibus erat. Igitur ubi labefactam, convulsamque petitionem Maximiliani sensit, quâ alienatione gentis ab eo, quâ cunctatione, atque erratis ipsius, timens jam ne hæreticis inter Ernesti, Henricique contentionem locus è suis aliquem intrudendi daretur, subsequi suo quoque studio rem ad Henricum inclinatam statuerat, eaque res Catholicis, qui jam ad Gallum flexerant animos, ac perinviti tamen Commendono non obsequebantur oppidò quàm grata fuerat, quos quidem ille dum de Cæsare non desperaret, & temerè concitatis in Henricum studiis haud satis fideret, retentare non destiterat. Cùm ergo quò multitudinis aura ferret, cò Principum studia sequerentur, nec qui inclinatos retineret, ampliùs esset, quin Henricum renunciaturi Regem essent, haud sanè dubium videbatur. Venere & Cæsaris Legati Varisiam frequenti jam conventu, ac posteriâ die ad Commendonum adiere, expositisque quæ mandata à Cæsare habebant, quæque post adventum suum in Poloniam egissent, & maximè tarditate excusatâ, petierunt ab eo, ut quorum antea comparaverat studia, eos in fide Cæsaris retineret, & se ad reliqua consilio, atque operâ juvaret. Commendonus neutrâ re se iis defutu-



rum pollicitus; vereri se tamen ostendit, ne ferus esset jam omnis conatus; siquidem & multitudo cuncta arbitrii sui fecisset, & Principes cum aliis alii de suis rebus transgissent, quos sicuti ipse quandiu licuit hortando, monendoque, & spem ostendendo variè sustinuerat, ita certis pactorum vinculis, & inter se obstrictos, & competitoribus obligatos, vix sperandum videri à decreta, constitutaque sententia eos revocari posse. Jam frequens undique toto Regno Nobilitas armata, proceresque magnis amicorum, clientumque comitatibus convenerant, positisque in campo antè habendis comitiis, delecto tabernaculis omnia castrorum similia fecerant. Nec gladiis modò succincti omnes vagabantur, sed gregatim armati cum hastis, sclopiis, sagittis, aliisque telis incedebant, & quidam præter armatorum præsidia, bombardarum quoque, ac bellicorum tormentorum apparatus, quo se communirent, adduxerant, ad bellum euntium magis, quàm ad comitia, civilemque conventum venientium more; prorsus ut ad invadendum alienum, non ad suum dandum Regnum venisse viderentur. Speciem certè præbuerunt, tanquam vi, atque armis, non sententiis, ac suffragiis decreturi eventum illorum comitiorum essent. Nec sanè quicquam mirabilius nobis visum, quàm quòd inter inter tot armatorum agmina, in tanta omnium rerum impunitate, cum nullum jus legum, nulla magistratum auctoritas esset, non cædes vlla facta, non

strictus gladius, non vlla vltra verborum certamen contentio, rixave scævierit; adeò gens sui sanguinis abstinens est, & civili dissidio, quod armis decernendum sit, abhorret. Ante omnia placuit legationes audiri, contententibus hæreticis, vt inde protinus dato responso extra fines Regni summoventur, ne comitiorum libertati exterorum ambitus, & corruptelæ officerent. Alii, aut retinendos Varlavix omnes, aut si vtrique abesse comitiis placeret, Legatos, qui ad petendum Regnum venissent, dimittendos in proximas vrbes, vbi hospitaliter, ac benignè habiti creationem novi Regis opperirentur, censebant. Atque hæc accepta sententia est, quâ haud fefellit hæreticos Commendonum Varlavix retineri, itaque nominatim de eo retulerunt, negantes libera comitia fore, si vnus ille adfuisset, qui tamen si nemini peteret palam Regnum, neminem tamen ignorare plurimum momenti allaturum, quocumque favor ejus inclinasset, ac ne reliquis quidem Reipublicæ consultationibus, præsentiam, auctoritatemque illius non magnum pondus, quâ intendisset addituram; & maximè Episcopos notantes, Gallinas super instantem Aquilam formidantes appellabant, ejusque respectu nec liberas sententias dicere solitos, nec libera suffragia luros criminabantur, ac in Senatu eorum interdum dicta refellentes, ea non domi concepta, sed aliunde afflata, ac tales non apud se nasci, sed ab Italia flare ventos, Commendonum desi-



gnantes, dictitabant: sed Catholicis decretum  
 tuentibus nihil est immutatum. Ad v r. Id. Apri-  
 lis omnium primò Senatus Commendono est  
 datus, deduxere eum domo, missi à Senatu tres  
 Episcopi, ac totidem alterius ordinis Senatores,  
 & multi præterea privati officii causâ principes  
 Nobilitaris. Senatus iisdem in castris ultra Vistu-  
 lam, quam sublicio ponte junxerant, habeba-  
 tur, tenso ad id in media planitie regio ingenti  
 tabernaculo, Commendonum è curru, quo vectus  
 erat, descendente, ante tentorium Palatinus  
 Cracoviensis, & Corchevicius acceperunt, alter Po-  
 loniæ, alter Lithuanie Marefciillus; sic enim ipsi  
 eum magistratum, magnâ præditum potestate  
 appellant. Ii, quod officium vni Regi præstare  
 consueverunt, cum baculis Commendonum an-  
 recedentes, turbam ei summovent; cui intran-  
 ti tabernaculum, consurgens vniversus Senatus  
 obviâ est factus. Ipse ad principem sedendi lo-  
 cum deductus, cludentibus latera hinc Gnesnen-  
 si Archiepiscopo, hinc Cracoviensi Episcopo,  
 confedit; idem Senatus fecit, circumfusa nobi-  
 lium multitudine, quantam capere locus poterat.  
 Silentio facto litteras Pontificis Maximi Senatui  
 reddidit, quibus recitatis, ipse orationem est ex-  
 orsus, in qua non solum de Rege Catholicæ fi-  
 dei cultore creando disseruit, sed etiam de inita  
 ab hæreticis adversus eam fidem societate, verba  
 fecit, quàm ea à Christiani animi sensu, ac religione  
 abhorreret, ostendens. Id verò adeò conspiracyonis

auctores pupugit, summo silentio, attentissque audi-  
 ri animis eum cernentes, vt Palatinus Sandomiriens-  
 sis contineri, quin dicentem interpellaret, non po-  
 » tuerit. Quo cum honore appellato, Tu verò, inquit,  
 » Legati officium transgressus, Consiliarii, ac Sena-  
 » toris partes agere videris. Quæsumus te, vt Reipu-  
 » blicæ nostræ, quæ vtilia, aptæque sint judicare  
 » nos sinas, neque tu curiosius te in nostras res,  
 » quàm peregrinum decet, intrudas, sed tantùm si  
 » qua à Pontifice mandata habes ea exequare. Sub  
 eam vocem consurrexere vniversi Catholici Sena-  
 tores, fremitusque increpantium, & silere Palati-  
 num jubentium, vndique est ortus, tantæque indi-  
 gnatio circumfusæ Nobilitatis fuit, vt minæ, con-  
 viciæque jactarint in hæreticos, & profilientes è se-  
 dibus suis Cotchevicius, & Laschius manum ad  
 gladii capulum injecerint, securusque periculo-  
 sus aliquis tumultus foret, nisi, & ille conticuisset,  
 & Commendonus rem minimè ad offensam,  
 injuriàmque vertisset, sed manu, vultuque æquè ac  
 antea pacato, nec vllam in partem commoto con-  
 fidere, & conquiescere omnibus jussis conversus  
 » ad Sandomiriensem, Neque ego, inquit subri-  
 » dens, me ipsum, neque muneris mei officium,  
 » quale sit, ignoro, & id ipsum quod tu mones, a-  
 » go, vt Pontificis Maximi mandata exponam, ne-  
 » que enim ille magis de Rege, quàm de vobis,  
 » deque vestra Republica, vt salva, florénsque sit,  
 » laborat, neque ego ex hoc loco tecum, aut sigil-  
 » latim cum illo, sed vniversè cum omnibus loquor:  
 quòd



quòd si ipse Senator non sum, ne tu quidem Senatus. Perrexit inde quæ cœperat adeò non interrupto ordine orationis, ut ne verbum quidem vllum exciderit eorum, quæ dicturus erat, auditusque est summo omnium silentio. Nos, quo res notior esset, ipsam orationem ejus subjiceremus, nisi ea exscripta, editaque in vulgus, legere cupientibus pateret.

---

*De comitiis habitis, & Henrico Rege creato.*

CAPUT IX.

CUM hæc Commendonus perorasset, Senatus Principes in medium tentorium cõverere, & pauca inter se collocuti, ad suum quisque locum rediere. Tum consurgens Archiepiscopus Gnesnensis Senatus nomine Pontifici Maximo, & Commendono gratias egit, quòd Poloniæ salutis tantam curam gererent, daturumque operam Senatui dixit, ut à consiliis, monitiisque ejus paternæ benevolentiae, atque officii plenius, ne discederet. Post hæc Commendonus discessit, prosequente usque ad currum universo Senatu, præter illum ipsum Sandomiriensem interpellatorem, & paucos hæreticos. Qui quidem Sandomiriensis, & gravissimis postea verbis est à Senatu objurgatus, & magnæ ea res invidiæ illi fuit.

A a a

Contrà Commendono moderatio animi ingentem gratiam apud omnes ordines conciliavit. Neque enim dubitabant, nisi ille rem tam lentè, lenitèque accipiendo, sedasset, eâ die turbare comitia, & cædis initium fieri, & magnam discordiarum flammam excitari potuisse. Quod periculum impotentiâ, ac temeritate Sandomiriensis contractum, vnâ avertisse Commendoni gravitatem, & constantiam prædicabant. Posterâ die audiri Cæsaris Legati, à duobus Senatoribus, Palatino Lublinensi, & Castellano Gedanensi deducti. Hi antea magnoperè contenderant, vt Petrus quoque Fassardus Hispanus Philippi Regis Legatus, qui ad commendandum Ernestum venerat, vnâ in Senatum introduceretur, quòd & vnâ venisset, & eadem mandata afferret, nec in ea re separatim quicquam à Cæsare Philippus esset acturus: sed impetrare nequiverunt contrà tendentibus Galliarum Regis Legatis, qui se loco præstare, & Hispano præferri debere aiebant. Ita Fassardus, ne concessisse Gallis videri posset, Senatu non convento domum discessit, & post Cæsaris Legatos Galli introducti sunt, ac deinceps aliâ ordine auditæ legationes. Datis singulis brevibus responsis, paucos post dies Senatusconsultum afferri ad eos iusserunt, quo omnes abire Varsoviâ, atque alibi comitiorum opperiri eventum jubebantur, editisque vrbibus in quas cuique decedendum esset, Germani Lovitium, Galli Plotiam profecti sunt. Tum iterum hæretici à Sena-



tu postularunt, cum Commendono ageretur, ut extra Varſaviam aliquò & ipſe ſecederet, eòſque pateretur rem ſuam publicam ſine externis arbitris agere; nam neque comitiorum libertati cujuſquam debere auctoritatem officere, & alios Legatos inde ſummos ſe minùs agrè eſſe laturos, ſi ipſe quoque diſceſſiſſet: contradicentibus Catholicis. Cùm quotidie de ea re altercaretur, nec aliud æquè Senatū diſtineret, Commendonus ne quid cauſæ publicis diſſenſionibus ex ſe oriretur, Varſaviæ me relicto, ipſe Schernovitiā bidui inde itinere ſe recepit. Poſt diſceſſum ejus cupientibus omnibus, ut omiſſis aliis habendi comitia initium fieret; hæretici, ut priùs leges comuni libertati firmandæ, ac minuendo regio imperio novæ ferrentur, veteres inſpicerentur, & ad Reipublicæ uſum, tempùſque corrigerentur, ſummâ ope nixi ſunt. Hac ſpecie publici juris ordinandi, abrogare, aut inſirmare antiquas de hæreticis leges cupientes, & acceſſurum eorum licentiæ rebantur, quicquid detractum Regiæ poteſtati foret: Atque altiùs etiam cogitationem intendentes, ſi Regem ſuo jure diſpoliaſſent, exteros Principes putabant petitione abſtituturos, ita ipſis ſpes ſuas proceſſuras. Huic conatui Catholicī repugnabant: atque hæc plures dies contentio tenuit, hæreticis id quoque ſtudio agentibus, ut tempus fruſtrâ tereretur, ſic aut diſſoluturos, quod præoptabant, ſine ullo effectu comitia ſperantes, aut Catholicorum frequentiam tæ-

A a a ij

dio diuturnæ moræ diminutam iri. Sed Masovii, quorum numerus ingens ad comitia venerat, cœtu suorum coacto negotium dederunt vni è popularibus suis, nomine Cossobutio, homini diserto, atque industrio, hæreticos refutandi, & palam in concione, quæ fraus in eorum ficto libertatis studio lateret, aperiendi. Quod ab eo copiosè, atque accuratè pro sua fide, cum esset factum: denunciavit inde Senatui, ni cæteris omisissis rebus de Rege creando, cuius vnus rei gratiâ id coactum concilium esset, ageretur, Equites sibi, ac Reipublicæ, quæ diutiùs carere rectore non posset, sine Senatûs auctoritate consulturos. Catholici Senatores, plerique Masoviorum orationi favebant. Hæretici questi omnia sui arbitrii facere Masovios, & Senatui etiam audere, quæ agenda, omittendâve essent præscribere, serò locum comitiorum pro se non esse senserunt. Extractis tamen hac contentione aliquot diebus, tandem clamoribus, minisque multitudinis Regem poscentis victus Senatus ad I v. Nonas Maii iri in suffragia iussit. Id hoc maximè modo, atque ordine est factum. Concessere diversi in suam quisque tribum; ( ipsi Palatinatus vocant ) his singulis ferè Episcopi præsident; iidem de vnaquaque re, cuius deliberatio sit, ad concilium referunt; iidem primi sententiam dicunt, & suffragia non tabellis, aut fabis, sed palam voce feruntur, & cuique facultas est suam sententiam oratione exequi. Episcopi in sua quis-



que tribu , antequam de Rege referrent , humi procubuerunt , & genibus nixi , quod & circumfusa concio fecit , Deum adorarunt , & solemne illud carmen , quo divini numinis præsentia imploratur , cecinere : *Veni , creator Spiritus , reple tuorum corda fidelium.* Cœptæ inde sententiæ dici , arque in omnibus ferè tribubus ab singulis Principibus , Ernesti cum magno verborum honore facta mentio est : quidam Sueciæ Regem : multi vnum è Poloniæ Principibus , quem Piasium appellabant : pars longè maxima Henricum Regem dixere. Ne singulorum Palatinatum sententias percontemur , quod longum , molestumque legentibus esset , sat fuerit apud Masovios , quomodo acta res sit , retulisse. Hic comitia habebat Petrus Miscovius Episcopus Plocensis , vir gravis , & prudens , & dicendi imprimis peritus , qui cum Ernesto maximè studeret , eumque nullo suo merito , sed præjudicato quodam in Henricum studio , à multitudine respui intelligeret , sententiam ita dixit , ut Ernestum describeret , nomen reticeret. Ac primùm familiam ortum ostendit longè totius Europæ nobilissimam , quæ cum latissimè propagatum Imperium haberet , tum omnes propè Reges , ac Principes Christianos affinitatibus , & clientelis complecteretur. Deinde , quæ ex ipso commoda , utilitatesque , quas ex propinquis , & maximis suis , & familiæ opibus , res Polona captura esset , memoravit. Postremò ipsum juvenem omnibus regiis laudi-

A a iij

bus cumulavit. Exigentibus inde clamore omnibus, ut nomen ederet, Faciam, inquit, si hæc à vobis probari, & vos rebus, non nominibus addictos esse intellexero. Hinc de Gallis exorsus magniloquentiam Legatorum, & vanitatem promissorum irrisit, quæ tanta, atque ejus generis esse dixit, quæ ne si velint quidem Galli præstare possint. Efflagitantibus inde omnibus, ut promereret tandem, quem tantopere oratione extulisset, Ernestum, adeò averfis omnium auribus nominavit, ut vulgus Henricum nudum, & nihil eorum, quæ Legati polliciti essent, præstantem, quàm quemvis alium aureos montes afferentem, malle se fremeret. Tum Volscius unus Senatorum, quæ dicta ab Episcopo erant, vehementer refutavit, & multis invidiosè in Austriam familiam conjectis, illam ipsam propinquitatem, opportunitatemque paternorum Regnorum, illas ipsas opes, & affinitates, quas Miscovius in præsidio, atque ornamento Poloniæ ponebat, opprimendæ eorum libertati fore, si Ernestum sibi Regem imponi paterentur, disservit. Henricum deinde laudibus ferens, non Regium solum genus, sed Regiam indolem, humanitatem, liberalitatem, bellicæ rei scientiam, victorias, decoraque bello parta magnificè percensuit. Atque in hujus sententiam adeò discessum ab omnibus est, ut perseverantem Episcopum in sua, ad extremum etiam familiares, & domestici ministri desererent. Tantùm præjudicata opinio ad mul-



titudinis animos impellendos valet, ut in Erne-  
 sto, quæ amplificando ornandóque Poloniæ Re-  
 gno haud dubiè erant, patris, & familiæ opes,  
 eas ad invidiam, suspicionémque tyrannidis ver-  
 terent; de Henrico etiám, quæ ab ipsis Galliæ  
 Legatis jactata, quæque vanus distulerat rumor,  
 credita pro veris omnia, penitúsque accepta  
 sint. Sic quæ allicere, ac pertrahere ad Ernestum  
 rem debuerant propinquitás, & mutua finitimo-  
 rum Regnorum opportunitas, & ipse adolescens  
 visus, cognitúsque multis, ea maximè avertère;  
 Henrico ipsum intervallum tot interjectarum  
 provinciarum, quod maximè nociturum peti-  
 tioni suæ ipsi crediderunt Galli, solum propè rem  
 juvit. Regem enim longè ab domo petitum,  
 nec vllis propriis, quas in promptu habiturus ef-  
 fet, opibus, & quæ de ipsius laudibus fautores  
 disperferant, iis vim, fidémque longinquitás addi-  
 dit, natura famæ, quæ fluminum instar quo lon-  
 giùs à fontibus labuntur, & majores eundo vires  
 colligunt, cuncta in majus ex longinquo affert.  
 Et si ex omnibus tribubus pars longè maxima Hen-  
 ricum Regem dixerat; tamen quia & Ernestum  
 quosdam, quosdam Sueciæ Regem, haud negli-  
 gendum numerum Piasum postulasse constabat,  
 quo in vnum ab omnibus consentiretur, placuit  
 de singulis iis ad Senatum referri. Cùm opinio-  
 ne plures Piaso studere compertum esset, neque  
 is facilè refutari oratione videretur posse, hæc  
 ad eum explodendum ratio à Catholicis est inita

Primò postulatam, vt nomen profiteretur, palàmque peteret, quicumque idoneum se Regno putaret, quo de eo jus suffragii ferendi tribubus fieret. Audente profiteri nemine, etenim impudens videbatur eximium se, dignumque iudicare, cui dominatus in cæteros mandaretur: & hæreticis pudore impediri homines, nec ausurum id de se facere iudicium quemquam, & ab ipsis deligendum, consensuque cogendum accipere Regnum è Principibus vnum dicentibus, responsum est, vt quando nemo de se profiteri auderet, ederent ipsi eorum nomina, quos maximè aptos Regno censerent. Cùm diu, ne quem nominarent, pugnassent, coacti tandem flagrantium consensu, primùm quidem quos minimè fieri volebant, Catholicorum aliquot nomina ediderunt: quibus abnuentibus omnibus, eorum „ vnus; Ego verò, inquit, vestra isthæc in me studia vobis remitto, qui me haudquaquam vllâ re „ ita excellere alios puto, vt præponi omnibus debeam, aut adedò velim, neque me quisquam ci „ oneri subiciat, quod ferre cuiusquam privati humeri non valent. Idem dum de se quisque prædicaret, etiam quorum non ignota cupiditas, atque ambitio erat, pudore deterriti, abstinere. Nam & in ludibrium adducta res est, aliis alios, & humillimi, & indignissimi cuiusque nomen per iocum, ac risum subicientibus. Ita Piaustus Regno, hæretici suâ spe dejecti. Creati inde novem viri, qui de Henrico, & Ernesto, & Rege Suecia



ciæ in Senatu disceptarent, ternique mandatam  
 cujusque causam agerent; Henrico Cujaviensis  
 Episcopus, Sandomiriensis Palatinus, & Castella-  
 nus, Gedanensis; Ernesto Episcopus Plocensis,  
 Palatinus Marienburgensis, & Castellanus Lu-  
 blinensis; Sueco, Cracoviensis, Ravensis, & Podo-  
 liæ Palatini sunt dati. Ab his repetita eadem, quæ  
 in sua quisque dixerat tribu, & Episcopus Plocen-  
 sis gravissimâ oratione, cum lenire, ac trahere ani-  
 mos ad Ernestum, cujus etiam depictam imagi-  
 nem Senatu ostendit, tum detertere ab aliis est  
 conatus. Sed potius ipse laudem constantiæ, at-  
 que eloquentiæ tulit, quàm moverit quicquam,  
 aut Senatum, aut Equitum multitudinem, quæ  
 Senatum coronâ circumdederat; quin sæpè fremi-  
 tu aspernantium orationem ejus est interpellatus.  
 Hæreticos, & maximè Palatinum Cracoviensem  
 Regem Sueciæ commendare conantes, interfatus  
 Cochevicius adeò acribus verbis futilem spem  
 illius est infectatus, ut mentionem de eo ampliùs  
 facere nemini opus fuerit: at Cujaviensis Episcopi  
 pro Henrico dicentis oratio secundissimis auri-  
 bus à multitudine accipiebatur; quæ identidem  
 obstrepens aliis huic mirificum silentium præ-  
 stabat, dictaque ejus non assensu solum, & ap-  
 probatione, sed clamoribus lætis, plausuque pro-  
 sequebatur. Atque adeò illi animis, studiisque  
 favit, ut quoties reclamandum, plaudendumve  
 orantibus esset, signum ab eo acciperent, suda-  
 riolumque nunc fronti, nunc ori admoventi ob-

Bbb.

sequerentur. Satis igitur perspectâ multitudinis voluntate, conclamatum vndique est, vt redirent in suam quisque tribum, vnâque inde sententiam ad Senatum referrent; sic principibus Nobilitatis pro Henrico adnitentibus, cû in Senatum reditum esset ad 1v. Id. Maii, Henricum omnes Regem dixerunt, præter Cracoviensem Palatinum, & aliquot hæreticorum Principes, qui ne assentiri cogerentur, Senatu egressi in sua se tabernacula receperunt, accepturos eum Regem, quem Senatus consensu declarasset, denunciantes. Jus Regis renunciandi, more antiquitus tradito, est penes Archiepiscopum Gnesnensem, qui idem præses est publici consilii. Is quia nox disceptantes oppresserat, non videri sibi dixit Regem noctu renunciari debere, & rem in sequentem diem diſtulit, qui dies, quia festus Pentecostes fuit, haberi Senatus non potuit. Atque hunc Archiepiscopi errorem præne magno malo Republica luit. hæretici enim hoc nacti spatium coiverant, & consilia disturbandi comitia agitarunt. Ac postera die vocati in Senatum venire recusarunt, privatûque cœtum suorum apud Firleium, Palatinum Cracoviensem habuerunt. Hæc secessio in exitiosam seditionem, bellûque erupisset, si hæreticis pares turbidis, infensisque animis vires fuissent. Nam Catholici adeo illâ defectione sunt irritati; vt non jam verbis certandum, sed vi domandam contumaciam, subigendosque omnes, Senatûs au-



auctoritati parere clamantes, Senatu se ad expedienda arma proripuerint: & Corchevicius ænea tormenta produci, quorum haud negligendam copiam adduxerat, & suos capere arma, & conscendere equos iusserat. Idem Laschius, idem alii Catholicorum Principes fecere, quibus alacer, & cupida pugnae Masoviorum egregia manus se conjunxit. Hi omnes medio in campo, instructis turmis, ac directâ acie paratam vim separantibus à Senatu consilia, & Regem consensu creatum abnuentibus, ostentavere. Hæretici quoque armati campum tenebant; sed neque numero, neque animis pares haud temerè arma, atque vim experturi videbantur. Seniores Principum, & Episcopi hinc Catholicos rogando, ut vi abstinerent, hinc monendo hæreticos, ne consilia ab aliis dissociarent, rem præcipitem sustinuerunt. Ad Catholicos, & maximè Laschium, & Corchevicium exorandos, apud quos summa Commendoni erat auctoritas, ego quoque ab Episcopis sum adhibitus; vterque quietum expectare me exitum rei iussit, non enim ad eadem illa esse sumpta arma, sed ad metum adversariis injiciendum, quo incusso non dubitabant eos in potestate Senatûs futuros, neque eos spes fefellit. Hoc enim subacti metu hæretici, depositisque vtrimque armis in concordiam reditum, & Senatu coacto, Henricus Rex ab Archiepiscopo est renuntiatus. Acciti post hoc Galliæ Regis Legati, atque in Senatum introducti, in leges Poloniæ

conceptis verbis designati Regis nomine jurarunt, quod factum circumfusa multitudo plausu prosecuta lætis clamoribus fausta novo Regi precatur, Palatinus Cracoviensis inter tumultum, strepitumque confusæ turbæ, quæ mixta Senatoribus rentorium impleverat, à Monluco Legatorum principe in id quoque jusjurandum exegit, nemini prisca religionis cultum deseruisse fraudi, pœnæque futurum. Id cùm Archiepiscopo renunciatum esset, rediens properè, eò ubi hæc agebantur edixit, Regem nullâ nisi quæ communi consensu lata esset, lege teneri. Designati inde viginti Legati, qui ad Regem è Gallia in Poloniam deducendum mitterentur; cujus legationis principes fuere Adamus Conarchius Episcopus Parnaviensis, & Albertus Laschius Palatinus Siradiensis, & Nicolaus Radgivillus Dux Eliciensis, qui diversi omnes, quâ cuique commodum fuit, Metim nobile oppidum Lotharingæ convenere, atque inde vno agmine Lutetiam Parisiorum petiere.

*De discessu Commendoni è Polonia, & de mora adventus Regis.*

#### CAPUT X.

COMMENDONUS creato Rege non Catholico solùm, sed propè in castris, atque armis, quæ ab ineunte ætate adversus Catholicæ



pietatis hostes induerat educato, hæreticorum conatibus egregiè semper reclusis, rectè omnibus, & è Republica administratis legationis suæ munere summa cum fidei, religionis, prudentiæ gloria expleto, per litteras à Pontifice Maximo postulavit, vt sibi decedere Poloniâ, atque redire in Italiam, Româque liceret, quando adventum novi Regis expectare longum videretur futurum, qui neque itineri se per tot feroces, & infestas Germaniæ gentes committere, nisi conciliatis priùs, exploratisque Regulorum animis, per quorum fines transiturus esset, neque è Gallia movere sine magno molimine apparatuque rerum posset. Et Pontifex quamquam cupivisset, vt Commendonus Regi novum ineunti Regnum, operâ, consilioque, cuius ille indigens videbatur, futurus adesset, & Galli ipsi id eum magnopere rogarent; tamen post diuturnam biennii ipsius in ea legatione moram, negare tam bene de Republica merito, tantis laboribus, ac tam insigni opere perfuncto reditum, non est visum. Datis igitur ad eum litteris, & amplissimis verbis fide, virtutisque ejus collaudatâ, quâ effectum esse aiebat, vt in tantis opibus, audaciâque hæreticorum Catholicum sibi Regem gens imprimis nobilis delegisset, ei permisit, vt suo arbitrio vteretur, siue Romam redire, siue expectare in Polonia adventum Regis, eumque bonis, atque utilibus consiliis ad novum Regnum salubriter habendum imbuere mallet. Si decedendum sibi statuisset, tum me Pon-

tifex in Galliam ad Regem proficisci, tum de omnibus rebus edocere, & cum ipso in Poloniam redire, & initiis ejus præstò adesse jubebat. Sed Commendono satius visum morari me in Polonia, donec profectum è Gallia Regem allatum esset, ut turbidis adhuc rebus, ne hæreticis si occasio daretur satis quieturis, esset interea in Regno, qui ex Pontificis Maximi auctoritate monere, si usus posceret, & excitare Episcopos, Catholicosque posset, ne quid per negligentiam aliorum de jure sacrorum, ac religione secus consuleretur. Decedentem è Polonia Commendonum, gentis Principes primùm retinere conati; deinde certatim omnibus officiis humanitatis, atque observantiæ abeuntem sunt profecuti, tantumque ejus remansit in ea gente nomen, tanta veneratio, ut nunc quoque memoria dictorum, factorumque ejus colatur, usurpeturque ab iis. Et nuper post Stephani Regis mortem in edicto publicè proposito rem auctoritate firmantes, solitum id à Commendono dici præfati sunt. Eodem tempore Legati Polonorum Lutetiam venere, tantis ab universa Gallia, Regibusque accepti honoribus, quantum ad se redire gloriæ ex tam clara legatione, & legationis causa haud vanâ æstimatione rebantur. Et præbuere Legati spectaculum non numero solùm suo, comitumque, sed ipso etiam cultu, atque ornatu novo, insuetoque Gallorum oculis; cum enim ferarum pellibus, quas magno parant pretio, caput, corpusque amicti erant,



tum auro, purpurâque, & gemmis ipsi, equique fulgebant. Reddunt inde Henrico Senatusconsultum, quo ipse ad accipiendum Poloniae Regnum vocabatur, & iusjurandum suo more in patrias leges exigunt. Quo accepto fœdum inter Legatos certamen est ortum, in quibus erant hæretici aliquot primarii, homines à sociis ad id ipsum missi, cum hipermitteri sibi de Deo, ac de religionibus liberum sentiendi arbitrium, atque in id iusjurandum jurari, quod Legati ejus in Polonia jurassent, postularent; Catholici negarent aliis, quàm quæ publicè offeruntur legibus, Regem obligari debere, aut privatorum postulata eximere de publico jure quicquam posse. Cum hæretici solito clamore, ac tumultu rem agerent, Rex ita iis morem gessit, ut se cum in Regnum venisset statutum consensui, ac voluntati Senatûs de ea re diceret. Secundum hæc Poloni epulis, festisque ludis armorum, equorumque, & nobilium fœminarum choreis, aliisque Regiæ Galliæ voluptatibus culti, & ipsilætabantur illo Regum, Reginarumque more sese liberali, ac benigno alloquio usque in omnia familiaritatis jura cum suis pariter, & cum hospitibus miscerent. Donna quoque Legatis regali munificentia singulis data, nec ullum in eos comitatis, & liberalitatis officium prætermisissum. Agi inde de discessu Regis cœptum, Catholicis Legatis monentibus præsentem Rege indigere Poloniam, resque ibi ex recenti comitorum, atque interregni jactatione

adhuc in motu esse, nec nisi Rege viso quieturas. Et Galli dum advenas tantum viæ emensos ad petendum è sua gente Regem, advenarumque cultum, ac morem mirantur, & ad Galliæ gloriam vertentes rem sermonibus tollunt, læti & ipsi Legatos, ludosque concelebrarant. At ubi discedendum Henrico, appararique profectionem videre, tum animum ad cogitationem rerum suarum contrahunt. Et Catholici eo duce usque à puero, omnibus cum infesta Ugonotorum factione bellis feliciter usi, omni vi illum in Gallia retinebant. Quid enim ei amplissima fortuna, » opulentissimo in Regno nato, quæsito in ultimis » terris, ac propè alio in orbe Regno opus esse? Et » cui dubium videri possit, solutusne ipse in suos » imperium habeat, an à suis promptius, obediens » tiusque illi pareatur, eò se abduci ab domo, à » patria, ab tot fidelissimis amicis, carissimisque » rebus sinat, ubi arctissimis legum vinculis obstrictus, non Rex, sed nomen inane, ac ludibrium » Regis sit futurus, ubi à barbarico Senatu obsessus, » ac veluti captus, non publicæ pecuniæ, non pacis, non belli, non denique sui ipsius jus, atque » arbitrium sit habiturus. Et quod gravius sit, unde » de reditu ei liber in Galliam, si patriæ necessitates revocent, non sit futurus. Quid si fratrem » carentem liberis, nec firmâ valetudine, defungi » fato contingat? an dum ipse longè gentium agit, » neminem in Gallia fore novæ spei, novæ potentiae inhiantem credat, qui minorem natu fratrem,

ad



ad Regni cupiditatem sollicitet? Cùm eum jam  
 nunc haud obscuris discordiæ, atque æmulatio-  
 nis seminibus ab Ugonottis imbutum constet?  
 Moverunt his sermonibus animum juvenis, &  
 jam segniùs iter instruebatur, morandique ac dif-  
 ferendi causæ quærebantur, jam Poloni ipsi sen-  
 ferant refrixisse in Henrico studium profectio-  
 nis, ac propè sordere ei Regnum, quod sibi tantis via-  
 rum, rerùmque incommodis esset habendum.  
 Sed cùm Regi fratri, matricque indignum, & in-  
 delebilem notam levitatis habiturum videretur,  
 magno studio petitem majorem penè delatum fa-  
 stidire Regnum, ac per molliorem, atque desi-  
 diam objicere, & gentis nobilissimæ spem, ex-  
 pectationemque frustrari, auctoritate suâ evicerunt,  
 ut porrò itineri instaretur; quam quidem in rem  
 immanis est pecunia insumpta, gravisque Galliæ  
 Polonica hæc actio fuit. Cùm igitur stetisset profe-  
 ctionis consilium, non tamen priùs à Parisiis mo-  
 vit Henricus, quàm eum frater in suorum Con-  
 silio Legatis Poloniæ, & matre, & proceribus  
 coram, hæredem, ac successorem Regni Galliæ, si  
 prior ipse sine liberis decessisset, declaravit. Tum  
 præmissis qui à Cæsare, ac Germaniæ Regulis fi-  
 dem acciperent, tutum per eorum fines transi-  
 tum fore, iter est ingressus. At in Polonia id mo-  
 dò nunciatum erat, venisse in Galliam Legatos,  
 magnificentissimæque acceptos à Regibus esse.  
 Expectatio inde adventûs ejus tenebat hominum  
 animos; & res poscebat, & ex re spes erat, Re-

C c c

gem nihil sibi ad iter moræ facturum, nec quicquam discessui suo præversurum. Sic affectis, & jam intrasse Germaniam eum, & multum viæ progressum credentibus, ( nam quintus post eum renunciatum Regem mensis excesserat ) missus è Lutetia nuncius litteras ab eo attulit, quibus Senatui de Regno ad se delato gratias agebat, erantque litteræ cæteræ quidem ad tempus apte scriptæ, sed nulla cum mentione discessus sui. Id verò tantum toto Regno animorum motum fecit, vt incertiores tum Regem, quàm antequam crearetur, haberemus. Nam hæretici arreptâ occasione ad quam semper intentissimi excubant, effictis etiam, atque ementitis litteris rumores incommodissimos disperferant. Nunc impediri Regem novis Galliæ motibus, nunc aspernari Regnum, ad quod nisi immensis sumptibus, infestisque itineribus pervenire non posset, nunc inopiâ pecuniæ laborare, eaque à populis Galliæ corrogandâ occupari, nec nisi insequenti ætate venturum. Et adhæc ipsum, morēsque ejus carpen-tes, nunc mollem, atque amoribus deditum, nunc sævum, auctoremque omnium Galliæ seditionum distrahebant, idque adeò licenter, vt in sacris, cœtibusque suis, palam hortarentur concionem, Deum precari, vt talem Poloniâ Regem averteret. Coitiones quoque ab iis cœptæ fieri, & haud dubiè novis rebus studeri: languebant ex his bonorum spes, & cùm rumoribus mora Regis fidem adstrueret, nec hæreticos crederent ausuros ei



tam apertè maledicere, ac malè precari, nî non  
 venturum exploratum haberent, multietiam Ca-  
 tholicorum, vt impetu animi potiùs, quàm certâ ra-  
 tione patrata ponè pœnitentia sequitur, nova con-  
 silia respiciebant: vt nobis magnum negotium fue-  
 rit penitus diffidentes quosdam erigere, & contine-  
 re, ne ex fama vanissimè orta, aut arte adversario-  
 rum dispersa, de summa Republica statuerent: nec  
 fisti potuisset res, nisi præmissi à Rege Joannes  
 Sborovius vnus Legatorum Poloniae, & Rambouil-  
 letus Gallus offusas credulis animis suspicionum  
 nubes, adventu suo dispulissent. Et Sborovio in  
 Senatu non profectum modò Lutetiâ Regem, sed  
 de præstantibus ejus animi, atque ingenii orna-  
 mentis multa prædicanti, eo plus fidei fuit, quòd  
 erat ipse inter capita hæreticorum longè acerrim-  
 us Christianæ religionis hostis, cûs Andreæ  
 fratris, de quo suprà à nobis mentio facta est, au-  
 ctoritatem secutus, suffragatus Henrici Regno  
 fuerat. Hi labantes spes Catholicorum in præsen-  
 tia sustinuerunt, hæreticorum cohibuerunt. Sed  
 penitus hos repressit, & reliquos confirmavit ad-  
 ventus Cracoviam Joannis Cotchievicii, qui iis-  
 dem primò rumoribus, nam in Lithuaniam quo-  
 que pervaserant, deinde meis, atque Andreæ  
 Sborovii, qui vnus omnium constantissimè pro  
 Henrico stetit, communibus litteris excitus, qui-  
 bus quàm sustulissent adversarii animos, quàm no-  
 stri dimississent, certior fiebat, in Poloniam con-  
 tenderat, & ex publica Lithuanorum auctorita-

te, suâque quæ haud minor quàm publica erat, auditum in Lithuania dixit esse novis rebus studentes quosdam infirmare, atque adeò, si possint, infringere creationem Regis conari, & non venturum eum in Poloniam multitudini persuadere. Id neque ab se, neque à Lithuanis facilè creditum, quippe tam improbum civem esse quemquam existimari non debere, sed si quiescent, qui patriæ fideique obliti talia moliri, atque ea semina discordiarum ac seditionum jacere auderent, quæ haud dubiè perdendæ Reipublicæ essent futura, hos sibi, ac Lithuanis omnibus pro communis salutis proditoribus hostibûsque futuros. Regem illos ea gente, stirpèque sibi delegisse, ea ipsum specimina sui dedisse, ut sperare optimum jure possent, & hoc de illo consentientem famam polliceri, sed qualemcumque Deus dedisset, habendum, ferendumque iis esse, neque imitandi barbarorum morem pari levitate deferentium Regna, atque auferentium. Hæc periculum, ex dilato Regis adventu Poloniæ imminens, avertère, & ut quietè Rex expectaretur effecère, quamquam Februarius mensis sequentis anni, qui fuit M. D. LXXIV. antè præterfluxit, quàm ille Poloniæ fines attigerit.





*De quibusdam qua adventantem Regem  
auctor edocuit.*

## CAPUT XI.

**E**G o cùm egressum Galliâ transisse Rhenum certis nunciis allatum esset, profectus Cracoviâ, conventisque ex itinere Archiepiscopo Gnesnensi, atque aliquot Catholicorum Principibus, & à singulis acceptis ad Regem mandatis, ad sexcenta millia passuum obviam profectus, in Saxonia illi occurri. Cum eo præter Poloniæ Legatos, quorum suæ quisque privatim rei intendebat, nemo erat, qui Poloniæ rerum, sed minimè qui hominum gnarus esset; nam è tribus Legatis, qui ad petendum Regnum venerant, Lillius per Russiam, ac Valachiam perrexerat in Thraciam, ut Constantinopoli apud Regem Turcarum moraretur: Lansachius cùm navim apud Gedanum conscendisset, sperans maturius per Balticum mare, si venti aspirassent, in Galliam se perventurum, à Rege Daniæ retentus Copinagii fuerat: Monlucus (is princeps legationis fuit) tam multis in Polonia se ingentibus promissis obstrinxerat, ut cùm omnes non elusisset solum reversus in Galliam; sed quò suâ vnius operâ, industriâque carius æstimaretur à Regibus, omnium reliquorum studia, meritâ-

Ccc iij

que malignè verbis elevasset, adeò in se Polonorum accenderat iras, ut Rex tutius, consultiusque esse statuerit eum in Gallia relinquere: gravior ob id adventus meus Regi, hisque, qui Regi in consilio erant, fuit; quippe ab experti odii, amorisque, nec privatim ulli, aut parti, aut homini addicto, cetera omnia, atque ex vero hausta audituri aliquando videbantur, apud quos præsente, ac jubente Rege plenissime, quantum tenuitas nostra tulit, de tota illius Reipublicæ forma, statusque disserui; & quod juvenis ipsius auribus jucundum imprimis accidit, haudquaquam Regis vim, potestatemque tam mutilam, comminutamque esse ostendi, quam jactaretur à quibusdam, neque idem in cohibendo, moderandoque Rege jus, ditionemque, quod in creando Polonorum esse; quin permissa Regi rerum omnium arbitria, omniumque vitæ, ac necis potestatem. Ab omnibus enim tam civitatum, quam provinciarum Magistratibus, Judicibusque provocationem ad Regem esse, legumque eundem, & publici juris vnicum interpretem, & Senatum consulere, non præscribere Regi, neque ipsum stare, sed uti Senatorum sententiis, quò certius quid optimum factu sit, statuat. Decreta, consultaque deliberari à Senatu, à Rege fieri. Hunc rectorem, moderatorumque Reipublicæ, illum monitorem esse. Denique Senatum testem vitæ, actorumque Regis, non arbitrum esse, & ei non justo imperio in suos, sed



iniquâ dominatione , ac violentâ interdictum. Ad hæc neminem in Polonia honoris ullum titulum , quo à privato distingui possit , nisi beneficio Regis habere , ac ne copias quidem honoribus pares , neque enim illos , aut aliam , quàm Senatoris dignitatem nosse , aut Senatorium munus facîle , nisi ex præfecturis , & Regionum bonorum procuratione tueri , neque hæreditario jure hæc à patribus transmitti filiis , sed vnico Regis munere dari. Igitur & legum arbitrium , & cum eo rem , famam , vitam omnium in Regis firam manu esse , & honorum , & commodorum nullam cuiquam , nisi in eo spem. Atque his frenis facîle Regem , quò velit , totam agere , continere , flectere , ac moderari Rempublicam. Publicam item pecuniam potestati ejus traditam , neque ad Senatum rationes , sed ad Regem à Quæstoribus referri : & Quæstores , & Senatores ipsum legere. Ergo summam in magistratibus mandandis , Senatoribûsque legendis curam , cautionemque Regi adhibendam : suorum , id est , Catholicorum , qui maximè sui essent , optimos quosque provehendos , ornandósque magno studio , atque delectu , quo cæteri ad promerendam paribus artibus ejus gratiam excitarentur. Illud respuendum callidorum hominum consilium , qui hæreticos suaderent leniendos , præmissisque adjungendos sibi : id enim in nullam partem fidele , aut tutum consilium esse. Nam quod iis Rex tribuisset , dupliciter nociturum :

primò adversarios suos potentiores facturum , & in seipsum confirmaturum ; deinde persuasurum eis , idque illos jactanter præselaturos , ipsum in eos non sponte , sed metu liberalem , ac munificum esse ; qui enim conscii sibi sint animi alieni , infensique , ne ipsum quidem aliter in se animatum existimatu-  
 rum. Atque hanc esse populorum de Regè opinionem , longè importunissimam , si beneficia metu , ac necessitate extorquenda , non fide , atque obsequio promerenda crediderint. Ad id illud quoque incommodum accessurum , quòd dum communes adversarios indulgentiâ , ac honoribus pellicere studebit , alienabit suos , qui debita sibi navatæ operæ , atque fidei præmia deferri ad alios æquo animo latu-  
 ri non essent. Contemnenda illi , deridendaque hæc terricula monentium , si Catholicos vnos complectatur , vnis maximè vtatur , periculum ab hæreticis ei fore : quod periculum ? aut à quibus , aut quo duce ? aut quibus viribus ? quin si omnes intelligent , eum Rempublicam non nisi Catholicis commissurum , ipsi quoque hæretici Catho-  
 lici fient , ac si se ipse indicarit , & honores , præmiâque bonorum , & dicto audientium , non seditiosorum , & contumacium fore declaraverit , brevi hos spiritus , quos Augusti negligentia prius , deinde corrupta mens aluit , fractos , submitten-  
 tesque se visurum. Hic vnus Gallorum : At tu ,  
 » inquit , hostili esse animo Regem in omnes hære-  
 » ticos vis ! eosque tuâ sententiâ exigis Regiâ , ac  
 totâ



totâ Republicâ expellis , quod nisi bello , & ar-  
 mis fieri non videtur posse : Ego verò , inquam ,  
 nihil hostiliter censeo in eos consulendum ; ne-  
 que enim vi , atque armis est opus , vbi idem le-  
 ge , atque disciplinâ assequi possis ; ac ne abigi  
 quidem Regiâ quemquam volo : hoc sentio , hæ-  
 reticos comiter à Rege esse habendos , atque ex-  
 ploratâ spe non solum gratiæ , sed quæ gratiam  
 sequuntur , si perniciosos errores , & sectas , qui-  
 bus Respublica scinditur , & infirmatur , abjece-  
 rint ; sin pertinaces esse , & in suscepta pravita-  
 te perstare voluerint , tum jaceant , & hanc sal-  
 tem pœnam ferant , vt desertæ Catholicæ pieta-  
 tis culpam honori sibi fore non sperent : atque  
 hoc lenissimum , & maximè præsens hujus mali  
 remedium esse , & in manu situm Regis. At cum  
 omnes magistratus , honorésque melioribus , pro-  
 batoribusque mandandos , nec in Senatum ,  
 nisi spectatæ fidei viros legendos , tum summam  
 curam , delectumque in Episcopis Regi esse ad-  
 hibendum , in quo pariter & populorum , & ipsius  
 ageretur salus : hos enim Senatûs & dignitate ,  
 & auctoritate Principes esse : hos provincialium  
 conventuum , & omnis publici consilii præfides :  
 hos sacrorum , ac religionis Antistites : hos de-  
 nique patres , pastoresque omnium esse , vt im-  
 probum Episcopum designare Rex non possit ,  
 ( quando deligendi eos jus usurpatione superio-  
 rum Regum ad ipsum reciderit ) quin se gravi  
 crimine , noxâque Deo obstringat : & malos

Ddd

Episcopos graves sæpè adversarios experiturum : bonis semper obsequentibus, semper sui, ac Reipublicæ studiosis visurum. Per hos in Senatu, per hos in provinciis omnia, quæ velit, quæque utilia Reipublicæ sint perfecturum : in summa, maximum ad omnia momentum ipsi in Episcopis fore, eoque plus curæ, studiique in iis cooptandis adhibendum esse. At cum hoc studiosè curandum, tum non negligendum illud esse. Ab singulis præfecturis, in quas est omne divisum Poloniæ Regnum, Legatos ex equestri ordine ad publica concilia mitti solere, ( terrestres nuncios ipsorum linguâ appellari ) & ab Equitibus ( plebem enim servorum loco habitam in nullam Reipublicæ partem admittunt ) cujusque præfecturæ hujus rei causâ coactis creari vnum, aut plures, ut visum mittentibus fuerit, & antea quidem hos ad id modò mitti solitos, ut consulta Senatus acciperent, & ad suos quisque renunciaret, ne qua pars Regni, quæ publicè decreta essent, ignoraret. Sub Augusto Rege tantam auctoritatem assumpsisse sibi, ut cuncta pænè sub arbitrium, ditionemque suam contraxerint, simillimique evaserint Tribunis plebis veteris Romanæ Reipublicæ, quorum potestas regendis ab injuria potentiorum civibus inventa, turbandæ, vexandæque civitati plerumque fuit. Eandem enim viam ingressos terrestres nuncios, & præscribere Senatui, quæ decernenda sint, & decretis intercedere audere, & turbulenta inde confi-



lia sapè prodire ; & inter hos plurimùm hæreticos audaciâ , ac seditiosis orationibus valere. Horum minuendam paulatim auctoritatem , cohibendâque licentiam Regi esse , ac in præsentia dandam operam , vt Catholici , & sui , & Reipublicæ cupidi , non turbulenti , ac novarum rerum machinatores ad concilia mitterentur ; quod vt fieret , excitandos , ac beneficiis invitandos Catholicos , ne id ipsi munus refugiant , nec vitandi causâ turbas , & contentiones cum hæreticis , domi se contineant , & publicos provinciarum conventus obire negligant ; sic enim fieri , vt Rempublicam à melioribus desertam hæretici invadant , & sapientium munera audaces præripiant. Quòd si ipse Catholicos monuerit , ne se , operamque suam inertem , aut certè indecoro otii studio subtrahant Reipublicæ , & navos inde , industriæque honoribus , ac præmiis illexerit , brevè totam in Catholicorum manus rem Polonam venturam , brevè hunc novarum opinionum amorem restinctum iri , & omnes suâ sponte obsolescentes hæreses brevè interituras , cunctâque inde auctoritati , ac nutui ejus paritura. Sed enim ita secum statuere eum debere talem Senatum habiturum , qualem ipse fecerit , non legendo solùm eum , sed exemplum ex moribus suis præbendo , neque Senatum solùm , sed vniversam Nobilitatem ad ipsius se similitudinem , morèque formaturum ; vnos enim ex omnibus gentibus maximè Regum suorum imitatores Polonos esse. Duarum igitur

D d d ij

rerum specimina statim in ipso eluceant; primò  
pium se, metuentemque Dei, & in Catholicæ  
religionis cultu, divinisque ceremoniis diligen-  
tem, observantemque præstet, quâ vnâ re tan-  
tùm ad sanandas, & ad Ecclesiæ auctoritatem  
revocandas hæreticorum mentes profecturum se  
speret, quantum multi simul Doctores, & sacra-  
rum litterarum scientiâ, & dicendi facultate ex-  
cellentes effecturi non essent: deinde bellicarum  
rerum studiis deditum animum præferat: de his  
differentes & libenter audiat, & ultro sermones  
provocet, juventutem in militaribus exercitatio-  
nibus assiduè habeat, decurrentes in equis, aliâ-  
que militiæ simulacra edentes, quibus gens suâ  
pte naturâ dedita, vel sub negligente talium re-  
rum Rege exerceri est solita, & spectet libenter,  
& edoceat, in morémque patrium aliquid insti-  
tuat, & ipse talibus ludis, quod ejus & ferre,  
& postulare ætas videretur, sæpè & intersit, &  
præsit. Mirum quantum hæ parvæ res, & gratiæ  
illi, & auctoritatis apud vniversam gentem fa-  
cturæ sint; mirum quantum & in restituenda re-  
ligione, & in revocanda militiæ disciplina vali-  
turæ. Adjeci inde ex consilio Commendoni, vt  
primo quoque tempore belli adversum Moscos  
æternos Polonorum hostes, & exercendæ, con-  
tinendæque in militari disciplina genti natos,  
gerendi cogitationem susciperet: ad multa id a-  
ptum consilium videri; primùm enim Imperia,  
& Regna nullam rem æquè tueri, ac Regum



ipforum nomen, atque famam, maximè si bello parta fuerit. Deinde Regi novo longinquo, alienigenæ, genere, ætate, expectatione florenti, quæ res alia Regnum confirmet, nisi quæ peperit? Quam commendationem sui præsentis appetat aliam, nisi per quam absenti Regnum conciliatum sit? Bellum initio Regni susceptum non ad opinionem modò hominum gloriosum, sed muniendis domi rebus propè necessarium à peritis præsentis rerum Status Poloniæ duci, ut si quies, & pax teneat, nulla satis efficacia remedia sint, quibus sanari, ac stabiliri Regnum posse videatur. si enim illæ gentes diutiùs in eo otio, luxûque, quo marcescerent, relinquerentur, alterutrum sequi necesse fore, ut aut intestino morbo contabescerent, aut externâ aliquâ vi conciderent. Bellum omnia hæc turbulenta consilia, quibus crescere ex commota, atque inquieta Republica, quidam volunt, concocturum, discussurumque, idem erudita illa pocula, inter quæ de divinis rebus quærunt, differunt, statuunt, exhausturum, ipsasque hæresum radices, quas otio natas, licentia, intemperantia, luxus, convivia aluere, disciplinâ, atque bello excisas, funditûsque extirparas iri. Id suam Reipublicæ formam, id pristinam legum, Magistratuum, Regis reverentiam pravâ consuetudine delapsam redditurum, id propagando imperio viam aperiturum; id verendam maiestatem nominis sui Polonis simul, ac finitimis Regibus populisque facturum; id denique

D d d iij

expeti vulgò poscique ab omnibus, præter eos-  
 dem illos quibus seditiosæ domi conciones, con-  
 ciliâque honori, atque emolumentò sint. Huic  
 communi studio lætantium nactos se aliquando  
 Regem, quo duce superiorum annorum incom-  
 moda Augusti ignaviâ accepta vlciscantur; nisi  
 » respondisset Rex, verendum esse, ut satis gloriæ  
 » partum in Gallia foret; si enim se iis conciliorum  
 » fluctibus, quæ alia ex aliis nascuntur, committat,  
 » si illis laqueis irretiri, ac circumveniri se patiatur;  
 » hæsurum implicatiorem, quàm ut faciliè inde se  
 » vñquam expedire, atque extricare possit. Mate-  
 » riam autem belli, causamque nec defuturam, & de  
 » eventu, nisi res oscitanter administrarentur, dubi-  
 » tandum non esse, quippe rem cum hoste viris, armis,  
 » arte militiæ longè impari fore. Hoc postea con-  
 silio usus Stephanus Rex, qui Henrico successit  
 totâ Livoniâ expulsi Moscis, pacatâque perno-  
 bili provinciâ, magnum nomen suum per om-  
 nem Europam fecit, atque homo novus, nec  
 privatâ solum, sed etiam tenui fortunâ ortus, Po-  
 lonos severiori imperio, quàm si natus Rex eorum  
 esset, plures inde annos rexit. Lætus hæc differentem  
 audivit Henricus, sed nihil libentiùs, quàm &  
 Commendonum aggrediendi belli auctorem esse  
 sibi, & Regiam vim non vsque ad eò constrictam  
 hebetemque esse, ut inculcatum ei à quibusdam  
 fuisset. Percunctatio inde Regis, amicorumque  
 de singulis pænè Principibus fuit, in qua juvenis  
 sensus enituit sanè egregius, qualis quisque ef-



COMMENDONI CARD. 401

set, haud aliâ re magis, quàm religionis fide distinguentis, ac nihil prius quàm Catholicus, an hæreticus quisque esset, quærentis: & nos quidem cùm ingenium vniuscujusque morésque, tum quæ inter ipsos conjunctiones, atque vnde vnitæ, quæ item simultates, quæ inimicitia, quibus ex causis; qui verum studium Regi in comitiis præstitissent, qui adversati palàm fuissent, quorum probata fides, quorum suspecta fraus esset, qui statim admovendi rebus, qui spe alendi, qui denique cavendi, quique amplectendi viderentur, abunde differuimus. Atque hæc nosse Regi adedò jucundum fuit, vt scripto comprehensa tradi vtique sibi voluerit; nec destitit inde, vt quidquid in deliberationem venisset, à nobis quid sententiæ haberemus, exquirere.

*De adventu Regis, ac de diademate illi  
imposito, ac de fuga ejusdem.*

CAPUT XII.

**T**RIGESIMO inde die Cracoviam est ventum ad primos Regni fines Francofordium inter, & Mieseriziam Cujaviensis Episcopus, & decem cum eo Principes à Senatu legati, advenientem accipere Regem frequenti, ac splendido comitatum agmine: multi enim Nobiles Poloni, alii privatim officium in Regem occupantes,

alii Legatos secuti, cum delectis quisque equitum turmis aderant. Conspecto Rege equitatus flexit ad dexteram, omnéque collium clivos, quantum patebat conspectus, & erant ad quindecim millia equitum, éxtensis longo ordine alis occupavere. In sinistra Germani constiterunt, tria millia equitum erant, Regem honoris, ac præsidii causâ profecuti, ac redituri domum perrexere, & ipsi intra suos fines aciem struxere, ostentaveréque Regi. Utrosque spectantibus nihil simile videbatur: Germanis graves equi, & in sua terra nati, ac fere nigri, nigra ocreæ, nigra vestis, brevisque, & vniúsmodi: ipsi item vultus nigri, & incultâ, ac promissa barbâ truces: unde eorum linguâ *Suarzreithi* dicuntur: arma quoque eadem omnibus, oblongus gladius, ac bini equorum ephippio pendentes sclopi, & quidem præter hæc ferreum malleum eodem ephippio suspenderant. Apud Polonos cuncta variabant, non equi, non cultus, non armatus idem, equis ipsis nec color, nec genus vnum, & quamquam equorum nulla feracior terra, tamen tanto eorum studio gens tenetur, ut è Thracia, ex Italia adducti, ac magno comparati pretio multi viferentur, quibus nobiliores Equites infidebant, aut sine sessore in pompam loris ab agasonibus ducebantur. Ornatus quoque multiplex, aliis patrius, aliis Ungaricus, aliis Scythicus, permultis Italicus, quibusdam & Gallicus: tanta genti inest libido externos imitandi: eadem in armis dissimilitudo, his Scytharum



tharum pharetra, & arcus, & acinaces; illis Epirotica hasta, & longum, & in alæ modum scutum; alteri lorica, & galea; paucis graviora arma; ut enim variâ, ita levi omnes, & expeditâ ad cursum, agitationemque equorum armaturâ lætantur. Ne in corporis quidem cultu similes erant; quidam capite tonso, quidam raso; capillati alii, brevis aliis coma; promissa his barba, illis præter superius labrum penitus abrasa: cunctis ad eum ferè habitum sese affingentibus, quem in suos quisque fines attingentibus populis conspexissent. Sed hæc ipsa varietas hanc in cærulea veste turmam, illam in viridi, aliam in rubra, omnes variarum ferarum pellibus, & serico, & auro splendentes, totamque versicolorem aciem procul spectantium oculos quâdam admiratione tenebat. Et Henricus illo aspectu militarium virorum, atque illo omni in honorem sui apparatu, & mixto tubarum cantu, ingentibus, lætisque clamoribus, quibus latè cuncta personabant, venerantium, ac veluti amplectentium advenientem Regem suum, adeò est delectatus, ut tum demum Regem se sibi visum esse fateretur. Cujavienensis Episcopus, cæteri que Legati coronâ nobilium juvenum circumdati viso Rege omnes equis descenderunt, & ipse conspectis iis propius accedens exilivit equo, summittentésque se ad genua, patre Episcopo appellato, perhumaniter singulos est amplexus. Hic habitis mutæ gratulationis orationibus, datâque iis, qui adire volue-

Ecc

runt, dexterâ, repetitis equis, ac Germanis cum donis domum dimissis, ire perrectum est, adeo lætis aspectu, oratione, comitate novi Regis omnibus, ut secunda illi, fausta que non sonu vocis, plausu que magis, quam animis, & votis precarentur. Incessit inde per confertas multitudines vias, offusis undique ex urbibus, agrisque virorum, mulierumque agminibus, passimque Nobilibus cum instructis equitum turmis occurrentibus, & Cracoviam sub finem Februarii pervenit. Atque hic biduo post, nequicquam variâ arte rem impediens hæreticis, qui per speciem muniendæ libertatis, novas ei imponere leges, & Regiam vim novis arctare, constringereque vinculis cupiebant, diadema Regi solemniter ab Archiepiscopo Gnesnensi est traditum; neque enim verè Rex quisquam, nisi illo accepto insigni, legibus eorum habetur. Tum de præmiis pro cuiusque merito dandis, & quæ tum præfecturæ, aut loca in Senatu vacua morte Senatorum essent, supplendis, aliisque publicis muneribus distribuendis agi est cœptum. Etenim eo biennio, quod propè ab excessu Augusti ad adventum ejus intercesserat, multi suo functi fato facultatis aliquantum remunerandi, quibus maximè delati Regni gratiam habebat, reliquerunt. Et ille quidem largè, ac munificè omnia est dilargitus. Sed cum hominum cupiditati, ac spei Respublica nihil sufficeret, & quæ dari poterant longè petentium, & pro debitis poscentium numerus supe-



raret, præter præsentis pecuniæ magnam vim, etiam de privatis suis vectigalibus Gallicis annua stipendia constituere permultis est coactus, ut hæreticorum quoque, & eorum, qui dignitati, ac Regno illius adversari fuerant, plerique ab facili, & neminem liberalitatis suæ expertem dimittere cupiente multa abstulerint. Nec tamen assequi ut cujusquam expleret spem potuit, etiam qui magna acceperunt, majora deberi sibi, ut de se quisque amplè, ac prolixè judicat, prædicantibus. Audire tum fuit graves, acerbâsque voces querentium gratiam sibi pro merito non redditam, & suis præmiis adversarios suos inflatos cerni indignantium. Et qui modò manus ad cælum tendentes gratias Deo agebant, quòd creandi eum Regem mentem Polonis dedisset, ipsùmque haud secus, quàm divinitus datum sibi, studiis, laudibusque ferentes colebant, & gloriabantur nullâ privatim spe, sed unicâ Reipublicæ charitate juvenem florentem annis, vetustâ Regum stirpe, Regiis ipsum animis, ex longè gentium diffusa terra ad Regnum accersivisse; tum veluti alii repente homines facti, seque, suumque infelix studium, & data suffragia execrabantur: adeò rem publicam verbis jactamus, re fructui esse eam nobis omnes volumus. Sed ubi nihil ampliùs, quod donaret, superfuit Regi, & cum provectum studio bonitatis, ac beneficentiæ suæ quoque dilargitum, magnùmque alienum æs contractum constitit, damnatis querelis suis ad novam gratiam

Ecc ij

per obsequia, & cultum Regis promerendam, & priores spes novis officiis tuendas pro se quisque animum convertit. Jam Rex dimisso concilio, quod ad diadema ei imponendum frequentissimum Cracoviam convenerat, cum iis Senatoribus, qui huic consilio maximè visi sunt idonei, de bello inferendo Moscoviæ deliberabat, videbaturque Regni sui fundamenta bene, ac firmiter posuisse, cum repentiè properi è Gallia nuncii alii super alios attulere, Carolum Regem tabe consumptum diem suum obiisse, & Alanfonium minorem fratrem, Rege Navarræ, hæreticisque impulsoribus, res novas moliri, agrèque à matre coerceri, quæ custodibus cum firmo præsidio militum appositis vtrumque apud se veluti captos asservaret: sed rem maturum reditum ejus exposcere, neque sic cunctetur, aut impediatur, credi motum Galliæ sustineri diu posse; matrisque omnes litteræ filium obtestabantur, ut posthabitis omnibus rebus, quâcumque ratione posset, celeriter se Poloniâ explicaret; ipsâ enim suspicione non futurum in potestate sua discessum, magnopere spem, cupiditatémque incitari Ugonotorum, & vehementer ab iis fratrem ad capeendam fortunam, quæ offerretur, vacuum invadendi Regnum sollicitari. Confusus re subitâ Rex noctu cum paucis Gallis, quos fidelissimos habebat, summotis aliis, quid factò opus sit consultat; & cum pro nihilo jam Poloniæ Regnum duceret, nec discessui, ac celeritati quid prævertendum



censeret, ex eorum sententia nocturnæ fugæ con-  
 silium cepit. Posterâ die avertendæ suspitioni  
 adeuntes, solantésque luctum suum Polonôs be-  
 nignè affatur, rediisse ad se jure hereditario Re-  
 gnum Galliæ, eoque statu res ibi esse, vt præsen-  
 tem se magnopere desiderent; ad eas consti-  
 tuendas currendum sibi necessariò in Galliam  
 esse: sed ita meritos de se, ac de nomine  
 suo Polonos esse, vt eos charitate æquare patriæ  
 suæ deberet, nec minorem sibi ejus, ad quod ac-  
 citus, quàm in quo natus Rex esset, curam Re-  
 gni habendam; eos ergo se, quæ ratio regendæ  
 Reipublicæ, dum ipse abfuerit, statuenda sit,  
 consulere. Qui eum creandi Regem auctores fue-  
 rant, summâsque de eo spes ceperant, mœren-  
 tes, attonitísque similes stabant; cæteri pro cu-  
 jusque habitu animi sententias variabant. Omnes  
 respondere, statui de re tanta, nisi in concilio  
 gentis nihil posse; dimittendos extemplò per  
 Provincias, qui conventum Cracoviam indice-  
 rent. Et Rex quidem ita fieri jussit. Nocte infe-  
 quenti claudi Regia cubicula, ac manè admitti  
 neminem; siqui adire velint, ægritudine, ac lu-  
 ctu fessum Regem quietem capere respondere  
 janitores Galli jubentur. Ipse cum decem admo-  
 dum comitibus, quo noctis tempore altior om-  
 nes somnus habet, posticâ Regiæ parte egressus  
 præparatos equos conscendit; & vbi excessere  
 vrbe, quantum ire equi poterant calcaribus  
 subditis, rapiunt iter. Pernox luna erat, & fortè

Ecc iij

puer in area Regiæ transeuntem agnoverat Regem, dominóque narraverat. Is primò dicta pueri est aspernatus; sed ubi iterare jussu signa, quibus agnitum sibi aiebat Regem, fides affirmanti fuit, metuens ne ipse contra Rempublicam fecisse argui posset, si rem tantam Senatores celasset, vel vanæ rei auctorem esse, quàm veram non indicasse tutius ratus, sub lucem Tencinii comitem Principum vnum adiit. Ille domo egressus rem cum aliquot Senatoribus communicat: nulli quicquam credi, aut agi temerè placuit; Tencinium ipsum pergere in Regiam, & rem explorare jubent. (& erat fortè ille cubiculo Regis præpositus, quamquam ei muneri exercendo nondum adhibitus) Orto jam sole & ipse Regiam intravit, & totam peruasit urbem rumor conscisse fugam Regem, & concursus in Regiam cœptus est fieri. Janitores excitati à Tencinio, quæ præcepta erant sibi de claudendis foribus, ne quis quiescentem turbaret Regem, edixere. Tum haud dubia res visa, & Tencinius Regis cubiculum irrupit, nec aliud in eo, quàm binas super mensa litteras, ad Senatum alteram, alteram ad Cujaviensem Episcopum scriptas invenit, quibus causam consilii sui Rex reddebat, negans aliter vtriusque Regni rationibus consuli potuisse. Tum re vulgatâ discursus per urbem, ac trepidatio ingens fuit, & pro se quisque arreptis equis, fugientem persequi Regem Poloni, ut retinerent, Galli, ut sequerentur. Sed ille spatium nactus multum



antecefferat viæ, nec eum antè adeptus est quisquam, quàm extra Poloniæ fines in Slesiam evassisset; nam Cracovia paulò plus vnius diei itinere ab iis finibus abest. Polonos suppliciter ut maneret deprecantes redire Cracoviam, ac renunciare Senatui iussit, se nisi summis patriæ necessitatibus ad id consilium non descendisse, sed brevì constitutis Galliæ rebus in Poloniam redituum, ac benignè omnes appellatos, stantes plerosque, ac suam fortunam incusantes dimisit. Poloni in priores revoluti difficultates, cum stare diu Rempubicam eorum non posse sine Rege sentirent, legatione ad eum in Galliam missâ, renunciâtâque, ubi reditum ejus desperarunt, habitis iterum comitiis, sed nequaquam concordia pari peractis, duos Reges crearunt. Pars maxima Senatûs litteris, legationibus, donis conciliata Maximilianum Cæsarem, Nobilitas reliqua Stephanum Bathorem Transsylvaniæ Principem Regem dixit. Is cunctantem Cæsarem, & tantum vanas spes sui ostendantem consilio, ac celeritate antevertit, & Poloni eum vel modico popularium præsidio Poloniam ingressum, relicto Cæsare, quem nihil ausurum sperabant, Regem omnes acceperunt. Henricus Gallis, quos Cracoviæ reliquerat, se subinde assequentibus, & ipsis quoque Regulis, quorum per agrum iter habebat, sese officii causâ associantibus, haud indecorum jam Regi agmen trahens, Viennam petebat adeò contento cur-

fu, seu cura Galliaē vrgeret, seu spatium de fe  
hostiliter quicquam consulendi Germanis præri-  
piens, vt ad Maximilianum simul & excessisse  
Poloniā, & appropinquare Viennam eum alla-  
tum sit. Lætè vtrumque Maximilianus audivit,  
ac ausos è suis quosdam suadere, æmulum fami-  
liæ, Regniq̃ue comprehendendum, custodien-  
dumq̃ue, nec antè dimittendum, quàm Poloniā,  
Galliaēque res arbitrio suo constituisset, non re-  
pulit modò violandi communem gentium fidem,  
& fœderum, & hospitii iura fallendi auctores,  
sed acribus verbis castigatos etiam impudentiæ  
redarguit, abeunti in Galliam, Poloniāq̃ue re-  
linquenti Henrico vel aureos pontes faciendos  
esse ferens. Itaque missis extemplò, qui Rodul-  
phum, & Ernestum maiores natu filiorum ex Un-  
garia accirent, ipse curru vectus ( erat enim pe-  
dibus æger ) obviā Henrico processit, eumq̃ue  
transmittentem Danubium in citeriori ripa oppe-  
riens accepit tantā comitate, vt contentio Re-  
gum alterius alterum præferre sibi honore cupien-  
tium fuerit. Et Maximiliano quidem in obeun-  
dis omnibus humanitatis officiis mira inerat dex-  
teritas, mira in omni sermone comitas. Cultus  
ergo splendidè, ac liberaliter ab eo Henricus  
per Styriam, Carinthiāq̃ue in Forum-Julii,  
atque in Italiam magnis itineribus transcendit,  
nec antè de instituto cursu remisit, quàm Vene-  
tias venit. Hic, concurrentibus vndique ad eum  
Italiaē Regulis, legationibúsque, aliquot substitit  
dies,



dies, tantis à civitate omnis benignitatis, atque munificentiae cultrice honoribus, tantisque omnium ordinum studiis acceptus, habitusque, ut cum nullum neque in ipsum venerationis, & obsequii, neque in comites ejus humanitatis, atque hospitii pratermitteretur genus, unius humani, & comis amici, atque hospitis animum induisse univèrsa illa civitas videri potuerit; atque hinc profectus Henricus in Galliam est reversus.

---

*De eodem Commendono.*

CAPUT XIII.

**S**ED ut & ipsi aliquando revertamur, unde nos Poloniae res abstulerunt, de Commendoni fide, ac sapientia tanta apud hunc Regem opinio fuit, & fama, quae de illo in Galliam pervaserat, accepta, & Polonorum praedicatione confirmata, ut neque nomen ejus, nisi magno cum honore usurparet unquam, & omnia sibi Regnum intranti, accipientique è sententia evenisse memorans, unum exciperet Commendoni è Polonia discessum; cujus studio eò provectus est, ut Pontificem Maximum per litteras rogare, ac summis contendere precibus non dubitaret, ut nomine legationis eum ad se in Poloniam remitteret, cujus operam, & consilium univèrso regimini rerum adhiberet. Et mecum de eadem

F ff

re sæpè agens, nomine Legatum, re participem, & moderatorem rerum omnium futurum apud se, & parentis majestatem, sanctitatèque obtenturum aiebat, nec se in Republica quicquam, nisi ex consilio, & auctoritate ejus acturum, nec alium, si proficiscendum sibi ad Moscicum bellum, quod meditaretur, foret, regendo pro se Regno in Polonia relicturum. Atque hæc postulatio, & cogitatio de se Regis Commendono quidem, ut erat, honesta, ac decora nomini suo est visa; sed sicuti ab tam remoto Rege Regni, ac rerum moderatorem expeti amplum, ac magnificum videbatur; ita ad experiendum ancipitem, ac minimè optabilem rem esse ipse aiebat, haud ignarus quantis se invidiæ æstibus esset commissurus, si homo externus in alieno Regno tantum simul gratiæ, ac potentiæ onus subiisset. Itaque & ipse apud Gregorium Pontificem rem variè distulit, & mors inde Caroli Regis, & reditus in Galliam Henrici penitus discussit. Atque hic finis Commendono per claras actiones, legationesque splendendi fuit. Reliquum vitæ obscurius otium, & dempta ingenio materia fecit. Et Gregorius Pontifex etsi advenientem palàm benigne, & honorâ oratione suscepit; tamen & inferri ei ab Alexandro Farnesio Cardinali, homine potentissimo, litem est passus, cum prohibere & posset, & videretur debere: & Maximiliano Cæsare querente eum in petitione Regni Poloniæ Henrico prioniorem, quàm filio suo fuisse,



& in magnam ob id apud plerosque factionis ejusdem invidiam conjectum destituit; seu subire ipse malam cum Maximiliano gratiam noluit; seu labefactato ejus animo ab iis, qui Commendoni dignitati invidentes, apud Gregorium artium regendæ Reipublicæ vt in novo principatu non peritissimum, illum quasi correctorem, obrectatorémque actorum ejus criminabantur. Sed utramque ipse injuriam magno animo tulit, & adversarium, à quo petitus lite fuerat, constantissime sustinuit: & quod vnum de Republica ei restabat Senatorium munus gravitate morum, prudentiæ laude, atque vfu maximarum rerum, & exterarum nationum notitiâ ita implebat, v nemo eum in civitate aut opinione virtutis, aut famâ vitæ perhonestâ, ac decorâ actâ anteiret; nullius sententia, sive in privatis Cardinalium cœtibus, cùm de mandatis à Pontifice rebus consultaretur, sive in Senatu gravior, liberiôrque haberetur. Et quibus rebus diminuturos se quidam dignitatem ejus, validum ei adversarium excitando, sperarunt, iisdem, quod sæpè fit, auxerunt, clarisque, ac fidelibus amicitiiis munierunt. Nam duo nobilissimi, & in Senatu longè cæteros claritudine, atque opibus suis, suorumque eminentes viri, Aloysius Estius Ferrariensis, & Ferdinandus Medices Florentinus Cardinales, quorum fratres in sua quisque civitate Regnum obtinebant, æmulatione potentiæ à Farnesio dissidentes, ita se junxerunt Commendono, vt de eo Pontifice

Fff ij

Maximo creando consenserint, ad stipulatoresque consilii sui Alexandrum Sfortiam, & Flavium Ursinum, & Marcum Altempsium Cardinales, quorum magnæ erant in Senatu opes, haberent. Et Estius quidem, qui Regiâ liberalitate, ac Regio vitæ cultu, & blandis, & ad insinuandum se in hominum animos compositis moribus maximè & civitatem omnem, & Patrum partem maximam devinctam sibi officiis, beneficiisque habebat, cum sponte suâ, & præcipuo erga Commendonum studio, tum Henrici Galliæ Regis jussu (erat enim Estius Gallicæ factionis Romæ princeps) in id consilium penitus incubuerat. Et cum ægrotare aliquando Gregorium, & inde periculose laborare emanasset, ita eodem circum-eunte, & summâ ope adnitente Estio rem composuerant, ut si concessisset tum fato Gregorius, non dubitaretur, quin eum Pontificem Maximum renunciaturi fuerint. Sed & Gregorius convaluit, & Commendonum paucos post annos morbus oppressit, de quo antequam dicamus, pauca de quibusdam moribus ejus differere operæpretium fuerit.





*De quibusdam moribus ejus.*

## CAPUT XIV.

**V**ITÆ, ac morum gravitatem à puero susceptam, atque adeo insitam ingenio ejus perpetuò retinuit: imbecillâ adhuc ætate neque cum æqualibus ludere, neque puerilia facere vnquam sultinuit. Adultior non conviviis, non spectaculis, aut vllis juvenilibus studiis deditus, majoribus natu, atque his probatoribus applicare sese in more habuit. Vir & risûs, & joci parcus, salibus, & aculeis promptior, maximè ironiis, quibus jucundè exagitare familiares, & interdum figere irritantes solebat; in quo vel intemperans interdum est visus, dum parato, ac celeri ad respondendum ingenio parum moderatur, vt sæpè multos acumine dictorum perstrictos acrius offenderit, ab seque alienaverit. Humanitatis, & mansuetudinis laudem magis meruit, quàm tulit: nam sicuti inexpertis æquo plus gravis, ac severus videbatur, ita tractantibus commodus, affabilisque fuit, & in eo, ne quod humanitatis officium, quod vlli deberi videretur, prætermitteret, diligens, ac propè nimius. In sacrorum disciplina, atque institutis Christianæ religionis pietatem diligenter, ac studiosè, non purè solùm, & castè coluit. Rem di-

Fff iij

vinam & frequenter, & summa cum religione, ac ceremonia faciebat, & à suis pro domestica disciplina inviolatè exigebat, vt sapiùs per annum confessione delictorum, pœnitentiâque expiati divinam sumerent hostiam, quam ipse singulis suis manibus peracto sacro porrigebat: iisdem ægrotantibus ipse afferebat; omnesque sumptus, omniâque Christianæ charitatis officia præstabat. Sed qui innocentiam morum, & totius vitæ sanctitatem propè singularem per omnem ætatem præstitit; quique divinarum rerum studiis deditos, piisque, & religiosis juvenes institutis peramanter amplecteretur, vfu, benevolentia, obsequio tueretur; nec vllam in hominum vita laudem honestati, ac pudori anteferreret: idem respuebat ostentatores quosdam pietatis, qui specie rei, quàm ipsâ re magis delectati, opinionem modò hominum, existimationemque venantur, & videri, quàm esse pii, probique malunt; & hoc artificio, ac simulatione religionis, ac modestiæ, cujus imaginem ore tantùm, atque habitu exprimere conantur, ad opes sese, atque honores callidè sæpè insinuant, quibus in ipsis ita se gerunt, vt rei maximè augendæ intendant, sumptibusque, ac splendidiori cultui, non modestiâ, sed cupiditate parcant, & sordes animi, atque avaritiam falsis frugalitatis, & parsimoniæ vocabulis tegant; & plerumque tenaces, ac restricti moderatos se, ac paucis contentos ferri volunt. Hos ille & aspernabatur, & arguebat, religio-



nis laudem non fictis pietatis studiis, nec inani ostentatione sanctitatis, sed mentem Deo puram, castam, piam præbendo, & externæ ceremoniæ, externo cultui, externis actibus habitum animi æquando haberi ferens. Voluptatum omnium ultra fidem abstinentissimum ne malevoli quidem, & obrectatores ejus negabant: ut id ipsum ei vitio verterent quidam, quod ne concessis quidem oblectamentis, veluti sensibus alienatus, reficeret animum, continentiam, & meliorum studia rerum stuporem, tristitiâque appellantes. Nos quod diuturno, & domestico usu perspectum habemus, verè possumus de illo affirmare, siue hoc naturæ fuerit paulò austerioris, siue pertinax studium suscepti instituti perpetuò retinendi; remittentem quidem animum, hilaréque, & jucundè cum amicis, & familiaribus suis jocantem, agentemque persæpè; ad vllum genus voluptatis, quod non modò turpitudinis, sed vel mollitiæ, vel levitatis suspensionem haberet, descendantem vidimus sanè numquam; ne ad ea quidem, quæ concessu ejus capere suis liceret. Verùm qui non aucupio, non venatu vlllo vñquam tempore fuerit delectatus, obequitare sylvas, saltusque, altissimos conscendere montes, nullâ viarum asperitate retardante, atque omnes vbique captare prospectus ad fastidium vsque comitantium solebat, à quibus laboris tædio sæpè relictus, neque ferebat ægrè, & porrò pergebat nihilominus, quò lustrandi cuncta studium rapuisset. Gaude-

bat etiam, si quando agasones ipsos, ac servos à pedibus ipse anteiens fatigasset; atque huic generi voluptatis per omnem ætatem intemperanter indulgit. Naturâ ad iram pronus, ac si frænum laxasset, præceps fuit; sed ejus laudum haud postrema hæc fuerit, quòd imperum animi effervescentis ita comprimere, ac domare assueverat, ut, quod paucis contigit, iram in potestate haberet. Inimicitias, ac simulates, quamvis laceffit, ac læsus, sustinuit magis, quàm exercuit: collegas in publicis muneribus, legationibusque clam invidentes, atque obtrectantes sibi ultro laudibus apud Pontifices Maximos, ac testimoniis prosequabatur, eaque moderatione sæpè communis industriæ gratiam solus tulit. Asperior adversantibus, pervicaciórque est habitus: nam contra voluntatem ejus acriùs tendendo vel ad iniqua pepulisses potiùs, quàm per vim ab invito, ac repugnante ne jus quidem extorqueres, inque eo non ratio, non utilitas, non auctoritas, non respectus cujusquam valuisset; unde parvas ob res, & quas ipse alioquin floccifecisset, gravia certamina, & in quibus de summis rebus periclitaretur, aliquando subivit. Idem cedentibus adeo facilis, placabilisque, ut vel ultro plurimùm de suo jure, si prece aggredieris, remitteret.



De



*De constantia ejus adversus potentiores.*

## CAPUT XV.

**Q**Uo tempore Germaniam Episcopus obiit, ut eam gentem ad Concilium exciret, diverſante eo apud Joachimum Brandenburgium, vnum è Germaniæ ſeptemviris, qui Cæſarem eligunt, magiſtri ſacrorum ex Lutheri diſciplina, in quam ipſe traductus ab iis Regulus erat, cœnantibus ex conſuetudine adſtabant, ſeu juſſi ut ſermones de divinis rebus ſererent, ſeu ſponte, ne quid Joachimi animum Commendoni oratio permoveret. Horum vnus, nomine Abdias, ex vſuali-quot jam dierum audacior factus (& eſt omne illud genus mirè confidens) effutierat temerè quædam de Romana Eccleſia, eamque adverſam ſemper, inſenſamque Germanis fuiſſe, gravibûſque incommodis gentem affeciſſe memorabar. Tum enimverò Commendonus, quamquam in hæretici Principis domo, in hæreticorûmque poteſtate eſſet, tamen hominem ſeverè increpuit, nec petulantiam modò ejus caſtigando retudit, ſed multis repetitis ex annalium memoria beneficiis, quibus auctam, ornatamque Germaniam à Pontificibus Maximis oſtendit, poſtremò verſus ad Regulum ipſum, Quid multa, inquit, quòd familia tua, ac tu ipſe ſeptemvirali iſto honore

Ggg

» inter cæteros Principes Germaniæ emineas, an  
» alteri, quàm Romanæ Ecclesiæ referre acceptum  
» debes? Commotus eâ oratione Joachimus, vt erat  
» vir perhumanus, ac mitis, consurgens, ac detra-  
» cto pileo caput aperiens, qui maxime veneran-  
» tium mos est, Id quidem, inquit, ego & fateor,  
» & præ me fero, maneréque apud me, filios, post e-  
» rósque meos memoriam huius beneficii, hono-  
» rísque familiæ nostræ habiti sempiternam cupio:  
» & conversus ad Lutheranum illum Germanicè,  
» Hic te, inquit, egregiè, & sanè jure, vt mihi  
» quidem videtur, corripuit; nam hospites ne in-  
» clementiori quidem verbo violare decet. Sed an  
» vides animi vim nihil pro sua ratione, ac pro di-  
» gnitate Romanæ Ecclesiæ formidantis? quid pu-  
» tas facturum, si dicere ista Romæ ausus esses, qui  
» ne in nostro quidem Regno, domoque dici im-  
» punè patiatur? Iter ad Maximilianum Cæsarem  
» Pii V. missu habens, Oenipontem cum advenisset,  
» Ferdinandus Cæsaris frater, cujus imperio qui  
» Rhetias Alpes incolunt, populi parent, sive occu-  
» patus hospitem aliorum adventu; nam aliqui tum  
» fortè apud eum Reguli Germanorum erant, læta  
» pro more gentis convivia celebrantes, sive per in-  
» curiam, non obviàm itione, non hospitii, non de-  
» nique ullius officii honore, quod & mos, & di-  
» gnitas ejus postulabat, aut advenientem affecit,  
» aut abeuntem est prosecutus. Post paucos inde  
» menses actâ, vt docuimus, legatione rediens  
» Viennâ in Italiam, cum flectere aliò, aut decli-



nare Oenipontem nequiret, quamquam Ferdinan-  
 dum intellexerat correcturum, quæ prius præter-  
 miserat; tamen ad oppidum manè summo, ante-  
 quam lucefceret, cum sequenti die venturus pu-  
 taretur, accessit, transgressusque milliæ vnum  
 ad monasterium quoddam divertit. Presto fuere  
 à Regulo missi, qui hospitaliter in Regiam invi-  
 tarent, excusarentque inopinato adventu ejus fa-  
 ctum, ut honor illi, qui deberetur, advenienti  
 habitus non fuerit. Commendonus suo se vsurum  
 hospitio respondit, & pransum iter porrò perse-  
 cuturum, & gratias Ferdinando, & salutem ab se  
 referre eos iussit. Veritus Ferdinandus, ne & in-  
 officiosus in Pontificem Maximum, & alienior  
 à viro commendatione virtutum imprimis claro  
 haberetur, & qui se ab elato animo cuius Re-  
 gum honore, atque amplitudine æquari vellet, ne  
 agrestis atque illiberalis notam subiret, si nullo  
 cultum officio, ac ne visum quidem virum talem  
 abire pateretur; ipse conscensus equis magno co-  
 mitatu in monasterium ad Commendonum ve-  
 nit, fuitque plures cum illo horas, atque huma-  
 nitate animum permulcere est conatus. Tum de-  
 mum certavit officiis cum eo Commendonus,  
 ita ut & Ferdinandum prioris negligentia pœnite-  
 ret, & uterque renovatâ gratiâ latari videretur.  
 Sed cum dignitatis suæ retinens, tum verò ut eâ  
 decederet, nullius aut gratiâ, aut metu adigi se  
 patiebatur. Henrico Polonorum Rege creato, ut  
 ostendimus, & Ernesto præterito Maximiliani

Ggg ij

Cæsaris filio, Commendoni adversarii, & Maximiliani ipsius Legati, quo à se averterent, culpam omnem ejus repulsæ in Commendonum contulerunt, propensioem eum in Galliam fuisse, atque illi omnibus suis studiis favisse criminantes, dictis eorum facile exitu rei fidem astruente. Hæc Cæsar seu credidit, seu causam hanc erratis suis, suorumque obtenderet, graviter, atque acerbè de Commendono, tamquam ab eo filius honore dejectus esset, querebatur: eoque iræ processit, ut redituro è Polonia per Joannem Delphinum Episcopum Torcellanum, Pontificis apud se Nuncium denunciari jusserit, non modò ut Viennam ex itinere non attingeret, ubi Regiam ipse habebat, sed Austriæ quoque finibus abstineret. Eterant Commendono alia æquè commoda, nec longiora itinera, quibus in Italiam rediret, & qui cum illo erant, precibus eum hortabantur, ut per Bohemiam in Bavariam ad amicissimum sui Regulum, & perhumaniter invitantem diverteret; Austriam omitteret vel benevolo Cæsare, Pontificum Legatis defectione à Christianis sacris satis infensam. Sed ille neque dignitatis suæ esse Cæsari in eo parere, & culpæ, aut certè timoris confessionem habiturum aliò deflexum iter ferens, non Viennam modò rectò itinere perrexit; sed etiam triduum in suburbano monasterio sacrificii causa, quod Kal. Novembris solemne incidit omnibus Divis, est immoratus, quò ad eum visendum multi præstantes viri, & omnes, qui Viennæ e-



COMMENDONI CARD. 42,

rant, Regum Legati convenere. Et ipse, ne quid ab se de pristino instituto, aut animo commutatum videri posset, per eundem Delphinum interrogari Cæsarem iussit, an ab se adiri, ac salutari vellet. Quo congressum declinante, ipse incolomis inde, nullo aut dicto, aut facto violatus, nihil dignitate suâ indignum vnquam passus in Italiam transiit. Ab eadem legatione redeuntem Romam gravis cum potentissimo homine controversia excepit, quam ipse animo haud quaquam ab se discrepante & subiit, & gessit. Abbatiam Veronæ vberrimi vectigalis vacuum fortè Andreæ Cornelii morte Commendono Pius V. tradiderat. Eam Alexander Farnesius Cardinalis ad se rediisse certo jure contendebat: sed sub Pio severitatem judicii, quod ei de manifesta fraude, quam confidentiam vocant, intendebatur, veritus, juratus cesserat causæ. Mortuo demum Pio, non tam jus, quod nullum erat, quàm dolorem, atque iram prioris judicii lite prosequabatur, Gregorio novo Pontifice permittente. Et Commendonus injuriam illam, & imparem cum homine tantis fortunis, copiisque circumfluente contentionem à Gregorio, quem esse in adversarium prioniorem, ac sibi minùs æquum senserat, ut deprecaretur adduci non potuit, diligentiam se, ac bonitate causæ adversarii potentiam æquaturum sperans; quin vehementer pro se litteras Regis Galliæ manu ea de re ad Pontificem scriptas reddi vetuit. Is erat Farnesius nepos Pauli III.

Ggg iij

Pontificis Maximi, summi viri, & cui summæ laudes consilii, & sapientiæ deberentur, si eas publico bono habere, quàm in filii, nepotumque augendis opibus pessimo publico omnes impendere maluisset. Quo in studio adeo nimius fuit, ut qui Reipublicæ præclare gesta famam ferre potuerit, laceratæ, atque distractæ invidiâ gravissimè laborarit. Nam Petrum Loysium filium inde ante Cardinalatum concubinâ susceptum, primò Camertibus dominum imposuit invitis, & in pristino jure, quo in fidem, ac ditionem Romanæ Ecclesiæ redierant, manere cupientibus. Eidem castrum, aliquotque præterea oppida haud longè ab vrbe sita contribuit: postremò Placentiam quoque, & Parmam, valentissimas vrbes summâ virtute à Julio II. Pontifice Maximo Regibus, à quibus occupabantur, ereptas, & adversus descendentes ab Alpibus barbaras nationes pro muro objectas tradidit: inque ea re adeo Rempublicam ludibrio habuit, ut cum pro iis Camerinum reddi sibi voluisset, Senatusconsultum fieri cum ea perscriptioe jussit, eam permutationem utilem Reipublicæ videri. Quo in loco nos præterire nolumus Marini Grimani Cardinalis contumax quidem adversus Pontificem, ac defectioni proximum, sed utile pro Reipublica fortè consilium, si perductum ad effectum fuisset. Istum iis vrbibus Legatus cum imperio præerat, atque adeo rem non probavit, ut jussu eas Petro Loysio tradere, nec statim paru-



erit, & palàm juraverit, si prompta sibi decem aureorum millia militibus ad oppidorum custodiam scribendis fuissent, audientem se Pontificis dicto non futurum: sed sublato edita in turricum geminis clavibus insigni Romanæ Ecclesiæ vexillo, vrbes in potestate sua, & futuri Pontificis habiturum. At Paulus ad eam denique magnitudinem extulit filium, vt nec Carolus V. nec Henricus II. summi Christiani nominis Reges infra fortunæ suæ fastigium duxerint socerum eum filiarum suarum videre. In Pontificis enim gratiam Octavio Petri Loysii filio Margarita Caroli Cæsaris, Horatio Octavii fratri Diana Henrici Regis Galliæ filia, sed neutra iusto matrimonio genita, nupsere; in quibus ornandis, Regiôque cultu pro sua, parentumque amplitudine habendis Paulus ingentes pecunias effudit, atque eò inde spes, & cupiditates suas extulit, vt Mediolanensium Imperium, de quo internecino bello inter Gallos, Cæsaremque certabatur, transferre in domum suam appetierit, deque eo tentare Cæsaris animum non sit veritus, cum illo apud Cremonam congressus. At statim Pontificatu inito, Alexandrum Petri Loysii item filium, & Ascanium Sfortiam Constantiâ ejusdem Petri Loysii sorore ortum, ac paulò pòst Ranutium quoque Alexandri fratrem, pueros omnes, quorum nemo xv. annum attigerat, Cardinales creavit, opulentisque beneficiis, ac sacerdotiis ornatos, amplissimis Romanæ Ecclesiæ muneribus præpo-

fuit. Nam Alexandrum, in quem fuisse proclivior est visus, Vicecancellarium, Ascanium Camera-  
rium, Ranutium Pœnitentiarium fecit; & maxi-  
mè Alexandrum tantis adauxit, & cumulavit di-  
vitiis, tantis circumsepsit præfidiis, ut cum ne-  
que honores nisi per eum impetrari ab se pate-  
retur, ac sacerdotiorum ditissimum quodque aut  
differret ad eum, aut in alios conferens eam adjun-  
geret conditionem, ut iis fato perfunctis, qui ab  
se accepissent, ad Alexandrum inde ea redirent,  
vnus omnem propè civitatem beneficiis obstri-  
ctam, latissimèque propagatas clientelas, amici-  
tiâsque haberet, ac in eo ordine potentiorum  
hominem ætas nostra non viderit. Cum hoc igitur  
controversia, atque lis Commendono inter-  
cessit, tenuitque vltra biennium; irritati enim  
animi vtrique erant, quòd sub Pio Farnesius  
cui Commendono congressus, non debere quem-  
quam adeo præsentibus rebus, gratiæque confi-  
dere, quin cogitaret mutari cum Pontificibus  
tempora solere dixerat: Commendonus, & ita id  
quidem esse responderat, & optimè omnium sci-  
ri ab his, qui aliquando propinqui Pontificis, &  
potiti rerum fuissent. Id Farnesii animum elatum,  
tumidumque altè penetravit, eoque magis vrebatur,  
quòd appeti, ambiri, rogari fuerat Commendonus  
ne ad colloquium quidem ea de re se-  
ctum vnquam se demississet. Itaque Farnesius a-  
mico agenti cum eo, ut ne pergeret indecoro ju-  
dicio seque, ac virum magnæ in civitate existima-  
tio-



mationis conflictare, responderat, Ita tractor ab illo, vt si ipse Farnesius esset. Commendonus quoque cum familiarium, & amicorum intimis consiliis stimuletur, vt aliquem finem tam impari dimicationi imponeret, quod haud difficile esset futurum, si modò imperare ipse sibi posset, vt Farnesium comiter appellaret, tuncque domi conventum prece, & commodâ oratione aggredere, ille moriturum se prius, quàm id faceret, affirmavit; quippe nec à Pio illud se petiisse sacerdotium, & ultro traditum nemini alteri acceptum laturum: ipsum Gregorium se Pontificem Maximum, qui eam sibi injuriam patiendo fieri fecisse dici posset, deprecari noluisse; supplicem Farnesio iturum? Iudices aut per suos quæ in rem essent edocebat, aut per amicos, magnæ viros auctoritatis, officii admonebat, continebátque, vt causæ, non gratiæ essent. Ipse eos aut blandiùs appellare, aut prehensandi, & conciliandi causâ domi convenire numquam sustinuit: quod Farnesius, tanti vir fastigii, factitare curru circumvectus non est veritus; adeo elatos hominis spiritus sibi ira, & cupiditas submiserant. At Commendonus hunc tenuit semper modum, vt neque dicto, factove vlllo adversarium læderet, quòd & vitæ institutis, & personâ illâ alienum duceret, vllas inimicitias, aut similtates exercere, & jus, atque causam adeo intento studio, constantique decreto defenderet suam, vt quantum opibus adversarius excelleret, tantum supera-

Hhh

ri industriâ videretur. Initium agendi de compositione tandem à Farnesio est ortum Commendoni perseverantiâ fesso, & diffidente jam etiam causæ, & maximè invidiâ commoto, quam inde excitatam sibi inter Patres senserat. Igitur interpretibus Alexandro Sfortia, & Nicolao Caëtano Cardinalibus, ex auctoritate Gregorii reconciliata inter eos concordia est, magnopere confirmata opinione, quæ de Commendoni animo excelso, & adversus aspera obfirmato antea quoque erat.

---

*De more ejus numquam se purgandi, de quo conscius sibi non esset.*

## CAPUT XVI.

**S**IQUEM alienatum à se suspicione aliquâ, aut malevolorum artificio, non vlllo suo merito comperiisset, ei ut errorem eximeret, aut se, de quo offensum illum sensisset, purgaret numquam adduxisset. Paulo IV. Pontifici Maximo inter paucos è familiaribus carus, acceptusque fuit prorsus, ut ferri in finu videretur. Initio scribendis epistolis ascitus, mox ad Cæsarem, ad Italiæ Principes, ad Venetos missus; crebris Pauli testimoniis fides, industria, sanctitas est juvenis celebrata, ut jam non dubitarent homines eum ad Cardinalatum usque proferre. Itaque bello inter Pontificem, & Hispanos exorto, ad concitandos in societatem armorum



Venetos mittitur. At qui ejus spei invidebant, facile Carolo Carafæ persuaserant, vt juvenem acrem, & si Cardinalis fieret, nequaquam ei obnoxium futurum, & magnâ Pauli gratiâ, ejusque itineribus euntem vltra crescere ne pateretur; & ipsi jam Carolo inquinatissimè, ac perditè viventi suspecti graves, atque integri Commendoni mores erant. Ab eo igitur insimulatus apud Pontificem est, quasi in Hispanorum causam inclinatione voluntatis propenderet. Reversus Romam, cum & quo mendacio offensus, & alienatus ab se Paulus sciret, & criminis ipsius facilis ei inficiatio, ac depulsio esset futura, nec clausus, si niti voluisset, ad se purgandum aditus, & amici hortarentur adire Pontificis ipsius aures, pertinaciter abnuìt innocentie fiduciâ, & conscientiâ tutus, & Paulum obsessum à suis alienâ jam voluntate regi, agique intelligens. Quo tempore in Polonia Nuncii Apostolici munere fungebatur, apud Augustum Regem magno in honore, ac dignatione fuit. Nam non aditus modò ad eum patuit quoties, & quo tempore voluit: sed vltro sæpè accersebatur, atque de omnibus privatis, ac publicis rebus cum eo Rex communicabat, & frequenti, & perquam familiari consuetudine ejus delectari, & consilio, prudentiæque ejus tribuere plurimùm videbatur, multique studio, & commendatione illius ad honores, magnamque fortunam sunt proveci. Arrepta hinc malevolis quibusdam obrectandi ansa,

H h h ij

& cùm Augustus repudiare vxorem flagrantissimè cuperet, consiliâque illa agigaret, de quibus à nobis suprà commemoratum est, rumorem distulere, à Commendono Regis conatum adjuvari; eâque suspicio ita est apud Reginam, Cæsaremque fratrem illorum obtrectatione, artificioque confirmata, vt Cæsar Andreæ Duclitio Episcopo Quinque-Ecclesiensi, & Cerzbachio Slesio, claris viris, quos Legatos de sororis rebus ad Augustum misit, mandarit vt nullius rei, quæ ad Reginam pertineret, Commendonum participem haberent. Legati cum eo sæpè congressi de aliis rebus satis pro consuetudine, & more inter se Legatorum, de Regina, cujus de causa venerant, nullum vquam verbum. Sensit Commendonus eâdem opinione imbutos, quam ei confessa de se Regina fuerat: & quamquam vnus jam tempestatem non sustinuerat modò, sed etiam excusserat, cùm Regis impetum remorando, cohibendoque, tum deterrendis iis, qui altores cupiditatis ejus putabantur; tamen neque Legatis se, neque per eos Cæsari purgare sustinuit, nec omnino mentionem vllam Reginæ apud eos facere: donec Legati ipsi, per se compertâ re, ac perspectâ, ad Commendonum venerunt, litterasque ei Cæsaris manuscriptas reddiderunt, quibus fide, pietate, industriâque ejus collaudatâ, multis & honorificis verbis gratias ei agebat, testabatúrque quàm grata sibi ejus in sororem, seque, & Austriam omnem familiam officia fuissent, quamquam sciret ea



magis ex religione, ac fide sua, quàm gratiæ causa cujusque suscepisse. Exinde Legati nihil nisi de sententia, & consilio ejus egerunt. Ab vltima legatione Romam reverso cum idem Maximilianus Cæsar ei haud minùs gravi ex causa vehementius succenseret, quòd in petitione Regni Poloniæ, vt antè memoravimus, favisse Henrico Galliæ Regis fratri, filiùmque suum dejecisse insimulareretur, Gregorius Pontifex, qui tueri fidem Legati probatam, perspectamque sibi debuerat, destituit, & quantum in ipso fuit, à se rei invidiam in Commendonum derivavit. Eo non Maximilianus solùm, sed Hispani etiam, & Philippus, cujus Romæ magnæ, ac propè nimix sunt opes, offensiores in eum esse videbantur: quod neglegendum Commendono nemini amicorum videbatur, auctoresque erant, vt Gregorium, quando tam ingratus in se fuisset, vlcisceretur, & vtri-que Regi mandata, quæ ab ipso accepisset, produceret. Nullius nec precibus, nec auctoritate vinci potuit vñquam, vt se vlli eorum, quod ei facile, explicatùmque futurum fuit, de Polonicis comitiis purgaret, non Regum se, sed Pontificis Legatum fuisse ferens, ei quidem satis fidem probasse suam, cæteri quid opinarentur non ad se magnopere pertinere. Præterquàm quòd non debere se aiebat malo publico persequi privatam injuriam, & Pontificem Maximum, quamquam sibi parum æquum, cum Christianis Regibus committere, quin ambitionis, aut cupiditatis opinio.

H h h iij

nem subitum, si quos non læserit, iis satisfacere, eorum affectare gratiam videretur: nec ullam excusationem aliquā culpæ suspitione vacare, & culpam qui præstant, excusari non debere. Nec eum constantis, ac rectæ mentis fiducia fefellit; uterque enim Rex, ut veritatem ferè dies aperit, fide ejus perspectâ, & litteras ad eum reconciliatæ gratiæ pignus postea dedit, & Rex Hispaniæ Apostoli Philippi in Phrygia pro fide erga Christum Deum interfecti os brachii, ad templum, quod ei Divo ædificabat, ornandum, sanctiusque eâ reliquiâ corporis ejus reddendum, dono dari sibi à Commendono postulavit. Eam ipse è Germania ex æde Marthæi apud Treviros de sacerdotum, qui fano præerant, voluntate detractam in Italiam cum aliis multis attulerat, & petenti Regi argenteâ inclusam thecâ in Hispaniam perlibenter misit, à quo quidem ritè, atque castè suscepra suo in templo reposita est.

---

*De abstinentia ejus.*

CAPUT XVII.

UT sui minimè profusus, ita alieni abstinentissimus fuit. In frequentibus legationibus, quas, uti docuimus, pro Republica obivit, cum veras innocentiae, atque integritatis laudes externis nationibus, quas infatigabili cursu peragra-



vit, ostendit, tum maximè abstinentem in omni re non se solùm, sed suos etiam præstitit. Cùm ampla illi, latèque multarum rerum potestas, & major quàm pro more propter spectatam ejus fidem, & diligentiam ferè permitteretur, hujus vsus potestatis ita ab omni semper quæstu abfuit, vt nullus à quoquam teruncius cuiusvis rei diploma auferente insumptus vmquam sit, ne pro scriptura quidem, atque opera. Ac si quando res cogere videbatur, ne neglectæ legis multa remitteretur, eam ipse multam aut templis, aut egentibus esse jubebat. Siquem suorum accepisse quicquam ab vlllo provincialium quamcumque ob rem comperiisset, statim cum ignominia domo exigebat; nec minùs iis irascebatur, qui dedissent: magnam verò ab eo gratiam inibat, qui delatum ad se donum rejecisset, idque ipse pro suis facultatibus remunerabat. Quà disciplinâ est consecutus, vt & amarent eum sui, & veneratione, & exultatione ejus perinde, ac suæ studerent. Cujus rei experimentum, fructumque per jucundum aliquando cepit. Provinciâ decedens vsus in itinere hospitio est Archiepiscopi cuiusdam, fortunæ viri amplissimæ, & copiis, & opibus magnis præditi, sed qui senserat se Commendono suspectum, quòd parum sincerâ fide Catholicæ religionis partes tueri, conjunctiùs, & amantiùs cum hæreticis vivere, quàm Archiepiscopum deceret, diceretur. Eò impensius huic tegendæ, aut abluendæ famæ, hospitem eum magni-

ficè, ac splendide acceptum omnibus humanitatibus, & comitatus officiis percoluit. Abeunti cum non solum ipsi argentea vasa magni ponderis obtulisset cum pertinaci obtestatione ut acciperet, sed familiaribus quoque ejus singulis pro cujusque fortuna munera eodem tempore dari jussisset, nemo inventus est qui acciperet, ne coeci quidem, aut ultimi ministrorum. Eares Comendono oppidò perquam grata accidit læto respondisse institutis suis mores omnium suorum, nec ambitiosi hospitis largitioni cujusquam cupiditatem patuisse. Atque hujus ipse continentiae permulta, & magna documenta dedit, & qui locupletare se nec injusto, nec infueto aliis compendio potuit, gloriam, quam divitias ferre è publico ministerio satius habuit. Ego ne, quod longum esset, singula enumerem, duo tantum exempla subjiciam. Cum in Germanica legatione, in quam Episcopus ad Concilium indicendum est missus, ad Joachimum Brandenburgensem Regulum, unum è septemviris, qui suffragiis suis Cæsarem creant, & ipsum Lutheranâ doctrinâ, factioneque imbutum venisset, ut supra docuimus, summoque apud eum in honore fuisset, discedentem ille regiâ munificentia prosequi cupivit. Nam equos eximios quatuor, varii usus argentea vasa, atque in his ex argento item, sed auro superinducto pateras binas notabilis magnitudinis, ac ponderis, Germanico factas opere, quibus illi solemnibus potant dapibus, horologium



summi artificii, quo magnopere Germanorum ingenia gaudent, excelluntque, adjecit, & aureos nummos quingentos, præfatus haud ignarum se quantis sumptibus qui procul ab domo peregrinantur, hauriri necesse sit. Ex his Commendonus nihil accepit, atque contendenti Regulo, & pudori sibi sua spreta munera fore querenti non cessit, professus rem modò ab se remitti, gratiam rei perlibenter accipi. Cùm item è Polonia novo Cardinalatûs honore insignis in Italiam proficisceretur, Augustus Rex indecorum sibi existimans, si virum eâ dignitate è Regno suo decedere nullâ suâ liberalitate vsum pateretur, per Petrum Miscovium Episcopum Plocensium, vnum è Poloniae proceribus, ac tum principem apud eum gratiæ locum obtinentem, diploma ad eum Regiis signis, atque chirographo consignatum misit, quo ei annum vectigal duorum millium Ungaricorum duabus solvendum pensionibus constituebat. Quo quidem diplomate testabatur Rex id quod res erat, non sibi ante eum diem studium bene, ac largiter merendi de viro tali defuisse, sed ipsum obtinuisse voluntati suæ omnia repudiando. Quod tum quoque contigit. Nam Commendonus, quamquam ei pro novæ dignitatis splendore pertenuis, atque angusta res esset, ramen gratias simul, & diploma ad Augustum referre Miscovium iussit, pulchrè quidem mereri, sed pulchrius contemni Regum dona existimans. Sed Rex de eo litteras ad Pontificem Maximum de-

dit, nec destitit, donec Pontificis adactus imperio Commendonus munus Regium recepit. Ita factum, ut & liberalitas Regis, & Legati abstinentia egregiè constiterit. Hæc, atque alia huiusmodi multa abstinentis, atque integri animi documenta eò majori admiratione accepta, celebratæque sunt, quò nos antea gravius & cupiditatis infamiâ apud exterarum nationes premebamur. Nec parva in iis alienatarum gentium culpa residere creditur, qui ad eas in fide, atque in antiquæ sanctitatis officiis continendas missi, ita se turpium quæstuum, atque avaritiæ sordibus contaminarunt, ut Romanum nomen in magna inde acerbitate, atque invidia externis gentibus posuerint. Quæ maximè vnius virtute, atque abstinentiâ deleta macula est.

---

*De habitu corporis, & valetudine,  
& morte ejus.*

CAPUT XVIII.

**S**TATURA fuit justâ, erectâque, & minimè tardoincessu, facie decorâ, magnâque gravitatem, ac dignitatem præferente, colore subfusco, sed florido, & fere rubentibus genis, barbâ, capillorque denso, & admodum nigro; nigris item oculis, vegetisque, & acutâ, ac celeri acie; naso paulò eminentiore, & qui subridenti spontè, ut notari posset, moveretur: aures item mo-



biles habuit, & parvas, dentes raros, & minutos, adeo ut ultimâ ætate ab inferiori gingiva vix extarent: reliquis membris teretibus, & validis fuit, & toto corpore optimè constituto, ac firmo. Vini, cibique juxta modici, sed quem avidè, ac properè lumeret, neque in eo vlla lenocinia quærebat, vulgari, ac parabili contentus; somni adeò potens, ut & statim caperet cum vellet, & quacumque destinasset horâ abrumperet. Valetudine per omnem vitam est usus prosperrimâ: quippe cum omnes Europæ provincias durissimis sæpè anni temporibus peragrasset, omnes itinerum labores, omnia peregrinantium incommoda pertulisset, languentem de viâ, aut vlllo labore fatigatum nemo vnquam vidit; sed nec febrim vnquam sensit, nec vlllo decubuit, aut omnino magnopere laboravit morbo, nisi quòd interdum animo linqui ad breve spatium solet: quod tum ferè fiebat, cum aut missum sanguinem, aut recens aspexisset vulnus, aut etiam cum acrior cura animum ejus versaret; sed si vel paulum modò quateretur sopitus, vel frigidâ aspergeretur, statim excitabatur, nihilo pristini vigoris deperdito: vnde neglectum ab ipso, ac ne indicatum quidem medicis est malum; adeò in nulla suspitione comitialis, aut omnino vllius gravioris morbi habuit. Ingravescente ætate vires sumpsit, & cum antè vix quinto aut sexto quoque anno semel sentiretur, jam frequentius, graviusque infestabat, nec tamen lædere vlla ex parte,

aut infirmare pristinum robur valetudinis videbatur. Sed insidiosum virus in occulto gliscens, animo quàm corpori infestius grassari, atque ipsam sensim corrumpere, ac labefactare mentem, magis mirantibus ingenii, morum, naturæ, vitæque mutationem, quàm satis intelligentibus causam, qui ei in domestico vsu, ac familiaritate eramus. Quotidie molestior, iracundior, & sui impotentior fieri: quocumque cupido impulisset, non ipse se inhibere, non alij moderari poterant; ipsa excellentissimarum virtutum ornamenta, quarum gloriâ floruerat, elanguescere, atque ad eò in contrarium verti, & ingenii vis omnis hebetari in dies videbantur, & ex diligenti medicorum consultatione adhibita remedia morbi vim, contumaciâque irritarunt; tanto enim impetu mox erupit, ut voce, spiritûque abrepto, diu pro mortuo jacuerit, nec igne, nec ferro adhibito excitari, revocarique malo obruti sensus potuerint, donec ipsa per se desæviente, ac remittente peste, revixere tandem, ac suus corpori vigor rediit. Mens exinde illi nunquam satis constitit, maximè ea pars dilapsa est animi, quæ reliquarum custos ingenii partium dicitur, ut viciatâ, penitusque extinctâ memoriâ, quâ antea summâ, & admirabili fuerat, & sui, & aliorum oblivisceretur. Quia solitudine maximè conturbari, afficique videbatur, adhibiti assidui custodes, qui cogitationibus defixum serendo sermones variè detinerent. Et ipse sicuti suâ sponte haud facillè silentium abrupisset, ita illatum ab



alio sermonem arripiebat, protrahebátque spatian-  
do, ac loquendo longissimè, eadem assiduè repe-  
tens; nec rem cœptam vnquam omisisset, nisi  
novo injecto sermone aliò de industria traductus  
fuisset, in eo semper insistens quod novissimè sub-  
jectum esset, priorum penitus immemor: nec ta-  
men seu narraret aliquid, seu differeret, ordinem  
non tenebat, ac ne solito quidem acumine ora-  
tio ejus carebat, sententiis quoque, verbisq̃ apta,  
& cohærens, & si res postulasset, etiam salibus,  
jocisq̃ distincta, sed iisdem se semper revolvens.  
Atque in hac miseria annum ferè transegit, mise-  
rantibus, & lacrymas ægrè comprimentibus qui  
in colloquium ejus admittebantur, recordantibus  
gravitatis, ingenii, eloquentiæ, & variarum, &  
pulcherrimarum rerum notitiæ, quâ tenere ho-  
minum aures, & sui admirationem facere erat so-  
litus. Ne Romæ infelicitas ejus spectaculo esset,  
& quia curandi spem aliquam tamen fovebamus,  
& occulendæ rei studebamus, lecticæ impositus  
Patavium est adductus. Ibi omnibus frustra adhi-  
bitis remediis, quintum post mensem novâ erum-  
pente vi morbi extinctus est. Ad viii. Kalendas  
Januarii, Natali die Christi, anno M. D. LXXXIV.  
ætatis suæ sexagesimo, sacris religiosè, ac piè, vt  
videbatur, cùm interfuisset, peractis iis capturus  
cibum confedit, & repentè collapsis omnibus  
membris supinus cecidit. Strato illatus eum diem,  
& noctem insequentem juxtâ mentis, ac sensuum  
expers, atrocibus motibus, & colluctationibus vo-

lutatus, postridie ejus diei, eâdem fermè horâ, quâ corripuerat eum morbus, fœdè, miserabiliterque oculis, atque ore distorto, ad vitæ finem pervenit, genere mortis, quale ipse minimè optaverat. Mentione enim aliquando Julii Cæsaris ortâ lentum exitum damnantis, subitumque, & inopinatum præferentis obitum, ipse longè præstare aiebat sensibus, ac mente integrâ decedere; magni scilicet æstimans, animum prius morti componere, & Deum sibi per Christianæ disciplinæ sacra, piaculâque propitiare: Augustini dictum sæpè usurpans, Neminem, quamvis nullius criminis, delictique conscium sibi, committere debere, ut sine dolore offensi, aut certè non perinde, ac de humano genere mereretur, culti divini numinis è vita discederet. Elatus est nullo funeris honore, & in Capucinorum æde (nam utrumque antè testamento ipse ita mandaverat) vulgari sepulcro est conditus.

FINIS LIBRI IV. ET VLTIMI.





## LECTORI.

**O**RATIONIS habitæ à Commendone in comitiis de Rege Poloniæ eligendo, cujus auctor noster meminuit pag. 369. exemplar integrum nancisci non potuimus : majorem tamen ac potiore ejus partem ecce tibi producimus ex Andræ Maximiliani Fredro historia gestorum populi Poloni, sub Henrico Valesio pag. 43. 44. & seq. editionis Dantiscanæ 1659. Sic autem habet.

**I**NTROMISSUS *in plenum utriusque ordinis consessum Legatus Pontificis; Joannes Franciscus Commendoni Cardinalis. Hic salutatis ordinibus litteras secretas à Pontifice reddidit : tum ipse eum in modum Latino sermone locutus ; cujus formalia suggero.*

**Q**UÆ Pontifex Maximus in vestra Regis eligendi deliberatione gravissima atque maxima à Deo precatur, ut vestræ mentes atque sententiæ divino instinctæ Spiritu, salutem vobis, & huic Regno incolumitatem & dignitatem præstent, eandem mandatorum meorum & legationis summam esse voluit. Nam quemadmodum sua Sanctitas indictis Romæ ad omnia templa publicis supplicationibus, & suis, & populi precibus Deum placare non destitit, ut Regem vobis concedat, qualem & vestræ, & universæ reipublicæ Christianæ tempora postulant ; ita vos hortatur, ut in re tanta, quantâ major vobis nulla esse potest,

non tam quid in præsentia ipsi possitis, quàm quantum momenti in eo sit, quocumque iudicia vestra inclinarint, animo reputetis, atque hac potestate sapienter utamini. Est enim res huiusmodi, ut in vnius decreti vi summum aut salutis aut exitii discrimen vertatur. Quæ intelligens Pontifex, sicut ex litteris (quæ modò recitatae sunt) audivistis, haud minus quàm Christianæ reipublicæ parentem decet, sollicitus de vestra salute, comitiorum, consiliorumque vestrorum exitum spectat. Verùm ego vellem, ut ex eo templo, unde pias ad Deum preces pro vobis mittit, quâ pace, quâ tranquillitate interregnum hoc, unâ vos patriæ charitate, & legum reverentiâ conjungente, peregeritis, intueri posset: bonam profectò spem ex vestra virtute perciperet. Est enim singularis exempli res in libero regno Rege diu caruisse, & silentibus Regis morte propè omnibus legibus, omnes tamen ex lege vixisse, & suam cuique voluntatem, suum cuique in patriam studium pro lege fuisse, ut in tot nobilium, & maximè militarium hominum millibus nullus tumultus aut vis, nullæ seditionum turbæ extiterint, nullus omnino armorum sonitus auditus sit. Quod cum vobis ipsis salutare, & præclaro posteris vestris exemplo fuerit, tum certè apud omnes nationes moderati animi admirationem habebit. Quam ego gloriam & vobis ex animo gratulor, & mihi ipsi meo quodam jure gaudeo, cui in his quæ de vestris laudibus, & republica prædicare con-



conſuevi, tam illuſtre teſtimonium dediftis. Quòd ſi quâ pietate, orbatî Rege, pacem patriâmq; ſeruaſtis, eandem hoc in loco, in dicendis ſententiis ferendiſque ſuffragiis retinueritis, ſi vnâ animis Rempublicam complectemini, ſi nihil niſi ex veteri more & majorum inſtitutis, quibus hætenus Reſpublica ſtetit ac floruit, agi patieminî, equidem non modò ſpem, ſed lætitiâ delecti concordiffimè optimi Regis, jam animo percipio. Eam verò veſtræ Reipublicæ formam conſiderans, admirari ſoleo ſapientiam majorum veſtrorum, qui regni & libertatis modum ita temperarunt, vt inter ſupremam vnus poteſtatem, & diſſolutam multitudinis licentiâ, tam firmam tuendarum legum & propagandi imperii rationem excogitarint. Hanc illi innumerabilem Equitum multitudinem ampliffimo diſfuſam regno, paribus viventem legibus, (& æquo inter ſe jure ita viventem, vt vna aliqua videatur eſſe ingens ciuitas, quæ multas & longè diſtantes provincias ſit complexa) haud alio imperio regi poſſe, quàm Regio intellexerunt. Cùm verò hoc quemadmodum eſt præſtantiffimum, ita ſit periculofum libertati, iidem vtrumque viderunt, & Rege Rempublicam indigere, & ne Rex gravis comuni libertati foret, providendum duxerunt. Cùm magiſtratus in Republica inſtitui nullus poſſet, qui Regem poteſtate anteciret. Spiritualem ordinem aſſumpſerunt, eumque in ſpecula libertatis, & præſidio Reipublicæ collocarunt, nullumque ſi-

K k k

ne eo publicum consilium esse voluerunt. Cùm enim Episcopi instituti in populis sint, tanquam nuncii & interpretes Dei, ad eorum dignitatem per se maximam adiecere humanas opes honorésque in Republica amplissimos, quibus communiti & Regem in officio haberent, parentumque majestatem apud eum obtinerent, atque inde custodes ac vindices libertatis existerent: quod sæpè factum esse rerum vestrarum scriptores memoriæ prodiderunt, ut efferentem se Regum licentiam, saluberrima Episcoporum admonitio coërcuerit. Quamobrem cùm ita Respublica sit constituta, ut fundamenta libertatis, in religionis & Ecclesiæ ordinis dignitate collocaverit, nemo, ut arbitror, dubitat, quin necessarium sit ad statum Reipublicæ conservandum, ut Regem avitæ, & Catholicæ pietatis cultorem habeatis, ne si spreta fuerit, aut etiam ejecta Ecclesiastica auctoritas, tanquam evulsis iis radicibus, quibus primùm fixa & confirmata est, vestra libertas evertatur ac concidat. Cujus rei exempla utinam nulla haberetis, quæ nimis multa vobis ad cavendum horum temporum pravitas præbuit. Sed profectò videntius in quibus provinciis par tuendæ libertatis ratio instituta erat, in iis, sublati pereorum dominatum (qui à Catholica religione desciverant) Episcopis, non solum libertatem oppressam, sed & nobilitatem extinctam esse, & omnia sub unius arbitrium voluntatémque redacta. Id ne vobis accidat, vestræ imprimis prudentiæ, vestræ



in patriam pietatis est providere. Ut Regnum hoc nobilissimum, quod semper propugnaculum habitum est Christianæ Reipublicæ, iisdem rationibus conservetis, quibus initium stabilitum esse intelligitis: Id enim, id, fortissimi Equites, est firmamentum vestræ libertatis, quod qui comminutum & labefactatum cupiunt, eodem tempore concuti totum, & dissolvi Rempubicam volunt. Multa vos quidem & magna à Deo beneficia habetis, qui Regnum vestrum à Balcico mari ad Euxinum, ab Odra flumine per immensa regionum spatia Boristhenem ultra propagatum, tantis rerum opportunitatibus auxit; sed pulcherrimum illud est, quod eligendi Regis facultatem vobis tribuerit, ut Regem habeatis, non eum quem fors ex certa hæreditatis lege dederit, sed quem vos ipsi dignum (à quo regamini) judicaveritis, quo profectò in rebus humanis nihil videtur esse præstantius. At non hoc solum munus dignitatis & amplitudinis plenum vobis elargitus est Deus, sed munus ipsum novo, & nobiliore munere cumulavit, cum id non humanis viribus aut opibus, (quanquam ne his quidem, vos non abundè instructos esse voluit) sed bonorum omnium maximo & potentissimo, Catholicâ religione fundavit. In qua utinam omnes consentientes essetis, neque hæc novitas & varietas opinionum, quibus scinditur Christiana Respublica, in Poloniam unquam pervasisset, & in hanc gentem, quæ suis juncta & consentiens legibus, præsidio esse Chri-

K k k ij

stiano nomini potest, hoc malum invecum esset, Quo ægrotare vestram Rempubicam & ipsi sensistis, qui proximo Warfaviensi conventu ei mederi cupivistis, &c.

*Hic de una religione longum admodum differuit & facundè, quàm felix Respublica futura, si vera ei contingat religio; quàm infirma & ad casum properans, si adulterata & varia. Longum foret recitare totam Legati orationem, quam prolixius perorabat, solum subjiciam epilogum.*

Decernite ergo nunc concordibus vocibus Regem eum qui maximè Reipublicæ utilis sit futurus, qui vestro beneficio ad vestram salutem utatur, qui cùm à vobis creatus & tamquam genitus Rex fuerit, evadat ipse patriæ & vestrùm omnium pater, amator Reipublicæ, conservator legum, idem erga Deum pius, fortis adversus hostes, ingubernandis, gerendisque rebus peritiam, in jure dicundo justitiam diligentiamque adhibeat, in domestica consuetudine humanitatem, in omni publica actione dignitatem majestatemque retineat, nec ipse voluptatibus occupetur, nec juventutem languescere otio patiatur, sed exemplo & præmiis, bellicæ disciplinæ laudem excitet. Sit regia domus tamquam templum pudoris, modestiæ, religionis, ut liberi vestri quos in regis ministerium traditis, ex ea velut scholâ virtutum, digni parentum honoribus evadant. Haud ego sum nescius, Regem his præditum ornamentis, oratione effingi facilius quàm inveniri; verùm ne-



que nobis defuturus est quærentibus, & ut talem habeatis, multum in vobis ipsis positum est, non solum diligendo illum, sed etiam instituendo. Quem enim non optimum Regem efficiatis, si quot estis Senatores, tot monitores Regum esse volueritis? Si Regis salutem quam gratiam malueritis? Si publica commoda privatis utilitatibus antetuleritis? Si denique hoc propositum habebitis, diligentissimeque operam dabit, ut & vos ex legis præscripto Regis imperio obedientes sitis, & Rex ita obsequio utatur vestro, ut se liberis & volentibus imperare intelligat? hoc enim modo & res Polona augebitur, & libertas vestra conservabitur, nec dominatu offensa, nec corrupta licentia, quæ plerumque falso libertatis nomine exitiosam servitutem concipit, ac parit. Ad hunc statum rerum vestrarum tuendum communiendumque, vos Pontifex hortatur, atque ad eam rem mihi mandavit, ut & in præsentia vobis, & paulò post, simul vobis, simul Regi vestro summum paterni animi studium pollicear, ac deferam, ut omnia vos quæ non solum conservando, sed etiam augendo aut ornando huic regno sint, haud aliter ab se quam ab optimo Patre postulare atque expectare velit: Tum sicuti vobiscum egit de Rege (reque vestra) eligendo, vobisque auctor fuit, nihil à majorum consuetudine & rationibus discendendi; ita Regem quem elegeritis verbis suis admonere me voluit, ut memor à vobis accepti regni, parem vobis gratiam referre studeat, nihil-

K k k iij

que sibi aut ad fidem præclarius, aut ad charitatem optatius, aut ad stabilitatem firmitus, aut ad nominis sui commendationem amplius ducat, quàm ut hanc Rempublicam, hoc libertatis jus, sacrum rectumque retineat, ac defendat. Me verò ipsum commodis atque utilitatibus vestris, quantum operâ atque studio meo effici possit, diligenter sua Sanctitas inservire iussit, in quo quidem si quantum voluntatis atque animi, tantundem facultatis esset de vobis merendi, etsi pietati & amoris erga vos meo numquam satisfacturus essem, vobis certè ipsis satisfacerem. Hæc sunt de regno, de vobis, de novo Rege sanctissimi Domini nostri mandata, hæc vota Parentis Reipublicæ, hæc ut consequi possitis suis ille vos precibus Deo commendat, id maximè orans, ut actionem hanc in qua vestrum omnium salus vertitur, suo Sancto Spiritu regat, ut his comitiis, cum Regem consentientibus studiis renunciatis, sub quo florentissimi beatissimique vivatis.





448  
2.3.234

---

## SUMMA PRIVILEGII.

**C**AUTUM est auctoritate Regis, ne quis in regno ipsius, aliisve locis ejus ditioni subiectis, intra septem annos proximos librum qui inscribitur: Antonii Mariæ Gratiani à Burgo S. Sepulchri Episcopi Amerini, de vitâ Joannis Francisci Commendoni, libri quatuor: præter Sebastianum Mabre-Cramoisy, Regis Typographum, imprimat aut divendat. Qui secus fecerit, multâ indictâ, prout ampliùs in diplomate Regio continetur, coërcebitur. Datum Parisiis, die 24. Februarii 1669. Sic signatum, De mandato Regis, DE SEIGNE-ROLLE.

Z

2, 3, 2



005645988

















